

বিজ্ঞান-শান্তি-কুসুম

অর্থাৎ

2622

মনের শান্তি ও বিবেক উদ্দীপক কতিপয় প্রস্তাব।

“প্রবৃত্তিরেষা ভূতানাং
নিবৃত্তিস্তু মহাকলং।”

শ্রীযুক্ত কুমার রাধাপ্রসাদ রায়
প্রণীত ও প্রকাশিত।



কলিকাতা

রাজবাটী, ২৫ নং দরমাছাটা স্ট্রীট।

শকাব্দঃ ১৮০৫।

CALCUTTA

**Aroonodoy Ghose. Printer. Vidya Ratna Press.
285 Upper Chitpore Road.**

পূর্বভাষ ।

—০—

মৎ প্রণীত বিজ্ঞান-কল্প-লতিকা গ্রন্থ আদরের সহিত সৰ্ব্বত্র পরিগৃহীত হইয়াছে । তদৃষ্টে উৎসাহের সহিত বিজ্ঞান-শান্তি-কুসুম মুদ্রিত ও প্রচারিত করিলাম । পূর্বোক্ত গ্রন্থের ন্যায় বহু যত্ন ও পরিশ্রমে প্রণীত বিজ্ঞান-শান্তি-কুসুম কিয়দংশেও যদি পাঠার্থিগণের শান্তিপ্রদ হয়, তাহা হইলেও শ্রম সফল ও অর্থ ব্যয় সার্থক বোধ করিব । বিজ্ঞান-শান্তি-কুসুম প্রণয়ন সম্বন্ধে আমার নিতান্ত ভক্তিভাজন শিক্ষা গুরু শ্রীযুক্ত হরিমোহন চট্টোপাধ্যায় মহাশয় যথেষ্ট সাহায্য করিয়াছেন ।

কলিকাতা রাজবাটী,
২৫ নং দরমাহাটা স্ট্রীট ;
আশ্বিন, ১৮০৫ শকঃ ।

শ্রীরাধাপ্রসাদ রায়
গ্রন্থকারস্য ।

বিজ্ঞাপন ।


—০—

এতদ্বারা সৰ্ব সাধারণ জনগণকে বিজ্ঞাপিত করা যাই-
তেছে যে, আমি এই বিজ্ঞান-শাস্তি-কুসুম খানি রীতিমত হোম
আপিসে রেজিষ্টারি করিয়া লইলাম । ইহাতে আমার ও আমার
উত্তরাধিকারিগণের সম্পূর্ণ সত্ত্ব রহিল । আমার কিম্বা আমার
উত্তরাধিকারিগণের অনুমতি ব্যতিরেকে যদি কেহ এই পুস্তক
ষা ইহার কোনও অংশ মুদ্রিত করেন, তাহা হইলে, গ্রন্থসত্ত্বের
আইন অনুসারে তিনি দণ্ডাই ও ক্ষতিপূরণের দায়ী হইবেন ।
আমার নামাক্রিত মোহর ভিন্ন কেহ এই পুস্তক গ্রহণ করিবেন
না ।


কলিকাতা
রাজবাটী,
২৫ নং দরমাহাটা ষ্ট্রীট ।

}

শ্রীরাধাপ্রসাদ রায়
গ্রন্থকারস্ব ।



বিজ্ঞান-শান্তি-কুসুম।



সময় ও প্রবৃত্তি।*

ঈশ্বর স্বভাব স্বলভ দ্রব্যে সকলকে সমান অধিকার দিয়াছেন। সূর্যরশ্মি সমভাবে সর্বত্র নিপতিত হইতেছে এবং জল, বায়ু, অগ্নি প্রভৃতি কি ক্ষুদ্র কি ভদ্র, কি রাজা কি প্রজা, সমভাবে সকলেরই কার্য্য করিতেছে। মনুষ্য মাত্রেই হস্তপদ বিশিষ্ট এবং তাহাদের শারীরিক গঠন প্রায় সকলেরই এক প্রকার। মন ও চিন্তা শক্তি লইয়া সকলেই অবনীতে জন্ম গ্রহণ করিয়াছে। দিবা রাত্রি ষষ্টি দণ্ডে বিভক্ত। ঐ সময়ে আমরা ইচ্ছানুরূপ কার্য্য করিতে ক্ষমতা রাখি, কেহই তাহার প্রতিবন্ধক হইতে পারে না; তথাচ সংসারে মনুজকুল ভিন্ন ভিন্ন প্রবৃত্তির বশবর্তী হইয়া মনের শান্তি ভঙ্গ করিতেছে। প্রত্যক্ষ দেখিতে পাওয়া যাইতেছে যে, ঈশ্বরানুকম্পায় যে সকল লোকের কিছুই অভাব নাই, অনুসন্ধান করিয়া দেখিলে, তাহারাও প্রকৃত প্রস্তাবে স্থস্থির নহে; উহারা সাংসারিক সমস্ত সুখ সত্ত্বেও সুখানুভব করিতে পারে না। একপ শান্তি ভঙ্গের কারণানুসন্ধানে প্রবৃত্ত হইলে, বোধ হয়, বহু মূল্য সময় নিরর্থক নষ্ট করা হইবে না।

* Time and tendency.

মনুজকুলের আদিম অবস্থায় সকল বিষয়ই অনায়াস প্রাপ্য ছিল। এই জন্ম সে সময় মানবজাতির আহাৰ, নিদ্রা ও সন্তানোৎপাদন প্রভৃতি কার্য্য ব্যতিরেকে আর কিছুতেই কচি ছিল না। উদর পূরিয়া আহাৰ করিতে পাইলেই গিরিগুহায় কি বৃক্ষের শীতল ছায়ায় পরম সুখে নিদ্রা যাইত। স্ত্রী পুরুষেরা বৈবাহিক সম্বন্ধে বন্ধ না থাকাতে, পশুবৎ স্বেচ্ছাচারী হইয়া পাশব রূতি চরিতার্থ করিত। ক্রমে কালের পরিবর্তন হইলে, মনুষ্যেরা দলবদ্ধ হইয়া কুটিরাदिতে স্ত্রী পুত্র পরিবারের সহিত বাস করিতে শিখিল। সেই সময় আপন আপন স্বার্থ রক্ষার জন্ম সকলেই ব্যতিব্যস্ত হইয়া উঠিল; কিন্তু সে স্বার্থ রক্ষা এক বল ব্যতিরেকে আর কিছুতেই হইবার সম্ভাবনা ছিল না। যে হেতু, তৎকালে রাজা নাই, ব্যবস্থা নাই এবং ধৰ্ম্ম নাই যে, তাহার সাহায্যে আপন আপন স্বার্থ রক্ষা করিবে; সুতরাং সমস্ত লোকেরই এই বিশ্বাস ছিল যে, এক শারীরিক বলই সৰ্ব্ব সুখের মূল। যে বলবান্, সেই সকলের পূজ্য; এই জন্ম সৰ্ব সাধারণের বলের প্রতি লক্ষ্য হইয়া উঠিল। এক এক অঞ্চলে যে, সৰ্ব্বা-পেক্ষা বলবান্, সেই সৰ্ব সাধারণের আদরণীয় হইল। তাহার আজ্ঞাবহ হইয়া সকলকেই চলিতে হইল। ক্রমে ক্রমে তাহার নাম অধিপতি হইয়া উঠিল। সুন্দরী রমণীরা বলবানের পত্নী হইতে অভিলাষিণী হইলেন; যে হেতু, তাঁহারা জানিতেন, বলবান্ স্বামী ব্যতিরেকে তাঁহাদিগের মৰ্য্যাদা রক্ষা হইবেক না। পিতা মাতারাও বীর পুরুষকে কন্যা দান করিবার জন্ম সাধ্যানু-সারে যত্ন ও প্রয়াস পাইতেন। প্রাচীন কালে ভারতবর্ষে ধনুৰ্ভঙ্গ, লক্ষ্যভেদ ও স্বয়ম্বর এবং ইউরোপে Tournament প্রভৃতিতে

সুকপা কন্যাগণ আপন আপন পতি মনোনীত করিয়া লই-
 তেন । কেবল সুন্দরী কন্যাগণকে সর্বতোভাবে সম্বৃত্ত করি-
 বার জন্যই Knight-errantry সৃষ্টি হইয়াছিল । বিভীষণ
 আপন ভ্রাতুষ্পুত্র বীরবাহুকে রামচন্দ্রের নিকট পরিচিত করিবার
 সময়, এই কথা বলিয়া তাহার গুণ ব্যাখ্যা করিয়াছিলেন—“হস্তী,
 অশ্ব, বিমানে সমান শিক্ষা ধরে । বীরবাহু সম বীর নাহিক
 সংসারে ।” কুরুক্ষেত্র যুদ্ধ আরম্ভ হইবার কিঞ্চিৎ পূর্বে কুম্ভী
 দেবী তাঁহার পুত্র অর্জুনকে কহিয়াছিলেন—কৃত্রিয় কন্যারা
 যে জন্য পুত্র প্রসব করে, তাহার সময় উপস্থিত হইয়াছে ।
 এক্ষণে তুমি কুরুসৈন্য সাগর মস্থন করিয়া আপন ভুজবলের
 পরিচয় দাও । এক সময়ে অষ্টাবক্র মুনি জনক দুহিতা মীতাকে
 আশীর্বাদ করিয়াছিলেন—বৎসে ! অচিরে বীর পুত্র প্রসব কর ।
 আমি আশীর্বাদ করিতেছি, তোমার গর্ভজ পুত্র ভুজবলে এই
 জম্বুদ্বীপে একাধিপত্য স্থাপন করিবে । পুরাণে বর্ণিত আছে,
 চন্দ্রবংশীয় কোন রাজা প্রাণভয়ে যুদ্ধক্ষেত্র হইতে পলায়ন করিয়া
 আসিয়াছিলেন, রাজ্ঞী তাহা জ্ঞাত হইয়া স্বহস্তে গৃহের দ্বার বন্ধ
 করিয়া দিলেন । রাজা দ্বারে উপস্থিত হইবা মাত্র কহিলেন—
 আর আমি তোমার মুখাবলোকন করিব না ; কাপুরুষ
 পতির পত্নী হওয়া অপেক্ষা কৃত্রিয় কন্যার মরণই মঙ্গল । যখন
 সংসারে এইরূপ সময় ছিল, তখন শারীরিক বলে বলবান হইতে
 কাহার না প্রবৃত্তি জন্মিত ?

মধ্যে কিছু কাল পণ্ডিতের যথোচিত গৌরব হইয়া উঠিয়া-
 ছিল । রাজারা পণ্ডিতদিগকে অতিশয় আদর করিতেন এবং
 বৃত্তি দিয়া তাঁহাদিগের গ্রামাচ্ছাদনের সংস্থান করিয়া দিতেন ।

পরে আবশ্যক মতে সেই পণ্ডিতগণকেই সভাসদ ও প্রধান মন্ত্রীর পদ প্রদান করিতেন। সেই সময় সুন্দরী কন্যারাও বিদ্যাবতী হইয়া প্রতিজ্ঞা করিতেন, যে পুরুষ আমাকে বিচারে পরাস্ত করিতে পারিবেন, আমি তাঁহাকেই পতিত্বে বরণ করিব। তৎকালে পণ্ডিতদিগের এতাদৃশ গৌরব হইয়াছিল বলিয়া সাধারণের বিদ্যানুশীলনে প্রবৃত্তি জন্মিত ; অধিক কি, সময়ে সময়ে লোক শরীরকে অসহ্য কষ্ট দিয়াও বিদ্যা লাভে প্রবৃত্ত হইত।

এক সময়ে পৃথিবীর প্রায় সর্ব স্থলেই বুদ্ধির গৌরব হইয়া উঠিয়াছিল। বুদ্ধিমান ব্যক্তির আপনাদিগের অসাধারণ বুদ্ধিবলে শারীরিক বল ও বিদ্যাবলকে খর্ব করিয়া আপনাদিগের উন্নতি করিতেন। প্রথম নেপোলিয়ন্, পিটর্ দি গ্রেট্, অগষ্টস্ সিজর্ প্রভৃতি মহাত্মারাই তাহার প্রধান দৃষ্টান্ত স্থল। তৎকালে সামান্য কৃষকের মধ্যেও এক জন অসাধারণ বুদ্ধিমান ব্যক্তি জন্ম গ্রহণ করিলে, সেও সাধারণের পূজ্য—অন্য কথা কি, রাজদরবারে সে আদরের সহিত গৃহীত হইত ; স্মতরাং সে সময়ে এক বুদ্ধির প্রতিই সাধারণের লক্ষ্য হইয়াছিল।

কালে সংসারের অবস্থার পরিবর্তন হইল। কি বলের, কি বিদ্যার, কি বুদ্ধির আদর কমিয়া আসিল। কি বলবান্, কি বুদ্ধিমান্, কি বিদ্বান্, সাধারণে সকলকেই সমভাবে দৃষ্টি করিতে লাগিল। অনন্তর বিজ্ঞানের উন্নতি বশতঃ দ্বাদশ জন বলবান্ ব্যক্তিকে এক জন দুর্বল লোক একটি বন্ধুক হস্তে করিয়া অনায়াসে বিমুখ করিতে পারে। একটি উন্নত শৈলশৃঙ্গ, বাহা দশ সহস্র বলবান্ পুরুষ বহু কাল চেষ্টা করিয়াও ভূমিসাৎ করিতে পারে না, সেই শৈলশৃঙ্গেরই দুই

পার্শ্বে দুইটি করিয়া ভোপ ছুড়িলে, তাহা রেণু রেণু করিয়া উড়াইয়া দিতে পারা যায়। এই জন্ত শারীরিক বলের আর তত দূর প্রয়োজন বোধ হয় না। এতদ্ভিন্ন রাজা দুর্বলকে সবলের অত্যাচার হইতে রক্ষা করেন বলিয়া শারীরিক বলে আর কাহারও বিশেষ অভিলাষ রহিল না। এদিকে আবার বিদ্যারও তাদৃশ গৌরব নাই। মহামহোপাধ্যায় পণ্ডিতেরা জীবিকা নির্বাহের জন্ত মুর্থ ধনীর দ্বারে দ্বারে লালায়িত হইয়া বেড়াইতেছেন দেখিয়া আর কেহই বিশেষ রূপ বিদ্যা অর্জনের চেষ্টা দেখেন না। ঐকুপ বুদ্ধিবান্ লোকেরও আর বিশেষ আদর নাই। পূর্বে সাধারণ লোকেরা আপন গ্রামে এক জন বুদ্ধিমান্ লোক থাকিলে, তাঁহাকে সমূহ আদর ও সম্মান করিত এবং সময়ে সময়ে তাঁহার পরামর্শ লইয়া কার্য্য করিতে প্রবৃত্ত হইত। এক্ষণে প্রায় আর কেহই বুদ্ধিমান্ লোককে আদর করে না দেখিয়া আর কাহারও বুদ্ধির প্রতি লক্ষ্য নাই। এখন সর্ব্বতোভাবে ধনবানেরই আদর হইয়াছে। ধনবলে বলবান্ লোকদিগের অভিলাষ সর্ব্বতোভাবে চরিতার্থ হইতেছে এবং ধনবলের নিকট সমস্ত বল পরাস্ত হইয়াছে। এই জন্ত বর্ত্তমান সময়ে লাভারণের এক মাত্র ধনের প্রতি লক্ষ্য হইয়া উঠিয়াছে।

প্রাচীন কালাবধি দেখিতে পাওয়া যাইতেছে যে, যে সময়ে অধিকাংশ লোকের যে দিকে প্রযুক্তি জন্মিত, সে সময় অপরাংশ লোকের সেইরূপ কার্য্য করিতে প্রযুক্তি হইত। আমাদের দেশের লোক তৎকালে কিঞ্চিৎ অর্থ সঞ্চয় করিতে পারিলেই যাগ যজ্ঞে প্রবৃত্ত হইতেন। পুরাণে দেখিতে পাওয়া যায় যে, যে সময় ভারতবর্ষে অশ্বমেধ যজ্ঞ বিলক্ষণ প্রচলিত ছিল, সেই সময় এক জন নিবিড় অরণ্যবাসী কিরাত আপন অধিকারের মধ্যে অশ্বমেধ

যজ্ঞের অনুষ্ঠান করিয়াছিল । এক জন পরাক্রান্ত ক্ষত্রিয় ভূপাল
কিরাত কর্তৃক অশ্বমেধ যজ্ঞের অনুষ্ঠানের কথা শুনিয়া বল পূর্বক
যজ্ঞের ঘোটক ও অপরাপর যজ্ঞীয় সামগ্রী লুণ্ঠন করিয়া আনিয়া
স্বয়ং অশ্বমেধ যজ্ঞে ব্রতী হইয়াছিলেন । যবন রাজ্যের প্রথম অব-
স্থায় এতদেশীয় হিন্দুগণ সামাজিক আচার ব্যবহার প্রতিপালনে
ক্রটি করিতেন না । যাগ যজ্ঞ, পিতৃমাতৃর শ্রাদ্ধ ও নানা প্রকার
ক্রিয়া কাণ্ড করাই হিন্দুজাতির প্রধান পুরুষার্থ বোধ ছিল । গ্রামা-
চ্ছাদন হইয়া কিছু উদ্ধৃত ধন থাকিলেই, সামান্য গৃহস্থেরাও কোন
একটি ক্রিয়া কাণ্ড উপলক্ষে দশ জন ব্রাহ্মণ ভোজন করাইত ।
ন্যূন কল্পে সংকল্প করাইয়া পুরাণ পাঠ করাইতে প্রবৃত্ত হইত ।
পরিবার মধ্যে এক জন উপার্জনকর্ম হইলে, নিঃস্ব জাতিবর্গ
তাঁহা দ্বারা প্রতিপালিত হইত । ঐ অকর্ম জাতিগণকে অন্ন বস্ত্র
দিতে ক্লতী এক দিনের জন্যও কষ্ট বোধ করিতেন না ; বরং দশ
জনে তাঁহার বাটীতে আহারাদি করে বলিয়া আপনি অত্যন্ত
সন্তোষলাভ করিতেন । তৎকালে এতদেশীয় স্ত্রীলোকদিগেরও
প্রবৃত্তি স্বতন্ত্র ছিল । কিসে উত্তমরূপে রন্ধন করিতে শিক্ষা করিব,
কিসে প্রতিবেশীরা আমাকে বুদ্ধিমতী গৃহিণী বলিয়া গণ্য
করিবে, কিসে স্বামী আমার সেবা শুশ্রূষায় পরিতুষ্ট হইবেন ও
কিসে পরকাল রক্ষা করিব, এই সকল চিন্তাই তাঁহাদিগের নিম্নল
মানসক্ষেত্রে সর্বদা বিচরণ করিত । তাঁহাদিগের সুপ্রবৃত্তি ছিল
বলিয়া কুপ্রবৃত্তি মনোমধ্যে স্থান প্রাপ্ত হইত না । পূর্বকালে বালক
বালিকারাও ধর্মনিষ্ঠ ছিল । কিশোর বয়স্ক ব্রাহ্মণপুত্র যজ্ঞোপ-
বীত ধারণের পরই প্রত্যুষে উঠিয়া পুষ্প চয়ন করিত এবং
শিব পূজা ও সন্ধ্যা বন্দনাদির সমস্ত আয়োজন করিয়া রাখিয়া

পাঠাভ্যাসে মনোনিবেশ করিত । কি ক্ষুদ্র, কি ভদ্র, কি ধনী, কি ব্রাহ্মণ, কি শূদ্র সমস্ত লোকেরই কন্যারা প্রত্যাশে শয্যা ত্যাগ করিয়া গৃহ কার্যে ব্যাপ্ত হইতেন । তাঁহাদিগের ক্ষমতানুযায়ী সাংসারিক কার্যের সাহায্য করিতে ক্রটি করিতেন না । এতদ্ভিন্ন অবিবাহিতা কন্যাগণের কতকগুলি মনঃকল্পিত ব্রত নিয়ম ছিল । অদ্যাপিও কোন কোন গৃহস্থের গৃহে সেই সকল ব্রত নিয়ম প্রচলিত আছে । কালের পরিবর্তনে সেই সকল প্রবৃত্তি প্রায় কাহারও নাই । বালকগণ প্রত্যাশে উঠিয়াই চা ও বিস্কুট খাইয়া দিল্লীর দাস রাজগণের রাজত্বের বিবরণ পাঠে মনোযোগী হইয়াছে । বালিকাগণের মধ্যে কেহ বা ‘বোধোদয়’ পাঠ করিতেছে, কেহ বা কার্পেট বুনিতেছে, কেহ বা আতার পায়ের মাপ লইয়া জুতা বুনিবার উদ্যোগ করিতেছে ।

ভালই হউক বা মন্দই হউক, সময়ে সময়ে কতকগুলি লোক এক বিষয়ের প্রবর্তক হইয়া উঠে । দেখিতে দেখিতে আরও কতক গুলি লোক তাহাদিগের দৃষ্টান্তের অনুসরণ করে ; ক্রমে অধিকাংশ লোকের সেইরূপ প্রবৃত্তি ঘটিতে থাকে । ভাল, মন্দ, কিম্বা তাহার প্রয়োজন অপ্রয়োজন বিবেচনা না করিয়া সাধারণ লোক সেই সকল কার্যের অনুকরণে প্রবৃত্ত হয় । কথিত আছে যে, এই কলিকাতার জন কতক শিক্ষিত হিন্দু যুবকই হিন্দু আচারের বিপরীত সমাজ বহির্ভূত কার্য করিতে প্রথম প্রবৃত্ত হন । তাঁহাদিগকে সমাজ বহির্ভূত কার্য করিতে দেখিয়া প্রথমতঃ হিন্দু সমাজ তাঁহাদিগের উপর খড়্গখস্ত হইয়া উঠিয়াছিলেন ; কিন্তু তাঁহারা স্বজাতির চীৎকার শব্দে কিছু মাত্র ভীত না হইয়া আপনাদিগের স্বেচ্ছামত কার্য করিতে লাগিলেন ।

দেখিতে দেখিতে বহু সংখ্যক হিন্দু যুবক তাঁহাদিগের দলভুক্ত হইলেন। তৎকালে ধনবান্ লোকের পুত্রেরাই হিন্দু কালেজে উচ্চ শিক্ষায় দীক্ষিত হইতেন। উচ্চ শ্রেণীর ছাত্রগণের আচার ব্যবহার দর্শনে নিম্ন শ্রেণীস্থ ছাত্রগণ তাহার অনুকরণ করিতে লাগিল। ক্রমে ক্রমে যখন সকল ঘরের প্রায় একটি না একটি যুবক সেই দলভুক্ত হইল, তখন কুসংস্কারাপন্ন বৃদ্ধ সম্প্রদায় নয়ন মুদ্রিত করিলেন ও কর্ণে তুলা দিলেন। হিন্দু সমাজের বন্ধন শিথিল হইবার এই প্রথম সূত্রপাত হইল। ক্রমে উচ্চ ও মধ্য শ্রেণীর যুবকবৃন্দ একত্র হওয়াতে একটি প্রকাণ্ড দল হইল। তখন তাঁহারা চীৎকার শব্দে বলিতে লাগিলেন—‘আমরা মন্দ লোক নহি, অজ্ঞানান্ধ ব্যক্তিরাই আমাদিগকে মন্দ লোক বলে। আমরা যখন জ্ঞানালোকে আসিয়াছি, তখন হিন্দু সমাজের সংস্কার করিব এবং দোষাকর দেশাচার উঠাইয়া দিব।’ এই রূপে প্রত্যেক গৃহে পাশ্চাত্য সভ্যতার বীজ বপন হইল।

বর্তমান কালে দেখিতে পাওয়া যায় যে, ভিন্ন ভিন্ন মনুষ্যের ভিন্ন ভিন্ন কার্য্যে ঘোরতর প্রবৃত্তি জন্মিয়া থাকে। কেহ বা অর্থ সঞ্চয়ে ব্যতিব্যস্ত, কাহারও বা গবর্ণমেন্টের নিকট মান প্রাপ্ত হইবার জন্য বিশেষ ঝাঁক হইয়াছে, কেহ বা লোকের অনুরাগ লাভ করিবার জন্য নানা প্রকার কার্য্যের অনুষ্ঠান করিতেছেন। আবার অন্য দিকে কাহারও বা কদর্য্য আমোদ, আত্মলাভ ও বিলাস ভোগ করিবার প্রবৃত্তি অধিক। অনেকেই স্ত্রী সেবন, বেশ্যা সংসর্গ, উদ্যান বিহার প্রভৃতি নীচ আমোদে সময় যাপন করে।

প্রবৃত্তি দুই প্রকার, সৎ প্রবৃত্তি ও অসৎ প্রবৃত্তি। যাঁহারা ধর্ম্ম সঙ্গত, সমাজ সঙ্গত ও যুক্তি সঙ্গত পথে বিচরণ করেন এবং

পরোপকার, আত্মোন্নতি ও স্বদেশের মঙ্গল প্রভৃতি সৎকার্যের অনুষ্ঠানে যাঁহাদের মতি, তাঁহাদিগকে সৎ প্রকৃতির লোক কহে । আর যাঁহাদের প্রভারণা, চৌর্য্য, পরস্রী হরণ, সুরা পান, অবস্থার অতীত বিলাস প্রভৃতি অসৎ কার্য্যে সমধিক উৎসাহ, তাঁহাদিগকে অসৎ প্রকৃতির লোক কহে । পাঠকগণ, বিবেচনা করিয়া দেখুন, সময় সকলের পক্ষে সমান, সময়ের গতি কেহ রোধ করিতে সক্ষম নহে ; কিন্তু যাঁহাদিগের সৎ প্রকৃতি, তাঁহারা অলীক আমোদে বৃথা সময় নষ্ট না করিয়া সৎকার্য্যের অনুষ্ঠানে আপনার ধন, প্রাণ ও মান বৃদ্ধি করিয়া সুখী হইতেছেন । আবার যাঁহাদিগের অসৎ প্রকৃতি, তাঁহারা অসৎ কার্য্যে কাল ক্ষেপণ করিয়া আপনার ধন, প্রাণ ও মান নষ্ট করিতেছে । কোন কালেই তাঁহাদিগের প্রকৃত সুখ বা উন্নতি দেখা যায় না ।

স্বপ্রকৃতি হউক বা কুপ্রকৃতিই হউক, এই দুই প্রকার প্রকৃতির উৎপত্তি স্থল কোথায়, তাহা এক্ষণে দেখিতে হইবে । কোন কোন পণ্ডিত কহেন যে, প্রকৃতি স্বভাব সিদ্ধ ; কারণ দেখা যায় যে, অনেকানেক বালক বাল্যকাল হইতেই পাঠাভ্যাসে বিশেষ অনুরাগী হয় । তাঁহারা সৎকার্য্যের অনুষ্ঠানে বিশেষ আনন্দ লাভ করে এবং অসৎ কথা শুনিতে বা অসৎ কার্য্য করিতে কোন মতে ইচ্ছুক নহে । আবার কোন কোন বালক বাল্যকাল হইতেই লোককে উৎপীড়ন করিতে আরম্ভ করে, অন্যায় বিষয়ে অত্যন্ত আবদার করে, পাঠাভ্যাসের পরিবর্তে ক্রীড়া কৌতুকে বিশেষ অনুরাগী হয় । দেখা গিয়াছে, কোন দ্বাদশ বর্ষীয় বালকের জুয়া খেলায় ঘোর প্রকৃতি জন্মিয়াছিল । তৎকালে তাহার অর্থ ছিল না এবং পিতা মাতার তাড়নায় সমস্ত দিন তাহাকে বিদ্যালয়ে আবদ্ধ থাকিতে

হইত ; কিন্তু সে সময়ে পাঠে মনোযোগী না হইয়া সেই বালক দ্যুতক্রীড়ার বিষয়ই চিন্তা করিত। সময় পাইলেই সমবয়স্ক বালকদিগের সহিত জুয়া খেলিত। ক্রমে সে স্বাধীন হইয়া অর্থের মুখ দেখিল, তখন মনের সাধে জুয়া খেলিয়া অর্থ নাশ করিতে লাগিল। বাল্যকালে অর্থের অভাবেও জুয়া খেলায় যাহার এতদূর প্রবৃত্তি ছিল, কালে সে অর্থ পাইলে, কয় দিবস রাখিতে পারে ? উপরোক্ত কারণে বোধ হইতেছে যে, প্রবৃত্তি স্বভাব সিদ্ধ ; কিন্তু সংসর্গ, অবস্থা, বংশ ও বয়স ভেদে উহার ভারতম্য ঘটিয়া থাকে।

কোন ব্রাহ্মণ পণ্ডিতের এক জন পাচক ব্রাহ্মণ ছিল। বাল্যকাল হইতেই তাহার কুপ্রবৃত্তির আধিক্য থাকাতে, সামান্য দ্রব্য সামগ্রী অপহরণ করিত, অবসর কালে ভাস পাশা খেলিয়া সময় কাটাইত। তাহার প্রভু দেশ বিদেশে নিমন্ত্রণে গমন করিবার সময় তাহাকে সমভিব্যাহারে লইয়া যাইতেন। পাচকের বয়ঃক্রম তৎকালে বিংশতি বর্ষের অধিক হয় নাই। পণ্ডিত মহাশয় এক দিন কোন সভায় নিমন্ত্রিত হইয়াছিলেন। সেই দিন তাঁহার সঙ্গে উক্ত পাচকও গমন করিয়াছিল। সেই সভায় অনেকানেক পণ্ডিতের সমাগম হওয়াতে ঘোরতর বিচার আরম্ভ হয়। উল্লিখিত পণ্ডিত মহাশয় সর্ব বিধায়ে জয় লাভ করাতে সভাস্থ সকলেই তাঁহাকে ধন্য ধন্য করিতে লাগিলেন এবং কার্য্যাধ্যক্ষ সর্বাপেক্ষা তাঁহাকে মহা সম্মানের সহিত উচ্চ বিদায় দিলেন। এইরূপে চারি পাঁচ সভায় পণ্ডিত মহাশয় জয়যুক্ত হইয়া লোকের প্রশংসা ভাজন ও উচ্চ বিদায় প্রাপ্ত হওয়ায়, পাচকের মনে এইরূপ চিন্তার উদয়

হইল যে, যিনি পৃথিবীতে পণ্ডিত হইতে পারিয়াছেন, তাঁহারই মার্থক জন্ম। পণ্ডিতেরাই ধর্ম, অর্থ, কাম, মোক্ষ চতুর্গগ ফল প্রাপ্ত হইয়া থাকেন। আমি এই পণ্ডিত মহাশয়ের সহিত এত দিবস বাস করিতেছি, ইহার মধ্যে যদি প্রত্যহ একটি করিয়া কথা শিখিতাম, তাহা হইলে, বোধ করি, এত দিনে মুক্তিবোধ ব্যাকরণ খানি শেষ করিতে পারিতাম ; কিন্তু আমি এমন কুপ্রবৃত্তির দাস যে, তাহা না করিয়া সময় পাইলেই তাম পাশা খেলিয়া কাল হরণ করি। অদ্যাবধি প্রতিজ্ঞা করিলাম, আর কুপ্রবৃত্তির দাস হইয়া অনর্থক সময় নষ্ট করিব না, কিঞ্চিৎ কিঞ্চিৎ বিদ্যার চর্চা করিব। যদি এক জন প্রধান পণ্ডিত না হইতে পারি, তথাচ কিঞ্চিৎ শাস্ত্র জ্ঞান থাকিলেও দশ জনে মান্ত করিবে। কালে সেই পাচক ব্রাহ্মণ অধ্যবসায়ের গুণে এক জন পণ্ডিত হইয়া উঠিয়াছিল। এ কথা কে অস্বীকার করিবে যে, যদি উক্ত ব্রাহ্মণ কোন মদ্য প্রিয় ও বিলাসী বাবুর বাটীর পাচক হইত এবং সেই বাবুর সহিত উদ্যান ভোজে দুই দশ বার রন্ধন করিতে গিয়া বাবুদিগের বারান্দার সহিত ক্রীড়া কৌতুক স্বচক্ষে দর্শন করিত, তাহা হইলে, পণ্ডিত হইবার অভিলাষ কোন কালেই তাহার মনোমধ্যে উদয় হইত না ; বরং অধিকতর কুপ্রবৃত্তির দাস হইয়া সুরাপায়ী ও বেশ্যাসক্ত হইয়া উঠিত।

অবস্থা ভেদেও মনুষ্যের প্রবৃত্তির পরিবর্তন ঘটিয়া থাকে। দেখা গিয়াছে যে, কোন মনুষ্য ভাল অবস্থায় চৌর্য্য প্রভৃতি অপকর্মে অত্যন্ত ঘৃণা বোধ করিত; কিন্তু সেই মনুষ্যেরই অবস্থা মন্দ হইলে পর, তাহার প্রবৃত্তি ক্রমে অসং হইয়া উঠিতে লাগিল। তখন সে চুরি ও প্রভারণা প্রভৃতি

অসৎ কার্য্য করিতে কিছু মাত্র সঙ্কুচিত হইত না । আরও দেখা যায় যে, কোন ব্যক্তি অর্থাভাব সময়ে স্বেচ্ছাপ্রবৃত্তি বিশিষ্ট গৌক ছিল । সে তখন বিদ্যার আলোচনা ও পরহিত চিন্তা প্রভৃতি সৎ কার্য্যে সময় অতিবাহিত করিত ; কিন্তু ক্রমে হস্তে ধন হইলে, তাহার সে প্রবৃত্তি অন্তর্হিত হইয়া গিয়া সুরা সেবন, বারাদনা বিহার ও বিলাস প্রভৃতি অসৎ কার্য্যে মতি হইল । অবস্থাভেদে এইরূপে মনুষ্যের কখন বা স্বেচ্ছাপ্রবৃত্তি ও কখন বা কুপ্রবৃত্তি ঘটিয়া থাকে ।

Time and tendency—এই দুইটি ইংরাজী কথার হেতু-বাদ করা উচিত । সময়ের অর্থ নানা প্রকার বুঝায় । প্রাচীন সময়, বর্ত্তমান সময় ; মনুষ্যের কুসময়, সুসময় ; বিদ্যোপার্জনের সময়, অর্থোপার্জনের সময় ; ক্রীড়া কৌতুকের সময়, কার্য্যে মনোনিবেশ করিবার সময় ইত্যাদি । Tendency র প্রকৃত অর্থ ঝোঁক । পণ্ডিত ঈশ্বরচন্দ্র বিদ্যাসাগর মহাশয় ঝোঁক শব্দের অর্থ “পাতপ্রবণতা” করিয়াছেন । সময়ানুযায়িক ঝোঁক বিবৃত করিবার পূর্বে মনুষ্যের বয়স ভেদে যে প্রবৃত্তির অর্থাৎ ঝোঁকের পরিবর্ত্তন হয়, তাহা নিম্নে বর্ণন করা যাইতেছে । শৈশবাবস্থায় জননীর স্তন্য পান করিতে শিশু সন্তানেরা অত্যন্ত ভালবাসে । সে সময়ে তাহাদিগের প্রবৃত্তি বা ঝোঁক অন্য দিকে প্রায় থাকে না । কালে যখন সেই স্তন্য দুগ্ধ পুষের মত গাঢ় হইয়া উঠে, তখন তাহারা আপনা আপনি তাহা পরিভ্যাগ করিয়া থাকে । বোধ কর, যে শিশুর স্তন্য পানে চারি বৎসর পর্য্যন্ত অত্যন্ত ঝোঁক ছিল, সেই শিশুর চীনের বাদাম খাওয়ার উপর হুতন ঝোঁক পড়িল । তখন সে স্বেচ্ছাচ্ছুদ্ধের বাটীতে চুমুক দিতে

চীৎকার করে । জোর করিয়া পান করাইয়া দিলে বমন করিয়া ফেলে; কিন্তু চীনের বাদাম পাইলে, তাহার আর আত্মাঙ্গদের পরিসীমা থাকে না । একপয়সার চীনের বাদাম খাইয়া তৃপ্তি বোধ হয় না, আরও খাইতে ইচ্ছা করে । কালে সেই বালকটির উদরাময় রোগ জন্মিল । এক বৎসর কাল সেই রোগে মহা কষ্ট পাইয়া আরোগ্য হইল । চিকিৎসাকালে বালকের সম্মুখেই চিকিৎসক মহাশয় বলিলেন যে, কেবল চীনের বাদাম খাইয়া খাইয়াই এই রোগের সৃষ্টি হইয়াছে । উহা অত্যন্ত কুসামগ্রী, চীনের বাদাম কি ভদ্রলোকের সন্তানগণের উদরে পরিপাক হয় ? বালকটি তখন রোগের যন্ত্রণায় অত্যন্ত জ্বালাতন হইয়াছিল । প্রতি দিবস এক প্রকার পথ্য দেওয়ায়, নানা সামগ্রীর প্রতি তাহার লালসা জন্মিল । যে দুগ্ধ পান করাইয়া দিলে, সে পূর্বে বমন করিয়া ফেলিত, সেই দুগ্ধ পান করিবার জন্য এক্ষণে লালায়িত হইয়া উঠিল । আর চীনের বাদামের উপর পূর্বের ন্যায় তাহার ঝোঁক রহিল না ; বরং মনে মনে অনুতাপ করিতে আরম্ভ করিল, যদি পূর্বে দুই তিন পয়সার বাদাম চুরি করিয়া না খাইতাম, তাহা হইলে, এখন একপা রোগের কষ্ট ভোগ করিতে হইত না । চিকিৎসক মহাশয় যখন বলিয়াছেন যে, চীনের বাদাম ছোট লোকের খাদ্য, ভদ্রলোকের সন্তানগণের উদরে পরিপাক হয় না, তখন আমি আর উহা খাইব না । রোগমুক্ত হইয়া উক্ত বালকের চীনের বাদামের পরিবর্তে সন্দেশের উপর ঝোঁক পড়িল । জননী নিয়ম মত সন্দেশ দিতেন, বালক তাহাতে তৃপ্তি বোধ করিত না । কখন বা ভাণ্ডার হইতে চুরি করিয়া খাইত, কখন বা বিদ্যালয়ের জলপান ওয়ালার নিকট ধার করিয়া উদর পূর্ণ করিত । এই সন্দেশের উপর হুতন ঝোঁকের কারণে

বালকের পক্ষে দুইটি অনিষ্ট উৎপাদিত হইল ; এক দিকে জলপান ওয়ালার নিকট স্তূপাকার ঋণ, অপর দিকে অল্পের পীড়ার সূত্রপাত । ঝাঁকের জন্ত সন্দেশ পাইলেই আহাৰ করে ; কিন্তু ক্রিয়ৎকাল পরেই গলা জ্বলিতে আরম্ভ হয় । সন্দেশ খাওয়ায় যে টুকু সুখানুভব হইয়াছিল, গলা জ্বলায় ও বুক জ্বলায় তাহা অপেক্ষা দশ গুণ কষ্ট বোধ হইতে লাগিল । সেই সঙ্গে যখন জলপান ওয়াল টাকার ভাগাদা করে, তখন আর কষ্টের পরিসীমা থাকে না । অল্পের পীড়া ক্রমে বাড়িয়া উঠায় বালকের মনে একটি ভয় হইল যে, সন্দেশ খাইলে বড় কষ্ট পাইতে হয়, আর সন্দেশ খাইব না । বালকের সহাধ্যায়িগণ কহিতে লাগিল, সন্দেশে Acid আছে । এই জন্ত যে অধিক সন্দেশ খায়, তাহার অল্পের ব্যারাম অবশ্যই হইবে । সহাধ্যায়িগণের উপদেশ, জলপান ওয়ালার উৎপীড়ন, অল্পের পীড়ার কষ্ট ভোগ এই তিনটি একত্র হওয়ায় বালকের চৈতন্য হইল । সেই সময় পূৰ্ব্বকার গর্হিতাচরণের একটি কথা মনে পড়িয়া গেল । বালক ভাবিল, এক বার চীনের বাদাম খাইয়া কষ্ট ভোগ করিয়াছি, আবার সন্দেশ খাইয়া ঋণগ্রস্ত হইলাম, একটি নূতন রোগকে শরীরের মধ্যে স্থান দিলাম । কোন বিষয়েই আর অধিক বাড়াবাড়ি করিব না, সম্ভব মত সকল কার্যই করা উচিত । বালক বহু কষ্টে ঋণ পরিশোধ করিল এবং সন্দেশ খাওয়া পরিত্যাগ করায় সামান্য ঔষধ সেবনেই অল্পের পীড়া ভাল হইয়া গেল ।

সহাধ্যায়িগণের বিদ্যাশিক্ষায় বিশেষ যত্ন দেখিয়া তাহারও সেই দিকে প্রবৃত্তি জন্মিল । কিছু কাল বিশিষ্ট বিধানে বিদ্যানুরাগী হইয়া লেখা পড়া সম্বন্ধে অল্প সময়ের মধ্যেই খ্যাতি ও

প্রতিপত্তি লাভ করিল। ক্রমে সে যৌবন সীমায় পদার্পণ করিল। যৌবন সুলভ বিলাস আসিয়া তাহার মনোমন্দিরে প্রচ্ছন্ন ভাবে অবস্থান করিল। উত্তর সাধক নাই বলিয়া কিছু কাল বিলাসকে গুপ্তভাবেই কালহরণ করিতে হইল। যুবকের মনে মধ্যে মধ্যে নানা প্রবৃত্তি আসিয়া উপস্থিত হইত। কখনও অর্থাভাবে, কখন ভয় প্রযুক্ত, কখন বা জ্ঞানবলে সেই সকল প্রবৃত্তির হস্ত হইতে নিস্তার লাভ করিত। সেই সময় সে সন্ধিস্থলে দাঁড়াইয়াছিল। ভাল মন্দ কোন্ দিকে ঝুঁকিবে, তাহার কিছুই স্থির করিতে পারে নাই। সেই সময় এক জন উত্তর সাধক তাহাকে যে দিকে টানিবে, সে সেই দিকে গড়াইয়া পড়িবে, তাহাতে আর সংশয় ছিল না। যুবক এই অবস্থায় অবস্থিত, এমন সময় কতকগুলি সম-বয়স্ক যুবক তাহার বন্ধু হইয়া উঠিল। অবসর কালে হাস্য পরিহাস ছলে তাহাদিগের সহিত নানা কথার আন্দোলন চলিত। বন্ধু-গণের কথা বার্তা শুনিয়া যুবক বিলক্ষণ সন্তুষ্ট হইত এবং বুঝিতে পারিত যে, সেও যেকোন মনে মনে বিলাস প্রিয় হইয়াছে, তাহার বন্ধুরাও তন্মতাপন্ন। তবে এই মাত্র বুঝিতে পারিল যে, তাহা অপেক্ষা তাহার বন্ধুগণ সাহস পূর্বক অনেক কার্য করিতে পারে। এক দিন যুবক শুনিল যে, তাহার বন্ধুরা কোন বার বিলাসিনীর বাটীতে গমন করিবে। সেই খানে প্রায় তাহার বেলা ছুইটা অবধি সন্ধ্যা পর্যন্ত আমোদ আহ্লাদ করিয়া থাকে। যুবকও অবশ্য বন্ধুগণ কর্তৃক নিমন্ত্রিত হইল; কিন্তু সাহস করিয়া তথায় যাইতে পারিল না। বন্ধুগণ গণিকালয়ে গমন করিল, আর সেই যুবক বাটীতে আসিল। বাটীতে আসিয়া তাহার মন স্থির হইল না। সেই বন্ধুগণের নিকট যাইবার অত্যন্ত ইচ্ছা হইতে লাগিল।

তখন কেন তাহাদিগের সমভিব্যাহারে গমন করিলাম না, এই ভাবিয়া মনে মনে আক্ষেপ করিতে লাগিল। সেই সময় যদি কোন উপযুক্ত শিক্ষক উক্ত যুবকের মনের ভাব জানিতেন, তাহা হইলে, অতি অল্পায়াসেই তাহার মনোমালিন্য দূর করিয়া দিতেন এবং একপ বুঝাইতে পারিতেন যে, সে তাহার বন্ধুগণের সহিত গণিকালয়ে না গিয়া বাটী আসায় ভাল কার্য্যই করিয়াছে। তাহারা ন্যায়, যুক্তি ও সমাজ বিরুদ্ধ কার্য্যে প্রবৃত্ত হইয়াছে ; কিন্তু তুমি বাটী আসিয়া ঐ কয়েকটি মর্যাদা রক্ষা করিয়াছ। তথ্যচ তুমি আক্ষেপ করিতেছ কেন, তাহাও আমি বুঝাইয়া দিতে পারি। এই সংসারে সমস্ত বিষয়ই অধঃপতনের জন্য ব্যগ্র হইয়া আছে, কেবল একটু সুরবিধা পাইগেই সেই দিকে ধাবিত হয়। নিম্নগামী সমস্ত পদার্থকেই স্বভাব বাধা দিয়া রাখিয়াছেন। বোধ কর, সাগরের চতুর্দিকে যদ্যপি উপকূল না থাকিত, তাহা হইলে, সিন্ধু সলিল যে দিকে সুরবিধা পাইত, সেই দিকেই প্রবল বেগে ধাবিত হইয়া জগতের যে কতদূর অনিষ্ট উৎপাদন করিত, তাহা বর্ণনাভীত। সূর্য্য পৃথিবীকে আকর্ষণ করিয়া রাখিয়াছে বলিয়াই ভূতধাত্রী ধরিত্রী স্থনিয়মে সূর্য্যমণ্ডল পরিভ্রমণ করিয়া বেড়াইতেছে। বৃক্ষের ফল সর্ব্বদা পতনোন্মুখ হইয়া রহিয়াছে। তাহারা যখন আপন ভারে ভারাক্রান্ত হয়, তখন তাহাদিগকে সুপক্ক অবস্থায় আনিবার জন্য লোকে বস্ত্রের দ্বারা বন্ধন করিয়া রাখে। তোমারও সেই অবস্থা ঘটিয়াছে, তুমি যৌবনমদে মত্ত হইয়া উঠিয়াছ। এই সময় যদি জ্ঞানাক্লুশ হস্তে করিয়া তোমার এক জন পৃষ্ঠ পুরুষ না থাকে, তাহা হইলে, তুমি অবশ্যই নিম্নগামী হইবে। অদ্য তোমাকে নিম্নগামী করিবার জন্য বিল-

ক্ষণ চেষ্টা পাইয়াছিল ; কিন্তু তুমি ভয় প্রযুক্ত তাহাদিগের সহিত গমন করিতে পার নাই । এক্ষণে বাটী আসিয়া মনোমধ্যে এইরূপ আলোচনা করিতেছ যে, আমার বান্ধবগণ এক্ষণে গণিকালয়ে আমোদ আশ্বাদ করিতেছেন, তাহাদিগের সেই আমোদে কোন রূপ অনিষ্টের কারণ কিছুই দেখিতেছি না । তবে তাহাদিগের সহিত আমোদ প্রমোদে লিপ্ত না হইয়া কেন বাটী আসিলাম ? ইহার পর, আমি একটা অনুরোধ করিলে, তাহারা আমার কথা রক্ষা করিবেন না, কারণ তাহাদিগের অনুরোধ আমি রক্ষা করি নাই । তোমার মনে এইরূপ চিন্তার ভরস্ব প্রবল হইয়া উঠিয়াছে । যদি তাহাদের সংসর্গ একেবারে পবিত্যাগ না কর, তাহা হইলে, তুমিও তাহাদের স্থায় অধোগামী হইবে ।

যুবক বাটী আসিয়া যখন ভাবিতে ছিল যে, বন্ধুগণের সহিত না যাওয়া আমার অন্তায় কার্য্য হইয়াছে, সেটা স্থায্য কি অন্তায়, তাহা বুঝাইয়া দিবার লোক তৎকালে কেহই ছিল না ; সুতরাং সে আপন মনেই ধার্য্য করিল যে, তাহাদিগের সহিত না যাওয়া অতি গর্হিত কার্য্য হইয়াছে । তাহারা যেখানে প্রবেশ করিয়াছেন, তাহা আমি দেখিয়া আসিয়াছি । যদি এক্ষণে হঠাৎ সেখানে উপস্থিত হই, তাহা হইলে, তাহারা পূর্বা-পেক্ষা অধিক আমোদিত হইবেন । এইরূপ ভাবিয়া যুবক বাটীর বাহির হইল ; কিন্তু অপরিচিত স্থানে কি প্রকারে প্রবেশ করিব, ইহা ভাবিয়া বাটী প্রত্যাগমন করিবার উপক্রম করিতেছে ; এমন সময় পথিমধ্যে উহার আর একটি বন্ধুর সহিত সাক্ষাৎ হইল । তাহাকে জিজ্ঞাসা করিল, তুমি কোথায় যাইতেছ ?

সেই ব্যক্তি উত্তর করিল, অমুক স্থানে। যুবক হাশ্ম বদনে কহিল, আমিও সেই খানে যাইতে অত্যন্ত ইচ্ছুক ; কিন্তু সঙ্গীর অভাবে যাইতে সাহস হইতেছিল না বলিয়া অগত্যা বাটী ফিরিয়া যাইতে ছিলাম। অপর যুবক হাশ্ম করিয়া বলিল, তুমি এত হীনসাহস কেন? দশ জায়গায় না যাইলে, কি লোক চালাক হয়? আমরা ত প্রত্যহ সেখানে যাই না যে, ইহা অপকর্ম্য বলিয়া ধরিবে। মধ্যে মধ্যে এমন আমোদ সকলেই করিয়া থাকে। এই সকল কথা শুনিয়া যুবকের পূর্বাপেক্ষা সাহস হওয়াতে অক্লেশে মাথায় কাপড় দিয়া গণিকালয়ে প্রবেশ করিল। বন্ধুবর্গ যুবককে দেখিবা মাত্রই জয়ধ্বনি করিয়া উঠিল। পূর্বেই বলা হইয়াছে, যৌবন স্থলভ সমস্ত বিলাসই যুবকের মনোমন্দিরে আসিয়া আশ্রয় লইয়াছিল; কেবল উত্তর সাধক ছিল না বলিয়াই এত দিন যুবক কিছুই করিতে পারে নাই; কিন্তু আজি সে একটা হুতন পথে পদার্পণ করিল। হুতন প্রিয় সংসারে কোন হুতন বিষয় দৃষ্টি গোচর হইলে, সেটা প্রথম প্রথম যে কত দূর মনোজ্ঞ হইয়া উঠে, তাহা হুতন প্রিয় যুবকেরাই অনায়াসে বুঝিতে পারিবেন। সেই যুবক এই নিকৃষ্ট হুতন আমোদ চরিতার্থ করিতে গিয়া কাল ক্রমে আপনার সমস্ত সম্পত্তি নষ্ট করিয়া ফেলিল।

অসময়ানুযায়িক ষাঁক উপস্থিত হইলে, অবস্থার প্রতীক্ষা করে, ইহা স্পষ্ট দেখা যায়। এক জন দুরবস্থাপন্ন কৃষক কোন ব্রাহ্মণ কুলোদ্ভব ধনাঢ্য লোকের গৃহে সর্বদা গমনাগমন করিত। সেই ব্রাহ্মণের বাটীতে দোল ছুর্গোৎসব প্রভৃতি ক্রিয়া কাণ্ড হইত। উক্ত কৃষক বিনা বেতনে পূজা পার্কণোপলক্ষে ব্রাহ্মণের যথোচিত

সাহায্য করিত । ঐ সকল ক্রিয়াকাণ্ডে কাজ কর্ম করিতে করিতে কৃষকের মনে এইরূপ অভিলাষ জন্মিয়াছিল যে, যদি কখন হস্তে কিছু টাকা পাই, তাহা হইলে, অন্ততঃ এক বারও দুর্গোৎসব করিয়া কতকগুলি বুটুখ বান্ধবের সহিত আমোদ আনন্দ করিব । এই চিন্তা বহু কাল তাহার মনোমধ্যে প্রচ্ছন্ন ভাবে ছিল ; কেবল উপায় নাই বলিয়া সে চুপ করিয়া থাকিত । এক বৎসর পলি পড়া গঙ্গার চড়ায় কতকগুলি কড়াই ছড়াইয়া দিল । কৃষকের সৌভাগ্য বশতঃ সেই বৎসর সেই চড়ায় বিস্তর কড়াই উৎপন্ন হইল । মহাজনকে বিক্রয় করিয়া কৃষক নগদ দুই শত টাকা হস্তে পাইল । ফাল্গুন মাসে কৃষকের হস্তে টাকা হইল । তাহার মনে মনে যে সঙ্কল্প ছিল, তাহা সিদ্ধ করিবার জন্য একেবারে ব্যগ্র হইয়া উঠিল । সে আপন পুরোহিতকে ডাকিয়া বিনীত ভাবে কহিল, মহাশয়, আমার দোল ও দুর্গোৎসব করিতে বহু কালাবধি অভিলাষ আছে, কেবল টাকার অপ্রতুল বশতঃ করিতে পারি নাই । এই বৎসর কৃষিকার্য্যে কিঞ্চিৎ লাভ হইয়াছে । অতএব দোল ও দুর্গোৎসব এই দুইটি যাহাতে সমাধা হয়, তাহার একটি তালিকা করিয়া দিউন । পুরোহিত শুনিয়া মহা আনন্দিত হইলেন । দোলপর্বে যাহা যাহা ব্যয় হইবে, তাহার একটি তালিকা দিলেন । ক্রিয়া কাণ্ডের কিছুই নিয়ম থাকে না, যে টাকা ব্যয় করিবার সঙ্কল্প করা যায়, তাহার দ্বিগুণ ব্যয় হইয়া পড়ে ; সুতরাং এক দোলপন্ডেই কৃষকের দুই শত টাকা ব্যয় হইয়া গেল । যদি অবশিষ্ট টাকা থাকিত, তাহা হইলে, আশ্বিন মাসে দুর্গোৎসবও করিত ; কিন্তু নাই বলিয়া মনের আক্ষেপ মনে রাখিল এবং সেই ধনাঢ্য ব্রাহ্মণের বাড়িতে পূর্ব পূর্ব বৎসরের ন্যায় শাণীক পরিশ্রম

করিয়া ছুর্গোৎসবের আমোদ আছাদ করিতে লাগিল ; অসময়ানু-
যায়িক ঝোক ইহাকেই বলে । এইরূপে পৃথিবীস্থ সমস্ত লো-
কেরই এক এক বিষয়ে প্রবৃত্তি জন্মিয়া থাকে ; কিন্তু কাহারও
অর্থাভাব, কাহারও বা সময়াভাব প্রযুক্ত তাহা সম্পন্ন হয় না,
আবার কেহ কেহ বা ধর্মভয়ে ক্ষান্ত হইয়া থাকে ।

কোন কোন প্রাচীন ঘরে অদ্যাপি পূর্বকার প্রাচীন প্রথা
প্রচলিত আছে । সে সকল ঘরের শিক্ষিত যুবকেরা বংশের
চিরপ্রথা অমান্য করিতে হঠাৎ সাহস করেন না, কেন করেন
না ? অদ্যাপি সে সকল ঘরের যুবকেরা কর্তৃপক্ষের শাসনে
সন্ধ্যার পর বাটীর বাহিরে থাকিতে পান না, কতকগুলি অশিক্ষিত
নীচাশয় লোক লইয়া বাটীর ভিতর গোপনযোগ করিতে পান না,
ইচ্ছামত ভোজন পান করিতে অক্ষম, আবশ্যক মত অর্থ ব্যয়ে
অপারক ; এই কয়েকটি প্রতিবন্ধকের জন্য বংশ দর্যাদা রক্ষা
করিয়া নিশ্চিন্দে কালযাপন করিয়া থাকেন । এমন সময়ে এক
জন কর্তার মৃত্যু হইল । এক জন যুবক স্বাধীন হইল । সে যখন
বুঝিতে পারিল যে, আমি সর্বতোভাবে স্বাধীন ; পৈতৃক ধনের
একাংশে আমি বাহা ইচ্ছা তাহাই করিতে পারি । তখন যে সকল
প্রবৃত্তি মনোমধ্যে ওচ্ছন্ন ভাবে ছিল, তাহার মন সেই দিকে
ঝুঁকিল, আর কে বাধা দেয় ? যুবক স্বাধীন ভাব অবলম্বন করি-
য়াছে, প্রবৃত্তির উপযোগী সময় পাইয়াছে । ক্রমে তাহার কাছে দশ
জন নীচাশয় লোক যাতায়াত করিতে লাগিল । তাহার রকমারি
কথা কহিয়া যুবকের হত চেতন প্রবৃত্তির উত্তেজনা করিয়া দিল ।
সে আর বাটীর কাহাকেও ভয় করে না, আপন বৈঠকখানায়
বয়স্শগণকে লইয়া ইচ্ছামত ভোজন পানে বহু কালের আশা চরি-

তার্থ করিতে লাগিল । বাটীর অন্যান্য বর্ষীয়ানেরা চরম বিবেচনা করিয়া সে যুবকের দৌরাণ্য দেখিয়াও দেখেন না, শুনিয়াও শুনে ন না । ক্রমে বাটীর অভ্যন্তরে একটি বিলাসগৃহ প্রতিষ্ঠিত হইল । সেই খানে নানা রকমের আমোদ আফ্লাদ চলিতে লাগিল দেখিয়া অন্যান্য যুবকেরা আপন আপন কর্তৃপক্ষের ভয়ে দিন কতক উঁকি খুঁকি মারিয়া মরিয়া বাইত ; তাহার পর, আর থাকিতে পারিল না, প্রচ্ছন্ন ভাবে যোগ দিতে আরম্ভ করিল । ক্রমে সকলেই মদ্যপ হইয়া উঠিল, রজনীতে বাটীর বাহিরে থাকিতে শিখিল, অবশেষে ঋণগ্রস্ত হইয়াও ব্যয় করিতে আর কাহারও ভয় রহিল না । এত দিন সেই বংশের বিলক্ষণ বাঁধুনি ছিল, যুবকেরা কর্তৃপক্ষকে বিলক্ষণ ভয় করিত ; কিন্তু সে ভয় ভক্তির সহিত মিশ্রিত ছিল না, স্বার্থ সম্বলিত বাহ্য ভয় মাত্র । সেই ভয় এক জন ভঙ্গ করিয়াছিল, অপর কয়েক জন তাহার অনুগামী হইয়া চলিল ; তাহার পর, সকলেই স্বাধীন ভাবে কার্য্য করিতে লাগিল ।

এইরূপে অনেক স্থানে দেখা যায় যে, এক জনের প্রবৃত্তির অনুসরণ করিয়া এক একটি বংশ একেবারে নষ্ট হইয়া গিয়াছে । ক্রমে সেইটি সংক্রামিক হইয়া সেই বংশের আশ্রিতগণও নষ্ট হয়, ইহাও প্রায় দেখিতে পাওয়া যায় । কোন কোন গ্রামের এক ঘর ধনাঢ্য বংশের সময়ে সময়ে যেকপ প্রবৃত্তি হয়, গ্রামস্থ ক্ষুদ্র ভদ্র সমস্ত লোক তাহার অনুসরণ করে । ডুমুরদয়ের বাবুরা যখন দস্যুবৃত্তি করিত, তখন সেই গ্রামের সমস্ত লোক, তাহা-দিগের সেই অপকর্ম্মের উত্তর সাধক ছিল । অদ্যাপি রজনীতে ডুমুরদয়ের পথে আসিতে পথিকেরা ভয় করিয়া থাকে । যদিও তাহানিগের সেই বংশের কাচি কিছু মাত্র পরিবর্তিত হয় নাই ;

কিন্তু রাজশাসনে সেই দুর্ভাগ্যবান স্থিরভাবে অবলম্বন করিয়াছে। সময় পাইলেই উহারা আবার পূর্ব্ণভাবে ধারণ করিবে, তাহাতে আর সংশয় নাই। এক এক পরিবারের এক একটি প্রবৃত্তি প্রবল থাকে, কেবল দেশ কাল বিবেচনা করিয়া তাহারা সে প্রবৃত্তি সর্বোত্তমভাবে চরিতার্থ করিতে পারে না। ইংলণ্ডের হেনেরি বংশীয় রাজগণ পরপীড়ক, লম্পট ও নরঘাতক ছিলেন। ক্রমে সেই বংশ লোপ হইয়া গেল। অবশেষে উক্ত বংশে দুইটি কন্যা জন্মিয়াছিল। তাঁহারাও পূর্ব্ণ পুরুষের কুপ্রবৃত্তির অনুসরণ করিয়া ছিলেন। অন্য কি কথা, মহারাজ্ঞী এলিজাবেথকেও উল্লিখিত কয়েকটি দোষ স্পর্শ করিয়াছিল।

ফ্রান্সের প্রথম নেপোলিয়নের সংগ্রামের দিকে প্রবল প্রবৃত্তি ছিল। বাল্যকালে তিনি মাটির দুর্গ নির্মাণ করিয়া ক্রীড়া কৌতুক করিতেন। বয়োবৃদ্ধির সঙ্গে সঙ্গে তাঁহার সেই প্রবৃত্তি আরও প্রবল হইয়া উঠিল। সমর সম্বন্ধীয় পুস্তক পাঠ ও তৎ সংক্রান্ত কথাবার্তা কহিতে অত্যন্ত ভাল বাসিতেন। ক্রমে সৈন্যদলে প্রবেশ করিয়া আপন অসাধারণ সমর কৌশলের পরিচয় দিতে লাগিলেন। অতি অল্প কালের মধ্যেই কেবল সামরিক বুদ্ধির প্রভাবেই ফ্রান্সের সম্রাট হইলেন; কিন্তু এক দিনের জন্যও স্থস্থ মনে সাম্রাজ্য সুখভোগ করা তাহার অদৃষ্টে ঘটয়া উঠিল না। ফ্রান্সের সম্রাট হইয়া যত দিবস জীবিত ছিলেন, কেবল যুদ্ধক্ষেত্রেই কাল-যাপন করিয়াছিলেন। অবশেষে সমস্ত ইউরোপে সমরানল প্রজ্জ্বলিত করিয়া ওয়াটব্লুর যুদ্ধে পরাস্ত হইলেন। তাঁহার পুত্র দ্বিতীয় নেপোলিয়ন পিতার ন্যায় সামরিক বিদ্যার পরিচয় দিতে গিয়া ইটালি দেশে সম্মুখ যুদ্ধে হত হইলেন। তদীয় ভ্রাতৃপুত্র

তৃতীয় নেপোলিয়ন সামান্য ক্ষুদ্রে প্রসিয়ার সহিত যুদ্ধ ঘটাইয়া রাজ্যচ্যুত হইলেন । তৎপুত্র চতুর্থ নেপোলিয়ন বংশমর্যাদা রক্ষা করিবার জন্য জুলু সংগ্রামে ইংরাজদিগের পক্ষ সমর্থন করিতে গিয়া সম্মুখ যুদ্ধে নিহত হইলেন । তাঁহাকে যুদ্ধক্ষেত্রে যাইতে কেহই অনুরোধ করে নাই, যাইবারও কোন বিশেষ কারণ ছিল না ; কিন্তু বংশগর্ভে গর্ভিত হইয়া ইংরাজদিগের জন্য স্ব ইচ্ছায় নিহত হন । এইরূপে বংশগত এক একটি প্রবল প্রবৃত্তি থাকে । সময় পাইলেই সেই প্রবৃত্তি ভীষণ ভাব ধারণ করে । বহু চেষ্টা ও বহু যত্ন না করিলে, বংশগত প্রবৃত্তির মূলোচ্ছেদ করিতে পারা যায় না ।

কখন কখন সময় প্রবৃত্তির প্রতীক্ষা করে, কখন বা প্রবৃত্তি সময়কে চরিতার্থ করে । ব্যক্তিগত প্রবৃত্তি যে, সময়ের প্রতীক্ষা করে, এই স্থলে তাহার একটি উদাহরণ দেওয়া যাইতেছে,— এক ধনবানের পিতা অত্যন্ত বাবু ছিলেন ; বাবুগিরিতে মুক্ত হস্তে অর্থ ব্যয় করিতেন । সেই বাবুর ঔরসজাত পুত্র জন্মাবধি পিতার বাবুগিরি ও বদান্যতা দেখিয়াও স্বভাব দোষে ঘোর রূপণ হইল । বয়োবৃদ্ধির সঙ্গে সেই রূপণতা এতদূর প্রবল হইয়া উঠিল যে, অর্থ সঞ্চয় ব্যতিরেকে আর কোন বিষয়েই তাহার আনন্দ হইত না । পিতাকে মুক্ত হস্ত দেখিয়া মনে মনে সে অত্যন্ত বিরক্ত হইত । ভাবিত, যদি কখন পৈতৃক বিষয় হস্তে পাই, তাহা হইলে, পিতার অপব্যয়ের প্রতিশোধ লইব । কালে পিতা পরলোক প্রাপ্ত হইলেন । পুত্র তাঁহার সমস্ত বিষয়েরই অধিকারী হইলেন । এখন পূর্ব প্রবৃত্তি যে সময় প্রতীক্ষা করিয়াছিল, সেই সময় আসিয়া উপস্থিত হইল ;

স্বতরাং উক্ত ধনীর পুত্র কায়মনে আপন প্রবৃত্তিকে চরিতার্থ করিতে আরম্ভ করিল ।

কখন বা সময় প্রবৃত্তিকে চরিতার্থ করে । ব্যক্তিগত প্রবৃত্তি এস্থলে উদাহরণ স্বরূপ গ্রহণ করিতে হয় । কোন ধনাঢ্য যুবকের সুরা, বেশা, প্রভৃতি নীচ আমোদে ঘোর প্রবৃত্তি জন্মিয়াছে । এই সকল প্রবৃত্তি স্বভাবতই যুবকের মনে আবির্ভূত হইয়াছিল, তাহার পর কতকগুলি লোক উত্তেজক হইয়া সেই সকল প্রবৃত্তি উদ্দীপ্ত করিয়া দিল । মনুষ্য শরীরে বিশ্রামের নিতান্ত প্রয়োজন ; কিন্তু সুরাশক্ত, বেশাশক্ত প্রভৃতি কদর্য্য আমোদপ্রিয় ব্যক্তিবৃন্দের বিশ্রামের অবসর নাই । দিন বামিনী তাহারা উল্লিখিত প্রবৃত্তিকে চরিতার্থ করিতেছে ও সেই সকল প্রবৃত্তির এতদূর দাস হইয়া পড়িয়াছে যে, এক দিনের জন্মও স্বাস্থ্য ভঙ্গের ভয় রাখে না, আয় ব্যয়ের দিকে দৃষ্টি রাখিবার সময় পায় না, মান মর্যাদা কতদূর নষ্ট হইল, এক দিনের জন্মও তাহা ভাবিয়া দেখে না । কতদূর কর্তব্য কর্ম্ম বিমূঢ় হইয়াছে, ঘোর প্রবৃত্তির বশতাপন্ন হইয়া তাহা ভাবিবার অবসর প্রাপ্ত হয় না । তাহারা মনে মনে ভাবে, মার্কণ্ডের পরমায়ু ও কুবেরের অক্ষয় ভাণ্ডার লইয়া অবনীতে আবির্ভূত হইয়াছি । আমরা যাহা করিব, তাহার উপর কথা নাই । কখন বা প্রবৃত্তি পরবশ ব্যক্তির সময়ের জন্ম লালায়িত হয় । সেই সময় এক্ষণে কুপ্রবৃত্তি পরবশ ব্যক্তিদিগের হাত ধরা হইয়াছে । সময়কে যাহা ইচ্ছা তাহাই করিতেছে, সময় তাহার প্রতিকূলে দাঁড়াইতে পারিতেছে না । কখন কখন ঘোর প্রবৃত্তি স্বত্বেও কেবল সময় বশ্য নহে বলিয়া অনেক লোক তাহা চরিতার্থ করিতে পারে না । বোধ কর, কোন ব্যক্তি সুরাপান

ও বেশীকালে বাস করিতে অভ্যস্ত ভাল বাসে, সেই প্রবৃত্তিই তাহার হৃদয়ে প্রবল বেগে প্রবাহিত হইতেছে ; কিন্তু সে ব্যক্তি একটি গবর্ণমেন্টের কার্য্য করিয়া থাকে, সেই কার্য্যে মাসিক দুই শত টাকা বেতন পায়, তাহা ভিন্ন তাহার আর অন্য উপায় নাই । যদি সেই কার্য্যে শৈথিল্য প্রকাশ করে, তাহা হইলে, তাহার সকল দিক বন্ধ হইয়া যায় । সেই জন্য যতদূর সে কুপ্রবৃত্তির প্রবল বেগ মনোমধ্যে ধারণ করুক না কেন, বেলা দশটার সময় আহার করিয়া তাহাকে কার্য্যালয়ে উপস্থিত হইয়া পাঁচটা পর্য্যন্ত কাজ কর্ম করিয়া বাটীতে প্রত্যাবর্তিত হইতে হইবে । সুতরাং সে সপ্তাহের ছয় দিবস সময়ের উপর প্রভুত্ব করিতে পারে না, কার্য্যের অনুরোধে বাধ্য হইয়া চূপ করিয়া থাকিতে হয় । সপ্তাহের মধ্যে রবিবার অবসরের দিবস । সে দিবস সময়, অর্থ ও মন এই তিনটিই প্রবৃত্তির সাহায্য করে ; সুতরাং উক্ত ব্যক্তির সে দিবস কুপ্রবৃত্তি যত দূর বাড়াইতে ইচ্ছা হয়, তত দূর বাড়াইয়া বসে ।

কেবল অসৎ প্রবৃত্তি চরিতার্থ করিবার জন্যই অনেকে দীর্ঘ-কাল সৎপথের পথিক হইয়া বেড়ায় । তাহার পর, প্রবৃত্তি চরিতার্থের সময় উপস্থিত হইলেই, আর কাল বিলম্ব করে না । কত লোককে যৌবনের প্রারম্ভে একপ সৎপ্রবৃত্তির লোক বলিয়া বোধ হইয়াছে যে, তাহাদের বিজ্ঞ গুরুজনেরা ভাবিয়াছিলেন, ইহারা সংসারে প্রবেশ করিলে, সৰ্ব্বতোভাবে সংসারের মঙ্গল সাধন করিবে ; কিন্তু সময় পাইয়া তাহারা আপন অসৎ প্রবৃত্তির দাস হইয়া পড়িল ।

প্রবৃত্তি সময়ের বশ্য থাকে, ইহা উপরের লিখিত সংক্ষেপ

দৃষ্টান্তের দ্বারা প্রতিপন্ন হইল। এক্ষণে সময় কিরূপ প্রবৃত্তির বশ্য হয়, তাহার উদাহরণ প্রদত্ত হইতেছে। কোন ধনীর পুত্র পিতা বর্তমানে আপনার বিলাস চরিতার্থের অর্থ অনাটন হওয়ায়, গবর্ণমেন্টের একটি সম্ভ্রান্ত পদ গ্রহণ করিয়াছিলেন। পদের মর্যাদা রক্ষার জন্য তাঁহার প্রবৃত্তিকে সময়ের বশ্য হইয়া চলিতে হইত, সেই জন্য তিনি বাধ্য হইয়া অনেকাংশে বিশিষ্ট লোকের ন্যায় থাকিতেন; কিন্তু সময় পাইলে, যত দূর প্রবৃত্তির বশ হইতে পারেন, তাহাই হইতেন। কালে তাঁহার পিতা পরলোকগত হইলেন। সময় পাইয়া প্রবৃত্তি বলিল, আর কেন, গবর্ণমেন্টের কার্য পরিত্যাগ করিয়া স্বাধীন হও, সময়কে আপনার আজাদীনে রাখিয়া প্রবৃত্তি চরিতার্থ কর। পূর্বে যে সময়, নয়টা বাজিল, স্নান করিতে যাও বলিয়া ভয় দেখাইত, এক্ষণে সেই সময়ই বাবুর আজাদীন। পূর্বে যে সময়ে তিনি আহার করিতেন, এক্ষণে সেই সময়ে নিদ্রা যান; পূর্বে যে সময়ে স্নান করিতেন, এক্ষণে তিনি সেই সময়ে সুরাপান করেন; পূর্বে যে সময়ে তিনি মোকদ্দমার রায় লিখিতেন, এক্ষণে সেই সময়ে আমোদ করিয়া রন্ধন করেন। যে সময় পূর্বে কথায় কথায় জ্বলঙ্গী করিত—অর্থাৎ কহিত, শীঘ্র লও, আমি চলিলাম; এক্ষণে সেই সময় অর্থাৎ দিবারাত্রি সম্ভাব হইয়া গিয়াছে। কেননা, বাবু ইচ্ছা করিলেই রাত্রিকে দিবা ও দিবাকে রাত্রি করিতে পারেন।

ব্যক্তিগত প্রবৃত্তি কখন কখন হঠাৎ উপস্থিত হয়; কিন্তু সে প্রবৃত্তির শমতা কিছুতেই হয় না। বোধ কর, একটি শাস্ত, শিষ্ট ও সুশিক্ষিত যুবক ন্যায়, যুক্তি ও ধর্ম্মানুসারে দীর্ঘ কাল সংসার যাত্রা নির্বাহ করিয়া আসিতেছেন, কোন কালে অধর্ম্ম পথে বিচ-

রণ করেন নাই। তিনি এক দিন চাটুকারবর্গে পরিবেষ্টিত হইয়া গঙ্গাস্নান করিতে গেলেন। তথায় হঠাৎ একটি সূর্য্যপা নবযৌবনা বারাজনা শিবিকারোহণে তাঁহার সম্মুখে আসিয়া নামিল এবং স্নানের জন্ত যাহা যাহা প্রয়োজন, শিবিকার সম্মুখে দাঁড়াইয়া তাঁহার অনুষ্ঠান করিতে লাগিল। সেই শান্তশীল ও সচ্চরিত্র যুবক উক্ত সূর্য্যপা বারাজনাকে দৃষ্টি করিয়া কিঞ্চিৎ ধৈর্য্যচ্যুত হইলেন। প্রথম দর্শনে যুবার যেকপ মনোবিকার উপস্থিত হইয়াছিল, ধৈর্য্যের সহিত তাহা উড়াইয়া দিবার চেষ্টা করিলেন; কিন্তু দ্বিতীয় বার দর্শনে আর সে ধৈর্য্য রহিল না। সেই যুবার সহিত যে কয়েক জন লোক ছিল, তাহারা তাঁহাকে শিষ্ট শান্ত জানিয়া শিষ্টাচারের দ্বারাই তাঁহার প্রিয় পাত্র হইয়া কাল হরণ করিতে ছিল; কিন্তু তাহারা সকলেই শঠ ও অর্থশোষক, কেবল স্বেযোগের প্রতীক্ষায় শান্ত ভাবে যুবার কাছে অবস্থিতি করিত। তাহারা পুনঃ পুনঃ তাঁহাকে সতৃষ্ণ নয়নে সেই যুবতীর প্রতি দৃষ্টি নিক্ষেপ করিতে দেখিয়া তাঁহার মনোগত ভাব তৎক্ষণাৎ বুঝিয়া লইল এবং যুবার নবীন প্রণয়াক্ষুরে উৎসাহ-বারি সেচনে ব্যগ্র হইয়া সহাস্র আশ্রো জিজ্ঞাসা করিল, ‘কি নহাশয়! কি দেখিতেছেন? ওকে পাবার যো নাই, ও এই সহরের লক্ষহীরা!’ যুবা হাস্য করিয়া কহিলেন—‘চল চল, স্নান করা যাকুগে। যার যেমন মন, সে সবাইকে তেমনি দেখে।’ এই কথা বলিয়া যুবা সকলের সঙ্গে স্নানার্থ জলে নামিলেন। বারাজনাও দুই জন কিল্লরীর হস্ত ধরিয়া জলে নামিল এবং অঙ্গ ভঙ্গীর সহিত স্নান করিতে লাগিল। তদ্রূপে যুবার আর ধৈর্য্য রহিল না। এক জন চাটুকারক জিজ্ঞাসা করিলেন—‘এ কে? কোথায় থাকে?’ চাটুকার আনন্দের সহিত

কহিল—‘সে জন্ত ভাবনা কি, যদি আপনার নিভান্তই উহার সহিত আলাপ করিতে ইচ্ছা হইয়া থাকে, তাহা হইলে, সন্ধ্যার পর তাহার সন্যোগ দেখা যাইবে।’ এখানে আর অধিক লিখিয়া আমাদের প্রস্তাব বাহ্যিক করিবার প্রয়োজন নাই। উক্ত বেষ্ট্রাকে দর্শন করিবা মাত্রই স্থূল যুবকের তাহার প্রতি এত দূর ঝোঁক হইল যে, সেই বারান্দার সহিত সহবাসে তিন চারি বৎসরের মধ্যে তাঁহার নিজ সম্পত্তির অর্দ্ধাংশ নষ্ট করিয়া ফেলিয়াছিলেন। এখানে আর একটি কথা বলিয়া রাখিতে হইবে। যদি তাঁহার সেই হুতন ঝোঁকের সময় কেহ এইরূপ সতর্কদেশ দিত যে, মহাশয়, উহার প্রতি দৃষ্টি করিবেন না, ঐ ছুষ্ঠা অনেক বড় মানুষের সর্বনাশ করিয়াছে ইত্যাদি। তাহা হইলে, যুবকের সেই প্রবৃত্তি ক্ষণকালের মধ্যেই নিবৃত্ত হইত ; কিন্তু তাহা না করিয়া যুবকের ছুষ্ঠ চাটুকারগণ প্রজ্জ্বলিত অগ্নিতে ঘৃতাহতি দিয়া এক দিনের মধ্যেই সেই প্রবৃত্তি শত গুণে বর্দ্ধিত করিয়া দিল। কাজেই সেই যুবক চাটুকারগণের শঠতাক্রপ জাল কাটিয়া আত্মরক্ষা করিতে পারিলেন না। যাহার যে বিষয়ে যখন ঝোঁক ধরিবে, বুদ্ধিমান লোক উপদেশের বন্ধন দিয়া সে ঝোঁকের শমতা করিয়া থাকেন ; কিন্তু ছুষ্ঠ লোকেরা সেই সন্যোগ দেখিলে, হুতন বন্ধন দেওয়া দূরে থাকুক, মূল বন্ধন খুলিয়া সেই ঝোঁককে একেবারে ভূমিসাৎ করিয়া দেয়।

ব্যক্তিগত ঝোঁক কখন কখন কার্য্যানুরোধেও হইয়া থাকে এবং সেই ঝোঁক সময়ে কখন বা ইষ্ট ও কখন বা মহা অনিষ্টের কারণ হইয়া দাঁড়ায়। অত্যন্ত নির্যোধ লোকেরা সামান্য কার্যের

সামান্য প্রশংসা পাইয়া সেই কার্যের দক্ষতা লাভের জন্য একেবারে উন্মত্ত হইয়া উঠে । বোধ কর, কোন নির্যোধ সম্পন্ন যুবক এক গণিকালয়ে বসিয়া আছে, সেই স্থানে আর দুই তিনটি যুবক আসিয়া সমবেত হইল । দৈব বশতঃ সেই সময় সেই গণিকার নৃত্য গীত শিক্ষাদাতা ওস্তাদেরা উপস্থিত ছিল । যুবকেরা তথায় সকলেই এক একটি গান গাহিল । উপস্থিত ধূর্ত ওস্তাদেরা সুরযোগ দেখিয়া সর্বাপেক্ষা সম্পন্ন যুবককে লক্ষ্য করিয়া কহিল, মহাশয়ের কি মিষ্ট গলা ! বিনা শিক্ষাতেই এই প্রকার হইয়াছে, যদি কিছু কাল পরিশ্রম করিয়া এই বিদ্যার চর্চা করেন, তাহা হইলে, আপনি এক জন অদ্বিতীয় গায়ক হইবেন । মহাশয়, সঙ্গীত বিদ্যাটি কি কম ! আপনার মত মিষ্ট গলার গান কোথাও শুনি নাই । নির্যোধ যুবক তাহাদের সেই অবস্থা প্রশংসাবাদে একেবারে দুঃখ সঙ্গীত বিদ্যার চর্চায় ঝাঁক ধরিল । পক্ষান্তরে কোন নির্যোধ যুবক নবদ্বীপস্থ এক বিখ্যাত পণ্ডিতের চতুষ্পাঠীতে সৰ্বদা যাতায়াত করিত । তথায় এক জন ছাত্র কৃতবিদ্য হইয়া কথকতা শিখিতেছিলেন । পূৰ্ব্ব কথিত যুবক ইতিপূর্বে কলিকাতায় থাকিয়া বেশ্যালেয়ে সঙ্গীত চর্চা করিতে গিয়া বহু অর্থনাশ করে । পরে উপায়ান্তর না দেখিয়া নবদ্বীপে মাতুলালয়ে আশ্রয় লইয়াছিল । যদিও সেই যুবক বুদ্ধি ও বিবেচনার দোষে এবং সঙ্গীত শিক্ষার বাবুগিরিতে হতসৰ্বস্ব হয় ; তথাচ সঙ্গীত বিদ্যায় কিঞ্চিৎ বোধাধিকার হইয়াছিল । সে চতুষ্পাঠীতে বসিয়া সেই কথকের রাগ রাগিনীর আলাপ শুনিয়া মনে মনে ভাবিল, যদি সংস্কৃত ব্যাকরণ ও সাহিত্যে আমার কিঞ্চিৎ বোধাধিকার থাকিত, তাহা হইলে,

আমিও কথকতা শিখিতাম। এক দিন তাহার সেই মনের ভাব উক্ত কথকের নিকট ব্যক্ত করায়, তিনি বলিলেন, তোমার বেশ স্বরবোধ আছে ও গলাও অত্যন্ত মিষ্ট, তুমি আমার কাছে কথকতা শিক্ষা কর। ইহাতে অধিক সংস্কৃত বিদ্যার প্রয়োজন নাই, অল্প মাত্র ব্যাকরণ বোধ থাকিলে ও দুই তিন খানি কাব্য পড়িলেই চলিতে পারিবে। উক্ত কথকের সঙ্গীত বিদ্যায় সামান্য বোধাদিকার ছিল, তিনি আপন স্বার্থের জন্যই সেই যুবককে হস্তগত করিয়া লইলেন। তাহাকে কিঞ্চিৎ কিঞ্চিৎ ব্যাকরণ পড়াইতেন ও তাহার নিকট আপনি ভাল রূপে সঙ্গীত শিখিতেন। এইরূপে অতি অল্প দিনের মধ্যেই পরস্পরের সাহায্যে উভয়েই উৎকৃষ্ট কথক হইয়া উঠিলেন। পূর্বে যে সঙ্গীত শিক্ষা যুবকের সর্ব অনিষ্টের কারণ হইয়াছিল; কিন্তু এক্ষণে সজ্জন সংসর্গে সেই সঙ্গীতই তাহার গ্রাসাচ্ছাদনের কারণ হইয়া উঠিল।

কোন কোন লোকের জ্ঞান উদ্রেকের সঙ্গে সঙ্গে এক একটি প্রবৃত্তি জন্মিয়া যায়, সহস্র বাধা অতিক্রম করিয়াও তাহারা সেই প্রবৃত্তি চরিতার্থ করে। বিদ্যাসাগর মহাশয়ের সঙ্কলিত ‘চরিতাবলা’ ও ‘জীবনচরিত’ নামক পুস্তকদ্বয়ে ইহার ভূরি ভূরি প্রমাণ প্রাপ্ত হওয়া যায়। অনিষ্ট পক্ষে স্বভাব সিদ্ধ বোঁকের একটি উদাহরণ দেওয়া যাইতেছে। কোন কোন বালক জ্ঞান উদ্রেকের সঙ্গে সঙ্গে পিতামাতাকে তাহাদের একপ অনিষ্টকর বোঁক দেখাইতে আরম্ভ করে যে, জ্ঞানবান্ ব্যক্তির। সেই বালকের কার্য-প্রণালী দেখিয়া ও কথাবার্তা শুনিয়া বুঝিতে পারেন যে, এই বালক ভবিষ্যতে বংশের কুপুত্র বলিয়া পরিচিত হইবে। যদি

বৃহস্পতি স্বয়ং আসিয়া ইহার শিক্ষকতা কার্যে নিযুক্ত হন, যদি পিতামাতা প্রভৃতি গুরু জনেরা লৌহমুদ্রার হস্তে করিয়া তাহার পশ্চাৎ পশ্চাৎ ভ্রমণ করেন, তথাচ তাহাকে সুপথের পাথক করিতে পারিবেন না ; সে কুপ্রবৃত্তির বশতাপন্ন হইয়া কুপথে বিচরণ করিবেই করিবে । জ্ঞানার্জন সকলের পক্ষেই সুলভ, সকলেই জাননী ব্যক্তির সচুপদেশ শ্রবণ করিয়া থাকে, ধর্ম্মের জয় ও অধর্ম্মের ক্ষয়, ইহা সকলেই দেখিতেছে, শুনিতেছে ও পড়িতেছে ; কিন্তু এক এক জনের মস্তকে এমন এক একটি ঝাঁক থাকে যে, সহস্র প্রকার জ্ঞানগর্ভ পুস্তক পাঠে ও সচুপদেশ শ্রবণে তাহাদিগের সে ঝাঁকের শমতা হয় না ।

পূর্বে দেশগত ও কালগত ঝাঁকের উল্লেখ মাত্র হইয়াছিল, এক্ষণে সেই বিষয় আর একটু বাহুল্য করিয়া বলা যাইতেছে । ভারতবর্ষে পাশ্চাত্য সভ্যতা প্রবেশ করায়, আপামর সাধারণ লোকের এই প্রবৃত্তি হইয়াছে, কিসে আপনি সুখী হইব । বাল্যকালে সেই আত্মস্বথের উপযোগী কিঞ্চিৎ বিদ্যানুশীলনে প্রায় সকলেই প্রবৃত্ত হয় । পরে কিঞ্চিৎ অর্থ উপার্জনক্রম হইলেই, আর লেখাপড়ার দিকে দৃষ্টি রাখে না । ত্রিশ মুদ্রা মাসিক বেতন হইলেই, আপনার প্রবৃত্তি চরিতার্থের পক্ষে যথেষ্ট বিবেচনা করে । ইহাতে লোক লৌকিকতা, স্বচ্ছন্দ আহার বিহার, পিতামাতার সেবা প্রভৃতি সংকল্প হউক বা না হউক, নিজের পরিচ্ছদ, সুরার ব্যয় ও বারান্ধনার মাসিক রুত্তি অবধারিত করিতে পারিলেই তাহাদের পক্ষে যথেষ্ট হইল । এই বঙ্গদেশে হ্যুনাধিক সপ্ত কোটি লোক বাস করে । তাহার মধ্যে প্রায় অধিকাংশ লোক এইরূপ আপন ইন্দ্রিয় চরিতার্থোপযোগী কিঞ্চিৎ

কিঞ্চিৎ মাসিক উপার্জন করিয়াই সন্তুষ্ট আছে, প্রকৃত মনুষ্যত্বের দিকে কেহই দৃষ্টিপাতও করে না। এই সময়গত ঝোঁক এ দেশে ক্রমে ক্রমে বন্ধ মূল হইয়া উঠিতেছে।

কতকগুলি লোকের রিপুগত ঝোঁক থাকে, এ ঝোঁক অত্যন্ত ভয়ানক ও অনিষ্টকারক। মনুষ্য মাত্রেরই এক একটি রিপু প্রবল থাকে—অর্থাৎ কেহ বা ক্রোধের বশীভূত, কেহ বা মোহের বশীভূত, কেহ বা কামের বশীভূত ইত্যাদি। এই রিপুগত ঝোঁকও মনুষ্য শরীরে প্রচ্ছন্ন ভাবে থাকে, সময় পাইলেই প্রবল হয়। বোধ কর, কোন স্ত্রীলোক অত্যন্ত ক্রোধের বশব্দ; কিন্তু বাল্যকাল অবধি সেই ক্রোধরিপুকে চরিতার্থ করিবার উপ-যুক্ত পাত্র পায় নাই। যদিও সময়ে সময়ে তাহাকে শ্বশুর শাশুড়ীর তাড়না সহ্য করিতে হইত, তথাচ ক্রোধরিপুকে সাধ্যানুসারে দমন করিয়া রাখিত। সেই স্ত্রীলোকের কোন কালে দাস দাসী ছিল না; কিন্তু শ্বশুর শাশুড়ীর মৃত্যুর পর আপনার এক মাত্র পুত্রবধূর প্রতি লঘু পাপে গুরু দণ্ড করিতে আরম্ভ করিল। হীনবলের প্রতি সবলের অত্যাচার করিবার যে ব্যক্তিগত ঝোঁক থাকে, তাহার এই একটি সামান্য দৃষ্টান্ত স্থল। উক্ত স্ত্রীলোকের যদি বহু সংখ্যক দাস দাসী থাকিত, কিম্বা তাহার স্বামীর অগ্নে প্রতিপালিত কতকগুলি জ্ঞাতিবর্গ লইয়া তাহাকে সংসার করিতে হইত, তাহা হইলে, সেই সকল অধীনস্থ লোকের দুর্দশার অবধি থাকিত না। পুরুষের পক্ষেও ইহা অপেক্ষা অনেক দৃষ্টান্ত পাওয়া যায়। কেহ কেহ বহু সংখ্যক লোকের উপর প্রভুত্ব করিয়া নিজ গুণে তাহাদিগের প্রিয়পাত্র হইয়া উঠেন। অধীনস্থ লোকেরা সেই প্রভুর জন্ত প্রাণ পর্যন্ত

দিতে স্বীকৃত হয়। কেহ বা সামান্য পদে প্রতিষ্ঠিত হইয়া অধীনস্থ লোকের উপর উৎপীড়নের পরিসীমা রাখে না। কথিত আছে, এক জন রাজা আপন সচিবগণকে মনোনীত করিবার পূর্বে তাঁহাদিগকে সুরাপান করাইয়া তাঁহাদের কোন্ দিকে স্বভাবগত ঝোঁক, তাহা পরীক্ষা করিয়া লইতেন। সুরাপান করিলে, স্বভাবগত প্রবৃত্তি প্রবল হইয়া উঠে। তখন কেহ নিকটস্থ লোকের উপর অত্যাচার করিতে আরম্ভ করে, কেহ বা স্ত্রীলোকের প্রতি ঘোর আসক্ত হয়, কেহ বা আত্মপ্লাঘা আরম্ভ করে, কেহ বা অত্যন্ত বকিতে থাকে, আবার কেহ কেহ বা স্থির ভাব অবলম্বন করে। সুরাপান করাইয়া যেমন সেই রাজা মন্ত্রিগণের স্বভাবগত ঝোঁক বুঝিয়া লইতেন, সেইরূপ যে কখন অর্থের মুখ দেখে নাই, তাহার হস্তে কিঞ্চিৎ অর্থ হইলে, তাহার স্বভাবগত ঝোঁক প্রকাশ হইয়া পড়ে; কিন্তু যে বিপুল অর্থ ও স্বাধীনতা প্রাপ্ত হইয়াও কোন্ দিকে তাহার ঝোঁক, সাধারণকে তাহা জানিতে না দেয়, তাহাকেই যথার্থ শিক্ষিত বলিয়া বোধ হয়।

মনুষ্যের কখন কখন কার্য্যগত ঝোঁক উপস্থিত হয়, এইরূপ ঝোঁক নিতান্ত নির্দোষ ব্যক্তিরই হইয়া থাকে। বোধ কর, কোন বিশিষ্ট বংশোদ্ভব যুবার পিতৃবিয়োগ হইল। সেই সময় পাঁচ জন স্বার্থপর ব্রাহ্মণ পণ্ডিত, গুরু ও পুরোহিত যুবাকে এইরূপ প্রবৃত্তি দিতে আরম্ভ করিল,—‘লোকে যে জন্ম সন্তানের কামনা করে, তাহার সময় উপস্থিত হইয়াছে।’ যুবককে উত্তেজনা করিবার জন্য তাহারা আবার পিতৃভক্তি সম্বন্ধীয় নানা প্রকার উপদেশ দিতেও আরম্ভ করিল। সেই সকল কথা শুনিয়া

যুবক পিতৃভক্তির পরাকাষ্ঠা দেখাইবার নিমিত্ত মাতিয়া উঠিলেন, পশ্চাদ্ধৃষ্টি রাখিলেন না, পিতৃশ্রাদ্ধে কত টাকা ব্যয় করা কর্তব্য, তাহাও ভাবিলেন না, ঋণগ্রস্ত হইয়া পিতৃশ্রাদ্ধ করিলেন । যদি কোন নিরপেক্ষ ব্যক্তি তৎকালে তাঁহাকে ঋণগ্রস্ত হইয়া একপ সমারোহের শ্রাদ্ধ করিতে বারণ করিতেন, তবে তাহার প্রত্যুত্তরে যুবক এই কথা বলিতেন, মহাশয়, পুত্রের কর্তব্য কর্মই করিলাম ; তাহার পর, তাঁহার পুণ্য থাকে, সমস্তই পরি-শোধ করিতে পারিব । যুবা এতকাল পিতার অধীনেই ছিলেন, সংসারের গতিক কিছুই বুঝিতেন না ; সেই জন্য অগ্র পশ্চাৎ বিবেচনা না করিয়া বিপুল অর্থ ব্যয় করিয়া ফেলিলেন । তৎকালে লোকের মুখে তাঁহার পিতৃশ্রাদ্ধের স্মৃতি শুনিয়া শরীর পুলকিত হইতে লাগিল । তাহার পর, এক পক্ষ গত না হইতেই চারি দিক হইতে টাকার তাগাদা আরম্ভ হইল । রজনী প্রভাত হইতে না হইতেই হিসাবের খাতা লইয়া বহু সংখ্যক লোক দ্বারে আসিয়া উপস্থিত হইতে লাগিল । তাহাদিগের তাড়নায় যুবক ব্যতিব্যস্ত হইয়া উঠিলেন । এইরূপ হঠাৎ এক এক বিষয়ে এক এক জন নর নারীর প্রবৃত্তি উপস্থিত হওয়ায়, অবশেষে তাহারা মহা বিপদ সাগরে নিমগ্ন হইয়াছে ।

প্রবৃত্তি সম্বন্ধে যেকপে অনিষ্ট ঘটে, একপ উদাহরণ অনেক প্রদর্শিত হইল । এক্ষণে এক সময়ে এক বংশোদ্ভব এবং এক পৈতৃক বিষয়ের সমানাধিকারী দুই ভ্রাতায় ভিন্ন প্রবৃত্তির অধীন হইয়া কিরূপ ইষ্ট ও অনিষ্ট লাভ করে, তাহারই একটি দৃষ্টান্ত দেওয়া যাইতেছে । এক জন মধ্যবিত্তের দুই পুত্র ছিল । তিনি পরলোক গমন করিলে, ভ্রাতৃত্বের তাহার সম্পত্তি

সমানাংশে বিভক্ত করিয়া লইলেন। বাল্যকালাবধি জ্যেষ্ঠ পরি-
মিতব্যয়ী ছিলেন এবং মনে মনে এই সংকল্প করিয়া রাখি-
ছিলেন যে, পিতৃধনের অধিকারী হইলে, পরিমিত ব্যয়ের কি
গুণ তাহা সকলকে দেখাইব। এক্ষণে সময় পাইয়া তিনি
পূৰ্ব্ব প্রবৃত্তি অনুসারে কার্য্য করিতে লাগিলেন, অর্থাৎ মাসিক
আয়ের অর্দ্ধাংশ অগ্রে সঞ্চয় করিয়া অপর অর্দ্ধাংশে নিয়মিত
সাংসারিক ব্যয়, নিত্য নৈমিত্তিক ক্রিয়া, যথার্থ পাত্রে দান এবং
নির্দোষ আমোদ আশ্লাদ প্রভৃতি সমস্ত বিষয়েই পরিমিত-
রূপে ব্যয় করিতেন। তাঁহার এই প্রবৃত্তি ঘোর প্রবল হইয়াছিল
যে, আয়ের অর্দ্ধাংশ অগ্রে সঞ্চয় না করিয়া কোন কার্য্যেই হস্তার্পণ
করিতে অভিলাষী হইতেন না। অধিক কি, ব্যয় সম্বন্ধে অর্থের
নিতান্ত অনাটন হইলেও, আয়ের তহবিলের টাকা গ্রহণ করিতেন
না। আগামী মাসের এক বিষয়ের ব্যয় লাঘব করিয়া অন্য বিষয়ের
কুলান করিয়া লইতেন। জ্যেষ্ঠ এই রূপে পরিমিতব্যয়ী হইয়া
ক্রমে ক্রমে আপন বিষয় বৃদ্ধি করিয়া ফেলিলেন, অথচ কোন
বিষয়ে সমাজে নিন্দনীয় হইলেন না। এদিকে কনিষ্ঠ পিতৃসম্প-
ত্তির অধিকারী হইয়া ঘোর বিলাসী হইয়া উঠিলেন। বাল্যকাল
হইতেই তাঁহার এই প্রবৃত্তি প্রচ্ছন্ন ভাবে ছিল, কেবল অর্থের
অনাটন বশতঃই চূপ করিয়া থাকিতেন। তিনি একে বিলাসী,
তাহাতে বিষয় কার্য্য কিছুই বুঝিতেন না, সুতরাং একেবারে
আশার অতীত ধন হাতে পাইয়া আলস্যের স্রোতে শরীর ঢালিয়া
দিলেন। যেখানে বিলাস সেই খানেই আলস্য মূর্ত্তিমান হইয়া
অবস্থিতি করে। পূৰ্ব্বে কনিষ্ঠ প্রত্যহ গঙ্গাস্নান করিতে যাই-
তেন; কিন্তু পদব্রজে যাইতে হইত। পিতার মৃত্যুর পর, আর

হাঁটিতে পারিলেন না। পিতা বর্তমানে অনিচ্ছাক্রমেও সাংসারিক পাঁচটি কার্য দেখিয়া বেড়াইতে হইত। এক্ষণে আর সে ভয় নাই বলিয়া মনের সাধে নিদ্রা যাইতে আরম্ভ করিলেন। বিলাসী লোকেরা আয়ব্যয়ের তালিকা দেখিতে চাহে না, যে কোন প্রকারে বিলাস চরিতার্থ হইলেই হইল। কেহ কিছু না বলিয়া আজ্ঞা প্রতিপালন করিলেই তাহারা পরম আত্মদিত হয়। এইরূপে অতি অল্প কালের মধ্যেই কনিষ্ঠ ছুপ্পুরতির দোষে সমস্ত বিষয় নষ্ট করিয়া ফেলিলেন। জ্যেষ্ঠ সঞ্চয় করিব, অথচ রূপণ হইব না, এইরূপ ইচ্ছার বশীভূত হইয়া অল্প কালের মধ্যেই মূল ধন হ্রাস করিয়া তুলিলেন। দেখ, প্রবৃত্তির তারতম্যের জন্ত মনুষ্যের অবস্থারও কত দূর তারতম্য ঘটিয়া উঠে।

Convictive tendency—এই কথা চিরপ্রচলিত আছে যে, কতকগুলি বিচারপতির অপরাধীকে দণ্ড দিবার পক্ষেই মহা ঝোঁক থাকে। এই ঝোঁকের বশীভূত থাকায়, তাঁহারা প্রায়ই ভ্রমে পতিত হইয়া অবিচার করিয়া থাকেন। যেস্থলে বিচারপতির কেবল দোষ অনুসন্ধানে তীক্ষ্ণ দৃষ্টি থাকে এবং দোষের লেশ মাত্র পাইলেই অপরাধীর উপর খড়াহস্ত হইয়া উঠেন, সেখানে ন্যায় যুক্তি ও দয়ার কোন সম্ভাবনা থাকে না। দণ্ডবিধির বিধানে যতদূর দণ্ডাজ্ঞা লিখিত আছে, তাঁহারা সেই বিধানানুসারেই লঘু পাপে গুরুদণ্ড করিয়া থাকেন; কিন্তু যাহাদিগের Convictive tendency, তাহাদিগের দ্বারাই বিশিষ্ট বিধানে ছুষ্ঠের দমন হয়, ইহাও আবার আমাদিগকে অবশ্য স্বীকার করিতে হইবে। যৎকালে সার মর্ডন্ ওয়েল্‌স্ সাহেব কলিকাতা হাইকোর্টের সেশন-বেঞ্চ একচেটে করিয়া লইয়াছিলেন,

সে সময়ে শ্বেত ক্লষ্ণ উভয় বর্ণের দুই লোকেরা একেবারে কলিকাতা পরিত্যাগ করিয়াছিল। তিনই বিখ্যাত দম্ভ্য ‘মতিবাবুর’ দর্প চূর্ণ করিয়াছিলেন। ক’থত আছে, ‘মতিবাবু’ ষারং ষার সেশন সোপর্দ হয়; কিন্তু প্রতি বারেই আপন অসাধারণ বুদ্ধি কৌশলে অব্যাহতি পাইয়াছিল। শেষ বারে ওয়েল্‌স্ সাহেবের হস্তে আর নিস্তার লাভ করিতে পারিল না; যে হেতু, ওয়েল্‌স্ সাহেব ‘মতিবাবুর’ নাম শুনিয়াই একেবারে অলিয়া উঠিলেন। প্রতি পক্ষের সাক্ষীর জবানবন্দীর সময় স্বয়ং তাহাদিগকে সওয়াল করিতে লাগিলেন, আর আসামীর পক্ষীয় বারিষ্ঠারদের বক্তৃতার সময় বধির হইয়া রহিলেন। জুরিদিগকে চার্জ দিবার সময় আসামীর অপরাধ যে প্রমাণ হইয়াছে, তাহা তন্ন তন্ন করিয়া বুঝাইয়া দিলেন। যে স্থলে স্বয়ং বিচারপতি বিপক্ষ, সে স্থলে সংগ্রহ বারিষ্ঠার অপরাধীর স্বপক্ষে বক্তৃতা করিলেও ফলদায়ক হয় না। ‘মতিবাবুর’ কারাকদ্ধ হওয়ার কিছু দিন পরেই কলিকাতার নামজুদ্ধ, দাঙ্গাবাজ ও মোকদ্দমাবাজ জনৈক ধনবান্ চতুর্দশ বৎসরের জন্য দ্বীপান্তরিত হইয়াছিল। সেই পর্য্যন্ত Convictive tendency র বিচারপতি আর কলিকাতা হাইকোর্টের বিচারাসনে উপবেশন করেন নাই। এক্ষণে প্রায় সকল বিচারপতিরই Acquittal tendency প্রবল, এই জন্য তাঁহারা অপরাধীকে গুৰুদণ্ড দিতে ইচ্ছুক নহেন।

এক্ষণকার রাজমন্ত্রিগণেরও জিদ বজায় রাখা এক মহা ঝোঁক আছে। কিসে আপন পক্ষ সমর্থন করিব ও আপন দলের পুষ্টি সাধন করিব, ইহার জন্য তাঁহারা সকল প্রকারের কার্য্য

করিতেই প্রস্তুত আছেন। তাঁহাদের যদি ঈশ্বরদত্ত অসাধারণ বুদ্ধি না থাকিত, তাহা হইলে, অতি অল্প কালের মধ্যেই অনাদৃত হইয়া স্থায় পদ পরিত্যাগ করিতে বাধ্য হইতেন।

এতদ্দেশীয় কতকগুলি ধনীর পরিনিন্দা শ্রবণে অত্যন্ত প্রবৃত্তি আছে। তাঁহারা সেই প্রবৃত্তি চরিতার্থের নিমিত্ত কতকগুলি বিশ্বনিন্দুক লোককে অর্থের দ্বারা বশীভূত করিয়া রাখেন। কেন না, পরকুৎসা না শুনিলে, তাঁহাদিগের কর্ণবিবর পরিতৃপ্ত হয় না। যে সময়ে পাঁচ জন সাধু ব্যক্তি কোন নিতান্ত দোষী ব্যক্তির অপরাধ মার্জনা করিবার জন্য নানা উপায় উদ্ভাবন করেন, সেই সময় প্রবৃত্তির দোষে কোন কোন নীচ ব্যক্তি নিতান্ত স্থূল ব্যক্তির অপকীর্ত্তি শ্রবণে আত্মাকে চরিতার্থ করিয়া থাকে। কতকগুলি লোক অকারণ অর্থ দ্বারা কলহ ত্রয় করিয়া প্রতিবেশীর সহিত শত্রুতা করে। যে সকল কার্যের দ্বারা অমঙ্গল ব্যতিরেকে আর কোন লাভ নাই, তাহারা প্রবৃত্তির দোষে সেই অনর্থক কলহ ঘরে আনিয়া উপস্থিত করে। যদি মোকদ্দমায় হারিল, তবে আপনি ধনে প্রাণে সারা হইল, ইহা প্রথমে না বুঝিয়া কেবল প্রবৃত্তির পরবশে জন্ম অনেকে এই আমোদে হতসর্কস্ব হয়।

কুপ্রবৃত্তিই হউক বা সুপ্রবৃত্তিই হউক, মনুষ্য যখন সে প্রবৃত্তির বশীভূত হয়, তাহাতেই তাহার অসাধারণ বুদ্ধি কোশল প্রকাশ পাইতে থাকে। বোধ কর, এক জন যৌবনকালে তস্কর বৃত্তিতে প্রবৃত্ত হইল। কিছুকাল সেই কার্য্য করিতে করিতেই তস্কর বৃত্তিতে তাহার অসাধারণ বুদ্ধি প্রকাশ পাইতে থাকে। কারণ সেই বিষয়েই তাহার সর্কদা ধ্যান থাকে, আপনা হইতেই তাহার

নানা উপায় উদ্ভাবন করিয়া লয় । ইহার পোষকতার জন্য আর একটি উদাহরণ দেওয়া যাইতেছে যে, এক ব্যক্তি যৌবনকালে ঘোর লম্পট হইয়া উঠিল ; কিন্তু গুরুজনের ভয়ে বাটী হইতে বহির্গত হইতে পায় না ও অর্থ সম্বন্ধেও কুলান হয় না । সেই লম্পট প্রবৃত্তির বশীভূত হইয়া যেমন বিনা উপদেশে ঐ দুইটি বিষয়ের সুবিধা করিয়া লইতে পারে, সেই রূপ যে যখন যে প্রবৃত্তির ঘোর বশীভূত হয়, তাহাতেই তাহার অসাধারণ বুদ্ধি প্রকাশ পাইবে, তাহাতে আর সন্দেহ নাই । এই জন্যই ইংরাজী ও সংস্কৃত ভাষায় দুইটি মহাবাক্য লিখিত আছে “Where there is a will there is a way” এবং “যাদৃশী ভাবনা যস্য সিদ্ধির্ভবতি তাদৃশী ।”

একপা অনেক দেখিতে পাওয়া যায় যে, দুই সংহাদরের মধ্যে এক জনের সঙ্গ দোষে নীচ প্রবৃত্তি হইল, অর্থাৎ বাল্যকালাবধি বিশিষ্ট বিদ্যার চর্চা পরিহার করিয়া লম্পটগণের সহিত ‘গাওনা বাজনা’ শিক্ষা করিয়া বেড়াইতে লাগিল । যদি বল এ প্রবৃত্তির উদ্দেশ্য কি ? আর কোথা হইতে এ প্রবৃত্তির সঞ্চার হইল ? তাহার প্রত্যুত্তর এই যে, উল্লিখিত আত্মদ্বয় এক রজনীতেই এক জন থিয়েটার দেখিতে, অপর জন বেথুন সমাজের বক্তৃতা শুনিতে গমন করিল । বোধ কর, কনিষ্ঠ থিয়েটার দেখিতে বসিয়াছে, যথা সময়ে ‘গিরিজায়া’ আসিয়া রঙ্গ-ভূমে প্রবেশ করিল । তাহার কথা বার্তা শুনিয়া ও সুশ্রাব্য স্বর ও লয় সংযুক্ত সঙ্গীতে কনিষ্ঠের মন মুগ্ধ হইয়া উঠিল । সেই সময় হইতেই ঐ যুবকের ‘গাওনা বাজনা’ শিক্ষা করিতে প্রবৃত্তি জন্মিল । প্রাতে তাহার এক জন বন্ধুর সহিত

সঙ্গীত সম্বন্ধে তর্ক বিতর্ক উপস্থিত হওয়াতে, বন্ধু কহিল সঙ্গীতের ন্যায় বিদ্যা আর নাই, এই বিদ্যায় জগৎ মোহিত হয়। আমাদের লাট সাহেবকে কয় জনে চিনে? কিন্তু যত্ন ভট্ট প্রভৃতি গায়ককে না চিনে এমন লোকই নাই। বন্ধুর এই কয়েকটি কথা উক্ত যুবকের প্রবৃত্তি রূপ অনলে ঘূতাহুতি প্রায় হইল। সে সেই দিন বৈকালে এক জোড়া তবলা কিমিয়া আনিল। গুরুজনের তাড়নায় তাহাকে বিদ্যালয়ে বাইতে হইত বটে; কিন্তু মন প্রাণ সেই তবলার উপর পড়িয়া থাকিত। কখন বাটি যাইব, কখন তবলা বাজাইব, এইরূপে ‘গাওনা বাজনার’ প্রতি তাহার অত্যন্ত ঝোঁক হইল। সেই অনুরোধে অনেক নীচ লোকের সহিত তাহার আলাপ হইতে লাগিল। কারণ সেই যুবক যদি শুনে যে, অনুক লোক ভাল বাজাইতে পারে, তাহা হইলে, সে যে রূপ লোক হউক না কেন, তাহার নিকট কিছু না কিছু শিক্ষা পাইব, এই আশায় তাহার সহিত আলাপ করিতে বাধ্য হয়। সঙ্গীতের অনুরোধে নীচ ও লোভী লোকের সহিত সর্কাদা সহবাসে সে তাহাদের রীতি, নীতি ও প্রকৃতি শিক্ষা করিতে লাগিল। এ দিকে জ্যেষ্ঠ ভ্রাতা বেথুন সমাজে গিয়া দেখিলেন যে, এক জন যুবক ইংরাজী ভাষায় অনর্গল বক্তৃতা করিতেছেন। জিজ্ঞাসা করিয়া জানিলেন, তিনি এক জন প্রধান বিদ্বান্। বক্তার বক্তৃতা প্রণালী ও শ্রোতাগণের প্রশংসাবাদ শুনিয়া আমাদের যুবকের মন আর্দ্র হইল। সেই অবধি তাঁহার বিদ্যা শিক্ষার ঘোর প্রবৃত্তি জন্মিল। পর দিন প্রাতে ‘Blear’s Lecture’ নামক পুস্তক খানি ক্রয় করিয়া আনিলেন ও বিশেষ মনোযোগ

পূর্বেই সেই খানি ও অন্যান্য পুস্তক পাঠে অল্প দিবসের মধ্যেই এক জন কৃতবিদ্যা লোক হইয়া স্বচ্ছন্দে কালযাপন করিতে লাগিলেন । পাঠকগণ, প্রবৃত্তি ভেদে অবস্থার ক্রিপা ভারতম্য ঘটে, তাহা বিশেষ বিবেচনা করিয়া দেখুন । এক সময়েই উভয় ভ্রাতা ভিন্ন ভিন্ন স্থানে গমন করিয়া হৃদয় ক্ষেত্রে ভিন্ন ভিন্ন প্রবৃত্তির বীজ বপন করিয়া বাটী আসিলেন । সময় ও অবস্থা দুই জনেরই এক প্রকার ; কিন্তু কালে প্রবৃত্তির দোষ গুণে এক জন অবনত ও অপর জন উন্নত হইয়া পড়িলেন ।

মনুষ্য মাতেই প্রবৃত্তির দাস । প্রবৃত্তি দুই প্রকার । লোক বিগর্হিত এবং যুক্তি ও ন্যায় বহির্ভূত কার্যের অভিনাষকেই কুপ্রবৃত্তি কহে, আর ন্যায় যুক্তি ও ধর্ম সঙ্গত কার্যের ইচ্ছাকে সুপ্রবৃত্তি কহিয়া থাকে । একটি অন্যায় কার্য করিতে গেলে, কতদূর যে কষ্টভোগ করিতে হয়, তাহা বর্ণনাভীত । বোধ কর, এক জন মদ্যপায়ীকে তাহার এই কুপ্রবৃত্তি সাধনের জন্য সময়ে সময়ে কতদূর লাঞ্ছনা ও কষ্ট স্বীকার করিয়া অর্থ সঞ্চয় করিতে হয়, অসং কার্য করিয়া মধ্যে মধ্যে দণ্ড ভাজন হইতে হয়, লোক-লজ্জায় সর্বদা সঙ্কুচিত থাকিতে হয়, সময়ে সময়ে তাহার মনে কিছু মাত্র শান্তি থাকে না ; কিন্তু আশ্চর্য্যের বিষয় যে, সেই ক্রমিক আমোদের জন্য এতদূর লাঞ্ছনা ভোগেও তাহার চৈতন্যোদয় হয় না । সে যদি উক্ত কুপ্রবৃত্তি দমন করিতে পারে, তাহা হইলে, অনেক পরিমাণে শান্তিস্থখ লাভ করিতে পায় । এইরূপে মনুষ্য সময়ে সময়ে ভিন্ন ভিন্ন কুপ্রবৃত্তির বশবর্তী হইয়া নানা ক্লেশ ভোগ করে ও মনশ্চাক্ষল্য ঘটাইয়া থাকে । আবার দেখিতে পাওয়া যায় যে, কখন কখন মনুষ্য সুপ্রবৃত্তির বশবর্তী হইয়াও তাহার সেই

প্রবৃত্তি চরিতার্থ করিবার জন্য গর্হিতাচরণে প্রবৃত্ত হয়। যেমন কোন দয়ালু বালকের নিকট কোন দরিদ্র ব্যক্তি কিছু বাজ্রা করিল, তাহাতে ঐ বালকের উপকার করিবার ইচ্ছা মনোমধ্যে প্রবল হইয়া উঠিল; কিন্তু অর্থের অপ্রতুল বশতঃ সে মাতার বাকস হইতে টাকা চুরি করিয়া ঐ দরিদ্রকে দান করিল। এই সকল কারণে বোধ হয় যে, যে মনুষ্য প্রবৃত্তি উত্তেজিত হইলে, নিবৃত্তি করিবার ক্ষমতা ধারণ না করে, তাহার যে কোন রূপ প্রবৃত্তি মনোমধ্যে উদয় হইলে, তাহা সমাধা করিবার জন্য তাহার হিতাহিত জ্ঞান না থাকিতে, সময়ে সময়ে সে সম্পূর্ণ কষ্ট ভোগ করিয়া থাকে। আরও দেখিতে পাওয়া যায় যে, যে অবস্থায় মন শান্ত থাকে, সে সময়ে যদি প্রবৃত্তি সন্তোষের উপভোগ্য বিষয় কার্যগতিকে উপস্থিত হয়, তৎক্ষণাৎ আমাদিগের তদ্বিষয়ক প্রবৃত্তি উত্তেজিত হইয়া উঠে। যেমন কোন মনুষ্যের আহারে ইচ্ছা না থাকিলেও, তাহার প্রিয় আহার সামগ্রী সম্মুখে উপস্থিত করিলে, আর সে স্থস্থির থাকিতে পারে না, তখন তাহার বুভুক্ষা বৃত্তি উত্তেজিত হইয়া উঠে। এক্ষণে উপসংহার কালে এই মাত্র বক্তব্য যে, অর্থের স্বচ্ছলতা বশতঃ এবং সময় ও অবস্থাভেদে মনোমধ্যে নানা কুপ্রবৃত্তির আবির্ভাব হইয়া থাকে; কিন্তু কার্য কালে সেই প্রবৃত্তির নিবৃত্তি করিতে যেন শক্তির অভাব না হয়। কখন কুপ্রবৃত্তিকে প্রত্যাখ্যান দিও না, মনোমধ্যে কুপ্রবৃত্তির আবির্ভাব হইবা মাত্র তৎক্ষণাৎ তাহাকে দমন করিও। তাহা হইলে, অনেক পরিমাণেও শাস্তিস্থখ সন্তোষে অধিকারী হইতে পারিবে।

সুখ ও দুঃখ ।

—০০—

সুখ আর দুঃখ কাহাকে বলে, সৰ্বাগ্রে তাহার হেতুবাদ করিয়া তাহার পর, মূল প্রস্তাবে হস্তক্ষেপ করিব । মনের শান্তির নাম সুখ, কোন কালে কেহ এ কথার প্রতিবাদ করেন নাই । 'মন বিকৃত অবস্থায় থাকিলে, সমূহ দুঃখের কারণ হয়, ইহাও সত্য । তবেই মনের শান্তি ও মনের চঞ্চলতা সুখ দুঃখের মূল, সকলেই ইহা স্বীকার করিয়া আসিতেছেন ; কিন্তু অজ্ঞ ব্যক্তির আশ্রয় আপন মনের প্রকৃত অবস্থা অনুভব করিতে না পারিয়া অলীক আমোদ আহ্লাদকে সুখ বলিয়া বোধ করে । যেমন ভূষিত মৃগকুল মরীচিকাকে জলভ্রমে তাহার দিকে ধাবিত হয়, সেই রূপ অশিক্ষিত ব্যক্তির প্রকৃত সুখ বা দুঃখ কাহাকে বলে, তাহা সম্পূর্ণরূপে বুঝিতে না পারিয়া সুখী হইবার মানসে চরমে সমূহ দুঃখদায়ক এক প্রকার বিভ্রমের বশবর্তী হইয়া কষ্ট পাইতে থাকে । তাহার সুখী হইবার আশায় এই সংসার ক্ষেত্রে সৰ্বদা উন্মত্তের ন্যায় পরিভ্রমণ করিতেছে বটে ; কিন্তু মুহূর্তের জন্য প্রকৃত সুখ অনুভব করিতে পাইতেছে না । বিভ্রম বশতঃ দুঃখকে সুখ জ্ঞান করিলে, মনের শান্তি জন্মিবে কেন ? অর্থই যদি সকল সুখের হেতু হয়, তাহা হইলে, বিপুল ধনের অধীশ্বরেরা সচরাচর শান্তি ভোগ করিতে পান না কেন ? ধনবানেরা সুখের জন্যই অকাতরে অর্থ ব্যয় করিয়া থাকেন, তাহাতে আর সংশয় নাই ; তথাচ তাঁহাদিগকে মুহূর্তের জন্য প্রকৃত সুখী বলিয়া বোধ হয় না । কারণ সুখ ভোগের আশয়ে তাঁহারা যে সকল কার্যে প্রবৃত্ত

হইয়া অর্থ নাশ করেন, প্রায় তৎসমুদয়ই সময়ে সময়ে অসুখ প্রদান করে, ইহা জানিতে পারিয়াও বিভ্রম বশতঃ আবার সেই সকল কার্য্যে প্রবর্ত্ত হন । কোন ধনবান্ সুখের আশয়ে কল্য যে সকল কার্য্য করিয়া সমূহ সুখী হইতে না পারিয়া ভাবিয়াছিলেন, আর একপ কার্য্য করিয়া শরীর ও মনকে কষ্ট দিব না; কিন্তু প্রভাতে শরীর কিয়ৎ পরিমাণে প্রকৃতিস্থ হইলেই, আবার সেই ধনবান্ বিভ্রম বশতঃ সেই সকল কার্য্যের অনুষ্ঠানে প্রবৃত্ত হন । অজ্ঞানতা বশতঃ যাহারা সুখ দুঃখের তারতম্য বুঝিতে পারে না, তাহাদিগের নিকট সুখ দুঃখ উভয়ই সমান । গোলযোগ করিয়া কদর্য্য আনন্দ প্রমোদে দিবা রাত্রি অতিবাহিত করাই তাহাদের উদ্দেশ্য । তবেই মনের শান্তির নামসুখ ও মনঃপীড়ার নাম দুঃখ, ইহা সৰ্ব্বসাধারণকেই স্বীকার করিতে হইবে ।

মনের গ্লানি সমূহই একমাত্র দুঃখের কারণ । যখন কোন কারণ বশতঃ মনে গ্লানি উপস্থিত হয়, তখন প্রকাণ্ড সাম্রাজ্যের অধীশ্বরও সুখ অনুভব করিতে পারেন না ; তাঁহাকেও সৰ্ব্বতোভাবে অসুখী হইতে হয় । প্রথমতঃ দেখা যাউক, জাতি বিশেষের ধর্ম্মের কতকগুলি কঠোর সামাজিক নিয়ম সময়ে সময়ে মানবের আত্মগ্লানির হেতু হইয়া থাকে । এক সময়ে এতদ্দেশে সতীর সহমরণ একটি প্রধান ধর্ম্ম বলিয়া পরিগণিত ছিল । হিন্দু শাস্ত্রের প্রলোভন এইরূপ যে, যে সতী মৃত পতির সহিত হাশ্ব-বদনে চিতানলে দগ্ধ হন, তিনি পতির সহিত অনন্ত কাল স্বর্গসুখ ভোগ করেন । এই স্বর্গসুখের প্রত্যাশায় কত শত কুলকামিনী উন্মাদিনীর ন্যায় প্রজ্জ্বলিত চিতানলে আত্ম বিসর্জন দিয়াছেন । যে মরিল, সে সংসারের সকল জ্বালা হইতে নিস্তার পাইল, সে

বিষয়ের উপর এক্ষণে কিছু বক্তব্য নাই ; কিন্তু সহমরণের উদ্যোগটি কতদূর ভয়ঙ্কর এবং নৃশংস সেই ধর্ম্মাদিষ্ট কার্য্য-সাধনে লোককে কিরূপে অস্বখী হইতে হয়, এস্থলে তাহাই বর্ণনের প্রয়োজন ।

বোধ কর, একটি ত্রিংশ বর্ষীয় যুবকের মৃত্যু হইল । সেই উপযুক্ত পুত্রকে মৃত দেখিয়া তাহার পিতা, মাতা, ভ্রাতা, ভগ্নী ও অন্যান্য পরিজনেরা হাহাকার শব্দে রোদন করিয়া উঠিলেন । শোকের প্রথম তরঙ্গ সমুথিত হইতেছে, এমন সময়ে পরিজনেরা দেখিতে পাইলেন যে, সেই মৃত যুবকের বিংশতি বর্ষীয়া যুবতী ভাৰ্য্যা তাঁহার দুঃখপোষ্য ক্রোড়স্থ শিশুকে দূরে নিক্ষেপ করিয়া আত্মশাখা হস্তে করিয়া সীমন্তে সিন্ধুর দিয়া মৃত পতির শয্যায় উপবিষ্ট হইলেন । তাঁহাকে দৃষ্টি করিয়াই সমস্ত পরিবার কিছু ক্ষণের জন্য স্তম্ভিত হইয়া রহিলেন । পরে সতীর স্বশুর চক্ষের জল মুছিতে মুছিতে সৰুৰূপে কহিলেন—মা, তুমি আবার আমাদিগের ক্ষত শরীর লবণাক্ত করিবার উদ্যোগ করিতেছ কেন ? ক্ষান্ত হও । ঐ দেখ, তোমার শিশু সন্তান ধুলায় পড়িয়া কাঁদিতেছে । মা, আমার তাদৃশ লোকবল ও ধনবল নাই যে, এই ভয়ানক কার্য্য সমাধা করিয়া উঠিব । এই কথা শুনিয়া সতী প্রফুল্ল বদনে উত্তর করিলেন—পিতঃ ! আমাকে নিবারণ করিবেন না, তাহা হইলে, আমাকে গুরুবাক্য অবহেলন জনিত পাপ ভোগ করিতে হইবে । প্রসন্ন বদনে অনুমতি ককন, আমি পতির সহিত অনন্ত ধামে গমন করি । পতির মৃত্যু সংবাদ আমার কর্ণকূহরে প্রবিষ্ট মাত্রই, আমি ত মরিয়াছি । এক্ষণে আমার কায়া মাত্র লইয়া গিয়া পতির সহিত স্মরধূনী তটে দাহ ককন ।

আপনার কিছু মাত্র ভয় নাই, আমি বংশের মুখোজ্জ্বল করিয়া হস্ত বদনে পতির সহিত চিতানলে ভস্মীভূত হইব ।

অমূকের পুত্র মরিয়াছে, তাহার পুত্রবধু সহমৃত্যু হইবে, এই সংবাদ পল্লীতে প্রচার হওয়ায়, মৃত ব্যক্তির বাটীর সম্মুখে লোকারণ্য হইয়া পড়িল । যাঁহারা নিতান্ত আত্মীয়, তাঁহারা বিরস বদনে ক্রমে ক্রমে বাটীর অভ্যন্তরে প্রবেশ করিতে লাগিলেন । সমাগত নর নারীগণ মৃত ব্যক্তির পিতা মাতার অবস্থা দেখিয়া শোক করিতে লাগিলেন, তন্মধ্যে যাঁহারা দুই একবার সতীদাহের সাহায্য করিয়াছেন, তাঁহারা সদর্পে মৃত ব্যক্তির পিতাকে কহিলেন—মহাশয়, আপনি অত ভাবিবেন না, এ সকল বিধিকৃত কার্য্য; যাহা হইবার তাহা অবশ্যই হইবে, কেহই তাহার গতিরোধ করিতে পারিবেন না । এক্ষণে আপনার অনুমতি হইলেই, আমরা শব এবং সতীকে তীরস্থ করি, যে হেতু, এ সকল কার্য্য দুই চারি ঘণ্টায় সমাপ্ত হইবার নহে । মৃত ব্যক্তির পিতা অগত্যা সম্মতি দান করায় কয়েক জন বলবান্ যুবক হরিধ্বনি করিতে করিতে শবের সহিত সতীকে গঙ্গাতীরে আনিলেন । গঙ্গাতীর লোকারণ্য হইয়া গেল । সংবাদ পাইয়া স্থানীয় মাজিষ্ট্রেট ঘটনা স্থলে আসিয়া রীতি মত সতীর জবানবন্দী লইলেন এবং ব্যবস্থামত দাহ কার্য্যের আদেশ দিয়া প্রস্থান করিলেন । এদিকে শুষ্ক কাষ্ঠে একটি প্রশস্ত চিতা প্রস্তুত হইল । সতী গঙ্গাস্নান করিয়া অলঙ্কার পরিধান করিলেন, তাহার পর রক্ত পটবস্ত্র ও রক্তসূত্রে নির্মিত আভরণ, পুষ্পমালা এবং আলুলায়িত কেশে বিবিধ বর্ণের কৃত্রিম গুপ্প ও সীমন্তে উজ্জ্বল সিন্ধুর পরিধান করিয়া প্রথমতঃ সূর্য্য অর্ঘ্য দিলেন । তাহার পর, নিম্ন

লিখিত মন্ত্র পাঠ করিয়া স্বামীর সহিত চিতার উপর শয়ন করিলেন ।

“মৃত্যু ভর্তৃরি যা নারী সমারোহেদ্ধুতাশনং ।

সাক্ষ্যতী সমাচারী স্বর্গলোকে মহীয়তে ।”

পাঠকগণ, সতী চিতার উপর মৃত স্বামীর পার্শ্বে শয়ন করিলে পর, কতকগুলি লোক তিন গাছি মোটা দড়ি দিয়া শবের সহিত সতীকে দৃঢ় বন্ধন করিল । তাহার পর দুইটি প্রকাণ্ড প্রকাণ্ড কাঁচা বাঁশ শবের ও সতীর উপরে চাপাইয়া আট জন করিয়া ষোল জন বলবান্ যুবকে চিতার দুই পার্শ্বে চাপিয়া ধরিল । তৎপরে রীতিমত মুখাগ্নির পর চিতায় অনল সংলগ্ন করিয়া দিয়া সঙ্গে সঙ্গে মৃত সংযুক্ত পাট ও ধুনা চারি দিক হইতেই চিতার উপর অবিরত নিক্ষেপ করিতে লাগিল । সেই সময়ে ঢাক ঢোল এবং শঙ্খ ঘণ্টা ও উলু ধ্বনিতে ঘটনাস্থল প্রতিধ্বনিত হইয়া উঠিল । মুহূর্তের মধ্যেই সেই প্রজ্জ্বলিত হতাশনে সতীর প্রাণবায়ু বহির্গত হইল ।

এক্ষণে ব্রিটিশ গবর্ণমেন্টের আদেশে সতীদাহ উঠিয়া গিয়াছে । আর হিন্দু জাতিকে সময়ে সময়ে জ্বীহত্যায় উৎসাহ দান করিতে হয় না । সে যাহা হউক, এক্ষণে দেখিতে হইবে যে, এই ধর্ম-শাস্ত্রাদিষ্ট সহমরণ দ্বারা তৎকালের লোককে সময়ে সময়ে কতদূর অস্বস্তী হইতে হইত । কেবল এক কাল্পনিক স্বর্গ লাভের জন্য সেই স্বল্প বয়স্কা পরমা সুন্দরী স্ত্রীলোকটি ক্রোড়স্থ শিশু সন্তানকে পরিত্যাগ করিয়া স্বইচ্ছায় মৃত পতির সহিত চিতানলে ভস্মীভূত হইলেন । যদি পরকালে তাঁহার ঐ পতির সহিত কোটি কল্প স্বর্গভোগ হইয়া থাকে তবেই মঙ্গল, নতুবা শাস্ত্রকারেরা

তাঁহাকে কতদূর প্রভাবিত করিলেন, ভাবিতে গেলে, আমাদের যার পর নাই কষ্ট উপস্থিত হয়। কথিত স্ত্রীলোকটি প্রধানতঃ শাস্ত্রোক্ত একটি বচনের উপর বিশ্বাস করিয়া ইহ কালের সমস্ত সুখে জলাঞ্জলি দিয়া গেলেন। সেই যুবতী কি অল্প বয়সে মৃত ব্যক্তির সহিত চিতানলে দগ্ধ হইবার জন্য অবনীতে জন্ম গ্রহণ করিয়াছিলেন? না—এ কথা কখনই আমরা বিশ্বাস করিতে পারি না। পতিবিয়োগের পর তিনি যদি জীবিত থাকিতেন, তাহা হইলে, কেবল এক পতিসহবাস সুখ ব্যতিরেকে সাংসারিক অন্যান্য সুখে তাঁহার কখনই অভাব ঘটিত না। হয় ত, তাঁহার সেই ক্রোড়স্থ শিশু সন্তান কালে এক জন ভাগ্যবন্ত লোক হইয়া আপন গর্ভধারিণী জননীকে নানা সুখে সুখী করিত। সেই স্ত্রীলোকটি জীবিত থাকিলে, সন্তানটির রীতিমত লালন পালন হইত, শোকসন্তপ্ত শ্বশুর শাশুড়ীর বৃদ্ধাবস্থায় সেবা শুশ্রূষা করিতেন, নানা তীর্থ পরিভ্রমণ করিয়া নয়নের সার্থকতা সম্পাদন করিতেন, ক্ষুধার্তকে অন্ন জল এবং বস্ত্রবিহীনকে বস্ত্র দান করিয়া পরোপকার সাধন করিতেন, ক্রিয়া কার্যের সাহায্য করিয়া আত্মীয়বর্গের অনেকাংশে আনুকূল্য করিতে পারিতেন; কিন্তু শাস্ত্রের প্রলোভনে তিনি একেবারে স্বার্থপর হইয়া সমস্ত পরিবারের মায়া মমতা পরিত্যাগ করিলেন এবং শ্বশুর ও শাশুড়ীকে দুঃখের উপর দুঃখ দিয়া আপনি স্বর্গভোগ করিতে গেলেন। অথচ কি কথা, আপনার জনক জননী ও গর্ভজ সন্তানের প্রতিও দৃষ্টিপাত করিল না। তবেই এ কথা অবশ্য বলিতে হইবে যে, কেবল এক ধর্মের জন্যই স্ত্রীলোকটি অল্প বয়সে যার পর নাই যন্ত্রণা ভোগ করিয়া মৃত্যুমুখে নিপতিত হইলেন, তাঁহার শিশু সন্তানটি

এক কালে পিতৃমাতৃহীন হওয়ায়, মহাকষ্টে পিতামহী দ্বারা লালিত ও পালিত হইতে লাগিল। সতীর পিতা, মাতা, ভ্রাতা ও ভগিনীরা দীর্ঘ কাল শোকানলে দগ্ধ হইতে লাগিলেন। তাঁহার দ্বারা আত্মীয় স্বজনের যে ভাবী উপকারের সম্ভাবনা ছিল, তাহার কিছুই হইল না।

শাস্ত্রকারেরা এতদেশীয় নরনারীগণকে শাস্ত্র সম্মত কার্যের অনুষ্ঠানে প্রবৃত্ত করাইবার চেষ্টা পাইয়াছিলেন; কিন্তু তাঁহাদিগের মনঃকল্লিত শাস্ত্র সম্মত কঠিন নিয়মগুলি মনুজকুল প্রতিপালনে সক্ষম হইবে কি না, তাহা এক বারও ভাবিয়া দেখেন নাই। তাঁহারা একপ বিবেচনা করিয়াছিলেন যে, আমাদের প্রণীত ধর্মশাস্ত্রের সমুদয় নিয়ম চির কাল সমভাবে চলিয়া যাইবে। কালের পরিবর্তনে যে মনুষ্যের রীতি, নীতি, ব্যবহার ও প্রকৃতি সর্বতোভাবে পরিবর্তিত হইয়া যাইবে, ধর্মশাস্ত্রপ্রণেতাগণের এত দূর দূরদৃষ্টি ছিল না। যদি কোন জ্ঞীলোক বিধবা হইয়াই পুরাকালের কোন মুনি ঋষির আশ্রমে গিয়া অবস্থান করিতেন, তাহা হইলে, ঋষিগণের কঠোর ধর্মানুষ্ঠান দেখিয়া অনেকাংশে তাঁহার প্রকৃতির পরিবর্তন হইয়া যাইত। তিনি যখন যৌবনে বিধবা হইয়া বিলাস পরিপূরিত সংসারাত্মকে অবস্থান করিতে লাগিলেন এবং এক স্নেহের জন্ত সমাজের প্রায় সমস্ত লোকেরই ধর্মশাস্ত্র নিষিদ্ধ কার্যে প্রবৃত্ত হইতে প্রতিক্ষণ দেখিতে লাগিলেন, তখন কেবল এক ধর্ম ভয়ে তিনি কি প্রকারে আত্মশাসনে সক্ষম হইবেন? সমবয়স্ক আর দশ জন জ্ঞীলোককে স্বেচ্ছাচারে লিপ্ত হইতে দেখিয়া কথিত জ্ঞীলোকটি মনে মনে অবশ্য ভাবিতে লাগিলেন, এ কি,

আমার সমবয়স্কারা কেহই পর কালের ভয়ে ভীত নহে। এই কঠোর ব্রহ্মচর্য্য ব্রত কেহই প্রতিপালন করিতেছে না, তবে আমিই বা কি জন্য একপ কষ্ট স্বীকার করিব? দশ জনের দেখিয়া গুনিয়া তাঁহার পর কালের ভয় একেবারে তিরোহিত হইয়া গেল। হবিষ্যন্ন ভোজন ও কস্থল শয্যায় শয়নও ক্রমে ক্রমে পরিত্যাগ করিলেন। পূর্বে বিলাসের প্রতি কিছু মাত্র দৃষ্টি ছিল না; কিন্তু এক্ষণে অঙ্গ মার্জ্জন, কবরী বন্ধন ও উত্তম বসন পরিধান করিতে আরম্ভ করিলেন। সমবয়স্কাদিগের সহিত ক্রীড়া কৌতুক করিতে শিখিলেন। মন সর্ব্বতোভাবেই বিলাসী হইয়া উঠিল। কেবল গুরু জনের শাসনে ব্যতিচারে লিপ্ত হইতে কাল বিলম্ব হইতে লাগিল। যখন মনোবিকার প্রবল পরাক্রম প্রকাশ আরম্ভ করিল, দুর্দমনীয় ইন্দ্রিয় তাড়নায় শরীর জর্জরিত হইয়া উঠিল, তখন আর অগ্র পশ্চাৎ দৃষ্টি রহিল না; কেবল এক ইন্দ্রিয় চরিতার্থের জন্যই মন নিতান্ত অন্থখী হইয়া থাকিত। যে কার্য্যে যাহার অতিশয় ইচ্ছা জন্মে, সে তাহার সহজ উপায় আপনা আপনি করিয়া লইতে পারে। এই জন্য যুবতীকে অতি অল্প কালের মধ্যেই ব্যতিচারে লিপ্ত হইতে হইল; কিন্তু পাপপঙ্কে পতিত হওয়াতে মনের শান্তি ভঙ্গ হইয়া গেল। যে গর্হিত কার্য্যকে পূর্বে পরম সুখ বলিয়া বোধ হইয়াছিল, এক্ষণে সেই কার্য্যে প্রবৃত্ত হইয়া যুবতীকে সর্ব্বদা শঙ্কিতাবস্থায় কাল হরণ করিতে হইল। যদি কেহ সঙ্কোপনে দুই চারিটি কথা কহিয়া হাস্ত করিত, তদ্ব্যতীত যুবতীর মনে হইত, ইহারা আমার দুষ্চরিত্রের কথা জানিতে পারিয়াছে; এই বাবে সর্ব্বনাশ হইল। একটা সামান্য কথায় ।

বলিয়া থাকে, পাপ কার্য্য কখনই দীর্ঘ কাল গোপন থাকিবার নহে। অতি অল্প কালের মধ্যেই যুবতীর দুষ্চরিত্রের কথা পরিবারের মধ্যে সকলেই জানিতে পারিলেন। ক্রমে বাটীর কিস্কর কিস্করীরাও জানিল, তাহাদিগের প্রমুখাৎ ছুই এক জন প্রতিবেশীও শুনিল। বাটীর পরিজনেরা যুবতীর সেই পাপ প্রবৃত্তির নিবৃত্তির অনেক উপায় উদ্ভাবন করিতে আরম্ভ করিলেন। জননী ভাবিলেন, সর্ব্ব ক্ষণ কন্ঠাটিকে আমার চক্ষের উপর রাখিব, রজনীতে নিকটে শোয়াইব, তাহা হইলে, আর ব্যভিচারে লিপ্ত হইবার অবসর প্রাপ্ত হইবে না। তিনি যেকূপ চিন্তা করিলেন, সেই কূপ কার্য্যও হইতে লাগিল ; কিন্তু যেমন বালির বাঁধে নদীর প্রবল তরঙ্গ আটকইয়া রাখিতে পারা যায় না, তেমনি ইন্দ্রিয় স্খানুরক্ত ব্যক্তিকে লৌহগৃহে আবদ্ধ করিয়া রাখিলেও ফল দর্শে না। যুবতীর জনক জননী কিছু কাল সচুপদেশ দিলেন, ভবিষ্যতের ভয় দেখাইলেন, তাহাতেও প্রবৃত্তির নিবৃত্তি হইল না ; বরং পূর্বা-পেক্ষা বর্দ্ধিত হইয়া উঠিল। অবশেষে পরিবার সকলে একত্র হইয়া যুবতীকে গঞ্জনা দিতে ও উৎপীড়ন করিতে প্রবৃত্ত হইলেন। কেহ বলিলেন, উহার মস্তক মুণ্ডন করিয়া দাও, কেহ বলিলেন, উহাকে একটা ঘরের ভিতর ঢাবি বন্ধ করিয়া রাখ ; যথা কালে এক মুষ্টি অন্ন দিবে এই মাত্র। ভ্রাতারা কহিলেন, না না, উহার শিরশ্ছেদন করিয়া নদীর জলে ভাসাইয়া দিব ; তাহা হইলে, সমস্ত আপদ চুকিয়া যাইবে। যুবতীর প্রতি দিন ঈর্ষানী এই কূপ সকলেই উৎপীড়ন আরম্ভ করিলেন। যুবতীকে ভয় প্রযুক্ত কিছু দিন তাহা সহ্য করিয়াও

গৃহে থাকিতে হইয়াছিল ; কিন্তু যখন পরিবারদিগের লাঞ্ছনা অসহ্য হইয়া উঠিল, তখন অগত্যা যুবতীকে এক দিকে পলাইতে হইল । অমুকের কন্যা কি অমুকের ভগিনী কুলটা হইয়া গৃহ পরিত্যাগ করিয়াছে, এই কথা পল্লী মধ্যে প্রচার হওয়াতে খলস্বভাব জ্ঞাতিগণ এবং দলপতিরা সেই যুবতীর পিতাকে ও ভ্রাতৃগণকে একেবারে পাইয়া বসিল । আর উহার বাটীতে অন্ন জল গ্রহণ করিব না, উহাদিগের সহিত আর কোন সংস্রব রাখিব না, সকলে এক বাক্য হইয়া এই রূপ আশ্বালন আরম্ভ করিল । যুবতীর নিরপরাধ পিতার ও ভ্রাতৃগণের এবং শ্বশুর কুলের একেবারে সৰ্বনাশ উপস্থিত হইল । সমাজের তাড়নায় আর তাঁহারা মুখ তুলিয়া কথা কহিতে পারেন না ; তন্ময় অপেক্ষাও তাঁহাদিগের অবস্থা শোচনীয় হইয়া উঠিল ।

পাঠকগণ, এই স্থলে আপনারা বিবেচনা করিয়া দেখুন, কুলটা যুবতীর পিতৃকুলের এবং শ্বশুরকুলের ন্যূনাধিক পঞ্চাশ জন নর নারী সমাজ ও ধর্ম্মের নিকট কি অপরাধ করিয়াছেন যে, তাঁহারা সকলেই সম অংশে এই অস্বথ ভোগ করিতে লাগিলেন ? ইহা কি তাঁহাদিগের দোষ, না সমাজ ও ধর্ম্মের দোষ ? হয় ত যুবতীর উভয় কুলের নরনারীগণ কস্মিন্ কালে সমাজ বিকদ্ধ কোন কার্য্য করেন নাই, তথাচ তাঁহারা ঐরূপ অস্বথ ভোগ করিতে লাগিলেন কেন ? এ প্রশ্নের কে সন্তুস্তর প্রদান করিবে ? বোধ হয়, কেহই ইহার প্রকৃত উত্তর দানে সক্ষম হইবে না । তবে যাহারা নিতান্ত সদাশয়, ন্যায়পরায়ণ ও যুক্তিসঙ্গত কথা কহিতে শিখিয়াছেন, তাঁহারা অবশ্যই এই কথা

বলিবেন যে, এই পঞ্চাশ জন নরনারীকে অসুখী করিবার প্রধান হেতু, আমাদিগের প্রচলিত ধর্ম ও সমাজ। যদি আবহমান কাল ধর্মশাস্ত্র সম্মত বিধবা বিবাহ প্রচলিত থাকিত, তাহা হইলে, কথিত যুবতী একপ ব্যভিচার দোষে লিপ্ত হইত না। যদি সমাজের ভয়ে পরিজনবর্গ উক্ত যুবতীর প্রতি উৎপীড়ন আরম্ভ না করিতেন, তাহা হইলে, সেই কামিনী কখনই পিতৃকুল ও শ্বশুরকূলে জলাঞ্জলি দিয়া সংসার ত্যাগ করিত না। পতিহীন যুবতীগণ কন্দর্প শরে আহত হইয়া যখন ব্যভিচারে প্রবৃত্ত হয়, তখন তাহাদিগের হিতাহিত জ্ঞান থাকে না; তাহার পর আত্মীয় স্বজনেরা ধর্ম ও সমাজের অনুরোধে উৎপীড়ন আরম্ভ করাতে তাহা অসহ্য বোধে কেহ বা কুলত্যাগ করে, কেহ বা আত্মঘাতিনী হয়।

উপরোক্ত কারণ বশতঃ অসম্মদেশে বহু সংখ্যক জারজ পুত্র কন্যা উৎপন্ন হইতেছে। ঐ সকল পুত্র কন্যার মধ্যে যদি কেহ সর্কতোভাবে সুশীল ও শান্ত হয় এবং নানা গুণে গুণবান হইয়া উঠে; তথাপি তাহারা ধর্ম ও সমাজ বহির্ভূত বলিয়া সমাজে স্থান প্রাপ্ত হয় না। এই জন্য তাহাদিগের সকল সুখ সত্ত্বেও আত্মগ্লানি ভোগ করিতে হয়। যদি তাহারা সমাজে প্রবেশ করিতে পাইত, তাহা হইলে, হয়ত কেহ কেহ আপনাদিগের অসাধারণ বুদ্ধি বলে সমাজের বিস্তর উপকার করিত। একটি বিধবা স্ত্রীলোকের জন্য যখন এত দূর অনিষ্ট ঘটিতেছে, তখন সে অনিষ্ট নিবারণের চেষ্টা দেখা উচিত। পূর্বে প্রতিপন্ন হইয়াছে যে, একটি বিধবা স্ত্রীলোকের জন্য তাহার পিতা, মাতা, আত্মীয়, বান্ধব প্রভৃতি ন্যূনাত্মক পঞ্চাশ

ব্যক্তির ঘোর মনঃপীড়া উপস্থিত হইল। সেই কপ শত শত বিধবা রমণীর জন্ত কত শত লোক মনঃপীড়া জনিত অসুখ ভোগ করে, তাহা সহজেই উপলব্ধি করিতে পারা যায়। এতদ্ভিন্ন ধর্ম ও সমাজের দোষে আমাদেরকে আরও কত দূর অসুখী হইতে হয়, তাহা সংক্ষেপে বর্ণন করিতেছি।—

সমাজ সাধারণ লোকের ক্ষমতার প্রতি দৃষ্টি রাখে না। যদি কেহ উপযুক্ত সময়ে অর্থের অনটন জন্ত আপন কন্যার বিবাহ দিতে না পারিলেন, তাহা হইলে, তিনি ধর্মে পতিত ও সমাজের নিকট নিন্দনীয় হইবেন। যেমন কোন সম্ভ্রান্ত ব্যক্তি দুইটি পুত্র রাখিয়া লোকান্তরিত হইলে, পুত্রদ্বয়কে দায়গ্রস্ত হইয়াও ধর্মতঃ ও লোকতঃ আদ্বাদি কার্যগুলি সমাধা করিতে হইবে। অনেকে বলিতে পারেন যে, পিতা মাতার আদ্বের ব্যয় সম্বন্ধে শাস্ত্রে কোন কঠোর নিয়ম লিখিত হয় নাই; ভিল কাঞ্চন, তদনুকুলে অরণ্যে রোদনও শাস্ত্রে ব্যবস্থা আছে। এ কথা সত্য; কিন্তু সমাজের অনুরোধে সে সূগম পথে কেহই বিচরণ করেন না। পিতৃ মাতৃ দায়ের জন্ত লোকের দ্বারে দ্বারে ভিক্ষা করিয়া বেড়াইলেও, জন সমাজে নিন্দনীয় হইতে হয় না; কিন্তু ব্যয় বাহ্য্য করিয়া আদ্ব না করিলে, সমাজে আর নিন্দার পরিসীমা থাকে না। এই কপ যেখানে আমাদের ধর্মের বন্ধন কিঞ্চিৎ শিথিল আছে, সে স্থলে সমাজের বন্ধন কঠিন রূপে ব্যবহৃত হয়।

ধর্ম সম্বন্ধে উপরে যে কয়েকটি কথার উল্লেখ করা গেল, তৎ পাঠে পাঠকগণ যেন একপ বিবেচনা না করেন যে, আমরা প্রকৃত ধর্মের উপর দোষারোপ করিতেছি। সত্য ধর্মই আমাদের এক

মাত্র সুখের সোপান ও উন্নতির কারণ। যে ধর্ম সকল কালে, সকল দেশে, সর্ব সম্প্রদায়ের মধ্যে সম ভাবে চলিয়া আসিতেছে, তাহাকেই যথার্থ ধর্ম বলা যায়। হিংসা ঘৃণা পরিত্যাগ করিবে, সত্য কথা কাঁহবে, পরোপকার করিবে, ব্যভিচারে বিরত হইবে ও সর্বতোভাবে ঈশ্বরপরায়ণ হইবে, ইহাকেই সাধারণ সত্য ধর্ম বলা যায়। সর্ব সাধারণ লোকে যদি সর্বাস্তঃকরণের সহিত উক্ত কয়েকটি নিয়ম প্রতিপালন করেন, তাহা হইলে, অনেক পরিমাণেও সাধারণে সুখী হইতে পারেন ও সামাজিক সঙ্কীর্ণ ধর্ম প্রতিপালনের প্রয়োজন নাই বলিলেও বলিতে পারা যায়। বিশেষ বিবেচনা করিয়া দেখিলে, বোধ হইবে যে, প্রকৃত ধর্ম ভুলিয়া গিয়া সামাজিক ধর্ম প্রতিপালনে প্রায় অধিকাংশ লোকে ব্যতিব্যস্ত হইয়া উঠিয়াছে। এখানে আমাদের কয়েক পঙ্তি পদ্য মনে পড়িয়া গেল;—

“সংসারের মধ্যে দেখ ধর্মই প্রধান,
সর্ব কালে এ ধর্মের আদর সমান ;
সত্য কি অসত্য জাতি পৃথিবী নিবাসী,
ধর্মামৃত পান জন্য সবে অভিলাষী ;
কিন্তু এ ধর্মের কেহ মূল নাহি ধরে,
ব্যবহারে শ্রেষ্ঠ করি ভ্রান্তি পথে চরে।”

এক সামাজিক ধর্ম প্রতিপালন করিতে গিয়া আমরা সময়ে সময়ে ছুরপনের দুর্দশা ভোগ করিতেছি। কেবল আমাদের দেশেই কেন, এক এক বার ধর্ম বিপ্লবের সময়ে ইউরোপ খণ্ডের এক একটি দেশ একেবারে ছার খার হইয়া গিয়াছে। পাঠক-গণের অবদিত নাই, আসিয়িক তুরস্কের সিরিয়া প্রদেশের

অন্তর্গত প্যালেষ্টাইনকে ইউরোপীয়েরা (Holy Land) পুণ্য ভূমি कहিয়া থাকেন ; কারণ ঐ স্থানে খ্রীষ্ট জন্ম গ্রহণ করিয়া ধর্ম প্রচার করিয়াছিলেন। কালে সেই সকল স্থান বিধর্মীদিগের হস্তগত হয়, উক্ত পুণ্য ভূমি বিধর্মীদিগের হস্ত হইতে উদ্ধার করিবার জন্য খ্রীষ্টধর্মাবলম্বীরা বহু কাল কায়মনে চেষ্টা করিয়াছিলেন। বিধর্মীদিগের সহিত খ্রীষ্টমতাবলম্বীদিগের সংগ্রামকে ইউরোপীয় ইতিহাস লেখকেরা (Crusade) ধর্ম যুদ্ধ বলিয়া উল্লেখ করিয়াছেন। তৎকালের খ্রীষ্টধর্মাবলম্বীদিগের এই রূপ দৃঢ় বিশ্বাস ছিল যে, উক্ত ধর্ম যুদ্ধে যাঁহারা শত্রু কর্তৃক নিহত হইবেন, তাঁহাদিগের আর কোন কালে নরক যন্ত্রণা ভোগ করিতে হইবে না। এই কাল্পনিক স্বর্গ লাভের প্রত্যাশায় ইউরোপের অধিকাংশ লোক পুণ্য ক্ষেত্রের উদ্ধারের জন্য বৎসর বৎসর যুদ্ধ করিয়া সমরশায়ী হইত। সেই কারণে কিছু কাল ইউরোপ খণ্ড বিধবায় ও পিতৃহীন বালকে পরিপূর্ণ হইয়া গিয়াছিল। তাহারা উদরের জন্য লোকের দ্বারে দ্বারে লালায়িত হইয়া বেড়াইত। যদি সামাজিক সঙ্কীর্ণ ধর্মের এই ফল হয়, তাহা হইলে, আমরা সেই ধর্মকে কেমন করিয়া সত্য ধর্ম বলিব ? খ্রীষ্টধর্মের প্রচার উপক্রমে রোমীয় সম্রাটেরা ধর্মপ্রচারকগণের উপর কি অত্যাচার না করিয়াছেন ? কেবল এক কাল্পনিক ধর্মের জন্য কত শত লোক প্রজ্জ্বলিত হুতাশনে আত্মবিসর্জন করিয়াছে। মার্টিন লুথর যখন পোপের ক্ষমতা খর্ব করিতে গিয়াছিলেন, সে সময়ে ধর্ম বিপ্লবে ইউরোপের কি দুর্দশা ঘটিয়াছিল, তাহা বর্ণন করিতেও হৃদয় কাঁদিয়া উঠে।

মহাপ্রভু চৈতন্য দেব যে হুতন ধর্ম বাজন করিয়া গিয়া-

ছেন, ডংকালে হউক বা না হউক, এক্ষণে তাহার বিষময় ফল ফলিতেছে । বৈষ্ণব সম্প্রদায়ীরা কেবল এক হরি নামের দোহাই দিয়া ভিক্ষা করত আপনাদিগের জীবিকা নির্বাহের চেষ্টা করে; কিন্তু কাল প্রভাবে তাহাদিগের উপার্জনের পথে অনেক প্রতিবন্ধক ঘটিয়াছে । এই জন্য যে সকল বৈষ্ণবেরা স্ত্রীপুত্র লইয়া গৃহস্থের ন্যায় কাল হরণ করে, তাহাদিগের দুর্দশার অবধি নাই । অনশনে প্রাণ পরিত্যাগ করিবে, তাহাও স্বীকার, তথাচ ধর্মের অনুরোধে ব্যবসায়ান্তর গ্রহণ করিবে না । যে সকল বৈষ্ণবেরা গৃহস্থাশ্রমে বাস করে না, কেবল ভিক্ষার উপর নির্ভর করিয়া দিন পাত করে, এক এক দিন তাহাদিগকে আহারাভাবে উপবাসী থাকিতে হয় । মথুরা ও হৃন্দাবনের চতুঃপার্শ্বে অনেক বৈষ্ণবের আখড়া আছে । তাহারা কেবল আকাশ বৃত্তির উপর নির্ভর করিয়া আলস্যে কাল হরণ করে, ইহা আমরা স্বচক্ষে দেখিয়াছি । তাহাদিগের দ্বারা সংসারের কি সমাজের কোন উপকারই নাই ; তথাচ তাহারা গৃহস্থগণের এক প্রকার গলগ্রহ হইয়া উঠিয়াছে । ধর্মের দোহাই দিয়া দ্বারে দাঁড়াইলে, লোকে তাহাদিগকে একেবারে বঞ্চিত না করিয়া মুষ্টি ভিক্ষা দিয়াও বিদায় করিয়া থাকে ।

সামাজিক সঙ্কীর্ণ ধর্মের দ্বারা সংসারের লোকের কত দূর কষ্ট ভোগ করিতে হয়, তাহা সংক্ষেপে বর্ণন করিতে গিয়াও প্রস্তাব বাহুল্য হইয়া পড়িল । সঙ্কীর্ণ ধর্মের অন্যান্য অঙ্গ প্রত্যঙ্গের বিষয় বিস্তারে বর্ণন করিতে গেলে, এক খানি স্বতন্ত্র পুস্তক লিখিতে হয় ; সেই জন্য তৎসমুদয় এ স্থলে বিবৃত করিতে পারিলাম না । তবে এ কথা পাঠকগণকে অবশ্য স্বীকার করিতে

হইবে যে, সামাজিক সঙ্কীর্ণ ধর্মের অনুরোধে আমাদিগকে অনেক সময়ে প্রকৃত ধর্ম পরিত্যাগ করিয়া অভ্যন্ত দুঃখ ভোগ করিতে হয়। এই কথাই যিনি যত প্রতিবাদ করুন না কেন, বিশেষ বিবেচনা করিয়া অভ্যন্তরে তীক্ষ্ণ দৃষ্টি পাত করিলেই দেখিতে পাইবেন যে, সামাজিক সঙ্কীর্ণ ধর্ম কাহারও মন নির্মল করিতে পারে নাই; কেবল বাহ্য আড়ম্বরেই পরিপূর্ণ হইয়া উঠিয়াছে। সকল দেশেই শাস্ত্রোক্ত ধর্মের মর্যাদা রক্ষা হইতেছে না; কারণ সে মর্যাদা রক্ষা করা রিপুপ্লবতন্ত্র মনুজকুলের অসাধ্য। শাস্ত্রকারেরা মনুষ্যের ক্ষমতা বিবেচনা না করিয়া যে সকল কঠোর নিয়ম পালনের আদেশ করিয়া গিয়াছেন, সেই সকল নিয়মই আমাদিগকে সময়ে সময়ে সর্বতোভাবে অস্বীকার করিয়া তুলে।

পৃথক্ পৃথক্ ধর্ম হইতেই পৃথক্ পৃথক্ জাতির সামাজিক নিয়ম চলিত হইয়া থাকে। উক্ত সামাজিক নিয়ম সকলও সময়ে সময়ে আমাদিগের সমূহ অস্বস্তির কারণ হইয়া উঠে। স্বাভাবিক নিয়ম প্রতিপালনে আমাদিগকে কার্য গতিকে বাধ্য হইতে হয়; কিন্তু সামাজিক নিয়ম সেক্ষেপ নহে। আমরা সে সকল নিয়ম প্রতিপালন না করিলে, সাক্ষাৎ সম্মুখে কোন কষ্ট অনুভব করি না বলিয়া তৎ প্রতিপালনে বিশেষ চেষ্টিত হই না। স্বাভাবিক নিয়মের ফল প্রত্যক্ষ দেখিতে পাইতেছি, এই জন্য বাধ্য হইয়া তৎসমুদয় প্রতিপালন করিতে হয়। অধিক হিম লাগিলে, আমাদিগের স্বাস্থ্য ভঙ্গ হয়, এটি স্বাভাবিক নিয়ম। যদি আমরা দুই এক বার কোন কারণ বশতঃ সে নিয়মের প্রতি দৃষ্টি না রাখিয়া ছরস্ত পৌষ মাসের শীতে সমস্ত রজনী পথে পথে ভ্রমণ

করিয়া বেড়াইছি তাহা হইলে, পর দিন প্রত্যুষেই তাহার ফল ভোগ করিবই করিব। হয় ত জ্বর রোগে আক্রান্ত হইয়া এক পক্ষের অধিক কাল শয্যাশায়ী থাকিব, না হয়, কফ ও কাশীতে সর্ব শরীর ব্যথিত হইয়া যার পর নাই কষ্ট দিতে থাকিবে। অনিয়মিত কার্য্য করিয়া তাহার এই ফল ভোগ করিতেছি, পীড়ার সময়ে মনে মনে তাহা বিলক্ষণ অনুভব হইবে। হয় ত সেই সময়ে মনে মনে দৃঢ় সঙ্কল্প করিয়া রাখিব যে, আর হিম ভোগ করিয়া বেড়াইব না, তাহা হইলে, পুনর্বার এই রূপ কষ্ট ভোগ করিতে হইবে না। পক্ষান্তরে সামাজিক নিয়ম আছে যে, যদি আমি আমার প্রিয় পুত্রকে বিদ্যা শিখাইবার জন্য ইংলণ্ডে পাঠাইয়া দি, তথায় কৃতবিদ্য হইয়া পুত্রটি স্বদেশে প্রত্যাবর্ত্তিত হয়, তাহা হইলে, সমাজের ভয়ে আমি তাহাকে সহসা গ্রহণ করিতে পারিব না। যে হেতু, আমার পুত্রটি স্নেচ্ছান্ন ভোজনে বাধ্য হইয়াছিল। সমাজ নিষিদ্ধ অর্ণবখানে আরোহণ করিয়া সমুদ্র পথে গমন করিয়াছিল, এই অপরাধে সেই সদাশয় ও কৃতবিদ্য পুত্রকে ধর্ম্ম ও সমাজের অনুরোধে পরিত্যাগ করিতে হইবে। ইহার অন্যথাচরণ করিলে, কুটুম্ব বান্ধবেরা আমার গৃহে অন্ন জল গ্রহণ করিবেন না। যদি সমাজকে অগ্রাহ্য করিয়া আমি সেই পুত্রটিকে গৃহে আনয়ন করি, তাহা হইলে, চির কালের জন্য আমাকে পতিত হইয়া থাকিতে হইবে। কন্যা পুত্রের বিবাহ দিতে পারিব না, অন্য কথা কি, সমাজে গিয়া কুটুম্ব বান্ধবের সহিত একাসনে উপবিষ্টও হইতে পারিব না। আমার পুত্র বিলাতে গিয়া স্নেচ্ছান্ন ভোজন করিয়াছে বলিয়া ভবিষ্যতে আমার বংশে যাঁহারা জন্ম গ্রহণ করিবেন, তাঁহাদিগকেও পতিত হইয়া থাকিতে হইবে। যাঁহারা

এইরূপ উভয় সঙ্কটে পতিত হন, পাঠকগণ, বিবেচনা করিয়া দেখুন, এক সমাজের অনুরোধে তাঁহাদিগকে কত দূর মনঃপীড়া ভোগ করিতে হয়।

আমাদের আর একটি সামাজিক নিয়ম আছে যে, যিনি যেকোন মর্যাদাবান্ হইবেন, তিনি সেই রূপ গৃহে কন্যা পুত্রের বিবাহ দিবেন। ইহার অন্যথা হইলেই, সমাজের লোক তাঁহার উপর খড়্গহস্ত হইয়া উঠিবেন। বোধ কর, কেহ যদি একটি নীচ কুলোদ্ভব পাত্রকে সর্কগুণান্বিত দেখিয়া আপনার কন্যার সহিত বিবাহ দিবার মনন করেন, তাহা হইলে, সেই প্রস্তাব কুটুম্ব বান্ধবদিগের নিকট উপস্থিত করিলে, তাঁহারা আর কোন দিকে দৃষ্টি করিবেন না, কেবল এক বংশ মর্যাদার উপর কটাক্ষ করিয়া বলিবেন, এ কার্য্য তুমি কি প্রকারে করিতে সাহস করিতেছ? তোমার ন্যায় উচ্চ বংশাবতংস ব্যক্তির কন্যা ঐরূপ নীচ বংশে কখনই পড়িতে পারে না। এরূপ কার্য্য করিলে, যে কেবল আপনার মর্যাদার হানি হইবে এরূপ নহে, আপনার সমকক্ষ ব্যক্তির আঁর আপনার সহিত আহার ব্যবহার রাখিবে না। অমুক ব্যক্তির জ্যেষ্ঠ পুত্রের সহিত আপনার কন্যার পরিণয় কার্য্য সম্পন্ন করুন, যদিও ছেলেটির তাদৃশ বিদ্যা বুদ্ধি নাই, কিন্তু সে বিষয়ের দিকে দৃষ্টি রাখিলে চলিবে না; কারণ সে কত বড় লোকের পোত্র এক বার বিবেচনা করিয়া দেখুন। সেটিকে জামাতা করিতে পারিলে, আপনার বংশ উজ্জ্বল হইয়া উঠিবে। পূর্ক কথিত ব্যক্তি কেবল এক সমাজের অনুরোধে নিজ মনোনীত পাত্রে কন্যাদান করিতে পারিলেন না; শুদ্ধ এক বংশ মর্যাদার দিকে দৃষ্টি পাত করিয়া

অপাত্রে কন্ঠাটি ন্যস্ত করিলেন । কালে সেই জামাতাটি যার পর নাই অত্যাচারী হইয়া উঠিল । দুর্ল্লভ বশতঃ আপন বিষয় বিভব নষ্ট করিতে লাগিল । যে কন্ঠাটিকে বিবাহ করিয়াছিল, এক দিনের জন্মও সে সুখী হইল না । একপ স্থলে সেই কন্ঠার পিতাকে কত দূর অসুখী হইতে হইল, তাহা অনায়াসে সকলেই উপলব্ধি করিতে পারেন । পূর্বে বলা হইয়াছে যে, যেমন একের দোষে একটি বংশ চির কালের জন্ম কলঙ্কিত হইয়া থাকে, সেই বংশে মহানুভব ব্যক্তি জন্ম গ্রহণ করিলেও সমাজে সম্মান প্রাপ্ত হন না, সেইরূপ একের মর্যাদায় একটি বংশ মর্যাদাবান হইয়া উঠে । তাহাদিগের ধন না থাকুক, বিদ্যা না থাকুক ও তাহারা যথোচিত অত্যাচারী হয়, ইউক, তথাচ তাহাদিগের পূর্ক মর্যাদা খর্ব্ব হইবে না ; নরাদমকে মান্য করিয়া উচ্চ আসন ও উচ্চ সম্মান প্রদান করিতে হইবে । এই সামাজিক নিয়মটি যে কত দূর আমাদের মনঃপীড়ার কারণ হইয়াছে ; তাহা সবিশেষ বর্ণন করিতে গেলে, প্রস্তাব বাহুল্য হইয়া উঠিবে, এই জন্ম সংক্ষেপে বর্ণন করিতে বাধ্য হইলাম ।

এ দেশে দীক্ষা গুরুর প্রথা বহু কালাবধি প্রচলিত আছে । শাস্ত্রকারেরা কহিয়াছেন—

“ অখণ্ডমণ্ডলাকারং ব্যাপ্তং যেন চরাচরম্ ।

তৎপদং দর্শিতং যেন তস্মৈ ত্রীগুরবে নমঃ ॥

অজ্ঞানতিমিরাক্ষয় জ্ঞানাজনশলাকয়া ।

চক্ষুকন্মালিতং যেন তস্মৈ ত্রীগুরবে নমঃ ॥ ”

যাঁহার এই রূপ ক্ষমতা আছে, তিনিই দীক্ষা গুরুর উপযুক্ত পাত্র । পূর্বে ঐ রূপ ক্ষমতাবান লোকেরাই শিষ্যগণকে

ইষ্ট মন্ত্র প্রদান করিতেন । শিষ্যেরা গুরু দক্ষিণা যাহা প্রদান করিত, তাঁহারা সন্তুষ্ট হইয়া তাহাই গ্রহণ করিতেন । এক্ষণে সেই সকল মহাবংশে যাহারা জন্ম গ্রহণ করিয়াছেন, তাঁহাদের মধ্যে অনেকে প্রণব উচ্চারণ করিতে জানেন না । যখন তাঁহারা কৃতবিদ্যা শিষ্যগণকে মন্ত্র প্রদান করিতে বসেন, তখন পদে পদে তাঁহাদিগকে হাস্ত্যাম্পদ হইতে হয় । সামাজিক নিয়মানুসারে গুরু ত্যাগ করিতে নাই । যিনি যে বংশের শিষ্য, তাঁহাকে সেই বংশ সম্বৃত্ত এক জন নরাধমের নিকটেও মন্ত্র গ্রহণ করিতে হইবে । ইষ্ট দেব জ্ঞানে সময়ে সময়ে পিশাচ প্রকৃতি নরাধমগণকেও অনেকে অন্তঃপুর প্রবেশ কালে নিষেধ করিতে পারেন না ; তজ্জন্ম এক এক সময়ে সেই সকল অশিক্ষিত দাস্তিক লোক দ্বারা কোন কোন পরিবারের ঘোর অনিষ্টোৎপাদন হইয়া থাকে । যদিও এক্ষণে শিক্ষিত সমাজের মধ্যে তাহাদের আর পূর্বের ন্যায় একাধিপত্য চলে না ; কিন্তু দূরস্থ পল্লীগ্রামের অজ্ঞ লোক আজ কালও দীক্ষা গুরুকে অত্যন্ত ভয় করে । কোন পল্লীর প্রান্ত ভাগে গোস্বামী প্রভুদিগের রামশিঙ্গার ধ্বনি উঠিলে, গ্রামস্থ লোক পলায়ন করিতে আরম্ভ করে, কেহ কেহ বা গৃহদ্বার বন্ধ করিয়া রাখে ; যে হেতু, গুরু আসিয়া বার্ষিক আদায়ের জন্য শিষ্যগণকে বর্ণনাভীত উৎপীড়ন করেন । পূর্বে ভূস্বামিগণ রাজস্ব আদায়ের জন্য প্রজাপুঞ্জকে যেকোন উৎপীড়ন করিতেন, পূর্ব ও দক্ষিণ অঞ্চলে দীক্ষা গুরুর উৎপীড়ন তাহা অপেক্ষা কোন অংশে হ্রাস নহে । প্রভুরা মনোমত দক্ষিণা না পাইলে, যাহাদিগকে পতিত করিয়া রাখেন, সমাজের লোক আর তাহাদের বাটীতে অন্ন জল গ্রহণ করে না । এই

ভয়েই বহু সংখ্যক নিঃস্ব লোক গুরু প্রণামীর জন্য দায়গ্রস্ত হইয়া পড়ে। তাহাদিগের অর্থাগমের কোন উপায় নাই, অথচ মর্যাদার ভয়ে গুরু প্রণামী আনিয়া উপস্থিত করিতে হইবে, তাহাদিগের আর মনঃপীড়ার অবধি থাকে না। কলিকাতা ও ডেপার্সবর্তী শিক্ষিত সমাজও দীক্ষা গুরুর অত্যাচারে যার পর নাই ব্যতিব্যস্ত হন। গুরু যত কেন মন্দ লোক হউক না, সমাজের ভয়ে আমরা তাহাদিগকে একটি উচ্চ কথা বলিতে পারিব না।

ইহা অপেক্ষাও আমাদের সমাজের মধ্যে আরও একটি ভয়ানক কাণ্ড প্রচলিত আছে; তাহার নাম দলাদলি। এক এক সময়ে দলাদলি লইয়া এক একটি গ্রামে তুমুল কাণ্ড উপস্থিত হইয়া থাকে। উচ্চ বংশাবতংস লোকেরা এক একটি দল বাঁধিয়া থাকেন। তদ্বারা সমাজের কিছু মাত্র উপকার নাই; কেবল নিঃস্ব ও অকুলীন লোকের ঘোর মনঃপীড়ার কারণ হইয়া থাকে। যদি কোন গণ্ড গ্রামে এক জন অকুলীন ব্যবসায় কার্য্য দ্বারাই হউক, কিম্বা রাজকার্য্য দ্বারাই হউক, ধনবান্ হইয়া উঠেন, তবে সেই ব্যক্তি কত পুত্রের বিবাহোপলক্ষে সমাজের শিরোরত্নগণকে বাটীতে আহ্বান করিবার চেষ্টা করেন; সেই সময় দলপতি মহাশয়দিগের দস্তুর পরিসীমা থাকে না। অনুসন্ধান দ্বারা যদি সেই ব্যক্তির সপ্তম পুরুষের মধ্যে কাহারও কোন কলঙ্ক প্রকাশ হয়, তাহা হইলে, সেই শুভ কার্য্যের সময় দলপতি মহাশয়েরা তাহাকে চাপিয়া ধরেন। অজ্ঞান বদনে বলিতে থাকেন, তোমার বাটীতে আমরা কি প্রকারে গমন করি? তোমার দশ টাকার বিষয় হইয়াছে বলিয়া কি একেবারে এই দিক্‌পালগণকে বাটী লইয়া

যাইতে সাহস কর ? এই কার্য্য কি সহজে হইয়া উঠিবে ? ভাল, আমরা তোমাকে যে সং পরামর্শ দিতেছি, সেই মত কার্য্য কর । কল্যাণপ্রত্যাশে গলবস্ত্র হইয়া সমাজের প্রধান প্রধান লোকের দ্বারে দ্বারে ভ্রমণ করিতে আরম্ভ কর । যদি তাঁহারা তোমার সৌজন্যে পরিতুষ্ট হন, তাহা হইলে, এবার না হউক, অন্য অন্য কার্য্য-কালে তোমার উদ্ধার সাধনের চেষ্টা দেখিব । সেই আধুনিক ধনবান্ সর্ব্ব গুণাশ্রিত সাধু ব্যক্তি হইয়াও কেবল কুলমর্য্যাদার অভাবে নরাধম লোকের দ্বারে দ্বারে ভ্রমণ করিয়া বেড়াইতে বাধ্য হন ; তথাচ সমাজের কর্তৃপক্ষেরা তাঁহাকে সহজে কৃপা করিতে চাহেন না । সেই ভদ্র লোকের বিনয় নম্রতা দেখিয়া যদি গ্রামের কতকগুলি ভদ্র লোক তাহার বাটীতে গমন করেন, তাহা হইলে, ঘোর দলাদলি উপস্থিত হয় ; পরস্পর পরস্পরের জাত্যস্তুর করিবার চেষ্টা দেখে । অন্য কি কথা, দলাদলি সূত্রে কখনও কখনও খুল্লতাভের সহিত ভ্রাতৃপুত্রের, জামাতার সহিত শ্বশুরের এবং ভাগিনেয়ের সহিত মাতুলের আহার ব্যবহার থাকে না । এক জন অকুলীনকে সমাজ ভুক্ত করিবার সময়ে এক একটি গ্রামের শত শত ব্যক্তিকে মনঃপীড়া ভোগ করিতে হয় ।

সাধারণের অসুখের দ্বিতীয় কারণ দুর্দান্ত ভূস্বামী । পাঠক-গণের অবদিত নাই, এই বঙ্গ দেশের প্রত্যেক জেলায় এক একটি প্রবল প্রতাপাশ্রিত ভূস্বামী আছেন । তাঁহারা স্ব স্ব অধিকারের মধ্যে একাধিপত্য করিয়া থাকেন, পূর্বে তাঁহারা স্বাধীন রাজার ন্যায় প্রজার উপর প্রভুত্ব করিতেন । তাঁহাদিগের মধ্যে কাহারও কাহারও অত্যাচারে প্রজাপুঞ্জ শঙ্কিত হইয়া কাল যাপন করিত । নিঃস্ব প্রজার ধন, প্রাণ ও মান হরণ

করিতে নির্দয় ভূস্বামিগণ কিছু মাত্র সঙ্কুচিত হইতেন না । তাঁহাদিগের অপরাধ রাজকীয় বিচারালয়ে প্রমাণ করে কাহার সাধ্য । যদি কোন ধনবান প্রজা বর্ণনাভীত ভূস্বামীর উৎপীড়ন অসহ্য বোধে সাহস করিয়া বিচারালয়ে অভিযোগ উপস্থিত করিত, তাহা হইলে, প্রমাণভাবে তাহার সে অভিযোগ প্রমাণ না হওয়াতে ভূস্বামী অনায়াসে অব্যাহতি পাইতেন । যদি ছুই এক জন নিতান্ত ধর্মশীল ব্যক্তি ভূস্বামীর প্রতিকূলে বিচারালয়ে সাক্ষ্য দিতেন, তাহা হইলে, ভূস্বামী মহাশয়েরা এক রজনীর মধ্যেই তাঁহাদিগের ঘর দ্বার ভাঙ্গিয়া শ্রোতস্বতী নদীতে নিক্ষেপ করিতেন, তাঁহার পরিবারবর্গকে ধৃত করিয়া আনিয়া চুণের গুদামের ভিতর বদ্ধ করিয়া রাখিতেন । নীলদর্পণ নাটক লেখক নীলকরদিগের প্রজাপীড়নের বিষয় বিস্তারে বর্ণন করিয়াছেন ; কিন্তু দেশীয় ভূস্বামিগণের কথা এক বারও উল্লেখ করেন নাই । যদি আমরা নিরপেক্ষ হইয়া বলি, তাহা হইলে, নীলকর অপেক্ষা এতদেশীয় ছুর্ত ভূস্বামিগণের প্রজাপীড়নও ন্যূন নহে । এক্ষণে ব্রিটিশ গবর্ণমেন্টের অনুজ্ঞায় প্রত্যেক গও গ্রামেই ডেপুটি মাজিস্ট্রেটের মহকুমা হওয়াতে ছুর্ত ভূস্বামীরা অনেক পরিমাণে সৌম্য হুষ্টি ধারণ করিয়াছে ; তথাচ তাহাদিগের পূর্ব প্রতাপ স্বরণ করিয়া কৃষিজীবী লোকের এক্ষণেও হৎকম্প উপস্থিত হয় । জমিদারের কাছারির একটি পেয়াদা দেখিলে, পল্লীগ্রামের ক্ষুদ্র ভদ্র সমস্ত লোকই কৃতান্তের অনুচর বলিয়া জ্ঞান করে । পল্লীগ্রামে প্রচলিত আছে, কোন উত্তম ফল, কি উপাদেয় সামগ্রী সর্কাগ্রে ভূস্বামীর বাটীতে পাঠা-

ইতে হয়। ইহার অন্যথা হইলে, ভূস্বামিগণ অপমান বোধ করিয়া থাকেন। যদি কৃষিজীবী লোকের গৃহে কোন সূত্রে কিঞ্চিৎ অর্থ সঞ্চয় হইয়াছে, সেই সংবাদ ভূস্বামীর কর্ণে উঠে, তাহা হইলে, অর্থপিশাচ ভূম্যধিকারিগণ বলে, ছলে ও কৌশলে তাহাদিগের অর্থ হরণের চেষ্টা দেখে। পূর্বে কৃষ্ণ-নগরাধিপতি রাজা কৃষ্ণচন্দ্র রায় ও বর্দ্ধমানাধীশ্বর মহারাজ তিলকচন্দ্র অধ্যাপক ব্রাহ্মণগণকে অনেক ভূমি সম্পত্তি দান করিয়া গিয়াছিলেন। সেই সকল সম্পত্তি ব্রাহ্মণেরা পুরুষানুক্রমে ভোগ করিয়া আসিতেছেন। পূর্বে কথিত রাজ-দ্বয়ের বদান্যতার উপর নির্ভর করিয়া বঙ্গ দেশের বহু সংখ্যক ব্রাহ্মণ এক প্রকার সুখ সচ্ছন্দে দিন পাত করিয়া থাকেন। কাল মাহাত্ম্যে এক্ষণকার কয়েক জন দুর্ভাগ্য ভূস্বামী সেই সকল ব্রহ্মোত্তর ভূমি বল পূর্বক আত্মসাৎ করিতেছেন। যদিও কেহ কেহ আপনাদিগের বহু কালের ভোগ দখলী কাগজ দেখাইয়া আদালতে স্বত্ত্ব সাব্যস্ত করিয়া লন, তথাপি তাঁহারা জমিদারের অত্যাচার হইতে নিষ্কৃতি লাভ করিতে পারেন না; কারণ দুর্দান্ত ভূস্বামিগণ আপন আপন অধিকারস্থ কৃষকগণকে বলিয়া রাখেন যে, যদি তোমরা অমুক অমুক ব্রাহ্মণের ব্রহ্মোত্তর ভূমিতে হল চালনা কর, তাহা হইলে, তোমাদিগকে চাল কাটিয়া উঠাইয়া দিব। সেই ভয়ে কৃষকেরা ব্রহ্মোত্তর ভূমির নিকটবর্তী হইতে পারে না; সুতরাং ব্রাহ্মণগণের সুখে কাল যাপনের পথ বন্ধ হইয়া যায়। নগরবাসী লোকেরা পল্লীগ্রামের ভূস্বামীর চরিত্র কিছু মাত্র অবগত নহেন। তাঁহারা গবর্ণমেন্টের চক্ষের উপর রামরাজ্য ভোগ করিতেছেন; কিন্তু পল্লীগ্রামের লোককে

ভূস্বামীর ভয়ে দন, প্রাণ ও মান লইয়া সর্বদা শশবাস্ত হইয়া থাকিতে হয় ।

পূর্বে যে কয়েকটি বিষয় লিখিত হইল, এই গুলি সময়ে সময়ে সৰ্ক সাধারণের পক্ষে ঘোর মনঃপীড়ার হেতু হইয়া থাকে । এক্ষণে ব্যক্তি বিশেষকে যে যে বিষয়ের জ্ঞান প্রায়ই বর্ণনাভীত অসুখী হইতে হয়, নিম্নে তাহাই লিখিত হইতেছে । যদি কেহ কোন নুতন পল্লীতে আপন বাসোপযোগী একটি বাটি প্রস্তুত করণের প্রতিপ্রায় করেন, তাহা হইলে, সৰ্কগ্রে প্রতিবেশীরা কিকপ লোক, তাহা বিশেষ রূপে অনুসন্ধান লওয়া সৰ্কতোভাবে কর্তব্য বলিয়া বোপ করেন ; কারণ কলহপ্রিয় প্রতিবেশীর মধ্যে বাস করিতে গেলে, গৃহস্থগণকে পদে পদে অসুখী হইতে হয় । এক এক পল্লীতে একপ দুই এক জন লোক আছে, বাহাদিগের দোরাঅ্যে পল্লীস্থ লোকদিগকে জর্জরীভূত হইতে হয় । তাহারা সামান্য সূত্র ধরিয়া নিতান্ত সজ্জন প্রতিবেশীর সহিত কলহে প্রবৃত্ত হয়, ইহার শত শত প্রমাণ প্রাপ্ত হওয়া যাইতে পারে । সেই সকল দুরাত্মারা পরস্পরের সহিত কলহ বাধাইয়া আপনাদিগের উপার্জ্জনের পথ পরিষ্কার করিতে যায় ; কিন্তু সজ্জন ব্যক্তিবৃন্দ সহজে কলহে প্রবৃত্ত না হইলে, তাহারা আপনা আপনি এক একটি কলহের সূত্র তুলিয়া লয় । তাহারা কেবল প্রতিবেশীগণকে কার্য্য গতিকে বিরক্ত করে একপ নহে । যদি পল্লীস্থ লোক উক্ত দুরাত্মাগণের সহিত কোন অংশে সংস্রব না রাখেন ও তাহারা সাক্ষাৎ সম্বন্ধে কোন অপকার করিলেও উপেক্ষা করিয়া যান, তথাচ ঐ সকল দুষ্ট লোকেরা আপন আপন পরিবারের মধ্যে সর্বদা কলহ বিবাদ করিয়া নিরীহ প্রতি-

বেশিগণকে কখনও কখনও বিচারালয়ে পর্য্যন্ত লইয়া গিয়া থাকে । কোন কোন রজনীতে উপরি উক্ত অসৎ পরিবারের কলহ সম্মুত চীৎকার শব্দে নিকটস্থ প্রতিবেশিগণ সুখে নিদ্রা যাইতে পারেন না । একপ কলহপ্রিয় প্রতিবেশীর সহিত এক পল্লীতে বাস সমূহ অসুখের কারণ, তাহাতে আর সংশয় কি ।

অপ্রিয়বাদিনী ভাৰ্য্যা অসুখের আর একটি কারণ বলিয়া ধরিভে হইবে । ভুবন বিখ্যাত পণ্ডিত সক্রেটিস অপ্রিয়বাদিনী ভাৰ্য্যার হস্তে পড়িয়া যার পর নাই অসুখে কাল হরণ করিতেন । যদিও তাঁহার মন সৰ্ব্বতোভাবে উন্নত ছিল, সাংসারিক তরঙ্গে সহসা তদীয় শিক্ষিত মনকে বিচলিত করিতে পারিত না, তথাচ এক এক সময়ে তিনি ভাৰ্য্যার কটুক্তি অসহ্য বোধে গৃহের বহির্ভাগে আসিয়া বসিয়া থাকিতেন । সক্রেটিসের জীবনী পাঠে জানা যায়, এক দিন তাঁহার সহধর্ম্মিণী কোন কারণে স্বামীর সহিত ঘোরতর কলহে প্রবৃত্ত হন । সক্রেটিস অনেক ক্ষণ পর্য্যন্ত আপন সহধর্ম্মিণীর চীৎকার ধ্বনি শুনিয়াও শান্ত ভাবে গৃহ মধ্যে উপবিষ্ট ছিলেন ; অবশেষে যখন গৃহিণী কৰ্কশ স্বরে কটু কাটব্য বলিতে আরম্ভ করিলেন, তখন তদীয় বাক্যবাণে ব্যথিত হইয়া মহাত্মা সক্রেটিস বাটীর বহির্দ্বারে আসিয়া উপবিষ্ট হইলেন । গৃহিণী শান্তশীল পাতিকে স্নান মনে তথায় উপবিষ্ট দেখিয়া উপর হইতে এক কলস জল তাঁহার মস্তকে ঢালিয়া দিলেন । সক্রেটিস উৰ্দ্ধে দৃষ্টি করিয়া হাস্যমুখে বলিলেন, “এমন গৰ্জ্জনের পর যে বর্ষণ হইবে না, ইহা অসম্ভব নহে ।”

পাশ্চাত্য সভ্যতার প্রভাবে এ দেশের স্ত্রীলোকেরা প্রকৃত

পাতিব্রতা ধর্ম একেবারে ভুলিয়া গিয়াছেন। পুরা কালে সীতা, সাবিত্রী, দময়ন্তী ও দ্রৌপদী প্রভৃতি পতিপরায়ণা রমণীগণ কেবল এক স্বামী সেবার জন্য সমস্ত সাংসারিক বিলাস ভোগের উপায় সত্ত্বেও বনবাসিনী হইয়া ছুরপনেয় দুর্দশা ভোগ করিয়াছিলেন। তাঁহারা স্বামীসেবাই পরম সুখ বলিয়া জানিতেন। এক্ষণকার রমণীগণ নানালঙ্কারে বিভূষিত হওয়া, হস্তে কিছু অর্থ থাকা ও স্বামীকে ক্রীতদাসের ন্যায় আজ্ঞাবহ রাখাই পরম সুখ বোধ করেন। স্বামী বিপদে পড়িলে, তাঁহার স্বয়ং সাবধান হইতে থাকেন। স্বামী যদি কোন বিষয় কার্যে ব্যাপৃত হইয়া দূর দেশে গমন করেন, এক্ষণকার রমণীগণের তাহাতে বিশেষ কষ্ট বোধ হয় না। তিনি দীর্ঘ কাল দূর দেশে অবস্থান করুন, তাহাতে তাঁহাদিগের ক্ষতি বৃদ্ধি নাই। উপার্জনের দ্বারা যদি বিবাহিতা স্ত্রীর বিলাস চরিতার্থ করিতে পারেন, তাহা হইলেই, তাঁহাদের মতে স্ত্রীর প্রতি স্বামীর প্রকৃত কার্য্য করা হইল, তাহার অন্তথা হইলেই সর্বনাশ উপস্থিত হয়। স্বামী যদি আপন স্ত্রীকে অন্তরের সহিত ভাল বাসেন, কোন কালে পর স্ত্রীর মুখাবলোকন না করেন, আর আভরণ দিতে অক্ষম হন, তাহা হইলে, একপ স্বামী এক্ষণকার রমণী মণ্ডলে কাপুরুষ বলিয়া গণ্য হন। স্বামী সুরাপায়ী বেষ্ট্রাসক্ত হইয়াও যদি আপনার সহধর্ম্মিণীকে নানালঙ্কারে বিভূষিত করিয়া রাখেন, তাহা হইলে, স্বামীর পূর্ব্ব কথিত জঘন্য বৃত্তি সকল সহধর্ম্মিণীর নিকট তত দূর দোষ বলিয়াই গণ্য হয় না। কেবল এক বিবাহিতা স্ত্রীর বিলাস চরিতার্থ করিতে গিয়া এক্ষণকার পুরুষ মাত্রেই ব্যতিব্যস্ত হইয়া উঠিয়াছে। স্ত্রীর প্রার্থনা

পরিপূর্ণ করিতে না পারিলে, পুরুষ মাত্রেই অসুখী হইয়া উঠে ; কারণ যিনি যে অবস্থার লোক হউন না কেন, সমস্ত দিন বিষয় কার্যে ব্যতিব্যস্ত থাকিতে তাঁহার মন প্রাণ অত্যন্ত উত্তাক্ত হইয়া উঠে, সন্ধ্যার পর আপন আপন গৃহে প্রবেশ করিয়া যদি গৃহিণীর হস্ত্য বদন দেখিতে পান, মিষ্ট কথা শুনিতে পান ও ইচ্ছামত পান ভোজন প্রাপ্ত হন, তাহা হইলে, সমস্ত দিনের কষ্ট দূর হইয়া যায় ; কিন্তু দুর্ভাগ্য বশতঃ এক্ষণকার স্ত্রীলোকেরা স্বামীর ক্ষমতার অতিরিক্ত বিলাসী হইয়া উঠিয়াছেন। কোটি পতিরাও আপন আপন সহধর্মিণীর সর্বতোভাবে বিলাস চরিতার্থ করিতে পারেন না, নিশ্চয় লোকের ত কথাই নাই। এক্ষণ স্থলে বিবাহিত পুরুষেরা ঐক্যপ পত্নী লইয়া কি প্রকারে সুখী হইবেন ? প্রিয়বাদিনী রমণী কাহাকে বলে, তাহা এক্ষণকার লোকে অনুভব করিতেও পারেন না। পতির অর্থ শোষণ করাই এক্ষণকার স্ত্রীলোকগণের পাত্তিব্রত ধর্ম হইয়া উঠিয়াছে। তাঁহারা যৌবন কাল হইতেই আত্মসাবধান হইতে আরম্ভ করেন। কালে বিধবা হইব, ইহা তাঁহাদিগের এক প্রকার স্বভাব সিদ্ধ ধারণা হইয়া দাঁড়াইয়াছে। বৈধব্য অবস্থায় কোন রূপ কষ্ট ভোগ করিতে না হয়, সুখ সচ্ছন্দে ও মনের আনন্দে কাল হরণ করিতে পারি, এই আশয়ে চির কাল পতিকে বিরক্ত করিয়া থাকেন। আভরণের অভাব দূর হইলে, কতকগুলি সম্পত্তি নিজ নামে করিবার জন্ত এক এক জন স্ত্রীলোক ক্রমান্বয়ে প্রতি রজনীতে পতির সহিত কলহ করিয়া থাকেন। সেই সকল পুরুষেরা কেবল এক অপ্রিয়বাদিনী স্ত্রীর কারণে এক দিনের জন্তও সুখী হইতে পারেন না। তবে ইহা অবধারিত হইল যে, এক্ষণকার

লোক অশিক্ষিতা স্ত্রীর বশতাপন্ন হইয়া সর্বতোভাবে শান্তি ভোগে নিরাশ হইয়া থাকেন।

অবাধ্য মূৰ্খ পুত্র সদাশয় সাধু পিতার ঘোরতর অমুখের কারণ হইয়া উঠে। এক একটি মূৰ্খ পুত্র হইতে এক একটি মহাবংশ একেবারে ধ্বংস প্রাপ্ত হইয়াছে। দূরদর্শী চাণক্য পণ্ডিত লিখিয়াছেন, “একেনাপি কুবৃক্ষেন কোটরস্থেন বহ্নিনা। দহতে তদ্বনং সৰ্বং কুপুলেন কুলং যথা ॥” পুরাণাদি পাঠে কুলাস্ফার পুত্রের অনেক পরিচয় প্রাপ্ত হওয়া যায়। তাহারা যদিও মূৰ্খ ছিল না; কিন্তু মূৰ্খের ন্যায় কার্য্য করিয়া বৃদ্ধ পিতা মাতাকে অপার শোক সাগরে ডুবাইয়া আপনারা অকালে মানব লীলা সম্বরণ করিয়াছিল। কুবৃক্ষপতি ধৃতরাষ্ট্রের প্রধান পুত্র দুৰ্য্যোধনের বাল্য চরিত্র অবগত হইয়া মন্ত্রী চূড়ামণি বিদূর অন্ধরাজকে কহিয়াছিলেন, মহারাজ, আমার অনুরোধ, আপনি এই জ্যেষ্ঠ পুত্রকে পরিত্যাগ করুন। আমি ইহার আকার প্রকার দেখিয়া বুঝিতে পারিতেছি যে, এই কুলাস্ফার পুত্র হইতেই কুবৃক্ষ নিৰ্ম্মূল হইয়া যাইবে। গান্ধারী দেবী শত পুত্র প্রসব করিয়াছেন; এই জন্য আমি বিনয় পূৰ্ব্বক বলিতেছি যে, কুলাস্ফার এক পুত্র পরিত্যাগ করিয়া একোনশত পুত্রের ভাবী মঙ্গলের পথ পরিষ্কার করিয়া রাখুন। ধৃতরাষ্ট্র, অপত্য স্নেহ বশতঃ বিদূরের কথায় কণ পাতও করিলেন না। কালে পিতার অবাধ্য এক দুৰ্য্যোধন হইতেই ভীমসেনের গুরু গদাঘাতে ধৃতরাষ্ট্রের শত পুত্র সমরশায়ী হয়। পুত্রগণ নিহত হইলে, অন্ধরাজ বিদূরের কথা স্মরণ করিয়া শোকসন্তপ্ত হৃদয়ে জীবনের অবশিষ্ট কাল

অতিবাহিত করিয়াছিলেন। দুর্ঘ্যোধনের ন্যায় পিতার অবাধ্য হইয়া মথুরাধিপতি উগ্রসেনের এক মাত্র পুত্র কংস চৌদীশ্বর শিশুপাল ও বিদর্ভরাজের জ্যেষ্ঠপুত্র কক্কা অকালে কাল কবলশায়ী হইয়া বৃদ্ধ পিতা মাতাকে চির কালের জন্য শোক সাগরে ভাসাইয়াছিলেন। পিতা মাতার কুলঙ্গার পুত্র হইতে মহাবংশের নাশ পুরাণাদিতে ও ইতিহাসে অনেক দেখিতে পাওয়া যায়। দিল্লীশ্বর শাজাহানকে দুর্ভৃত পুত্র আরঞ্জিব কর্তৃক কারাবদ্ধ হইয়া জীবনের শেষাংশ অতিবাহিত করিতে হইয়াছিল। এক্ষণকার কালে অবাধ্য পুত্রের অভাব নাই। অনেকেই পিতা মাতার জীবদ্দশাতেই ভিতরে ভিতরে পৈতৃক সম্পত্তি নষ্ট করিয়া রাখে ; কালে পৈতৃক বিষয়ের স্বত্বাধিকারী হইয়া আর অধিক দিন আত্ম পরিবারকে ভরণ পোষণ করিতে পারে না। এই কলিকাতা মহানগরীর মধ্যে বিপুল সম্পদশালী লোকের ঘর এক একটি কুলঙ্গার পুত্র হইতে ছারখার হইয়া গিয়াছে এবং এক্ষণেও যাইতেছে। তবেই কুলঙ্গার মূর্খ পুত্র হইতে লোকে যার পর নাই অস্বখী হন, তাহাতে আর সংশয় নাই। অবাধ্য মূর্খ পুত্র পিতা মাতার চির অস্বখের কারণ হইয়া উঠে।

উদরানের জন্য ঘাঁহারা চির কাল বিদেশে বাস করেন, তাঁহা-
দিগের ন্যায় অস্বখী আর নাই। প্রতিক্ষণ তাঁহারা চিন্তার অতল সাগরে ডুবিয়া থাকেন। যদি দশ দিন বাটীর সংবাদ না পান, তাহা হইলে, আর অস্বখের পরিসীমা থাকে না। মনে মনে নানা অনিষ্ট আশঙ্কা করিয়া সর্ব ক্ষণ চিন্তাকুল হইতে থাকেন। প্রবাসী লোকেরা বহু ব্যয় করিয়াও মনোমত আহার করিতে

পান না। সাধ্বী পত্নীর সেবা ভক্তি প্রায়ই তাঁহাদিগের অদৃষ্টে ঘটিয়া উঠে না। অপত্যগুলিকে লালন পালন করা, তাহাদিগের অর্ধশুট অমৃত তুল্য কথা শুনিয়া হৃদয়ের গ্লানি দূর করা, জনক জননীর সেবা ভক্তি করিয়া মনুষ্য জন্ম সফল করা, ভ্রাতা ভগিনীগণের অকৃত্রিম ভালবাসা প্রবাসী লোকের দুর্লভ হইয়া উঠে। যদিও দার্ষ কালের পর দুই এক মাসের জন্ম স্বদেশে আগমন করেন, তাহা হইলে, সেই সংক্ষিপ্ত সময় সংসারের গোলযোগ মিটাইতেই অতিবাহিত হইয়া যায়। নিশ্চিন্ত হইয়া পরিবারগণের সহিত সাংসারিক সুখ ভোগ করা তাঁহাদিগের ভাগ্যে প্রায়ই ঘটে না। জন্মভূমি পরিত্যাগ করিয়া যাহারা কেবল এক অর্থের জন্ম দূর দেশে বাস করিতে বাধ্য হন, তাঁহারা কোন কালেই প্রকৃত সাংসারিক সুখ অনুভব করিতে পারেন না। দূর দেশে বাস কালে যখন তাঁহাদিগের মনে জন্মভূমি ও আত্মীয় স্বজনের কথা উদয় হয়, তখন একেবারে হৃদয় কাঁদিয়া উঠে, মনে আর শান্তি থাকে না। এই জন্মই সাধারণ কথায় বলিয়া থাকে, যে অশ্বাশী অপ্রবাসী হইয়া দিনের মধ্য ভাগে শাকান্ন ভোজন করে, সেই ব্যক্তিই সুখী। ইহার বিপরীত অবস্থাপন্ন লোকেরাই সর্বতোভাবে অসুখী। সাংসারিক লোকের পক্ষে চির কাল বিদেশে বাস যে মহৎ অসুখের মূল, ইহা প্রতিপন্ন করিবার জন্ম আর অধিক বাক্য ব্যয়ের প্রয়োজন নাই। এতৎ সম্বন্ধে যে কয়েক পঙক্তি লিখিত হইল, তাহাই যথেষ্ট।

উদরান্নের জন্ম দাসত্ব কিম্বা বিদেশীয় ও বিধর্মী রাজার অধিকারে বাস মনুজকুলের সময়ে সময়ে মহৎ অসুখের কারণ হইয়া উঠে। আমরা বহু কালাবধি বিদেশীয় রাজার অধিকারে

রহিয়াছি, স্বাধীন স্মৃথ কাহাকে বলে, তাহা এক্ষণে আর ভাবিয়া আনিতে পারি না ; এই জন্তই বিদেশীয় রাজার হস্তে ধন, প্রাণ ও মান সমর্পণ করিয়া এক প্রকার নিশ্চিন্ত ভাবে বসিয়া আছি । যে সকল লোক বেতনভোগী দাস হইয়া রাজপুরুষগণের কিস্তা বিদেশীয় বণিকগণের সেবা করিতেছে, সময়ে সময়ে তাহাদিগের মনঃপীড়ার অবধি থাকে না । যাহারা বেতনভোগী দাস হইয়া আপন প্রভুর নিকট স্বাধীনতা বিক্রয় করিয়াছে, তাহাদিগের মুখে স্মৃথের কথা শ্রবণ করাই আশ্চর্য্য । পরাধীনতাশৃঙ্খলে আবদ্ধ হইলে, মনুষ্যের মনে কি শান্তির লেশ মাত্র থাকে ? যখন পাণ্ডবগণ শত্রুভয়ে আত্মগোপন করিবার জন্ত বিরাটরাজের দাসত্ব স্বীকারে অগ্রসর হইয়াছিলেন, তখন তাহাদিগের 'কুলপুরোহিত মহাবিজ্ঞ ধোম্য রাজসেবায় কি কি বিষয় আছে, তাহা পাণ্ডুপুত্রগণকে বিস্তারে বলিয়া দিয়াছিলেন । সেই অসাধারণ ধীশক্তিসম্পন্ন মুনিবরের উপদেশের স্থূল মর্ম্ম এই ;—

“ ক্রুত্রি মধ্যে অগ্নিসম তোমা পঞ্চ জনে,
সকলে তোমার শত্রু জানহ আপনে ।
গুপ্তভাবে গুপ্তবেশে রবে ভাল মতে,
রাজসেবা করিয়া থাকিবে রাজনীতে ।
ক্ষুধা তৃষ্ণা ভেয়াগিবে অলিস্থ শয়ন,
রাজারে বিশ্বাস না করিবে কদাচন ।
কোন কার্য্য হেতু যদি রাজ আজ্ঞা হয়,
আপনার প্রাণপণে করিবে নিশ্চয় ।

অস্তঃপুর নারী সহ না কহিবে কথা,
 মিথ্যা বাক্য রাজারে না কহিবে সৰ্ব্বথা ।
 হরষেতে মত্ত না হইবে কদাচন,
 রাজা সনে না কহিবে রহস্ত্র বচন ।
 সন্নিকটে না থাকিয়া অন্তরে থাকিবে,
 লাভালাভ না বিচারি অনুজ্ঞা রাখিবে ।
 ভ্রাতৃ বন্ধু পুত্রোত্তে রাজার নাহি প্রীত,
 নৃপতি করেন কৰ্ম্ম সব বিপরীত । ”

পরাদীন লোকের জন্ম এই নিয়মগুলি অবধারিত আছে ।
 যাহারা কায়মনোবস্ত্রে উপরিউক্ত নিয়ম সকল প্রতিপালন করিবার
 চেষ্টা করে, তাহাদিগের অন্তরে কি সুখের লেশ মাত্র থাকে ?
 অনন্যদাতার ভয়ে সৰ্ব্বদা শঙ্কিত হইয়া কাল হরণ করিতে হয় ।
 প্রভু কোন গর্হিত আদেশ করিলেও ইচ্ছার বিপরীতে তাহা
 সমাধা করিতে অগ্রসর হইতে হয় । কিস্করের প্রতি প্রভু
 সামান্য কারণে ক্রোধ করেন । তাহারা প্রাণপণে প্রভুর আজ্ঞা
 প্রতিপালন করিয়াও যশোলাভ করিতে পারে না । যেমন
 বিধবার একাদশী ব্রত না করিলে বিলক্ষণ প্রত্যবায় আছে ;
 করিলে কর্তব্য কার্য্য সাধন করা হয় মাত্র । প্রভুর নিকট
 কিস্করের কার্য্যও তদনুরূপ । পৃথিবীর মধ্যে যত প্রকার
 সুখ আছে, তন্মধ্যে স্বাধীনতা সুখই সর্বোৎকৃষ্ট । স্বাধীনতা
 ব্যতিরেকে কোথায় কে সুখী হয় ? এই জন্মই কোন কবি
 লিখিয়াছেন ;—

“ মহত্ৰ গৃধিনী যদি শতেক বৎসর,
 হুৎপিণ্ড বিদারিত
 করে অনিবার, প্রীত
 বরঞ্চ হইব তাহে, তবু হা ঈশ্বর !
 এক দিন—এক দিন—জন্ম জন্মান্তরে
 নাহি হই পরাধীন ;
 যন্ত্রণা অপরিসীম,
 নাহি সহি যেন নর গৃধিনীর করে ! ”

সেই স্বাধীনতা যাহারা উদরান্নের জন্য পরের নিকট বিক্রয় করিয়াছে, তাহাদের কোন সুখেরই সম্ভাবনা নাই। বিশ্রাম সুখ সম্ভোগের কথা দূরে থাক, কাহারও কাহারও প্রত্যহ স্নানাহারেরও অবসর হয় না। এইকপে দাসত্বের সঙ্গে সঙ্গে সকল সুখে জলাঞ্জলি দিতে হয়। কেবল কায়মনোবস্ত্রে প্রভুর সেবা করাই এক মাত্র কার্য্য হইয়া উঠে। মনুষ্যের সকল কার্য্যেই ভ্রম ঘটিয়া থাকে, যাঁহারা বহু সংখ্যক লোকের উপর প্রভুত্ব করিয়া থাকেন, কার্য্য গতিকে তাঁহাদিগের কোন ভ্রম ঘটিলে, অধীন লোকদিগকে “নুনীনাক্ষ মতিভ্রমঃ” বলিয়া উড়াইয়া দিতে হয় ; কিন্তু সেই ভ্রম দৈবাৎ যদি কোন কিস্করের হইয়া পড়ে, তাহা হইলে, প্রভুর ক্রোধের আর পরিসীমা থাকে না ; আরক্ত নয়নে যৎপরোনাস্তি ভৎসনা করিতে আরম্ভ করেন। ক্ষুদ্রজীবী কিস্কর হইলে, তাহার ভ্রম প্রমাদের কশাঘাত ও পদাঘাত প্রকৃত পুরস্কার হয়। কেবল মনুষ্য কেন, বন্দী অবস্থায় পশু পক্ষীরাও অসুখের চিহ্ন প্রদর্শন করিয়া থাকে। যদি স্বর্ণ-পিঞ্জরে একটি শুকপক্ষী রাখিয়া প্রত্যহ তাহাকে ঘৃতান্ন ভোজন

করাও, তথাচ সে স্বেযোগ পাইলেই, সুরম্য অট্টালিকার অভ্যন্তরস্থ স্বর্ণপিঞ্জর পরিত্যাগ করিয়া পলায়ন করিবে ও স্বাধীন ভাবে বৃক্ষ শাখায় বসিয়া আনন্দ প্রকাশ করিতে থাকিবে।

এই সংসারের বহু সংখ্যক লোক আপনার ক্ষমতাভীত বিলাস ভোগ ও মান মর্যাদা ক্রয় করিতে গিয়া ঋণগ্রস্ত হইয়া পড়ে। ঋণের ন্যায় মনঃপীড়াদায়ক বিষয় আর নাই। যখন লোকে ঋণ গ্রহণ করে, তখন অগ্র পশ্চাৎ ভাবিয়া দেখে না, উপস্থিত কার্য সম্পন্ন হইলেই পরম আনন্দ অনুভব করে; কিন্তু যখন ঋণ পরিশোধের সময় উপস্থিত হয়, উত্তমর্গগণ সর্বদা অধমর্গগণের বাটীতে যাওয়া আসা আরম্ভ করে, স্বদে আসলে কত হইল, তাহার হিসাব দেখাইয়া দেয়, তখন অধমর্গগণের মস্তক ঘুরিতে থাকে, ঋণদাতাকে কৃতান্তের অনুচর বলিয়া বোধ হয়, আহা! বিহারে কিছু মাত্র মনের সুখ থাকে না। যে নিদ্রা আমাদিগের সমস্ত সন্তাপ হরণ করে, সময় বুঝিয়া ঋণগ্রস্ত ব্যক্তিকে সেও পরিত্যাগ করিয়া যায়। প্রিয়ভমা ভার্য্যাকে ও প্রাণাধিক পুত্রগণকেও আর ভাল লাগে না। কি করিলাম, কি হইল, কল্য প্রত্যুষে ঋণদাতা পুনরাগমন করিলে কি বলিব, এই রূপ চিন্তানলে জীবন্ত শরীর সর্ব ক্ষণ দগ্ধ হইতে থাকে। বুদ্ধি বৃত্তি ও ধর্ম প্রবৃত্তি চিন্তা রূপ অনলের উদ্ভাপ সহ্য করিতে না পারিয়া ঋণ গ্রস্ত ব্যক্তির হৃদয় হইতে পলায়ন করে। সৎ প্রবৃত্তির বিনিময়ে অসৎ প্রবৃত্তি আসিয়া ঋণ গ্রস্ত ব্যক্তির হৃদয়ে আশ্রয় গ্রহণ করে, তখন সেই ব্যক্তি দুর্কুন্ধির বশবর্তী হইয়া আত্মরক্ষার উপায় উদ্ভাবন করিতে পারে না। ঐ বিপদের সময় যদি কোন বন্ধু বান্ধব সৎ পরামর্শ দিতে

যান. অর্থাৎ একপ কথা বলেন, বিষয়ের কিয়দংশ বিক্রয় করিয়া সমস্ত ঋণ পরিশোধ কর, তাহা হইলে, সমূলে নষ্ট হইবে না, এক রূপ মোটা ভাত ও মোটা কাপড়ের সংস্থান থাকিবে। বিলাস একেবারে পরিত্যাগ কর। মনুষ্যের অবস্থার বশবর্তী হইয়া চলাই উচিত। ঋণের উপর আরও ঋণ গ্রহণ করিয়া সম্মান রক্ষার চেষ্টা করিও না। ভাঙ্গা ঘরে তালি দিলে কখনই রক্ষা হন না। বন্ধু বান্ধবের এই সকল ন্যায় ও যুক্তি সঙ্গত কথা ঋণ গ্রস্ত ব্যক্তির বিষয়ং জ্ঞান হয়। সেই ব্যক্তি ঋণের উপর ঋণ করিয়া আরও দিন কতক সংসার রূপ নাট্যশালায় নৃত্য করিয়া লয়। যখন ঋণ পূর্ণ মাত্রায় উঠে, তখন একেবারে সর্বনাশ হইয়া যায়। সে সময়ে আর আপন মান মর্যাদার দিকে দৃষ্টি রাখিতে পারে না; সুতরাং এক ঋণ দায়ে সর্বস্বান্ত হইয়া চির কালের জন্য ঘোর অমুখে কাল যাপন করিতে থাকে।

শারীরিক অসুস্থতা, আত্মীয়গণের নিতান্ত কঠিন পীড়া ও সংসারের অপ্রতুল যদি কোন গৃহস্থের এক কালে ঘটে, তাহা হইলে, সেই গৃহস্থামীর ন্যায় অসুখী সংসারে আর দেখিতে পাওয়া যায় না। আপনার শরীর রুগ্ন হইয়া পড়িলে, মহাসম্পদ-শালী ব্যক্তিরও মনে সুখের লেশ মাত্র থাকে না। সর্ব রূপ রোগের ভাঙনায় শরীর অধৈর্য্য হইয়া উঠে, দীর্ঘ কাল ইচ্ছামত পান ভোজন করিতে না পাওয়াতে সামান্য কথায় ক্রোধ আসিয়া উপস্থিত হয়। রোগের যন্ত্রণায় সুখে নিদ্রা হয় না। সর্বোপরি মৃত্যুভয় প্রবল হইয়া উঠিলে একেবারে মনের শান্তি ভঙ্গ হইয়া যায়। কিসে প্রাণ রক্ষা হইবে, কিসে পুনর্বার ইচ্ছামত পান ভোজন করিতে পাইব, কবে সবল শরীর হইব, কবে আবার

আত্মীয় বন্ধুর সহিত আমোদ আহ্লাদ করিয়া বেড়াইব, পর্যায়ক্রমে এই সকল চিন্তায় অনুক্ষণ মহৎ অসুখে কাল হরণ করিতে হয়। যদিও সে ব্যক্তির মনুষ্যের অভিনাষোচিত সমস্তই আছে ; কিন্তু শরীর কণ্ঠ হইয়া পড়াতে সমস্ত সুখ সত্ত্বেও অনুক্ষণ যন্ত্রণা ভোগ করিতে থাকে। মনে মনে কত প্রকার বিলাসের চিন্তা আসিয়া উপস্থিত হয় ; কিন্তু সে সকল চিন্তা তৎ কালে তাহার পক্ষে স্বপ্নবৎ বোধ হইতে থাকে। কণ্ঠ ব্যক্তির সম্মুখে পত্নী ও পুত্রগণ উপাদেয় বস্তু আহাৰ করিতেছে, উন্নত অটালিকার উপর স্নান শয্যায় শয়ন করিয়া অকাতরে নিদ্রা বাইতেছে ; কিন্তু সেই কণ্ঠ ব্যক্তি সেই গৃহের সর্বোচ্চ হইয়াও সুখের লেশ মাত্র অনুভব করিতে পাইতেছে না। সজ্জিত গৃহ তাহার পক্ষে শ্মশানের স্থায় বোধ হয়, দুগ্ধ ফেণ নিভা শয্যা কণ্টকাকীর্ণ বলিয়া বোধ হয়, উপযুক্ত পথ্য সেবনের সময় কণ্ঠ ব্যক্তি বোধ করে যেন, পরিবারগণ বল পূৰ্ব্বক তাহাকে বিষ ভোজন করাইতেছে। আবার যে রোগী অধৈর্য্য ও অবাধ্য, কণ্ঠাবস্থায় তাহার দুর্দশার অবধি থাকে না। ফলতঃ পৃথিবীতে যত প্রকার অসুখ আছে, উৎকট রোগ গ্রস্ত হইয়া দীর্ঘ কাল শয্যাশায়ী থাকা অপেক্ষা আর কোন অসুখই নাই।

এই ভবের হাটে আসিয়া সৰ্ব বিধায় সুখী হওয়া দুষ্কর। বিষয় আছে, পুত্র নাই ; বিভব আছে, শরীর অসুস্থ ; সংসারের সৰ্ব প্রকারে সুপ্রতুল, কিন্তু সহধর্ম্মিণী দীর্ঘ কাল রোগের যন্ত্রণা ভোগ করিতেছেন ; ঐ এক জনের অসুখে সকলকেই অসুখী হইতে হয়। যে গৃহে একটি মাত্র রোগী উৎকট পীড়ায় প্রপীড়িত হইয়া আৰ্ত্তনাদ করিতে আরম্ভ করে, সে গৃহে আরও কাহারও

মনে শান্তি থাকে না ; সকলকেই অসুখী হইতে হয় । আবার
এক্ষণকার কালে পল্লীগ্রামে প্রায় অধিকাংশ গৃহস্থের গৃহে চারি
পাঁচটি রোগী এক সময়ে শয্যাশায়ী হইয়া থাকে । যেখানে
একটি রোগীর উচিত মত সেবা শুশ্রূষা করা সমস্ত পরিবারের
পক্ষে কষ্টকর হইয়া উঠে, সেখানে চারি পাঁচটির সেবা শুশ্রূষা
করা কি সহজ ব্যাপার ! সংসারে দুই চারিটি পরিবার কষ্ট
হইয়া পড়িলে, ধন নাশ, বুদ্ধি নাশ, অবশেষে সর্ব্ব নাশ পর্য্যন্ত
হইয়া যায় । স্বচক্ষে দেখিয়াছি, কোন ব্যক্তির এক মাত্র পুত্র
যক্ষ্মা রোগ গ্রস্ত হইয়া দীর্ঘ কাল শয্যাশায়ী ছিল, তাহার পিতা
ধনের প্রতি কিছু মাত্র মমতা না রাখিয়া সন্তানটিকে আরোগ্য
করাইবার জন্য যথোচিত চেষ্টা করিয়াছিলেন । পুত্রটি দীর্ঘ কাল
রোগ ভোগ করিয়া মৃত্যু মুখে নিপতিত হইল । তাহার চিকিৎসার
জন্য গৃহ স্বামীর সঞ্চিত ধনের আর এক কপর্দকও রহিল না ।

উপরি উক্ত ব্যবস্থা সম্পন্ন লোকে এক ধনের বলে অনেক
দুঃখের লাঘব করিয়া লইতে পারে ; কিন্তু যে সকল ব্যক্তি নিশ্চ,
সংসারে অপ্রতুল সাহাদের স্বভাবতঃ ঘটিয়া থাকে, তাহার উপর
আবার যদি শরীর কষ্ট হইয়া পড়ে ও মধ্যে মধ্যে স্ত্রীপুত্র
পরিবারগণ উৎকট রোগ গ্রস্ত হয়, তাহা হইলে, সে সকল
ব্যক্তির আর দুর্দশার অবধি থাকে না । তাহারা ভয়ানক
মানসিক গ্লানি ভোগ করে ।

সাংসারিক অপ্রভুলের ন্যায় অসুখ গৃহস্থের পক্ষে আর
কিছুই নাই । কিছু দিবস পূর্বে আমাদিগের দেশীয় পণ্ডিত-
গণ গৃহস্থের অপ্রভুলের অবস্থা কবিতায় বর্ণন করিয়া ধনী
সন্তানগণের নিকট সেই সকল কবিতা ব্যাখ্যা করিতেন ।

যদি লক্ষ্মীর বরপুত্রগণ সেই সকল দুঃখের কথা শুনিয়া দয়ার্দ্ৰ চিত্ত হইয়া দরিদ্রের প্রতি রূপাকটাক্ষ পাত করেন, এই উদ্দেশ্যেই সেই সকল কবিতা বিরচিত হইয়া থাকে। অদ্যাপি অনেক পণ্ডিত পূর্ব কালের রচিত কবিতাগুলি কণ্ঠস্থ করিয়া রাখিয়াছেন। ঐ সকল কবিতার স্থূল মর্ম্ম উদাহরণ স্বলে দুই একটি নিম্নে বিবৃত করা যাইতেছে। যে সকল ব্রাহ্মণ পণ্ডিত দর্শন শাস্ত্রে বিশেষ অভিজ্ঞতা লাভ করিতেন, তাঁহাদিগের বিষয় বুদ্ধি প্রায় থাকিত না। সঞ্চয় করিয়া রাখায় কত উপকার দর্শে, তাহা তৎ কালের সংস্কৃত পণ্ডিতেরা একেবারেই জানিতেন না; এই জন্য স্ত্রী পুত্র পরিবার লইয়া সময়ে সময়ে তাঁহার যৎপরোনাস্তি মনঃপীড়া ভোগ করিতেন। একটি উদ্ভট কবিতায় বর্ণিত আছে, এক জন নৈয়ায়িক পণ্ডিতের পর্য্যায় ক্রমে পাঁচটি পুত্র হইয়াছিল। পুত্রগুলি প্রত্যুষে উঠিয়া খাদ্য সামগ্রীর জন্য জননীকে ব্যতিব্যস্ত করিয়া তুলিত। এক এক দিন ঐ পণ্ডিতের গৃহে তগুল কণাও থাকিত না যে, দুটি দুটি আমান্ন বালকগণের হস্তে দিয়া তাহাদিগকে ভুলাইবেন। এক দিন প্রত্যুষে বালকগুলি আহার সামগ্রীর জন্য জননীকে ব্যতিব্যস্ত করিতে লাগিল। জননী ক্রোধ করিয়া এক সেরের অধিক আতপ তগুল আনিলেন ও এই খাও বলিয়া তাহাদিগের সম্মুখে ঢালিয়া দিলেন। বালকেরা অম্লান বদনে তাহাই মুটা মুটা করিয়া ভক্ষণ করিতে লাগিল। তদৃষ্টে ব্রাহ্মণ পত্নী সজল নয়নে বলিতে লাগিলেন, তোরা এ অভাগিনীর গর্ভে কেন জন্ম গ্রহণ করিয়াছিলি? যদি কোন সম্পন্ন ব্যক্তির গৃহে জন্ম গ্রহণ করিতে পারিতিস্, তাহা হইলে, তোদের জনক জননী এই প্রত্যুষ সময়ে

উষ্ণ দুগ্ধ ও মোহনভোগ খাওয়াইয়া তোদের পরিতুষ্ট করিতেন । পূৰ্ণ জন্মে তোরা অনেক পাপ করিয়াছিলি, সেই অপরাধে আমার গর্ভে জন্ম গ্রহণ করিয়া এক দিনের জন্তও ইচ্ছা মত খাদ্য সামগ্রী ভোজন করিতে পাইলি না । গৃহিণীর এই সকল কাতরোক্তি শুনিয়া ব্রাহ্মণ শয্যা উপবিষ্ট হইয়া কহিলেন, ব্রাহ্মণি, আজ তোমার কথায় আমার চৈতন্য লাভ হইল । এখন বিলক্ষণ বুঝিতে পারিলাম যে, প্রথমে মনুষ্য পশুর ন্যায় জন্ম গ্রহণ করে । কারণ তাহারা এক বৎসর বয়ঃক্রমাবধি চারি পায়ে হাঁটিয়া থাকে । তাহার পর মনুষ্য দুই পায়ে চলে । তখন তাহাদিগকে পক্ষী বলিয়া সম্বোধন করাই উচিত ; কারণ এক মাত্র উদরের জন্তই তাহারা দুই চরণে নানা স্থানে বিচরণ করিয়া বেড়ায় । দার পরিত্রাহের পর মনুষ্যের পুনরায় পশুত্ব প্রাপ্তি হয় ; কেন না, প্রকৃতি ও পুরুষ এই দুই জনের চারি খানি চরণ একত্র না হইলে, কোন কার্যই হয় না । তাহার পর একটি সম্মান হইলেই, মানবগণ ষট্পদ ভূঙ্গ হইয়া পড়ে । তখন পেটের জ্বালায় সৰ্বদা তাহাকে ভোঁ ভোঁ করিয়া ঘুরিতে হয় । আবার যাহার বহু অপত্য হইয়াছে, তাহাকে বৃশ্চিক বলিয়া সম্বোধন করা উচিত । দেখ, তুমিও বৃশ্চিক আর আমিও বৃশ্চিক । কখন বা তোমার দংশনে আমি জ্বালাতন, কখন বা আমার দংশনে তুমি জ্বালাতন হইয়া থাক ; অতএব আমাদিগের আর কোন স্মৃথেরই প্রত্যাশা নাই । এক্ষণে ধৈর্য্যের সহিত বৃশ্চিকের জ্বালা সহ্য কর । পতির এই রূপ উদ্ভাদের ন্যায় কথা শুনিয়া গৃহিণী আরও রোদন করিতে আরম্ভ করিলেন । ব্রাহ্মণ তাহাতে জ্বলন্ত হইয়া উঠিলেন না । উপরি উক্ত ভাবের দুইটি কবিতা রচনা করিয়া

চতুর্পাঠীতে গিয়া বসিলেন। তৎ কালের ব্রাহ্মণ পণ্ডিতেরা সহজে মনকে আকুলিত করিতেন না। সংসারে সমূহ অপ্রতুল সত্ত্বেও কেবল এক দর্শন শাস্ত্রের আলোচনায় মনকে আনন্দ সলিলে ভাসাইয়া রাখিতেন।

কোন সময়ে এক জন গৃহস্থ ব্রাহ্মণের নিতান্ত অপ্রতুল ঘটিয়াছিল। পর দিন কি প্রকারে আহাৰ চলিবে, এই চিন্তায় গৃহস্থানী একে বারে আকুল হইয়া উঠিয়াছেন। এমন সময় দেখি লেন, এক জন সম্পন্ন ব্যক্তি সপরিবারে তাঁহার বাটীর সম্মুখস্থ একটি ভাড়াটিয়া বাটীতে বাসা লইলেন। তদ্ব্যপেক্ষে সেই নিম্ন ব্যক্তি মনে মনে ভাবিলেন, কল্যাণ পুত্রটিকে ক্রোড়ে করিয়া ঐ সম্পন্ন ব্যক্তির সহিত আলাপ করিতে যাইব ও তথায় দুই চারিটি কবিতা ব্যাখ্যা করিয়া তাঁহাকে সন্তুষ্ট করিতে পারিলে, অবশ্যই আমার পুত্রের হস্তে উক্ত ব্যক্তি একটি মুদ্রা দিবেন, সেই মুদ্রা দ্বারা আমরা দুই দিবস অনায়াসে স্বপ্ন সচ্ছন্দে দিন পাত করিতে পারিব। ব্রাহ্মণ এই চিন্তায় মগ্ন হইয়া রাত্রি যাপন করিলেন। প্রত্যুষে উঠিয়া দেখেন, তাঁহার পুত্রটি একটি ক্ষুদ্র বাটী করিয়া কতকগুলি ভিজ্জিত তণ্ডুল ভক্ষণ করিতেছে। তিনি বল পূর্বক তাহাকে ক্রোড়ে করিয়া বলিলেন, আয়, অদ্য আর তোকে ভিজ্জিত তণ্ডুল খাইতে হইবে না। আমি এক জন বড় মানুষের বাটীতে যাইতোঁছি, আমার সঙ্গে আসিলে সন্দেশ খাইতে পাইবি। বালক সন্দেশের কথা শুনিয়া ব্যগ্র হইয়া পিতার ক্রোড়ে উঠিল। ব্রাহ্মণ শিশু সন্তানটিকে ক্রোড়ে লইয়া সেই সম্পন্ন লোকের বাসায় প্রবেশ করিলেন।

যাঁহারা কোন কালে চুৎখের লেশ মাত্র ভোগ করেন নাই,

তাঁহাদিগের মনে মনে এই রূপ ধারণা আছে যে, জগতে কাহারও
 অপ্রতুল নাই ; এই জন্য তাঁহারা লোকের মুখ দেখিয়া দুঃখের
 ভাব অনুভব করিতে পারেন না । সেই ব্রাহ্মণ যখন আপনার
 শিশু পুত্রটি ক্রোড়ে করিয়া উক্ত ধনাঢ্য লোকের সম্মুখে
 উপবিষ্ট হইলেন, তখনও ঐ শিশুটির মুখে দুই একটি ভর্জিত
 তণ্ডুল লাগিয়া রহিয়াছে, দক্ষিণ হস্তের মুটার ভিতরও দুই
 চারিটি ছিল । ধনী সেই ভর্জিত তণ্ডুলের প্রতি দৃষ্টি পাত
 করিয়া কহিলেন, এ কি মহাশয় ! এমন শিশুকে ভর্জিত
 তণ্ডুল খাইতে দিয়াছেন কেন ? একপ ক্ষুদ্র শিশুকে প্রাতে
 উষ্ণ মোহনভোগ ব্যতিরেকে আর কিছুই খাইতে দিবেন না ।
 সেই স্মরণে ব্রাহ্মণ আপন দরিদ্রতার উপর একটি কবিতা
 আবৃত্তি করিয়া তাহার ব্যাখ্যা আরম্ভ করিলেন । চুরদৃষ্ট বশতঃ
 যে ব্যক্তির নিকট কবিতার ব্যাখ্যা করিতে লাগিলেন, সে
 ব্যক্তির সংস্কৃতে কিছু মাত্র জ্ঞান ছিল না ; সুতরাং সেই কবি-
 তায় ঐ ধন মদে মত্ত ব্যক্তি কর্ণ পাত না করিয়া কিল্করকে
 বলিলেন, আমার চা খাইবার আয়োজন করিয়া দে । ভৃত্য
 তৎক্ষণাৎ এক রজত পাত্রে চায়ের সমস্ত আয়োজন আনিয়া
 তাঁহার সম্মুখে রাখিল । ধনী ব্যক্তি চা খাইতে খাইতে
 আপন আপিত্যের কথা আরম্ভ করিলেন । ব্রাহ্মণ কি অবস্থা-
 পন্নলোক তাহার একটি কথাও জিজ্ঞাসা করিলেন না । ধন
 মদে মত্ত ব্যক্তির ব্যবহার দেখিয়া ব্রাহ্মণ মনে মনে ভাবিলেন
 যে, ঈশ্বর যখন আমাকে দরিদ্র করিয়াছেন, তখন সেই দরিদ্র্য
 ভঞ্জন ভগবান্ ব্যতিরেকে আমার দুঃখের অন্ত হইবে না ।
 প্রত্যয়ে উঠিয়া যদি হৃদয়ের সহিত ভগবানকে ডাকিতাম,

তাহা হইলে, ইহ পর কালের কার্য্য হইত । আমার সেই পথ পরিত্যাগ করিয়া নরাদম ধনীর গৃহে প্রবেশ করা অন্যায় হইয়াছে । এই রূপ চিন্তা করিতে করিতে ব্রাহ্মণ পুত্রটি ক্রোড়ে করিয়া আপন আবাসে উপস্থিত হইলেন । শিশু সন্তানটি ব্যগ্র হইয়া পিতার ক্রোড় হইতে অবতরণ করিল ও পুনর্বার সেই বাটি লইয়া ভর্জিত তণ্ডুল চর্ষণ করিতে লাগিল । তদ্রূপে ব্রাহ্মণ আর চক্ষের জল সম্বরণ করিতে পারিলেন না । স্ত্রীলোকের ন্যায় আকুল হৃদয়ে রোদন করিতে লাগিলেন ।

যে সকল লোকের কন্যা পুত্র আছে, প্রিয়বাদিনী ভাৰ্য্যা আছে ; কিন্তু কেবল এক অর্থ না থাকাতেই সেই পুত্র কলত্র সম্বন্ধেও তিনি এক মুহূর্তের জন্য স্মৃথী হইতে পারেন না । এমন অনেক দেখা গিয়াছে যে, কোন পতিপরায়ণা রমণী স্বামী পরলোক গত হইলে, অপোগণ্ড শিশু সন্তানগুলি লইয়া যার পর নাই ব্যতিব্যস্ত হইয়া পড়েন । যত দিন হস্তে পূৰ্ণ সঞ্চিত কিছু অর্থ থাকে, তত দিন কুটুম্ব বান্ধবের নিকট আপন দরিদ্রতার বিষয় গোপন করিয়া কায় ক্লেশে দিন পাত করিয়া থাকেন । যখন সঞ্চিত অর্থ একেবারে নিঃশেষ হইয়া যায়, সেই সময় ত্রিভুবন শূন্য দেখিতে থাকেন । সন্তানগুলি তখন জননী ভিন্ন আর কিছুই জানে না । তাহার হস্তে অর্থ আছে কি না, তাহারও সংবাদ রাখে না, ক্ষুণ্ণ হইলেই আহাৰ করিতে চাহে ও প্রতিবেশীর সন্তান সন্ততির্য্যে রূপ উত্তম বসন ভূষণ পরিধান করে, উপাদেয় খাদ্য সামগ্রী ভক্ষণ করে, তাহারা দুঃখিনীর সন্তান হইয়াও সেই রূপ অশ্লব বসনের জন্য ঘোরতর আৰ্ত্তনাদ

করিয়া জননীকে ব্যাকুল করিয়া তুলে। তিনি অবোধ বালক বালিকাকে বচনের দ্বারা ক্ষান্ত করিতে না পারিয়া একেবারে বিষাদ সাগরে নিমগ্ন হইয়া পড়েন।

যে সকল সাংসারী রমণী পতি বিয়োগের পর ক্ষুদ্র ক্ষুদ্র পুত্র কন্যাগণকে মানুষ করিয়া তুলিয়াছেন, তাঁহারা সাক্ষাৎ সাবিত্রী। বুদ্ধা স্ত্রীলোকগণের মুখে গল্প শুনিয়াছি, কোন ভদ্র মহিলা কেবল এক চরকায় সূতা কাটিয়া দুইটি পুত্রকে কৃতবিদ্য করিয়া তুলিয়াছিলেন। কালে সেই স্ত্রীলোকটির জ্যেষ্ঠ পুত্র ধনবান্ হইয়া চির দুঃখিনী জননার দুঃখের অন্ত করিয়াছিলেন। এই কলিকাতা মহানগরীর মধ্যেও অনেক গৃহস্থের সময়ে সময়ে সংসারে বিলক্ষণ অপ্রতুল ঘটয়া থাকে; কিন্তু রাজ-ধানীর লোকের অর্থ কষ্টে উপস্থিত হইলে, তাঁহারা আর ধর্ম পথ রক্ষা করিতে পারেন না। প্রতারণা দ্বারা অর্থোপার্জনের চেষ্টায় গিয়া পুত্র কন্যাদিগকে আরও বিপদগ্রস্ত করিয়া ফেলেন। নীতি বিশারদ কোন পণ্ডিত বলিয়াছেন যে, এক দারিদ্র্য দোষেই লোকের বহু গুণ নষ্ট করিয়া দেয়; কেন না, যাচককে সংসারের লোক ভৃগু হইতে লঘু জ্ঞান করে। দরিদ্রগণ যত ক্ষণ হস্ত বিস্তার করিয়া লোকের নিকট যাজ্ঞা না করে, তত ক্ষণ তাহাদিগের সমস্ত মান মর্যাদা রক্ষা হয়। মুখে এক বার ‘ভিক্ষাং দেহি’ এই শব্দ উচ্চারণ করিলেই মহাবিজ্ঞ পণ্ডিতকেও লঘু হইয়া পড়িতে হয়। এই জন্যই ভগবান্ বিষ্ণু বলি রাজার যজ্ঞে বামন মূর্ত্তি ধারণ করিয়া যাজ্ঞা করিতে গিয়াছিলেন।

এক জন পণ্ডিত কহিয়াছেন যে, কৃতবিদ্য পুরুষেরই প্রায় দারিদ্র্য দশা ঘটয়া থাকে কেন? তিনি এই প্রশ্নের মীমাংসা

করিয়াছেন যে, যাঁহার বিদ্যারসাস্বাদনে কচি জন্মে, তিনি ধনকে অতি অকিঞ্চিৎকর বোধ করেন ; কেন না, ধন কোন কালেই মনুষ্যকে সৰ্ব্বতোভাবে সন্তোষ দান করিতে পারে না, বিদ্যাই অনায়াসে' সে কার্য্যে সক্ষম হয়। যে সকল ছাত্র একাহারে বহু কষ্ট সহ্য করিয়া বিদ্যালয়ে অধ্যয়ন করে, তৎ কালে তাহাদিগের শারীরিক কষ্টকে কষ্ট বলিয়া অনুভূত হয় না। যে দিন একটি নিগূঢ় ভাব সুন্দর রূপে হৃদয়ঙ্গম করিতে পারে, সে দিন আর তাহার আত্মার পরিসীমা থাকে না। যাঁহার অগ্র পশ্চাৎ বিবেচনা না করিয়া দারপরিগ্রহ করিয়া বহু অপত্যের জন্মদাতা হয়, তাহাদিগেরই দারিদ্র্য দশা ঘটে। আপনার উদরের জন্য প্রায় কাহারও মনঃপীড়া উপস্থিত হয় না ; যেন তেন প্রকারে দিন পাত হইতে পারে ; কিন্তু অক্ষম অবস্থায় বিবাহ করিলেই কৃতবিদ্য ব্যক্তিরও মনের শান্তি ভঙ্গ হইয়া যায়। তাহার উপর আবার অপত্য হইলে, দুর্দশার অবধি থাকে না। যেমন একটি বিগ্রহ প্রতিষ্ঠা করিলে, তৎ সেবার জন্য ভক্তকে শশব্যস্ত হইয়া বেড়াইতে হয় ; অথচ সে বিগ্রহ দ্বারা প্রতিষ্ঠাকারীর সাক্ষাৎ সম্বন্ধে কোন উপকারই দর্শে না। নিধন পুরুষের দার পরিগ্রহও সেই রূপ বিভ্রমনার হেতু হইয়া উঠে। বিগ্রহের ন্যায় যদি বিবাহিতা স্ত্রীকে উত্তম রূপে বজ্রালঙ্কারে সাজাইতে পারে, উত্তম উত্তম খাদ্য সামগ্রী আহার করাইতে পারে, সৰ্ব্বদা তদীয় আজাবহ হইয়া চলিতে পারে, তবেই দুই এক দিবসের জন্য স্ত্রী লইয়া স্মৃথী হয় ; নতুবা যত কেন কৃতবিদ্য হউন না, যত কেন শান্ত প্রকৃতির লোক হউন না, যত কেন সদাশয় ও সাধু হউন না, স্ত্রীসেবায় অক্ষম হইলে, তদীয় বাক্য বাণে সৰ্ব্ব ক্ষণ জর্জরী-

ভূত হইতে হইবে, মুহূর্ত্ত কালও মনে শান্তি থাকিবে না। একটা সামান্য কথায় বলিয়া থাকে যে, গাড়ী ঘোড়া, উদ্যান, উন্নত অটালিকা ও স্ত্রী ঐশ্বর্য্যশালী লোকেরই শোভা পায়, ধনহীনের পক্ষে বিড়ম্বনার কারণ হইয়া উঠে।

অগ্রে ধন সঞ্চয় কর, তাহার পর দার পরিগ্রহ করিও, পুত্র কামনা করিও। দারিদ্র্যাবস্থায় কেবল শাস্ত্রীয় বচনের উপর নির্ভর করিয়া দার পরিগ্রহ পূর্ব্বক স্বেচ্ছায় সংসার তরঙ্গে ঝাঁপ দিও না। তাহা হইলে, দুঃখের অবধি থাকিবে না। কেবল এক অবिवেচনার দোষেই এ দেশের লোক দারিদ্র্যতা নিবন্ধন ঘোরতর মনঃপীড়া ভোগ করিয়া থাকে।

ত্রিতাপ ।

সংসারীর পক্ষে যে সকল অসুখের কারণ বর্তমান আছে, তৎ সমুদয় তিন শ্রেণীতে বিভক্ত যথা—আধ্যাত্মিক, আধিদৈবিক ও আধিভৌতিক। যে তাপ দ্বারা আত্মা কলুষিত হয়, তাহাকেই আধ্যাত্মিক তাপ কহে। যদ্বারা দৈব প্রতিকূল হইয়া সংসারীকে তাপিত করে, তাহাকেই আমরা আধিদৈবিক কহিয়া থাকি। ভূত সম্বন্ধীয় অর্থাৎ শরীর সম্বন্ধীয় কষ্টকে শাস্ত্রকারেরা আধিভৌতিক কষ্ট কহেন। এই ত্রিবিধ তাপ নিবারণের পূর্বে ত্রিতাপের বিশিষ্ট কারণ সংক্ষেপে বিবৃত করা যাইতেছে ;—

যে তাপ দ্বারা আত্মা কলুষিত হয়, তাহার কতকগুলি কারণ আমাদের নিজ বুদ্ধির দোষে হইয়া থাকে। ত্রিবিধ তাপের মধ্যে আত্মসম্বন্ধীয় তাপ সমূহ কষ্টদায়ক। ইহাতে চিত্তানলের ন্যায় সর্ব শরীর দক্ষ হইতে থাকে। যে আত্মা পরিতুষ্ট হইলে, জগৎ তুষ্ট, সেই আত্মার বিকৃতি ঘটিলে, আমাদের আর কোন সুখেরই সম্ভাবনা থাকে না। এক ব্যক্তি রাজাধিরাজ হইয়াও যদি বুদ্ধির দোষে উৎকট পাপগ্রস্ত হয়। পাপ জনিত অনুতাপ কালে উক্ত নরপতির অতুল ঐশ্বর্য ও বিস্তৃত রাজ্যাধিকার স্বত্ত্বেও এই সংসারকে নরকাগ্নির ন্যায় বোধ হইতে থাকে। কোথায় গেলে চিন্তের সম্ভোষ জন্মিবে, আত্মার স্মৃতি হইবে ও শরীরের গ্লানি নিবৃত্তি হইবে, এই রূপ সুখময় স্থানের অনু-

সন্ধানের প্রবৃত্তি হয়, কখন অকাতরে দান করিয়া চিত্ত শুদ্ধি করিতে যায়, কখন যাগ যজ্ঞ ও ব্রতানুষ্ঠান দ্বারা মনকে প্রকৃতিস্থ করিবার চেষ্টা দেখে, তাহাতে যখন কিছু মাত্র ফলোদয় হয় না, তখন সৎ সঙ্গে সৎ কথার আলোচনায় প্রবৃত্ত হয় ; সজ্জনেরা যখন কথার প্রসঙ্গে পাপকে মূর্ত্তিমান্ন করিয়া তুলেন, তখন সেই ব্যক্তি ভয়ে অকৃষ্ট হইয়া আরও কষ্ট পাইতে থাকে। অবশেষে অন্য উপায় না দেখিয়া প্রকৃত জ্ঞানবান্ লোককে গুরু জ্ঞান করিয়া তাঁহার নিকট আপনার সমস্ত আন্তরিক পাপের কথা প্রকাশ করিয়া বলিয়া থাকে, তদ্বারা আত্মগ্লানির অনেক উপশম হয়। যখন নিতান্ত সজ্জনের নিকট পাপাত্মারা আপন পাপের কথা বিস্তারে বর্ণন করিতে আরম্ভ করে, তখন সেই সাধুগণ তাহাদিগের প্রতি অশ্রদ্ধা করেন না, বরং দয়াদ্রি চিত্তে তাহাদিগেকে উচিত উপদেশ দিতে আরম্ভ করেন। রামায়ণে দম্ভ্য রত্নাকরের ন্যায় উৎকট পাপী আর ছিল না। আরণ্য পথে কেবল এক খণ্ড বস্ত্রের জন্য অনায়াসে একটি মহাপ্রাণীর প্রাণ বিনষ্ট করিতে তাহার কিছু মাত্র কষ্ট অনুভব হইত না। কোন সময়ে দেবর্ষি নারদ অপর এক জন মহাবিজ্ঞ ঋষিকে সমভিব্যাহারে লইয়া সেই আরণ্য পথ দিয়া গমন করিতেছিলেন। রত্নাকর বৃক্ষের অন্তরালে দাঁড়াইয়া দেখিল যে, ছুই জন ঋষি তাহার নিকটবর্ত্তী হইতেছে। রত্নাকর তৎক্ষণাৎ মুদ্রার উত্তোলন করিয়া লক্ষ প্রদান করিতে করিতে তাঁহাদিগের সম্মুখে আসিয়া উপস্থিত হইল। তাহাকে দেখিয়া নারদ বলিলেন, তুমি কি সাহসে ব্রহ্মহত্যা করিতে অগ্রসর হইয়াছ? তোমার একপ পাপকার্য্য করিবার অভিপ্রায় কি? রত্নাকর হাস্য করিয়া কহিল, আমি

আমার রমণীর প্রণয় পাশে আবদ্ধ হইয়াছি, তাহার গর্ভে আমার তিন চারটি পুত্র কন্যা জন্মিয়াছে। অনেকগুলি পরিবার হইয়া পড়াতে আমি এই দস্যু বৃত্তি অবলম্বন করিয়া তাহাদিগের ভরণ পোষণ করি। এক্ষণে তোমরা নয়ন মুদ্রিত কর, এই মুদারাম্বাতে তোমাদিগের জীবনান্ত করিয়া যাহা কিছু পাইব, তদ্বারা আমাদের অদ্যকার আহাৰাদি সূচাক রূপে নির্বাহ হইতে পারিবে। নারদ পুনর্বার বলিলেন, আমরা যখন তোমার হস্তে পড়িয়াছি, তখন আমাদিগকে বিনাশ করিয়া তোমার যৎকিঞ্চিৎ উপার্জনের পথে আর কোন প্রতিবন্ধক ঘটবে না; কিন্তু মৃত্যু কালে আমরা তোমাকে একটি অনুরোধ করিতেছি, যদি সেই অনুরোধটি রক্ষা কর, তাহা হইলে, আমরা মরিতে কিছু মাত্র অস্ব্থ বোধ করিব না। রত্নাকর বলিল, আচ্ছা বল, যদি সঙ্গত হয়, তাহা হইলে, অবশ্য শুনিব। নারদ বলিলেন, আমরা যেমন অদ্য তোমার হস্তে মরিলাম, তোমাকেও এক দিন আমাদের ন্যায় মরিতে হইবে কি না? রত্নাকর বলিল, হাঁ, মনুষ্য দেহ ধারণ করিয়া মরিতে হইবে, তাহা ত জানি, তবে দুই চারি দিন অগ্র পশ্চাৎ, এই মাত্র প্রভেদ। নারদ পুনর্বার বলিলেন, মৃত্যুর পর জীবের কি দশা ঘটিয়া থাকে? রত্নাকর বলিল, যে যেকপ কার্য্য করিবে, তাহার সেই রূপ গতি হইবে, এই ত শুনিয়াছি। নারদ বলিলেন, তুমি যে সকল কার্য্য করিতেছ, ইহা দ্বারা পর কালে তোমাকে নরক যন্ত্রণা ভোগ করিতে হইবে কি না? রত্নাকর প্রত্যুত্তর দিল, আমি একাকী কেন ভুগিব? যাহাদিগের লালন পালনের জন্ত দস্যু বৃত্তি করিতেছি, তাহারা আমার

পাপের সম অংশী হইবে। নারদ বলিলেন, ভাল, এই কথা তোমার স্ত্রী পুত্রগণকে এক বার জিজ্ঞাসা করিয়া আইস। যদি তাহারা তোমার পাপের সম অংশী হয়, তাহা হইলে, আমরা তোমাকে দম্ব্য বৃত্তি পরিত্যাগ করিতে বলিব না। রত্নাকর বলিল, তোমরা কি ধূর্ত ! আমি বাটীতে জিজ্ঞাসা করিতে যাইব, আর সেই অবসরে তোমরা পলায়ন করিবে। নারদ বলিলেন, না, আমরা কখনই পলায়ন করিব না। যদি কথায় বিশ্বাস না হয়, তবে লতা পাশে এই বৃক্ষের সহিত আমরাদিগকে বন্ধন করিয়া রাখিয়া যাও। রত্নাকর বলিল, উত্তম, আমি তোমাদিগের এই সামান্য অভিলাষ পূর্ণ করিব। এই কথা বলিয়া ঋষি দ্বয়কে বৃক্ষে দৃঢ় রূপে বন্ধন করিয়া গৃহাভিমুখে চলিল। ইতি পূর্বে নারদ যে পর কালের কথা উত্থাপন করিয়াছিলেন, রত্নাকর তাহাই ভাবিতে ভাবিতে গৃহাভিমুখে চলিতে লাগিল। কিয়দূর যাইতে না যাইতে তাহার মনোমধ্যে পূর্ব সংস্কার জনিত সামান্য জ্ঞান উদ্ভীষ্ট হইয়া উঠিল। ইহাতে সে কিঞ্চিৎ বিমর্ষ ভাবে আবাসে উপস্থিত হইয়া প্রথমতঃ স্ত্রীকে জিজ্ঞাসা করিল, আমি যে এই দম্ব্য বৃত্তি করিয়া তোমার ভরণ পোষণ করিতেছি, এ পাপের উচিত দণ্ড কে ভোগ করিবে? দম্ব্যপত্নী বলিল, তুমি এই সামান্য কথার মীমাংসা করিতে পার নাই? যে পাপ করে, সেই তাহার ফল ভোগী হয়। আমি তোমাকে পাপ দ্বারা উপার্জন করিবার পরামর্শ দিই নাই; যে প্রকারে পার, আমার ভরণ পোষণ করিবে, তোমার সহিত আমার এই মাত্র সম্বন্ধ। পত্নীর এই কথা শ্রবণ মাত্রেই রত্নাকরের মন পূর্বাপেক্ষা আরও ব্যাকুল হইয়া উঠিল। সে অশ্রু পূর্ণ লোচনে পুত্র কন্যাগণকে

জিজ্ঞাসা করিল, তোমাদিগের লালন পালনের জন্য আমি পুঞ্জ পুঞ্জ পাপ করিয়াছি । তোমরা যেমন আমার উপার্জনের সমান অংশ ভোগ করিতেছ, সেই রূপ চরমে আমার পাপের সমান অংশ গ্রহণ করিবে কি না ? ইহাতে দম্ভ সন্তানগণ কহিল, না পিতঃ, কেহই কাহারও পাপের ভাগী হয় না । এই কথা শুনিয়া রত্নাকর উচ্চ স্বরে রোদন করিয়া উঠিল । তাহার হৃদয় মধ্যে সৰ্ব্বতোভাবে দিব্য জ্ঞান বিকশিত হওয়াতে সে পাপ পুণ্যের প্রভেদ বুঝিতে লাগিল । পূর্বে কি ছিলাম, এক্ষণেই বা কি হইয়াছি, তৎ সমুদয় স্মরণ হইল । সে আর ক্ষণ কালও পরিবারের মধ্যে না দাঁড়াইয়া উর্দ্ধ শ্বাসে ঋষি ঘরের নিকটে উপস্থিত হইল ও তাঁহাদিগকে সান্ত্বন্যে প্রণাম করিয়া কর পুটে বলিল, গুরুদেব ! আমাকে রক্ষা করুন, আমি পাপ ভারে ভারাক্রান্ত হইয়া পড়িয়াছি । আর পাপের ভার বহন করিতে পারিতেছি না—অসহ্য হইয়াছে । এই কথা বলিতে বলিতে ঋষি ঘরের বন্ধন মোচন করিয়া দিল । নারদ দেখিলেন, রত্নাকরের দিব্য জ্ঞান উপস্থিত হইয়াছে, আধ্যাত্মিক তাপ কাহাকে বলে, সে তাহা বিলক্ষণ অনুভব করিতেছে ।

রত্নাকর সম্বন্ধে যে ক্ষুদ্র গল্পটি লিখিত হইল, ইহার পরি-
শিষ্টাংশে আধ্যাত্মিক তাপের পরিচয় প্রাপ্ত হওয়া যাইতেছে ।
ত্রিতাপের মধ্যে উক্ত গল্পটিতে রত্নাকরের মনে আধ্যাত্মিক
তাপ ঘটিয়াছিল ।

যে সকল মহাত্মারা সংসারাক্রমে প্রবেশ করেন নাই,
ত্রিবিধ তাপ বর্তমানেও সামান্য কারণে তাঁহারা সে তাপে
তাপিত হন না । সংসারীর পক্ষে আত্মা কলুষিত হইবার

সামান্য সামান্য শত শত কারণ আছে। যাঁহারা সংসারী নহেন, তাঁহাদিগের আত্মা কি জন্ম সামান্য কারণে আধ্যাত্মিক তাপে তাপিত হইবে? জ্ঞানী লোকেরা আপনার আত্মাকে সেই আশ্রয় ঈশ্বরে অর্পণ করিয়া দিন যামিনী নিমীলিত নয়নে চৈতন্য স্বরূপ পরম বিভূকে ধ্যান করিতেছেন। যদিও তাঁহাদিগের সম্মুখে সংসারের প্রবল তরঙ্গ অজ্ঞ সংসারী লোককে প্রতি ক্রণ আকুল করিয়া তুলিতেছে; কিন্তু সে তরঙ্গে জ্ঞানবানের কিছু মাত্র আতঙ্ক হয় না। যে হেতু, তাঁহারা সংসারের মহামোহে স্তম্ভ নহেন। তাঁহারা অন্তরের সহিত চৈতন্য স্বরূপ ঈশ্বরের প্রেমে উন্মত্ত হইয়া কখন হাসিতেছেন, কখন কাঁদিতেছেন, কখন বা নৃত্য করিতেছেন। রোদন দুই প্রকার—শোক দুঃখে আত্মা কলুষিত হইলে, নয়ন অশ্রু পূর্ণ হয়; কিন্তু জ্ঞানী লোকেরা ভগবৎ প্রেমে বিহ্বল হইয়া আনন্দাশ্রু পাত করিয়া থাকেন। সে রোদনে আত্মা কলুষিত হয় না, বরং স্মৃতি পাইতে থাকে।

বৈবাহিক সূত্রে আবদ্ধ হইয়া কতকগুলি লোক ইচ্ছা পূর্বক আধ্যাত্মিক তাপকে আকর্ষণ করে। দার পরিগ্রহ করিবার পরই তাহাদিগের মনে একেবারে বিলাস মূর্ত্তিমান হইয়া উদয় হয়। কিসে সহধর্ম্মিণীকে একটি সুন্দর গৃহে রাখিব, গৃহটি উত্তম রূপে সজ্জিত করিয়া দিব, কি প্রকারে প্রিয়তমাকে উত্তম উত্তম বস্ত্রালঙ্কারে বিভূষিত করিব ও কি করিলে পত্নী সর্ব্বতোভাবে আমাতে অনুরক্ত হইবেন, এই সকল বিষয়ের কিছু মাত্র বৈলক্ষণ্য ঘটিলেই, আত্মা কলুষিত হইয়া উঠে। যদি কোন ব্যক্তি সৌভাগ্য বশতঃ একটি সর্বাঙ্গ সুন্দরী রমণীর

পাণি গ্রহণ করে, তাহা হইলে, সেই রমণীর চরিত্রের প্রতি অকারণ সন্দেহ করিয়া সে ব্যক্তি দিবা রাত্রি মানসিক সম্বাপে দক্ষ হইতে থাকে । যদি সেই স্ত্রীলোকটি আপনার সহোদরকে দেখিয়াও হাস্য করে, তাহা হইলে, সেই রমণীর পতির আর ক্রোধের পরিসীমা থাকে না । তাহার স্ত্রী সর্সাক্ষ সুন্দরী, তাহাতে নব যৌবনা ; এই জন্য সেই অবোধ পুরুষ সর্সাক্ষ এই ইচ্ছা করে যে, জগৎ শুদ্ধ লোক অন্ধ হইয়া থাকুক, তাহা হইলে, আর কেহই তাহার স্ত্রীর প্রতি দৃষ্টি করিতে পারিবে না । ন্যূনাধিক পঞ্চ বর্ষ অতীত হইল, কলিকাতা নিবাসী কোন সম্পন্ন তন্তুবায় পুত্র একটি সুকুপা কামিনীর পাণি গ্রহণ করে । পতি ও পত্নীর বয়ঃক্রমের ন্যূনাধিকতা অতি অল্পই ছিল । বিবাহের পূর্বে সেই যুবক বিদ্যা অভ্যাসে বিশেষ মনোযোগী থাকাতে সর্সদাই লেখা পড়ার চেষ্টা করিত । বিবাহের পর সহপর্ম্মণীকে সর্সাক্ষ চক্ষুর উপর রাখিতে আরম্ভ করিল । রজনীতে শয়ন গৃহের বাহিরে আসিলে, সন্দিক্ত চিত্তে নিভৃত স্থানে দাঁড়াইয়া আপন স্ত্রীর সদসৎ চরিত্রের পরীক্ষা করিত । কেবল এক স্ত্রী লইয়া উক্ত যুবক একেবারে উন্মত্ত হইয়া উঠিল, এক মুহূর্তের জন্যও বাটীর বহির্ভাগে আসিত না । সেই তন্তুবায়দের বাটীর পশ্চাতেই কতকগুলি গণিকা বাস করিত । তাহার স্ত্রী এক দিন ছাদের উপর উঠিয়া ঐ সমবয়স্কা বারবিলাসিনীদের সহিত কথা বার্তা কহিতেছেন, উক্ত যুবা নিভৃত দাঁড়াইয়া তাহা দেখিল । বেশ্যার সঙ্গে আমার স্ত্রী কথা কহিতেছে, ইহাতে অবগুই উহার মনে কোন দুর্ভাবসিদ্ধি আছে । তবেইত আর

উৎসাহে গৃহে রাখা আমার পক্ষে অসম্ভব হইয়া উঠিবে। বোধ হয়, বেশ্যাদিগের গৃহ সজ্জা, বস্ত্রালঙ্কার ও পর পুরুষের সহিত স্বাধীন ভাবে আহার বিহার প্রভৃতি করিতে দেখিয়া আমার স্ত্রীরও বেশ্যা রূপ্তি অবলম্বনে নিশ্চয়ই কচি জন্মিয়াছে। তাহা না হইলে, ঐ গণিকাগণের সজ্জিত কথা বার্তা কহিতে যাইবে কেন? এই রূপ ভাবনা যুক্ত হইয়া সেই যুবক ভূরি পরিমাণে আধ্যাত্মিক তাপ ভোগ করিতে লাগিল।

আমাদিগের দেশে লোকে পুত্র না জন্মিলে মনে মনে অত্যন্ত দুঃখিত হইয়া থাকে। কেন না, শাস্ত্রে লিখিত আছে, পুত্র ব্যতিরেকে মানবের পুন্মাম নরক হইতে উদ্ধার হয় না। এই কুসংস্কারের জন্য এ দেশের অনেক লোক বহু কষ্টে অর্থ সঞ্চয় করিয়া বৃদ্ধাবস্থাতেও দার পরিগ্রহ করিয়া থাকেন। তাহার পর যদি সময়ে সম্ভান না হয়, তাহা হইলে, পুত্র কামনায় দেব দেবীর নিকট মনন করিয়া বেড়ায়, যত দিন পুত্র না হয়, তত দিন আর মনঃ কষ্টের অবধি থাকে না। কালে সেই সকল লোকের যদি একটি পুত্র হয়, তাহা হইলে, আত্মাদে উন্নত হইয়া সেই পুত্রের জাতকর্মে, অন্নপ্রাশনে ও কর্ণবেধ প্রভৃতি কার্যে আপনার ক্ষমতার অতীত ব্যয় করিয়া থাকে। ক্ষমতার অধিক ব্যয় করিতে গেলে, লোকে ঋণগ্রস্ত হইয়া পড়ে, এ কথা বলা বাহুল্য মাত্র। বৃদ্ধ বয়সে সম্ভান হইলে, কেবল গৃহিণীকে পরিতুষ্ট করিতে গিয়া একগণকার অনেক লোক ঋণগ্রস্ত হইয়া থাকে। কালে সেই ঋণ বর্জিত হইয়া উঠে। তখন উত্তমর্গগণের তাড়না ও তিরস্কারে আত্মা কলুষিত হইতে থাকে। সাধনের ধন পুত্ররত্নকে ক্রোড়ে পাইয়াও আর মনে

শান্তি থাকে না, স্থান ভাৱে ভাৱাক্ৰান্ত হইয়া দিন যামিনী চিন্তা সাগরে ডুবিয়া থাকে । এ দিকে আবার এই সকল কষ্টের উপর সেই প্রিয় পুত্ৰের মৃত্যু হইলে, গৃহস্থ পক্ষে কি ৰূপ আধ্যাত্মিক তাপে তাপিত হইতে হয়, তাহা আমরা সৰ্ব্ব বিধায় ভাবিয়া উঠিতে পারি না । যদি সেই ব্যক্তি প্রকৃত জ্ঞানবান্ হইত, তাহা হইলে, পুত্ৰ অভাবে পুত্ৰ কামনায় অধৈৰ্য্য হইয়া মনোভ্ৰংশভোগ করিত না, কিম্বা পুত্ৰ বিয়োগেও আধ্যাত্মিক তাপে তাপিত হইয়া হাহাকার করিত না ।

পুরাণে কথিত আছে, শ্ৰীকৃষ্ণ প্রিয় সখা উদ্ধবকে বলিয়াছিলেন, সখে, গৃহস্থাশ্রমের অপেক্ষা উত্তম আশ্রম আর নাই ; কেন না, গৃহস্থেরাই কেবল সকল আশ্রমীয় লোকের সহায়তা করিয়া থাকে । বিশেষতঃ, পিতা, মাতা, স্ত্রী, পুত্ৰ প্রভৃতি পরিবার লইয়া যাঁহারা সংসারাত্মক করিতেছেন, তাঁহারা এই মৰ্ত্ত্য লোকেই স্বৰ্গ স্মৃথ অনুভব করিয়া থাকেন । শ্ৰীকৃষ্ণ উদ্ধব সংবাদে নানা কথার প্রসঙ্গ হইয়াছিল ; কিন্তু আবার সৰ্ব্ব শেষে শ্ৰীকৃষ্ণ উদ্ধবকে বলিয়াছিলেন, মনুষ্যের দার পরিগ্রহ করার ন্যায় অপকার্য্য আর কি আছে । দারা হইতে কন্যা পুত্ৰ উৎপন্ন হয়, তাহাদিগের লালন পালনের জন্য গৃহীরা সৰ্ব্বদা শশব্যস্ত হইয়া বেড়ায় । কিসে ধন উপার্জন করিব, কিসে পুত্ৰ কলত্ৰাদিকে স্মৃখী করিব, এই চিন্তাই তাহাদিগের মুখ্য চিন্তা হইয়া উঠে । দিন যামিনীর মধ্যে এক বারও ভগবানকে ভাবিবার অবসর প্রাপ্ত হয় না । অতএব হে উদ্ধব, আমি তোমাকে স্বৰূপ কথা বলিতেছি যে, কেবল পুত্ৰ কলত্ৰের জন্যই গৃহীরা অস্মৃখী হইয়া থাকে । দারা পুত্ৰ পরিবারই মনু-

যাকে শান্তি স্মৃতি ভোগ করিতে দেয় না । শ্রীকৃষ্ণের এই সকল কথা শুনিয়া উদ্ধব যুগ্ম করে নিবেদন করিলেন, হে যদুকুল-ভিলক, আপনার কথার ভাবার্থ আমি কিছুই বুঝিতে পারিলাম না । আপনিই পূর্ব্বে বলিয়াছিলেন যে, গৃহস্থাশ্রমই সকল আশ্রম অপেক্ষা উৎকৃষ্ট । এক্ষণে আবার পদে পদে সেই গৃহস্থাশ্রমেরই দোষ দেখাইতেছেন, ইহাতে আমার বিলক্ষণ সংশয় উপস্থিত হইয়াছে । হে মহাত্মন, আপনি আমার সংশয়চ্ছেদ করুন ।

শ্রীকৃষ্ণ বলিলেন, তুমি শাস্ত্রের যথার্থ তাৎপর্য্য বুঝিতে পার নাই, এই জন্যই সন্দিগ্ধ চিত্ত হইয়াছ । বিষয় রূপ বিষ ভোজন ব্যতিরেকে কি সহসা লোকের মনে তত্ত্ব জ্ঞান উদয় হয় ? তবে বেদব্যাসাত্মজ শুকদেবের ন্যায় বাল্য কাল হইতেও অনেকের মনে বৈরাগ্য উদয় হইয়া থাকে ; কিন্তু সে রূপ যোগী সংসারে অতি বিরল । দেখ, তক্ষরের অগ্রগণ্য রত্নাকর সদ্গুরু উপদেশ পাইয়া সংসারের মায়া পাশ ছিন্ন করিয়াছিল, অবশেষে সেই রত্নাকরই ঋষি শ্রেষ্ঠ বাল্মীকি হইয়া সংসারে অক্ষয় কীর্ত্তি সংস্থাপন করিয়া গিয়াছেন । মহাপ্রাজ্ঞ বিশ্বামিত্র যৌবনে দৌর্দণ্ড প্রতাপাব্বিত রাজা ছিলেন । তিনি এক সময়ে আপন ভুজ বলে ক্ষত্রিয় কুলকে আকুল করিয়া তুলিয়াছিলেন । অবশেষে ব্রহ্মবল ও তপোবলের প্রার্থন্য দেখিয়া তাঁহার ব্রাহ্মণ হইতে ইচ্ছা হয় ; সেই জন্যই রাজ্য স্মৃতি একেবারে তুচ্ছ জ্ঞান করিয়া যোগ সাধনে মনোনিবেশ করেন । সখে, তোমার যে সংশয় উপস্থিত হইয়াছে, তৎ সম্বন্ধে আমি একটি উদাহরণ বলিতেছি, মনোযোগ পূর্ব্বক শ্রবণ কর ;—

কোন গৃহস্থের এক মাত্র পুত্রের পিত্ত রোগ উপস্থিত

হইয়াছিল। পিত্ত রোগে নিষ সেবন করা শ্রেয়ঃ বোধে চিকিৎসক সেই বালককে নিষ সেবনের ব্যবস্থা করিয়া দেন। বালক সহজে তিক্ত রস পান করিতে চাহে না দেখিয়া তাহার পিতা বলিলেন, তুমি যত্নের সহিত এই তিক্ত রস টুকু পান কর, তাহা হইলে, আমি তোমাকে খাঁড়ের লাড়ু খাইতে দিব, সে অতি উপাদেয় সামগ্রী। বালক সেই খণ্ড লড্ডুকার লালসায় নয়ন মুদ্রিত করিয়া নিষ রস পান করিল। এ স্থলে উভয়েরই অভিপ্রায় স্বতন্ত্র। নিজ পুত্রকে পিত্ত রোগের হস্ত হইতে নিস্তার করণের মানসে তাহার পিতা খাঁড়ের লাড়ুর প্রলোভন দেখাইয়া নিষ রস পান করাইলেন ; কিন্তু রোগ হইতে মুক্ত হইব, শুদ্ধ এই অভিপ্রায়েই বালক নিষ ভোজন করিল না, কেবল একটি উপাদেয় লাড়ু খাইতে পাইব, এই লালসায় অনিচ্ছা সত্ত্বেও বালক সেই তিক্ত রস পান করিতে প্রবৃত্ত হইল। শাস্ত্রকারেরাও মনুজকুলকে গৃহস্থাশ্রমে রত করিবার জন্মই শাস্ত্রে তদাশ্রমের প্রশংসা করিয়াছেন। যদি প্রথম হইতেই কেবল এক বৈরাগ্যের উপর সমস্ত শাস্ত্রকারেরা লেখনী সঞ্চার করিতেন ও সংসারাত্মমের পদে পদে দোষ দেখাইতেন, তাহা হইলে, মনুষ্য সমাজে অত্যন্ত বিশৃঙ্খল ঘটিত। তোমরা সংসারাত্মমে প্রবেশ কর, ইহাতে অপূৰ্ণ সুখানুভব করিতে পারিবে। গৃহস্থাশ্রমের ন্যায় উৎকৃষ্ট আশ্রম আর নাই, এই রূপ বাক্যের দ্বারা সংসারবাসী মানবমণ্ডলীকে গৃহস্থাশ্রমে স্থাপিত করা হইয়াছে ; তাহার পর, যখন সংসারী লোক পুত্র কলত্রাদির ভরণ পোষণের জন্ত একেবারে উন্মত্ত হইয়া উঠে, কর্তব্য কার্য একেবারে ভুলিয়া যায়, ত্রিতাপে তাপিত হইয়া দিন যামিনী মনোদুঃখে কাল হরণ করে, সেই সময়ে সংসার-

শ্রমের অসারত্ব দর্শাইবার জন্য সদগুরু যদি আমা দ্বারা যে সকল যোগের কথা উল্লিখিত হইয়াছে, তৎ সমুদয় তন্ন তন্ন করিয়া বুঝাইয়া দেন, তাহা হইলে, মনুষ্যের ব্রহ্মজ্ঞান জন্মিতে পারিবে। সংসারকে তুচ্ছ জ্ঞান করিয়া অনায়াসে যোগ সাধনে অধিকারী হইবে। শ্রীকৃষ্ণের এই কপ কথা শুনিয়া উদ্ধবের সংশয় ছেদন হইল।

পূর্বে বলা হইয়াছে যে, এক আধ্যাত্মিক তাপই সকল তাপের শ্রেষ্ঠ। গৃহস্থশ্রমই সেই আধ্যাত্মিক তাপের আশ্রয়। যাঁহারা বাল্য যোগী, সংসারের কিছু মাত্র অবগত নহেন, তাঁহাদিগেরও আধিদৈবিক ও আধিভৌতিক তাপ উপস্থিত হইতে পারে; কিন্তু গৃহস্থ লোকের ন্যায় তাঁহারা সে তাপে তাপিত হন না। বোধ কর, কোন নিবিড় বন্য পথের মধ্য স্থলে একটি স্রোতস্বতী নদী আছে। দুই জন ধনবান্ বণিক্ ও সাত জন যোগী সেই স্রোতস্বতীর অপর পারে যাইবার জন্য এক খানি তরণীতে আরোহণ করিলেন। নৌকা খানি নদীর মধ্য স্থলে উপস্থিত হইবা মাত্রই প্রবল তরঙ্গে ভগ্ন হইয়া গেল। দুই জন বণিক্ হা হতোহস্মি! বলিয়া সেই বেগবতী নদীর জলে ঝম্প প্রদান করিলেন। সাত জন সন্ন্যাসীও অকুতোভয়ে স্রোত জলে ভাসিতে ভাসিতে চলিলেন; কিন্তু সেই দৈব বিপাকে কাহারও মৃত্যু হইল না। সকলেই বহু দূর ভাসিয়া গিয়া যে স্থানে নদী সঙ্কীর্ণ হইয়াছে, সেই স্থানের সৈকতময় তীরে উঠিলেন। সাত জন যোগী কিছু ক্ষণ শ্রম শাস্তি করিয়া হাহা শব্দে হাস্য করিতে লাগিলেন। তদ্বৃষ্টে বণিক্ দ্বয় কাঁদিতে কাঁদিতে বলিলেন, মহাশয়গণ, আপনারা এই বিপদের সময় কি স্থখে

হাসিতেছেন ? ইহা আমরা কিছুই অনুধাবন করিতে পারিলাম না ।
 আমাদের ত একেবারে সৰ্ব্বনাশ হইয়া গিয়াছে, অদ্য এই
 দৈব বিপাকে পাড়িয়া যেকপ ক্ষতিগ্রস্ত হইলাম, বোধ হয়, ইহ
 জন্মেও তাহার পূরণ করিয়া উঠিতে পারিব না । আমাদের
 পুত্র কলত্রগণের কি হইবে ? তাহারা যে দুঃখের বার্তা জানে না ।
 আমরা যেকপ ক্ষতিগ্রস্ত হইলাম, তাহাতে তাহাদিগকে আর
 রাজভোগে লালন পালন করিতে পারিব না । বণিক্‌ দ্বয়ের কথা
 শুনিয়া যোগিগণ পুনর্বার হাসিতে হাসিতে তাহাদিগকে বলি-
 লেন, তোমাদিগের ন্যায় আমরাও ক্ষতিগ্রস্ত হইয়াছি । আমা-
 দিগের প্রত্যেকের হস্তে এক একটি অলাবু পাত্র ও লৌহ
 নির্মিত এক একটি চিমটা ছিল, নদীর জলে সন্তরণ করিবার
 সময় দুই হস্তের দুইটি দ্রব্যই বাধ্য হইয়া পরিত্যাগ করিতে
 হইয়াছে ; সেই জন্যই আমরা হাশ্ব্য করিতেছি । তোমরা কিরূপ
 ক্ষতিগ্রস্ত হইয়াছ বল । দেখি, আমাদের দ্বারা যদি তাহার
 কিছু উপায় হইতে পারে ।

বণিক্‌ দ্বয় বলিলেন, আমরা দুই জনেই রত্ন পরীক্ষক বণিক্‌ ।
 দুই জনের হস্তেই বিবিধ রত্ন পরিপূরিত এক একটি কোটা ছিল ।
 তাহার এক একটি কোটার মূল্য দশ লক্ষ মুদ্রার ন্যূন নহে ।
 হে মহাভাগগণ ! বিবেচনা করিয়া দেখুন, অদ্য আমাদের কি
 সৰ্ব্বনাশ হইয়াছে ! আমরা দেশে গিয়া রত্ন ব্যবসায়ী বণিক্‌-
 গণের নিকট কি করিয়া মুখ দেখাইব ? এই কথা বলিয়া তাঁহারা
 পুনর্বার রোদন আরম্ভ করিলেন ও পুনঃ পুনঃ কপালে করাঘাত
 করিতে লাগিলেন । যোগিগণ কহিলেন, ওহে বণিক্‌ দ্বয়, আমরা
 যাহা বলিতেছি তাহা শ্রবণ কর । যদি আমাদের উপদেশ

মত কার্য্য করিতে পার, তাহা হইলে, তোমাদিগের এই উপস্থিত আধিদৈবিক তাপ ক্ষণপ্রভার ন্যায় তিরোহিত হইয়া যাইবে, আত্মারও ক্ষুণ্ণি হইবে । বণিক্ দ্বয় বলিলেন, কি আজ্ঞা করিতে-ছেন ককন । যোগিগণের মধ্যে যিনি অধিক বয়স্ক তিনি ধীরে ধীরে বলিতে লাগিলেন, দেখ, বণিক্ দ্বয়, অদ্য তোমরা দুই জন ও আমরা সাত জন এই নয় জন একত্র এক সময়ে একটি দৈব বিপাকে নিপতিত হইয়াছিলাম, তাহাতে আমাদের সকলেরই প্রাণান্ত হইবার সম্পূর্ণ সম্ভাবনা ছিল ; কিন্তু ককনাময় ঈশ্বরের অনুকম্পায় আমরা কেহই প্রাণে বিনষ্ট হই নাই । সকলেই অক্ষত শরীরে এই বালুকাময় পুলীনে উঠিয়া বসিয়াছি । আশ্চর্য্যের বিষয় এই, তোমরা কাঁদিতেছ ও আমরা হাসিতেছি । ভবিষ্যৎ ভাবিয়া তোমাদিগের মনঃ প্রাণ একেবারে আকুলিত হইয়া উঠিয়াছে ; কিন্তু আমাদের সে চিন্তার লেশ মাত্র নাই । একপ তারতম্য কেন ঘটিল ? ইহার উত্তর আমিই করিতেছি । তোমরা অদ্য যে দৈব বিপাকে পড়িয়াছিলে ও বহু কষ্টে এই স্থানে উঠিয়া প্রাণ বাঁচাইয়াছিলে, সংসার আবর্তন ইহা অপেক্ষাও ভয়ানক । সেই আবর্তনে পড়িয়া অনুক্ষণ দুরপনয় দুর্দশা ভোগ করিতেছ ; কিন্তু বিষয় মদে মত্ত হইয়া তাহা কিছুই অনুধাবন করিতে পার না । অদ্য সেই মদের কলস ভাঙ্গিয়া গিয়াছে বলিয়া তোমাদের একেবারে মনের শাস্তি ভঙ্গ হইয়াছে । এই আধিদৈবিক তাপ হইতে আধ্যাত্মিক তাপ উপস্থিত হইয়াছে । বাটী গমন না করিলে, সে তাপের পরাক্রম জানিতে পারিবে না । যখন হৃতসর্কস্ব হইয়া বাটীতে উপস্থিত হইবে, শ্রবণ মাত্রেই উত্তমর্গগণ আসিয়া উত্ত্যক্ত করিতে আরম্ভ করিবে, বিলাসী স্ত্রী পুত্রগণের কিয়ৎ পরিমাণে

বিলাসের পথ বন্ধ হইলেই, আর তাহাদিগের নিকট সুখের প্রত্যাশা থাকিবে না, নিরন্তর বাক্যবাণে জর্জরীভূত হইবে। তাহারা স্বাধীন ভাব ধারণ করিয়া তোমাদিগের ক্ষত শরীর লব-
গাক্ত করিতে আরম্ভ করিবে, তখন বুঝিতে পারিবে যে, এই আধি-
দৈবিক তাপ হইতে আধ্যাত্মিক তাপ কি ভীষণ ভাব ধারণ করিল। হয়ত এই দুই তাপে জর্জরীভূত হইতে হইতেই আধি-
ভৌতিক তাপটিও প্রচ্ছন্ন ভাবে তোমার ভৌতিক দেহে প্রবিষ্ট হইবে। কালে সেও নিজ মূর্তি ধারণ করিলে, ত্রিতাপের জ্বালায় অস্থির হইয়া উঠিবে। সেই জ্বালা অসহ্য হইলে, সংসার ধর্ম পরি-
ত্যাগ করিয়া পলায়ন করিতেও পার, উন্মাদ হইতেও পার; কিম্বা আত্ম নাশ করিয়া একেবারে সকল জ্বালা হইতে নিস্তার পাইতেও পার। এই জন্য বলিতেছি, যদি আধ্যাত্মিক তাপ হইতে নিস্তার লাভ করিতে চাহ, তাহা হইলে, আর বিষয় বাসনা করিও না, আর সংসারে প্রবেশ করিও না, স্ত্রী পুত্র পরিবারদিগের মায়া নমতা পরিত্যাগ করিয়া আমাদিগের পশ্চাদ্বর্তী হও। যদি যোগ সাধন দ্বারা কিয়ৎ পরিমাণেও তত্ত্ব জ্ঞান লাভ করিতে পার, তাহা হইলে, এই রূপ কয়েক খানা প্রস্তর হারাইয়া আর রোদন করিতে হইবে না। সেই নিষ্প্রয়োজন প্রস্তর কয়েক খানি যাহাকে তোমরা রত্ন বলিয়া থাক, যাহার জন্য তোমরা ইহ জন্মের মত দুঃখের সাগরে পড়িতে যাইতেছ, যাহা হারাইয়া তোমাদিগের হৃদয় একেবারে আকুলিত হইয়া উঠিয়াছে, সংসার শূন্য দেখিতেছ, সেই সকল অকিঞ্চিৎকর দ্রব্যকে আমরা দুই পদে দলন করিয়া থাকি। সংসারের মধ্যে যাহা সর্বাপেক্ষা উৎকৃষ্ট রত্ন তাহা আমরা সংগ্রহ করিয়া

লইয়াছি, হৃদয়ের অভ্যন্তরে রাখিয়াছি, সে রত্ন কোন কালেই তস্করে কাড়িয়া লইতে পারিবে না। যত কাল আমরা জীবিত থাকিব, তত কাল আমরা সেই রত্ন ভোগ করিব। সমাগরা ধরাপতিও আমাদিগকে সেই রত্ন হইতে বঞ্চিত করিতে পারিবে না। ইতি পূর্বে তোমরা আপন মুখেই বলিয়াছ যে, আমরা রত্ন পরীক্ষক ; কিন্তু আমাদিগের বিবেচনায় তোমরা ভস্ম অঙ্গারের পরীক্ষা করিতে পার, প্রকৃত রত্ন কাহাকে বলে, তাহার নাম গন্ধও শ্রবণ কর নাই। আমাদিগের সমভি-
 ব্যাহারে আইস, আমরা তোমাদিগকে অমূল্য রত্নের আকর দেখাইয়া দিব। পরিশ্রম করিতে পারিলেই, মনের মানসে রত্ন সংগ্রহ করিতে পারিবে। বণিক্‌ দ্বয় বলিলেন, মহাশয়গণ, আপনারা যে তত্ত্ব জ্ঞানের কথা বলিতেছেন, ধনলোভী বণিকেরা তাহার কি অধিকারী হইতে পারে? আমরা কেবল এক অর্থের ক্রীত দাস হইয়া আজন্ম কাল এই অসার সংসারে ঘুরিয়া বেড়াইতেছি। জীবনের অবশিষ্ট কালও সেই উপার্জনের জন্য বৎসরোনাস্তি কষ্ট ভোগ করিব ; কিন্তু কোন কালেই মনের মানস পূর্ণ হইবে না। এ সকল জানিয়া শূন্যিাও সাধুসঙ্গ করিতে পারিলাম না। কেবল এক ধনোপার্জনের জন্য ইহ কাল ও পর কাল হারাইলাম। শুদ্ধ অর্থলোভেই এক দিন না এক দিন এই মহামূল্য জীবন রত্ন হারাইব ; কারণ জলমগ্ন হইয়া মরা বণিকের পক্ষে কিছু বিচিত্র নহে। তবে এত দিন যে মরি নাই ও অদ্য মরিলাম না, ইহাই আশ্চর্য্য। এক্ষণে আপনাদিগকে প্রণাম করি, আশীর্বাদ ককন যেন উপস্থিত ঘটনার জন্য বণিক্‌ সমাজে অপমানিত না হই। যোগিগণের

মধ্যে এক জন বলিলেন, ওহে অর্থ লোলুপ বণিকগণ ! তোমরা এ স্থান হইতে প্রস্থান কর, আমরা এই নির্জ্জন স্থানে বসিয়া ক্রিয়ৎক্ষণ পবিত্র আমোদ আচ্ছাদ উপভোগ করি ।

বণিক্ দ্বয় যোগিগণ কর্তৃক আদিষ্ট হইয়া ধীরে ধীরে সে স্থান হইতে প্রস্থান করিলেন । যোগিগণও তথা হইতে কিঞ্চিৎ অন্তরে গিয়া একটি বৃক্ষ মূলে উপবিষ্ট হইলেন ও তত্ত্ব কথার আন্দোলন করিয়া দিনের অধিকাংশ সময় সেই স্থানেই যাপন করিলেন । তাহার পর অনায়াস লভ্য ফল ও জল খাইয়া আশ্র-নাভিমুখে চলিয়া গেলেন । বণিক্ দ্বয়ও সমস্ত দিন দুর্গম বন্য পথ পর্য্যটন করিয়া সন্ধ্যার পূর্বে আপন আপন বাটীতে উপস্থিত হইলেন । আপনাদিগের দৈব বিড়ম্বনার কথা আত্মীয় পরিবারগণকে বিজ্ঞাপিত করিয়া রোদন করিতে বসিলেন । এক এক জন রত্ন বণিকের অদৃষ্টের ফলভোগী নরনারীগণ সেই আশ্রয় দাতার আধিদৈবিক তাপে সকলেরই আধ্যাত্মিক তাপ ঘটিল । এখানে কেবল এক বিষয় বিভবই উপরি উক্ত তাপের প্রধানতম কারণ তাহাতে আর সংশয় নাই ।

পূর্বে যেমন বর্ণিত হইয়াছে যে, সাত জন যোগী ও দুই জন রত্ন বণিক্ দৈব বিপাকে পড়িয়া ক্রিয়ৎ ক্ষণ সকলেই সমান অংশে কষ্ট ভোগ করিলেন, তাহার পর সন্তরণ দ্বারা নীর হইতে তীরে উঠিয়া যোগিগণ হস্ত ও রত্ন বণিক্ দ্বয় ক্রন্দন করিতে লাগিলেন ; কিন্তু আধিদৈবিক তাপে যোগিগণকে তাপিত করিতে পারিল না । তাঁহারা ক্রিয়ৎ ক্ষণ শ্রম শাস্তি করিয়া আশ্রমে চলিয়া গেলেন । রত্নবণিকগণ কতকগুলি বহু মূল্যের রত্ন হারাইয়া অগ্রে আধিদৈবিক ও তৎপরে আধ্যাত্মিক তাপে তাপিত হইয়া

কাঁদিতে কাঁদিতে আপন আপন বাটীতে উপস্থিত হইলেন। সেই রূপ কোন সম্মুখশালী নগরে এক জন ভিক্ষুক ব্রাহ্মণ ও অপর এক জন বিপুল ধনশালী মহাজন বাস করিতেন। ভিক্ষুক ব্রাহ্মণ দিবা দুই প্রহর পর্য্যন্ত লোকের দ্বারে দ্বারে ভিক্ষা করিয়া যাহা কিছু সংগ্রহ করিত, তদ্বারা সিদ্ধ পক্ষ করিয়া তৃপ্তি পূর্ব্বক আহারান্তে আপন কুটীর দ্বারে বসিয়া মনের আনন্দে গান গাইত। তাহার কুটীরের সম্মুখস্থ উন্নত অট্টালিকার উপর বিপুল ধনশালী মহাজন দুঃখফেগনিভ শয্যার উপর উপবিষ্ট হইয়া রজতময় আলবোলায় তাম্রকূটের ধূম পান করিতেন ও চিন্তানলে দগ্ধ হইতেন। তাঁহার চিন্তার কারণ এই যে, হঠাৎ সংবাদ পাইলেন, কয়েক খানি বোঝাই কিস্তী পদ্মা দিয়া কলিকাতায় আসিতেছে। এই কাল বৈশাখীতে যদি ঝড় তুফানে পড়িয়া তরণী কয়েক খানি মারা যায়, তাহা হইলে, যথোচিত ক্ষতিগ্রস্ত হইতে হইবে। অমুক ইংরাজ বণিককে দুই লক্ষ টাকার তণ্ডুল দেওয়া গিয়াছে; কিন্তু তাহার নিকট হইতে অদ্যা-পিও এক কপর্দক আদায় হয় নাই। ষত দিন টাকাগুলি ঘরে না আসিতেছে, তত দিন আমার মন কিছুতেই স্থস্থির হইতেছে না। ব্যবসায় কার্য্য সম্বন্ধে প্রত্যহ এই রূপ নূতন চিন্তায় তাঁহার মন আকুলিত হওয়াতে বিপুল বিভবের অধিপতি হইয়াও মুহূর্ত্ত কাল সুখানুভব করিতে পারেন না।

কিয়দিবসান্তে ঐ মহাজনের দক্ষিণ চরণের উপর একটি বিস্ফোটক হইল। তাহার জ্বালা যন্ত্রণায় একেবারে অস্থির হইয়া উঠিলেন। এক দিন দুইটি নরম বালিসের উপর দক্ষিণ চরণ রাখিয়া বাতায়নের নিকট উপবিষ্ট আছেন ও মুহূর্ত্ত রাজ-

পথ নিরীক্ষণ করিতেছেন, এমন সময়ে দেখিতে পাইলেন, তাঁহার পল্লীস্থ ব্রাহ্মণ যষ্টির উপর ভর দিয়া খঞ্জের ন্যায় বহু কষ্টে আপন কুটীর দ্বারে আসিয়া উপস্থিত হইল। তদুপস্থিত ধনবান্ মহাজন জিজ্ঞাসা করিলেন, ঠাকুর, আপনার কি হইয়াছে, খঞ্জের ন্যায় চলিতেছেন কেন? ব্রাহ্মণ বলিল, বাবুজি, আর চুংখের কথা কি কহিব, এই দেখুন, বাম চরণের উপর একটা বিস্ফোটক হইয়াছে। ইহার যন্ত্রণায় সময়ে সময়ে অস্থির হইতে হয়; তথাচ উদরান্নের জন্য ভিক্ষায় যাইতে হইয়াছিল। মহাজন বলিলেন, আমারও দক্ষিণ চরণের উপর একটা বিস্ফোটক হইয়াছে, তাহাতে বড় কষ্ট পাইতেছি। মহাজন ভিক্ষুক ব্রাহ্মণের সহিত এই রূপ কথাবার্তা কহিতেছেন, এমন সময়ে মহাজনের একটি পঞ্চম বর্ষীয়া পৌত্রী ছুটিয়া আসিতে তাঁহার দক্ষিণ চরণের উপর পতিত হইল। মহাজন সেই আঘাতেই একেবারে মূচ্ছিত হইয়া পড়িলেন। কাটা ফোড়ার উপর সাংঘাতিক আঘাত লাগাতে কথির নির্গত হইতে লাগিল। মহাজন মূচ্ছিত হইয়া পড়াতে আত্মীয়, বন্ধু, পরিবার ও কর্মচারিগণ যে যেখানে যে অবস্থায় ছিল, উদ্ধ শ্বাসে সকলেই তাঁহার নিকট আসিয়া উপস্থিত হইল। কেহ ডাকার ডাকিতে ছুটিল, কেহ ক্ষত স্থানে বাতাস দিতে লাগিল, কেহ মুখে জল সেচন করিতে লাগিল, কেহ বা এক বাটা উষ্ণ দুগ্ধ আনিয়া মুখের কাছে ধরিল। মহাজন যত ক্ষণ অজ্ঞান অবস্থায় ছিলেন, তত ক্ষণ পরিবারবর্গের রোদন ধ্বনিতে বাটীর অভ্যন্তর প্রতিক্রান্ত হইতে লাগিল। সহসা বড় লোকের বাটীতে কি হইল, তাহার সঠিক সংবাদ জানিবার জন্ত পূর্ব কথিত ভিক্ষুক ব্রাহ্মণ

যেমন তাঁহার দরজার দিকে অগ্রসর হইবেন, আর অমনি হঠাৎ পড়িয়া গিয়া তাহার সেই কাঁচা ফোড়া একেবারে ক্ষত বিক্ষত হইয়া গেল। ব্রাহ্মণ কিয়ৎ ক্ষণ রাজপথের মধ্যে বসিয়া আপন। আপনি সামলাইয়া লইল। তাহার পর, বহু কষ্টে কুটীরাভ্যন্তরে প্রবিষ্ট হইয়া কধিরাস্ত ক্ষত স্থান জল দ্বারা বিলক্ষণ ধোত করিয়া ফেলিল। তাহার পর চূণের সহিত হরিদ্রা মিশ্রিত করিয়া সেই ক্ষত স্থানে চাপাইয়া অনলের উত্তাপ দিতে লাগিল। এই রূপ প্রায় এক ঘণ্টা কাল আপনি আপনার সেবা শুশ্রূষা করিয়া অবশেষে দক্ষ বার্ত্তাকু সংযোগে কতকগুলি অন্ন আহার করিয়া কথঞ্চিৎ সুস্থ হইয়া পূর্ক পূর্ক দিনের ন্যায় সম্মীত আরম্ভ করিল।

এ দিকে মহাজনকে লইয়া তদীয় বাটীতে হুলস্থূল পড়িয়া গেল। এক জনের স্থলে দুই জন ডাক্তার আসিয়া উপস্থিত হইল। ঔষধালয় হইতে নানাবিধ ঔষধ আসিল। মহাজন পূর্কপেক্ষাও উৎকৃষ্ট শয্যায় শয়ন করিয়া ঘণ্টায় ঘণ্টায় ঔষধ খাইতে লাগিলেন। ক্ষত স্থানের সেবা শুশ্রূষার জন্য এক জন চিকিৎসক নিযুক্ত রহিল। এই স্থলে স্পষ্ট দেখা যাইতেছে যে, নিম্ন লোক অপেক্ষা ধনীরাই অধিক পরিমাণে ত্রিতাপে ভাপিত হয়। দরিদ্র লোকেরা যে সকল বিষয় ভুঞ্জে বলিয়াই ধরে না, দিনান্তে শাকান্ন পাইলেই যথেষ্ট বোধ করে; কিন্তু ধনবান্ বিলাসী লোকের যদি দৈব বশতঃ এক দিন এক খানি মলিন বসন পরিধান করিতে হয়, কিম্বা মনের নিতান্ত অন্তায় অভিলাষ পূর্ণ না হয়, তাহা হইলে, হৃদয় আধ্যাত্মিক তাপে ভাপিত হইয়া উঠে। ধনী লোকের ধনের জন্য, বিলাসের জন্য ও অসদভিপ্রায় সিদ্ধির জন্য

প্রায়ই ব্যাঘাত ঘটে । সৰ্বদা অনিয়ম ও অন্তায় কার্যে রত থাকাতে শরীরে উৎকট রোগ আসিয়া আশ্রয় করে, প্রায় দেখিতে পাওয়া যায়, যাহারা অতুল ঐশ্বর্য্য ভোগ করিয়া বিলাস সাগরে ভাসিয়া থাকে, তাহারাই এক একটা উৎকট রোগ ভোগ পূৰ্ব্বক অবশেষে মৃত্যু মুখে নিপতিত হয় । সেই সকল উৎকট রোগের ঘোর যন্ত্রণা উপস্থিত হইলে, তাহাদিগের মন যে রূপ তাপে তাপিত হয়, সামান্য গৃহস্থ লোকের তাহার শতাংশের একাংশ হয় না ।

ইহা অবশ্যই স্বীকার করিতে হইবে যে, নরদেহ ধারণ করিয়া একেবারে ত্রিতাপের হস্ত হইতে নিস্তার লাভ করা অত্যন্ত দুৰূহ ব্যাপার । বিশেষতঃ, গৃহস্থাশ্রমে থাকিতে গেলে, আধ্যাত্মিক, আধিদৈবিক ও আধিভৌতিক তাপ মনুষ্যকে সহ্য করিতে হইবে । এই ত্রিতাপ নিবারণের উপায় শাস্ত্রকারেরা এক মাত্র তত্ত্ব জ্ঞানকেই অবধারিত করিয়াছেন । সংসারত্যাগী হইয়া ঈশ্বরারাধনায় মনোনিবেশ কর, তাহা হইলে, আর ত্রিতাপে তাপিত হইতে হইবে না ; কিন্তু যেমন গৃহস্থাশ্রমে ত্রিতাপের ভয় আছে, সেই রূপ আরও কতকগুলি পরম সুখ সম্ভোগের সম্ভাবনা আছে । গৃহত্যাগী হইয়া বৈরাগ্যাশ্রম গ্রহণ করা সহজ ব্যাপার নহে । এক্ষণকার কালে কয় জন লোক অতুল ঐশ্বর্য্য ও স্ত্রীপুত্র পরিবারের মায়া মোহ পরিত্যাগ করিতে পারে ? যে সকল যোগী, সন্ন্যাসী, পরম হংস ও দণ্ডাশ্রমী লোককে দেখিতে পাওয়া যায়, তাহাদিগের আভ্যন্তরিক তত্ত্ব যদি তন্ন তন্ন করিয়া অনুসন্ধান কর, তাহা হইলে, স্পষ্ট দেখিতে পাওয়া যাইবে যে, ঐ সকল সংসারত্যাগী লোক কেহ বা পরানে অনায়াসে প্রতিপালন হই-

বার জন্ম, কেহ বা সংসারের ঘোর অপ্রতুল জন্ম, কেহ বা উৎকট পাপের জন্ম সমাজচ্যুত হইয়া এবং কেহ কেহ বা যথার্থই ত্রিতাপের উগ্র তাপ সহ্য করিতে না পারিয়া গৃহত্যাগী হইয়া তীর্থস্থানে কিম্বা নির্জ্জন গিরিগুহায় অবস্থান করিতেছেন। যাঁহারা অন্যান্য কারণে গৃহত্যাগী হইয়াছেন, তাঁহারা সন্ন্যাসী হইয়াও সৰ্ব্বতোভাবে সুখী নহেন; যে হেতু, ইন্দ্রিয় দমন করিতে পারেন নাই। তজ্জন্ম ভগবানের প্রতি সৰ্ব্বতোভাবে মনকে রত করিয়া একেবারে সংসারের সমস্ত কামনা হইতে নিস্তার লাভ করিতে পারেন না। যাঁহারা গৃহ ত্যাগ করিয়াছে, অথচ লোকের দ্বারে দ্বারে ভিক্ষা করিয়া বেড়ায়, তজ্জন্ম সময়ে সময়ে লোকের তিরস্কার অসহ্য বোধে তাহাদিগকে কটু কাটব্য বলে, ক্রোধে অধীর হইয়া উঠে, তাহাদের মাদক দ্রব্য সেবনে ব্যতিক্রম ঘটিলে আর মনঃপীড়ার অবধি থাকে না। অন্য কি কথা, অনেক অনেক মহাপ্রাজ্ঞ তীর্থ স্বামীকে ও যোগী সন্ন্যাসীকে ব্যভিচারে লিপ্ত হইতে দেখা গিয়াছে। এ রূপ লোকের গৃহ ত্যাগ করা বিড়ম্বনা মাত্র।

বিশেষ বিবেচনা করিয়া দেখিতে গেলে, উপরি উক্ত বৈরাগ্যাশ্রম করিয়া সমাজের কণ্টক হওয়া অপেক্ষা দার পরিগ্রহ কর, গৃহস্থাশ্রমে থাকিয়া প্রকৃত প্রস্তাবে সজ্জনের ন্যায় ব্যবহার কর। মনকে আয়ত্ত করিতে না পারিলে, কোন আশ্রমেই সুখের সম্ভাবনা নাই। যদি ষড়্ রিপুকে আয়ত্তাদীনে রাখিতে পার, সুখ দুঃখ সমান জ্ঞান করিতে পার, বিপদে ধৈর্য্য ধারণ করিতে পার, সম্পদে উন্মত্তের ন্যায় কার্য্য না কর, স্ত্রী পুত্র পরিবারের প্রতি অনিয়মিত রূপে অনুরক্ত না হও, যখন যে অবস্থায় ঈশ্বর রাখিবেন,

তখন সেই অবস্থাতেই মনকে সন্তুষ্ট রাখিতে পার, তাহা হইলে, গৃহস্থাত্মমে থাকিয়াও অধিক পরিমাণে ত্রিতাপে তাপিত হইতে হইবে না। সৰ্ব্বদা মনে রাখিও যে, আমি একাকী নগ্ন বেশে রিত্ত হস্তে এই জগতে আসিয়াছি ও সেই ভাবেই এক দিবস এই সংসার পরিত্যাগ করিতে হইবে। অদ্যই হউক বা শত বর্ষ অন্তেই হউক মরিতেই হইবে। মৃত্যু যখন অবধারিত, অথচ নবে মরিব, তাহার সময়ের স্থির নাই, তখন সৰ্ব্ব ক্ষণ মৃত্যুকে স্মরণ করিয়া সংসার ক্ষেত্রে বিচরণ করা উচিত। এই সংসার সুখ ও দুঃখে পরিপূর্ণ। কেহ হাসিতেছে, কেহ বা কাঁদিতেছে, কেহ অতুল ঐশ্বর্য্য ভোগ করিতেছে, কেহ বা লোকের দ্বারে দ্বারে ভিক্ষা করিয়া বেড়াইতেছে, কেহ বা পরিবারের অন্ন বস্ত্র যোগাইতে অক্ষম হইয়া মনের দুঃখে কাল হরণ করিতেছে, কেহ বা বিপুল সম্পত্তি লইয়া একটি পুত্র বা কন্যার জন্য হাহাকার করিতেছে। এই বিচিত্র ব্রহ্মাণ্ডের গুপ্ত ভাব কেহই সম্পূর্ণ রূপে অনুধাবন করিয়া উঠিতে পারেন না। মুখে অনেকে অনেক কথা কহিয়া থাকেন সত্য ; কিন্তু কার্য্য কালে কাহারও হিতাহিত জ্ঞান থাকে না। সংসার একেবারে স্বার্থপরতায় পরিপূর্ণ, সকলেই অর্থের দাস, এ সকল জানিয়া শুনিয়াও যাহারা অসার সংসারকে সার ভাবিয়াছে, বিষয় মদে মত্ত হইয়া সত্য পথ ভুলিয়াছে, আমার আমার করিয়া পাগলের ন্যায় ছুটা ছুটা করিতেছে, তাহারাই উগ্র তাপ ভোগের যোগ্য পাত্র। যদি অল্পে সন্তুষ্ট হও, অধিকার বিস্তার না কর, পুত্র কলত্রের স্নেহে মুগ্ধ হইয়া না পড় ও মনে মনে সৰ্ব্বদা এই রূপ ভাবিয়া রাখ যে, মক্ষার প্রাক্কালে নানা স্থান হইতে কতকগুলি বিহঙ্গম একটি

উক্ত মহাকহে আসিয়া আশ্রয় করে, প্রত্যাষে দিগ্দিগন্তে উড়িয়া যায়, আত্মীয় বন্ধু লইয়া আমাদিগের সংসার করাও তদনুরূপ । বিবেচনা করিয়া দেখ, যখন মাতৃগর্ভ হইতে ভূমিষ্ঠ হইয়াছিলে, তখন যে জননী দশ মাস দশ দিন উদরে বহন করিয়া বহু কষ্টে প্রসব করিয়াছিলেন, তাঁহাকেও চিনিতাম না । কে পিতা, কে ভ্রাতা, কে আত্মীয় বন্ধু তাহার কিছুই অবগত ছিলাম না, বেবল ক্ষুধার সময় খাইতাম ও জড়পিণ্ডের ন্যায় পড়িয়া থাকিতাম । ক্রমে বয়োরুদ্ধির সঙ্গে সঙ্গে জ্ঞানের উদ্রেক হইল । পিতা মাতাকে ও আত্মীয় বন্ধুকে জানিলাম, ভাই ভগ্নীর সহিত সৌহার্দ্য জন্মিল । সে সময়ে যদিও আমাদিগের পুত্র কলত্র ছিল না, তথাচ আত্মীয় বন্ধুর বিয়োগে হৃদয় তাপিত হইত ; কিন্তু সে তাপ দীর্ঘ কাল স্থায়ী হইত না । কাড়ায় কৌতুকে বিশেষ মনোযোগী থাকাতে বন্ধু বান্ধব বিয়োগ জনিত শোক অতি অল্প কালের মধ্যেই ভুলিয়া যাইতাম । যৌবন সীমায় আসিয়া দার পরিগ্রহ করিলাম । বিবাহ কালে আনন্দের আর পরিসীমা রহিল না । তখন এক বারও ভাবি নাই যে, এ দার পরিগ্রহ আনন্দের নহে, সংসার আবর্তনে পড়িয়া দুঃখ ভোগের সূত্র পাত হইল । যাহাকে পূর্বে চিনিতাম না, গুটি কতক মন্ত্রের বন্ধনে অর্দ্ধ দণ্ডের মধ্যে তিনিই আমার গৃহলক্ষ্মী হইলেন, শরীরের অর্দ্ধাঙ্গ হইলেন ও আমার পাপ পুণ্যের সমান অংশী হইয়া দাঁড়াইলেন । যদি বিবাহের পর দিন জননীর ক্রোড়ে আমি মৃত হই, তাহা হইলে, আমার সঞ্চিত ধনের এক কপদকও গর্ভধারিণী পাইবেন না ; কিন্তু এক দিনের সম্বন্ধেই পত্নী আমার সমস্ত বিষয় বিভবের উত্তরাধিকারিণী হইয়া বসিবেন । যদি বিবাহিতা স্ত্রীর সহিত দীর্ঘ কাল সহবাসে

কতকগুলি অপত্য জন্মে, তাহা হইলে, ক্রমে ক্রমে জনক জননীর প্রতি স্নেহ মমতা বিস্মৃত হইয়া যাই, সেই দারা পুত্রই আপনার বলিয়া বোধ হয়, সহোদরগণকে জ্ঞাতির মধ্যে ধর্তব্য করি, ভগিনীগণ ত বিবাহের পরই একেবারে পর হইয়া যায় । কি আশ্চর্য্য, জন্মদাতা পিতা ও গর্ভধারিণী জননীর বিয়োগ অনায়াসে সহ্য করিতে পারি, তাঁহারা লোকান্তরিত হইলে, সংসার শূন্য হইয়াছে কেহই বলে না ; কিন্তু স্ত্রীবিয়োগের পরই লোকে আমার গৃহ শূন্য হইয়াছে বলিয়া থাকে । স্ত্রী বিয়োগ হইলে, পর্য্যায় ক্রমে এক শত বার বিবাহ করিয়া গৃহ পূর্ণ করিতে পারি ; কিন্তু জনক জননী লোকান্তরিত হইলে, সে ক্ষতি পূরণ আর কোন কালেই হয় না । পুনঃ পুনঃ স্ত্রী পুত্র বিয়োগ হইলে, আবার স্ত্রী পুত্র হইবার সম্পূর্ণ সম্ভাবনা থাকে ; তথাচ পিতা মাতার বিয়োগ অপেক্ষা লোকে স্ত্রী পুত্রের বিয়োগে অধিক তাপে তাপিত হয় । বৃদ্ধা জননী মরিলে কেহই শয্যাশায়ী হয় না, বরং জননীর সঞ্চিত ধন পাইব বলিয়া অনেক কুপুত্র মনে মনে তাঁহার মৃত্যু কামনা করিয়া থাকে ; কিন্তু যুবতী স্ত্রীর বিয়োগে অনেকের উন্মাদ দশা পর্য্যন্ত ঘটিয়াছে । তবেই পূর্ব্বের কথা পুনরায় এ স্থলে উত্থাপন করিতে হইতেছে যে, এক দার পরিগ্রহই আমাদিগের আধ্যাত্মিক তাপ ভোগের প্রধানতম কারণ হইয়া থাকে । স্ত্রী পুত্রকেই সর্ব্বতোভাবে স্মৃতি করিব বলিয়া আমরা নানা পথের পথিক হই, সেই স্মৃত্তিই আধ্যাত্মিক তাপ উপস্থিত হয় । দৈব ও ভৌতিক তাপ হইতে আধ্যাত্মিক তাপ প্রবল হইয়া উঠে । সেই ত্রিতাপের তাপ অসহ্য হইলেই

লোকে আত্মনাশ পর্যন্ত করিয়া সংসারের সমস্ত দুঃখ হইতে নিস্তার লাভ করে।

পূর্বে বলা হইয়াছে যে, আমরা নগ্ন বেশে এই সংসারে একাকী আঁসিয়াছি, আবার এক দিবস একাই যাইতে হইবে। স্ত্রী পুত্র পরিবার বিষয় বিভব কিছুই আমার সমভিব্যাহারে যাইবে না ; তথাচ আমার স্ত্রী, আমার পুত্র, আমার বিষয়, আমার বিভব বলিয়া কি জন্ম প্রলাপ দেখি ? লক্ষ মুদ্রার বিষয় বিভব হইলে, এক ব্যক্তির স্বচ্ছন্দে সংসার যাত্রা নির্বাহ হইতে পারে। যদি তাহাতেই সন্তুষ্ট হইয়া থাকে, তাহা হইলে, ত্রিতাপের হস্ত হইতে অনেক পরিমাণে এড়াইবার সম্ভাবনা আছে। আপনার ও আত্মীয় পরিবারের স্বচ্ছন্দে জীবিকা নির্বাহ হইবার সম্ভাবনা হইলেও যাহার লোভের শান্তি হয় না, পদে পদে তাহারই আধ্যাত্মিক তাপ ঘটিয়া থাকে। নিম্নে ইহার একটি উদাহরণ প্রদত্ত হইতেছে ;—

বঙ্গ দেশের মধ্যে নবদ্বীপ সংস্কৃত বিদ্যার আকর স্থান। অদ্যাপি নবদ্বীপে নানা শাস্ত্র বিশারদ কয়েক জন পণ্ডিত অকাতরে বহু সংখ্যক ছাত্রকে বিদ্যা ধন বিতরণ করিতেছেন। নবদ্বীপের প্রধান প্রধান পণ্ডিতগণকে শ্রাদ্ধাদি ক্রিয়া কাণ্ডে এতদ্দেশীয় লোকেরা যথেষ্ট দান দিয়া থাকেন। তাঁহারা সেই আয়ের উপর নির্ভর করিয়া স্বচ্ছন্দে দিন পাত ও ছাত্রগণকে বিদ্যা শিক্ষা করাইয়া মনুষ্য জন্মের সার্থকতা সম্পাদন করিতেছেন। ন্যূনাধিক পঞ্চাশ বৎসর পূর্বে উক্ত নবদ্বীপে এক জন অসাধারণ দী শক্তি সম্পন্ন পণ্ডিত জন্ম গ্রহণ করিয়াছিলেন। বাঙ্গালা বিহার ও উড়িষ্যার মধ্যে যে কোন সম্পন্ন ব্যক্তির বাটীতে

ক্রিয়া কাণ্ড উপলক্ষে অধ্যাপকদিগের নিমন্ত্রণ হইত, পূৰ্ণ কথিত পণ্ডিত মহাশয় সৰ্ব্বাপেক্ষা উচ্চ বিদায় প্রাপ্ত হইতেন । এই রূপে কিছু কালের মধ্যে তিনি ধনবান্ হইয়া উঠিয়াছিলেন । তাঁহার ন্যায় সম্পদশালী অধ্যাপক ভট্টাচার্য্য তৎ কালে নবদ্বীপে আর কেহই ছিলেন না । তাঁহার যে রূপ স্বোপার্জিত বিষয়ের আয় হইয়াছিল, তাহাতে পরমানন্দে দিন পাত করিয়া জীবনের অবশিষ্ট কাল অতিবাহিত করিতে পারিতেন, তাহাতে আর সংশয় নাই ; কিন্তু ভট্টাচার্য্য মহাশয় মহা ধনবান্ হইয়াও এক খানি অৰ্দ্ধ মুদ্রা মূল্যের পিতলের থাল বিদায় আনিবার জন্য পদব্রজে তিন ক্রোশ পথ গমনাগমন করিতেন । এক দিন সেই পণ্ডিত মহাশয় নবদ্বীপ হইতে পঞ্চ ক্রোশ দূরবর্তী এক খানি ক্ষুদ্র পল্লীগ্রামের কোন ব্রাহ্মণের বাটীতে আদ্য শ্রাদ্ধোপলক্ষে নিমন্ত্রিত হইয়াছিলেন । তিনি শ্রাদ্ধ সভায় গমনোদ্যোগ করিতেছেন, এমন সময় তাঁহার এক জন শ্রেষ্ঠ ছাত্র বলিয়া উঠিলেন, আপনার শরীর দুৰ্ব্বল হইয়া পড়িয়াছে, এ রুদ্ধ শরীরে পুনঃ পুনঃ পথ পর্যাটন করা কোন ক্রমেই যুক্তি সম্মত নহে ; এই জন্য বলিতেছি, আপনি চতুষ্পাঠীতে বসিয়া থাকুন, আমি পত্র খানা লইয়া বিদায় আনিতে যাই । ভট্টাচার্য্য মহাশয় বলিলেন, বাপুহে, তোমাদিগের বুদ্ধি এখনও পরিপক্ব হয় নাই । যদি স্বয়ং না গিয়া ছাত্র পাঠাইয়া দি, তাহা হইলে, ক্লান্তি কখনই উচ্চ বিদায় দিবেন না । আয়ের দিকে দৃষ্টি না রাখিলে সংসার করা যায় না ; অতএব আমি স্বয়ংই যাইতেছি, তোমরা চতুষ্পাঠীতে থাকিয়া আপনাদিগের পাঠাভ্যাস কর ।

পণ্ডিত মহাশয়ের কথা শুনিয়া ছাত্র মনে মনে ভাবিলেন,

যে, ইঁহার ষষ্টি বৎসর বয়ঃক্রম উত্তীর্ণ হইয়াছে, শমন ভবনে আতিথ্য স্বীকারের আর অধিক কাল বিনশ্ব নাই। অতুল বিভব সত্ত্বেও এই সামান্য লোভের বশবর্তী হইয়া ইনি পদব্রজে পঞ্চ ক্রোশ পথ পদ্যটনে অগ্রসর হইলেন, এই জন্য বিলক্ষণ বোধ হইতেছে যে, ষড়্-দর্শন বেত্তা পণ্ডিতেরাও লোভের ক্রীত দাস। লোভ বশতই ইঁহারা বাধ্য হইয়া আধ্যাত্মিক তাপের উগ্র তাপ সহ্য করিয়া থাকেন। ছাত্র এই রূপ চিন্তা করুন, এ দিকে পণ্ডিত মহাশয় আপন কিস্করের মস্তকে তল্লাচাপাইয়া শ্রাদ্ধ বাটীতে চলিয়া গেলেন। বৈশাখ মাসের প্রচণ্ড রৌদ্রের উত্তাপে সর্ব শরীর দগ্ধ করিয়া দিবা দুই প্রহরের সময় কৃতীর বাটীতে গিয়া উপস্থিত হইলেন। শ্রাদ্ধ শান্তির পর কৃতী তাঁহাকে নগদ পঞ্চ মুদ্রা ও একটি পিতলের কলসী বিদায় দিলেন। পণ্ডিত মহাশয় অপরাহ্নে বাটী আসিতেছেন, এমন সময় কাল মাহাত্ম্যে পথি মধ্যে ভয়ানক ঝড় বৃষ্টি উপস্থিত হইল। তিনি প্রাণ ভয়ে পণের পার্শ্বস্থ আত্র কাননের এক খানি ক্ষুদ্র কুটীরে গিয়া আশ্রয় লইলেন। ঝড় বৃষ্টি বশতঃ পূর্ব হইতে দুই জন দম্ব্যও সেই কুটীরে গিয়া আশ্রয় গ্রহণ করিয়াছিল। তাহারা ভট্টাচার্য্য মহাশয়কে সমাগত দেখিয়া মনে মনে ভাবিল, বিধাতা বড় চমৎকার শিকার মিলাইয়া দিলেন। ক্রমে ঝড় বৃষ্টির কিঞ্চিৎ শমতা হইয়া আসিতেছে অনুমান করিয়া দম্ব্য দ্বয় ভট্টাচার্য্য ও তাঁহার কিস্করকে সাংঘাতিক আঘাত এবং সর্বস্ব লুণ্ঠন করিয়া পলায়ন করিল। পণ্ডিত মহাশয় দিগম্বর বেশে কিস্করের সহিত সেই শূন্য কুটীরে পড়িয়া রহিলেন। সমস্ত রজনী সেই অবস্থায় অবস্থান করিয়া প্রত্যুষে কিস্করের সহিত ধীরে ধীরে

পাথের ধারে আসিয়া বসিলেন। পণ্ডিত মহাশয়কে অনেকেই চিনিত। প্রাতঃ কালে কণ্ঠিত শ্রাদ্ধ বাটী হইতে কয়েক জন কুটুম্ব আপন আপন আবাসাভিমুখে যাইবার সময় পণ্ডিত মহাশয়ের রত্নাক্র কলেবর ও দিগম্বর বেশ দেখিয়া জিজ্ঞাসা করিলেন, মহাশয়, এ কি হইয়াছে ! ভট্টাচার্য্য আদ্যোপান্ত রত্নাক্র তাঁহা-দিগের নিকট বর্ণনা করাতে তাঁহারা তৎক্ষণাৎ আপনাদিগের উত্তরীয় বসন ছুই জনকে ছুই খানি পরিতে দিলেন ও পণ্ডিতকে সমভিব্যাহারে লইয়া নবদ্বীপের সীমানায় আনিয়া দিয়া আপন আপন গৃহাভিমুখে চলিয়া গেলেন। পণ্ডিত মহাশয় কাঁদিতে কাঁদিতে কিল্লরের সহিত আপন চতুষ্পাশীতে গিয়া উপস্থিত হইলেন। ছাত্রেরা প্রথমে তাঁহার অবস্থা দেখিয়া বিস্মিত হইলেন, পরে পণ্ডিত মহাশয়ের প্রমুখাৎ আদ্যোপান্ত রত্নাক্র শুনিয়া দুঃখ প্রকাশ করিতে লাগিলেন।

শুদ্ধ শ্রাদ্ধ বাটীর বিদায় আনিতে গিয়াই অধ্যাপক ভট্টাচার্য্য এক কালে ত্রিতাপের ভাজন হইলেন। প্রথম আধিদৈবিক, সেই সঙ্গে প্রহারের দ্বারা জর্জরীভূত হওয়াতে আধিভৌতিক তাপ উপস্থিত হইল। তাঁহার উপর বিদায়ের কয়েকটি টাকা, পিতলের কলসী এবং তল্লী স্থিত পরিপেষ বস্ত্র, গাডু গামছা ও কোশা কুশী দ্রব্য কর্তৃক অপহৃত হওয়াতে আধ্যাত্মিক তাপের পরিসীমা রহিল না। যদিপি পণ্ডিত মহাশয় উপযুক্ত ছাত্রের কথা শুনিয়া শ্রাদ্ধ বাড়ীতে বিদায় আনিতে না যাইতেন, তাহা হইলে, এই ত্রিতাপের কোন সম্ভাবনাই থাকিত না।

এক লোভই মানবের সর্ব অনিষ্টের মূল হইয়াছে। আমরা যদি আপন আপন অবস্থায় সন্তুষ্ট হইয়া থাকি, স্বল্প কালে আশার দাস

হইয়া আপন ক্ষমতার অতিরিক্ত কার্যে প্রবৃত্ত না হই, সৌভাগ্য ক্রমে কিঞ্চিৎ অর্থ সঞ্চয় হইলেই ব্যবসায় কার্যের দ্বারা কি স্বাধীন দানে সেই অর্থ দ্বিগুণ করিব এই আশায় সঞ্চিত ধন পর হস্ত গত না করি, লক্ষপাতি হইয়া কোটিপাতি হইবার জন্য শস্য-ব্যস্ত না হই, ক্ষুদ্র রাজ্যের অধীশ্বর হইয়া সাম্রাজ্য লাভের জন্য সমস্ত সংসার স্মৃতে ইচ্ছা পূর্বক জলাঞ্জলি দিয়া পুত্র পৌত্রকে সমভিব্যাহারে লইয়া প্রবল শত্রুর সহিত যুদ্ধ বিগ্রহে প্রবৃত্ত না হই, তাহা হইলে, ত্রিতাপের হস্ত হইতে অনেক পরিমাণে নিষ্কৃতি লাভ করিতে পারি। যদি এ রূপ ইচ্ছা কর যে, সংসারে থাকিব, বিষয় কার্যাদিও করিব, তজ্জন্য যুদ্ধ বিগ্রহেও প্রবৃত্ত হইব, তাহা হইলে, আপনার মনকে সর্বতোভাবে আয়ত্তাধীনে রাখ। লক্ষ মুদ্রা উপার্জন করিলেও একেবারে আত্মাদে উন্মত্ত হইও না, দৈব বশতঃ আবার লক্ষ মুদ্রা ক্ষতিগ্রস্ত হইলেও বিষাদ সাগরে নিমগ্ন হইও না। তখন ভাবিও সৌভাগ্য বশতঃ আমিই অর্জন করিয়াছিলাম, আবার দুঃসময় উপস্থিত হওয়াতে নষ্ট হইয়াছে। পুনর্বার দেবতা অনুকূল হইলে, যাহা নষ্ট করিয়াছি, তাহা অপেক্ষা অধিক অর্জন করিলেও করিতে পারি। যাহা হইবার তাহা হইয়াছে ও যাহা হইবার তাহা হইবে, তজ্জন্য চিন্তা সাগরে ভাসমান হইয়া মনের শান্তি ভঙ্গ করি কেন? দেহ রক্ষা করিতে পারিলে, আবার ধনের মুখ দেখিলেও দেখিতে পারি। যে ধন আদ্য হইতে অর্জিত ও সঞ্চিত হইয়াছিল, তাহা নষ্ট হইয়াছে বলিয়া একেবারে শয্যাশায়ী হইব কেন? পূর্বে নিম্ন ছিলাম, মধ্যে বলবান্ হইয়াছিলাম; আবার নিম্ন হইয়াছি, “সুখস্থানান্তরং দুঃখং দুঃখস্থানান্তরং সুখম্।” চক্রবৎ পরিবর্তিতে

দুঃখানি চ সুখানি চ ॥ ” সংসারের গতিকই এই । পূর্বে অবিবাহিতাবস্থায় কেবল বিদ্যা অর্জনে রত ছিলাম, বহু কষ্টে কিঞ্চিৎ বিদ্যা অর্জন করিয়া তাহার পর দার পরিগ্রহ করিয়াছিলাম । কন্যা পুত্র হইয়াছিল, তাহারা একে একে আসিয়া আমার সংসারের শোভা বৃদ্ধি করিয়াছিল । তাহার পর একে একে প্রস্থান করিয়া সংসার শূন্য করিয়া দিয়াছে । পূর্বে আমি একাকী ছিলাম, পুনর্বার আবাব একাকী হইয়াছি । যাহারা আমি কর্তৃক উৎপন্ন হইয়াছিল, তাহারা আমার সম্মুখেই লয় প্রাপ্ত হইয়াছে, ইহার জন্ম কেন আক্ষেপ করি । যদি সংসারে থাকিয়া কি স্ত্রী পুত্র, কি বিষয় বিভব সকল বিষয়েই এই রূপে মায়া শূন্য হইতে পার, তাহা হইলে, আর ত্রিতাপের উগ্র তাপ সহ্য করিতে হইবে না ।

আপনাকে আপনি চিনিয়া লও । আপনার কর্তব্য কার্য অবধারিত কর । যখন যে কার্য করিবে, তখন মনে রাখিও যে, ঈশ্বর তৎসমুদয় দেখিতেছেন । যখন আনন্দে উন্মত্ত হইবে, যখন বর্ষীয়ান হইবে, তখন মৃত্যুর পথ পরিষ্কার করিয়া যাইও । ভ্রম বশতঃ মৃত্যুকেও ভুলিও না, আর ঈশ্বরকেও ভুলিও না । যদি দুর্ভিক্ষ বশতঃ কোন গর্হিত কার্য করিয়া ফেল, তজ্জন্য আপনা আপনি অনুতাপ করিও, তাহা হইলে, মন পরিষ্কার হইয়া যাইবে । এক বার যে কার্য করিয়া মনঃপীড়া পাইয়াছ, লোক নিন্দার ভাজন হইয়াছ, সে কার্য আর কখনও করিও না । প্রবৃত্তির বশবর্তী হইয়া নিষ্প্রয়োজন বিষয়ের প্রয়াস পাইয়া অনর্থক মনকে কষ্ট দিও না । ত্যাগ, যুক্তি ও ধর্ম বিহীন হইয়া কার্য করিও না । শারীরিক নিয়ম সকল রক্ষা করিয়া আধি

ভৌতিক, সতর্ক ও সাবধানের দ্বারা আধিদৈবিক এবং মন আয়ত্ত দ্বারা আধ্যাত্মিক তাপ অনেক অংশ নিবারণ হইতে পারে।



সুখ দুঃখ আপনার হস্তে।

মনুষ্য প্রকৃতি এক প্রকার নহে। প্রত্যেক মনুষ্যের কচি স্বভাব। সাধারণ সুখ কাগকে বলে, তাহারও স্থিরতা নাই ; এই জন্যই জগতের লোক এক ভাবে নিকপিত সুখের অধিকারী হইল না। এক্ষণে দেখিতে হইবে যে, অধুনা লোক সুখের সাধারণ অর্থ কি করিয়া রাখিয়াছে ও আবাল বৃদ্ধ বনিতা কি সুখের জন্যই বা সর্বদা শশব্যস্ত হইয়া বেড়াইতেছে। মনের অভিলাষ সর্বতোভাবে পূর্ণ হওয়াই এক্ষণকার লোক পরম সুখ বলিয়া ধর্তব্য করেন। সেই অভিলাষ সিদ্ধ না হইলেই মন দুঃখের অবধি থাকে না। মনুষ্যের অভিলাষের আদি নাই, অন্ত নাই। যাহার যেকপ প্রকৃতি সে সেই রূপ অভিলাষ করিয়া থাকে। যেমন কুকুরকে পায়সাম ভোজন করিতে দিলে, সে আগ্রহ পূর্বক আহাৰ করে না, পায়সামের বিনিময়ে এক খণ্ড মাংস প্রদান করিলে, তাহার আর আনন্দের অবধি থাকে না, সেই মাংস খণ্ডের অভ্যন্তরস্থ অস্থিগুলি পর্য্যন্ত পরম উপাদেয় জানে, চক্ষণ করিতে থাকে, মনুষ্য প্রকৃতিও সেই রূপ। কোন কোন ব্যক্তিকে ঈশ্বর অতুল ঐশ্বর্য্য দিয়াছেন, রূপবতী ও প্রিয়বাদিনী ভাৰ্যা দিয়াছেন, ইন্দ্রিয় তুল্য উন্নত অটালিকা দিয়াছেন, সংসারে

কিছু মাত্র অপ্রতুল নাই, সংসার ধনে জনে সৰ্ব্ব বিধায় পরিপূর্ণ হইয়া আছে ; কিন্তু এত স্বথ সত্ত্বেও তাঁহাদিগের মধ্যে কেহ কেহ কোন নীচ কুলোদ্ভবা কুকপা নারীর প্রণয় পাশে আবদ্ধ হইয়া সৰ্ব্ব ক্ষণ কেবল তাহাকেই ধ্যান করিয়া থাকেন। কি সুযোগে পতিপ্রাণা সহধর্মিণীকে প্রতারণা দ্বারা ভুলাইয়া তাহার নিকট গমন করিবেন, দিবা দুই প্রহরের পর পর্য্যন্ত চিন্তায় মগ্ন হইয়া তাহারই উপায় উদ্ভাবন করিতেছেন। সেই চিন্তার সময় যদি কপবতী প্রিয়বাদিনী ভার্য্যা আসিয়া তাঁহার নিকট উপবিষ্ট হন, তাহা হইলে, তাঁহার বিরক্তির পরিসীমা থাকে না। এক বার সুযোগ করিয়া আপনার রাজ প্রাসাদ তুল্য আবাস হইতে বাহির হইতে পারিলেই বোধ করেন যেন অগ্নি কুণ্ড হইতে বাহির হইলাম, এই বারে সুখময় স্থানে গিয়া শরীর ও মন জুড়াইতে পারিব। এই কপ আশার দাস হইয়া উক্ত নারীর পতনোন্মুখ গৃহে গিয়া প্রবিষ্ট হইলেন। ছুরদৃষ্ট বশভঃ বাড় বৃষ্টি আরম্ভ হইল। ঝটিকার প্রবল তরঙ্গে ভগ্ন গৃহ ছলিতে লাগিল। বৃষ্টির জলে গৃহের অভ্যন্তর ভাসিয়া গেল। তদ্রূপে কুলটা আক্ষেপ করিয়া বলিতে লাগিল, এই জন্মেই ত আপনার একটু কুঁড়ে করিতে চাই। দেখ দেখি, বৃষ্টির জলে শয্যা প্রভৃতি সমস্ত দ্রব্য সামগ্রী ভিজিয়া গেল। রক্তনীতে কি জলের উপর শয়ন করিব ? বাবু অপ্রতিভ হইয়া গৃহের যে অংশ শুষ্ক ছিল, স্বয়ং সেই অংশে শয্যাাদি স্তুপাকার করিয়া রাখিতে লাগিলেন। তৎপরে স্বহস্তে গৃহের জল সেচন করিয়া গণিকাকে সাব্বনা করিলেন। কি পরিতাপ ! কি পরিতাপ ! যাহার পরিচর্য্যায় বহু সংখ্যক কিস্কর কিস্করী নিযুক্ত আছে, যিনি ভোজন পাত্র পরিত্যাগ

থাকিত না। এই জন্ত বলিতেছি যে, কে কোন্ অবস্থাকে স্থখ বলিয়া ধরে, তাহা স্থির করা কঠিন।

এই সংসারের প্রাণী মাত্রেই এক ভাবে অবস্থান করিতে পারে না। যেমন অনন্ত ব্রহ্মাণ্ডের সমস্ত বিষয়ই মুহূৰ্ত্তে পরিবর্তন হইতেছে, সেই রূপ ভৌতিক মনুষ্য শরীরাত্মন্তরস্থ মনও কোন প্রকারে এক ভাবে দীর্ঘ কাল অবস্থান করে না। যে ব্যক্তি বাল্য কালাবধি পরম স্থখে লালিত ও পালিত হইয়াছে, সৰ্ব্বদা উপাদেয় সামগ্রী ভোজন করিয়া থাকে, সুরম্য অট্টালিকায় বাস করে; এই রূপে দীর্ঘ কাল সেই এক ভাবে কাল যাপন করিয়া তাহার মন একটি পরিবর্তনের জন্ত ব্যগ্র হইয়া উঠে। এ রূপ অনেক দেখা গিয়াছে যে, ধনাঢ্য লোকের সন্তানেরা অমৃত তুল্য দুগ্ধ পান করিতে নানা প্রকার আকার উপস্থিত করে। খাদ্যের এই কণ্ঠে তাহাদিগকে দুগ্ধ পান করাইয়া থাকে। সেই সময় যদি কোন নিধনের পুত্র রাজ পথে দাঁড়াইয়া মুড়ী খাইতে থাকে, তাহা হইলে, সেই ধনী সন্তানেরা ঐ দরিদ্র লোকের সন্তানের ন্যায় মুড়ী খাইবার জন্ত ব্যগ্র হইয়া উঠে। কখন কখন কিস্কর কিস্করী দ্বারা উক্ত দ্রব্য ক্রয় করাইয়া উপাদেয় জ্ঞানে আহাৰ করিয়া থাকে। এ দিকে যে দরিদ্র সন্তানেরা চির কাল মুড়ী চৰ্কণ করিয়া থাকে, তাহারা ধনী সন্তানদিগের ন্যায় উপাদেয় সামগ্রী প্রাপ্ত হইলে, যে রূপ আনন্দের সহিত ভোজন করিতে আরম্ভ করে, তদৃষ্টে তাহাদিগকে সেই সকল দ্রব্য খাওয়াইতে কোন্ সদাশয় ব্যক্তির ইচ্ছা না জন্মে?

ব্রহ্মা স্ত্রীলোকদিগের মুখে গল্প শুনিয়াছি যে, এক জন ধনাঢ্য লোক দৈব বিপাকে পড়িয়া কোন দরিদ্র ব্রাহ্মণের বাটীতে রাত্রি

কালে অতিথ্য স্বীকার করিয়াছিল। ব্রাহ্মণ সপরিবারে রজনীতে নেবু ও খুঁড়ের ডাল পোড়া দিয়া পান্তা ভাত খাইয়া থাকেন, অতিথিকেও সেই অন্ন ব্যঞ্জন আহার করিতে দিয়া ব্রাহ্মণ সবিনয়ে বলিলেন, মহাশয়, আমার অপরাধ লইবেন না। দুই বেলা আমাদের গ্রামের কোন ব্যক্তির বাটীতেই রন্ধন কার্য হয় না। রজনীতে এই স্থানের সকলেই পান্তা ভাত খাইয়া থাকেন; অতএব রাত্রি কালে উপবাসী না থাকিয়া যাহা কিঞ্চিৎ পারেন, আহার করুন। সেই ধনাঢ্য লোক তৈল লবণ সংযুক্ত খুঁড়ের ডাল পোড়া দিয়া উদর পূরিয়া পান্তা ভাত খাইলেন। আচমনান্তে গৃহস্থকে বলিলেন, মহাশয়, আজ আমার যে রূপ তৃপ্তির সহিত ভোজন হইল, বোধ হয়, জন্মাবচ্ছিন্নে এ রূপ সুস্বাদু অন্ন ব্যঞ্জন কখনও ভোজন করি নাই। বাটী গিয়া প্রত্যহ রজনীতে এই রূপ অন্ন ব্যঞ্জন আহার করিব। কথিত ভাগ্যবন্ত লোক বাটী আসিয়া পাচককে 'আদেশ করিলেন যে, গত রজনীতে আমি যে রূপ অন্ন ব্যঞ্জন আহার করিয়াছি, অদ্য রজনীতে তাহাই করিয়া দাও। তাহাকে পান্তা ভাত বলিয়া থাকে। নেবু ও খুঁড়ের ডাল পোড়া দিয়া তাহা খাইতে হয়। পাচক বলিল, অদ্য কি প্রকারে পান্তা ভাত হইতে পারে; যাহা বলিলেন, কল্যাণসমুদয় আয়োজন করিয়া দিব। পর দিবস রজনীতে তাহাই হইল; কিন্তু উক্ত ব্যক্তি তাহা আহার করিয়া পূর্ক দিনের মত তৃপ্ত হইলেন না। পুনঃ পুনঃ বলিতে লাগিলেন, এ সকল সামগ্রী সেই ব্রাহ্মণের বাটীতে যে রূপ সুস্বাদু হইয়াছিল, অদ্য সে রূপ বোধ হইল না। পাচক বলিল, মহাশয়, দৈবাৎ এক দিন সেই সকল সামগ্রী আহার করিয়াছিলেন বলিয়াই উপাদেয় জ্ঞান হইয়াছিল, অদ্য আর

সে রূপ হইবে কেন ? ভাল, অদ্য আমাকে ক্ষমা করুন, সেই ব্রাহ্মণের বাটীতে যে রূপ তৃপ্তি পূরক ভোজন করিয়াছিলেন, তাহা অপেক্ষাও উপাদেয় দ্রব্য কল্য রজনীতে ভোজন করাইব। পাচকের কথায় ধনবান্ পরিতুষ্ট হইলেন ।

পর দিন বৈকালে পাচক ধনবানের নিকট একটি টাকা চাহিয়া লইয়া কতকগুলি দ্রব্য সামগ্রী ক্রয় করিয়া আনিল ও পাক গৃহের দ্বার রুদ্ধ করিয়া দিয়া যাহা কিছু প্রস্তুত করিতে হয়, তৎসমুদয় করিয়া রাখিল । রজনী অষ্ট ঘটিকার সময় ধনবান্ আহার করিতে চাহিলেন । পাচক একটি শ্বেত প্রস্তরের বড় বাটি তাঁহার সম্মুখে ধরিয়া দিল । ধনবান্ তাহার কিসদংশ আহার করিয়াই একেবারে আশ্চর্য্য হইয়া গেলেন ও বলিলেন, ওহে, তুমি এ অমৃত তুল্য সামগ্রী কোথায় পাইলে ? কি জন্মই বা এত কাল এ রূপ ভোজনে আমাকে বঞ্চিত করিয়া রাখিয়াছিলে ? এখন প্রতি রজনীতেই আমাকে এই সামগ্রী প্রস্তুত করিয়া দিও । পাচক বলিল, না মহাশয়, তাহা আমি পারিব না । অদ্য যে দ্রব্য আহার করিয়া পরিতুষ্ট হইলেন, তাহা উপযুক্ত পরি তিন চারি দিবস খাইলেই আপনার তত দূর ভাল লাগিবে না ও স্বাস্থ্য ভঙ্গ হইয়া পড়িবে । বিশেষতঃ, যে যে দ্রব্যের সংযোগে আমি এই উপাদেয় সামগ্রী প্রস্তুত করিয়াছি, তাহার নাম শুনিলেই আপনি আর আহার করিতে চাহিবেন না ; যে হেতু, আপনি দীর্ঘ কাল বাত রোগে সমূহ কষ্ট ভোগ করিতেছেন । আমি যে যে দ্রব্যের সংযোগে ইহা প্রস্তুত করিয়াছি, অবগত করুন, পক্ক কদলী, দধি, পাতি নেবু, চিনি ও চিপটক ; বাত রোগ প্রাপ্ত ব্যক্তির পক্ষে এ সমুদয়ই বিষ তুল্য ।

মহাশয়, আপনি প্রত্যহ রজনীতে যে সকল দ্রব্য আহার করিয়া থাকেন, তাহা সকলই সুসামগ্রীতে প্রস্তুত হয় ও তৎসমুদয় আহার করিয়া দিন দিন আপনার শরীর সবল ও সুস্থ হইয়া উঠিতেছে । এই এক রজনীর মন্দ সামগ্রী ভোজনে আপনার কি অপকার হইবে বলিতে পারি না । বাবু পাচকের অর্থ পরিপূরিত কথা শুনিয়া অত্যন্ত পরিতুষ্ট হইলেন । বলিলেন, তুমি ষথার্থ বলিয়াছ । কি রসনার তৃপ্তিকর, কি নয়নের তৃপ্তিকর, কি মনের তৃপ্তিকর সকল বস্তুই আমাদিগের পক্ষে স্বাস্থ্য-প্রদ ও সুখকর নহে ; ইহা জানিয়া শুনিয়াও আমাদিগের অখাদ্য ভোজনে কখনও কখনও তৃপ্তি বোধ হইয়া থাকে । যেমন মনুষ্যের মন সর্বদা পরিবর্তনশীল, তেমনি আমাদিগের রসনাও নিত্য নূতন সামগ্রীর স্বাদ গ্রহণ করিতে ইচ্ছা করে । রসনার তৃপ্তি বোধ হইলে, ভাল মন্দ জ্ঞান থাকে না । দীর্ঘ কাল অমৃত তুল্য দুধ পান করিয়া আমার এক্ষণে সেই দুধ বিষবৎ জ্ঞান হইয়াছে । ভোজনের সময় দুধের বাটি দেখিলেই বিরক্ত বোধ হয় । যদি দুধের বিনিময়ে এক ভাণ্ড দধি খাইতে পাই, তাহা হইলে, রসনা পরিতুষ্ট হয় সত্য ; কিন্তু শরীরের অভ্যন্তরস্থ রোগ ভীষণ ভাব ধারণ করিয়া উঠিবে । এই জন্য চিকিৎসকের আজ্ঞাবহ হইয়া আমাকে নিতান্ত সুপথ্য সামগ্রীগুলি ইচ্ছার বিপরীতে আহার করিতে হইতেছে । চিকিৎসক বলিয়াছেন, যদি এই রূপ নিয়মে চির কাল চলেন, তাহা হইলে, ঐ উৎকট ব্যাধি আর বল করিতে পারিবে না । তথাচ কেবল এক রসনার তৃপ্তির জন্য সময়ে সময়ে আমি সমূহ যন্ত্রণা ভোগ করিয়া থাকি । যখন কুপথ্য ভোজনে বসি, তখন আর

পূর্বের কষ্ট কিছুই মনে থাকে না। আমার স্থায় সংসারে বহু সংখ্যক লোক কেবল এক মৃতন প্রিয় হইয়া অসীম সুখ সত্ত্বেও পদে পদে কষ্ট ভোগ করিয়া থাকে। কেহ বা দীর্ঘ কাল পুষ্টিকর অথচ উপাদেয় দ্রব্য সামগ্রী আহার করিয়া সে আহারে পরিভ্রষ্ট হন না; সেই জন্ত সুপথ্যের বিনিময়ে কুপথ্য ভোজন আরম্ভ করিয়া কিছুদিন পরিতোষ লাভ করেন; কিন্তু অল্প দিনেই তাহার ফল ভোগ করিবার সময় কি করিয়াছি বলিয়া আক্ষেপ করিতেও ক্রটি করেন না। কেবল এক ভোজন সম্বন্ধে কেন, কি আহার, কি বিলাস, সর্ব বিষয়েই মনুষ্যের মন পরিবর্তনের ইচ্ছা করে। সে পরিবর্তন ভালই হউক বা মন্দই হউক সে বিষয় বিবেচনা করিয়া লইতে অনেকের ক্ষমতা নাই; কিন্তু মনে যাহা ইচ্ছা হইয়াছে, সেই বিষয়ের সংযোগ হইলেই পরম সুখ বোধ হয়, না হইলে, মনঃপীড়ার অবধি থাকে না।

এক জন বৈজ্ঞানিক পণ্ডিত বলিয়াছেন যে, মনুজকুলকে পর্যায় ক্রমে সুখ দুঃখ ভোগ করিতে হইবেই হইবে। চির কাল এক ভাবে কেহই অতিবাহিত করিতে পারেন না। দেখ, শুশ্রূ নিশুশ্রু দৈত্য আপনাদিগের ভুজ বলে ত্রিজগতে একাধিপত্য স্থাপন করিয়াছিল। অশ্রু কি কথা, দেবতাদিগের সহিত যজ্ঞভাগ পর্যন্ত গ্রহণ করিয়া নিজ বুদ্ধির দোষে অবশেষে পুত্র শোকে, ভ্রাতৃ শোকে ও বন্ধু বান্ধবের শোকে জর্জরীভূত হইয়া কাল কপা কাল কামিনীর হস্তে নিহত হয়। একপ মৃত্যু মুখে নিপতিত হইবার কারণ কি? শুশ্রু ত্রিলোকের অধীশ্বর হইয়াও সর্বতোভাবে তৃপ্তি লাভ করিতে পারে নাই। যে দিন স্মগ্রীব নামক এক জন সৈনিক দৈত্যাধিপতি শুশ্রুকে সংবাদ দিল, মহারাজ, আমি হিমা-

জয় শিখরে একটি রমণী রত্ন দেখিয়া আইলাম । আপনি অন্যান্য সমস্ত ধনেরই অধিকারী হইয়াছেন বটে ; কিন্তু তাদৃশ রমণী রত্নে অদ্যাপি বঞ্চিত আছেন । এই কথা শুনিয়া শুস্ত স্মগ্রীবকে বলিল, তুমি এক্ষণেই তাহাকে আমার নিকট আনিয়ন কর । স্মগ্রীব বলিল, আমি আপনার অনুমতির অপেক্ষা করি নাই ; কিন্তু সে রমণীর প্রতিজ্ঞার কথা শুনিয়া আশ্চর্য্য হইয়াছি । সে মুক্ত কণ্ঠে বলিতেছে যে, যে আমাকে সম্মুখ সংগ্রামে পরাস্ত করিবে, তাহারই গলায় বরমাল্য দিব । এই কথা শুনিয়া শুস্ত হাস্য করিতে করিতে বলিল, কি আশ্চর্য্য কথা, রমণী আমার অধিকারে থাকিয়া দৈত্য-গণের সহিত সমর প্রার্থনা করিতেছে ! যাও, ধূম্রলোচন, তুমি এখনই গমন কর ; সেই কামিনীর প্রতিজ্ঞা পূর্ণ করিয়া অবিলম্বে আমার সম্মুখে আনিয়া উপস্থিত করিবে, দেখিও, যেন কাল বিলম্ব না হয় । দৈত্য পতির আদেশে ধূম্রলোচন স্বসৈন্তে দেবীর সম্মুখবর্তী হইবা মাত্রই তাঁহার একটি মাত্র হুঙ্কারে স্বগণ সহিত ভস্মাভূত হইয়া গেল । শুস্ত ধূম্রলোচনের মৃত্যুর কারণ শুনিয়া বিস্ময় সাগরে নিমগ্ন হইল । দৈত্য পতি পর্য্যায় ক্রমে রক্তবীজ প্রভৃতি প্রধান প্রধান সেনাপতিগণকে যুদ্ধে পাঠাইল ; কিন্তু কেহই সমর ক্ষেত্র হইতে প্রত্যাবর্ত্তিত না হওয়াতে অবশেষে প্রাণ সম সহোদর নিশুস্তকে রণ ক্ষেত্রে পাঠাইয়া দিল । যখন নিশুস্তও কাল কামিনীর সহিত সম্মুখ যুদ্ধে সমরশায়ী হইল, তখন শুস্ত একেবারে শোক সাগরে নিমগ্ন হইয়া প্রিয় বিয়োগ জনিত কষ্ট কাহাকে বলে, তাহা বিলক্ষণ অনুভব করিতে লাগিল । অবশেষে শোকে, দুঃখে, অপमानে ও ক্রোধে উন্মত্ত হইয়া স্বয়ং যুদ্ধ স্থলে উপস্থিত হইল । কিয়ৎক্ষণ সেই কালরূপা কামিনীর

সহিত সংগ্রাম করিয়া সেও গভায়ু হইয়া সমরাজ্যে শয়ন করিল। এক দৈত্য পতি শুস্তের দৃষ্টান্ত দ্বারা বিলক্ষণ বোধ হইতেছে যে, এ সংসারে কেহই সম ভাবে চির কাল সুখ ভোগ করিতে পারে না। লোকে সমস্ত সুখ সত্ত্বেও কোন না কোন সময় কোন একটা মনোবৃত্তির নিতান্ত বশবর্তী হইয়া দুঃখ ভোগ করিতে থাকে।

পাঠকগণ, ইতিহাসাদিতে পাঠ করিয়াছেন, কত শত রাজ-পুত্র কেবল মাত্র খেয়ালের বশবর্তী ও কামনার দাস হইয়া সমস্ত সুখ সত্ত্বেও বর্ণনাভীত মনোদুঃখ ভোগ করিয়াছেন। বর্তমান সময়ে লোকের শারীরিক সুস্থতা, সংসারে সুপ্রতুল, প্রিয়বাদিনী ভার্য্যা প্রভৃতি সত্ত্বেও দেখিতে পাওয়া যায় যে, অনেক লোক আপনার মনঃকল্লিত কতকগুলি কামনার বশবর্তী হয়। তাহারা সেই অনর্থক অভिलाষগুলি সম্পন্ন করিতে গিয়া পাপ পথের পথিক হইয়া আপন মনের শান্তি ভঙ্গ করে। অধিকাংশ লোকে সমস্ত সুখ সত্ত্বেও কি জন্ম সুখী হয় না, এ প্রস্তাবে তদ্বিষয়ে আর অধিক বাক্য বিস্তারের প্রয়োজন নাই। যত ক্ষণ পর্য্যন্ত লোকের মন সম্পূর্ণ রূপে আয়ত্ত না হইবে, প্রবৃত্তিকে নিবৃত্ত করিবার ক্ষমতা না ধরিবে, মনের কামনা ত্যাগ করিতে না পারিবে, তত দিন তাহাদিগের পদে পদে মনের শান্তি ভঙ্গ হইবার ও মানসিক তাপ ঘটবার বিলক্ষণ সম্ভাবনা আছে। ইহ সংসারে যে ব্যক্তি ঈশ্বরের প্রতি স্থির ভক্তি রাখিয়া সকল অবস্থা স্থির ভাবে সহ্য করিতে পারেন, সংসারের তরঙ্গে আকুলিত না হন, মনকে সৰ্ব্বতোভাবে আয়ত্ত করিতে পারেন, যে যে কার্য্য করিলে, শারীরিক অসুস্থতা ও মানসিক গ্লানি প্রভৃতি উৎপন্ন হয়, সেই সকল কার্য্য

একেবারে পরিত্যাগ করিতে পারেন, শরীর রক্ষার্থ যাহা প্রয়োজন, তাহার সংযোগ হইলেই, পরিতুষ্ট থাকেন ও কামনার দাস হইয়া নানা পথের পথিক না হন, তিনিই এই সুখ দুঃখ পরিপূর্ণ সংসারে শান্তি সুখ ভোগের অধিকারী হইতে পারেন ।

মনুষ্য বিবেচনার দোষে কষ্ট পায় ।

আমরা পুনঃ পুনঃ বলিয়াছি, সভ্য সংসারের অনেক মনুষ্য অলীক অভাব বৃদ্ধি দ্বারা মনের শান্তি সুখ ভঙ্গ করিয়া থাকে । সামান্য অবস্থার লোক যদি আপন অবস্থার দিকে তীক্ষ্ণ দৃষ্টি রাখিয়া সংসার যাত্রা নির্বাহ করে, তাহা হইলে, সকল অবস্থাতেই শান্তির সম্ভাবনা আছে । মনুষ্য আপন প্রবৃত্তি চরিতার্থ করিতে গিয়া ভবিষ্যতে কি হইবে, তাহা এক বারও মনে ভাবে না, প্রবৃত্তি প্রবাহে পড়িয়া ভবিষ্যৎকে একেবারে ভুলিয়া যায় । প্রথমে বিলাস হইতেই অহঙ্কার উপস্থিত হয় ও অহঙ্কারই মনুষ্যকে আপনার অবস্থা ভুলাইয়া দিয়া কুপথগামী করে । . .

পাঠকগণ, মনে ককন, কোন নিম্ন ব্যক্তির কলিকাতার একটি কার্যালয়ে দশ টাকা বেতনের কার্য্য হইল । সে কার্য্যটিতে মাসিক ছুই চারি টাকা উপরি আয়েরও সম্ভাবনা আছে ; কিন্তু সকল মাসে সমান হইয়া উঠে না । উক্ত ব্যক্তির বাস একটি ক্ষুদ্র পল্লীগ্রামে । সে স্থানে চারি পাঁচ জন পরিবার লইয়া সাত আট টাকা মাসিক ব্যয়ে এক প্রকার গুজরাণ হইতে পারে । পল্লীগ্রামের স্ত্রীলোকেরা পতির নিকট হইতে পূজার সময় যদি এক জোড়া ছুই আনার চুড়ি, এক খানি দেড় টাকার শাটী ও

এক আনার মাথাঘষা পাইলেই, আর আঙ্লাদের পরিসীমা থাকে না, আপনাকে সৌভাগ্যশালিনী বিবেচনা করিয়া পতি সেবায় নিযুক্ত হয়। অল্পে তাহাদিগের মন সন্তুষ্ট হইবার কারণ কি? না, পল্লীগ্রামে ধনবান্ লোক প্রায় নাই। পুজার সময় প্রায় সকল স্ত্রীলোকেই শাঁখা শাড়ী পরিয়া আমোদ আঙ্লাদ করে ও বহু দিনান্তে পতির আগমনই তাহাদিগের পক্ষে যথেষ্ট সন্তোষের কারণ হয়। এই স্নেহের সংসারে কেবল উক্ত ‘চাকুরে বাবু’ শরীরে সভ্যতার বীজ প্রবেশ করিয়া সমৃদ্ধ অস্নেহের আবাস করিয়া তুলিল। ‘বাবু’ যখন প্রথম কলিকাতায় আসিয়া দশ টাকা বেতনের একটি চাকুরী পাইয়াছিল ও প্রথম মাসেই একেবারে নগদ দশ টাকা হাতে পায়, তখন মনে মনে একপ অহুমান করিয়াছিল যে, ইহার উপর আর পাঁচটি টাকা বৃদ্ধি হইলেই আমার যথেষ্ট হইবে। পাঁচ টাকায় এখান কার বাসা খরচ নিরুসাহ করিব ও অবশিষ্ট দশটি করিয়া টাকা বাটিতে পাঠাইব, তাহা হইলেই, পরিবারেরা পরম স্নেহে দিন পাত করিতে পারিবে এবং আমারও এখানে বাসা খরচের কোন কষ্ট হইবে না। দেশস্থ পাঁচ জনের সহিত একত্র থাকিব, পাঁচ পাঁচে পঁচিশ টাকা হইলে, পাঁচ জনের সুন্দর রূপে বাসা খরচ চলিবেক। প্রথম দুই চারি মাস তাহাই হইল, অর্থাৎ সেই ব্যক্তি দশ আনার ধান পরিধান করিত, ছয় আনার মলমলের দোছোট করিত, ছয় আনার একটি পিরাণে গাত্র আবরণ করিত ও ছয় আনার চটি জুতা পায়ে দিত। রাস্তায় কাদা হইলে, সেই জুতা কাগজে মুড়িয়া বগলে করিয়া আপিসে যাইত। বাসা খরচ সম্বন্ধে এক বেলা মাছের ঝোল ও ভাত হইত, আর

এক বেলা ডাল, চচ্চড়ি ও তেঁতুলের অখল দিয়া আহার করিত ।
 বিকালে আপিস হইতে আসিয়া ছোলা ভিজান ও বাতাসা জল-
 যোগ হইত । বাসা খরচের সমস্ত সামগ্রীই নগদ ক্রয় করিত,
 দেশে-বিদেশে কাহারও নিকট একটি পয়সাও ঋণ ছিল না ।
 ক্রমে কলিকাতার সভ্যতা দৃষ্টে তাহার মনে মনে বিলাস বৃদ্ধি
 হইতে লাগিল । আপিসের সহযোগীদিগের পরিচ্ছদ দেখিয়া
 মনে মনে ভাবিল, ইহারাও মাসে দশ পনের টাকা উপার্জন করে,
 আমারও আয় তদনুরূপ ; তবে ইহাদিগের পরিচ্ছদ নকি প্রকারে
 একপ হয় । মনে এই রূপ কল্পনার উদয় হইবা মাত্রই সহযোগী-
 দিগের সহিত দশ আনার খান পরিয়া বসিতে একটু একটু
 লজ্জার সঞ্চার হইতে লাগিল ; কিন্তু মহুয্য স্বভাব এই যে, একটা
 সূত্র না পাইলে, হঠাৎ পূর্বের চাল পরিত্যাগ করিতে লজ্জিত
 হইয়া থাকে । সেই সময়ে উহাকে সহযোগীর মধ্যে দুই এক
 জন এই ভাবে উত্তেজনা দিতে আরম্ভ করিল, ‘ব্রজ বাবু,
 তুমি ছয় আনার চটি জুতা পায়ে দাও কেন ? লাক্‌চাঁদির বাড়ীর
 মাড়ে তিন টাকা দিয়ে এক জোড়া জুতো কেন, ছমাস খুব
 পোহতে পার্কে । এই দেখ, কাদার সময় চটি জুতো হাতে করে
 আনতে হয় ; কিন্তু সে জুতো পায়ে দিয়ে জল কাদা ভেঙ্গে
 চলে এস, কিছুতেই কিছু হবে না । তুমি কি ভাব মোটা
 কাপড় বেশী দিন টেকে, এই দেখ, আমি চার খানা কুঠীর ধুতি
 এই তিন বৎসর করেছি, একটু দাম লেগেচে বটে ; কিন্তু অনেক
 দিন ধরে ত পর্চি । কাপড় চোপড়গুলো একটু ভাল করা চাই
 হে, তা না হলে, সাহেব শুভরা মানে না, মজুর মনে করে ।’
 এই সকল উত্তেজনা বাক্যে ব্রজ বাবুর মন একটু নরম হইয়া

উঠিল। মনে মনে ভাবিল,—‘এঁরা যে কথা বল্চেন, সকলই সত্য।’ ফিরে মাসের মাহিনা পাইয়া তিন টাকা দিয়া এক জোড়া জুতা কিনিয়া পায়ে দিল, ভাল জুতা পায়ে দেবার কত সুখ তাহা অনুভব করিল। তার ফিরে মাসে শাদা ধুতি ও চাপকান হইল এবং আপিসে দুই এক পয়সার খাবার খাইতেও শিখিল। ক্রমে বর্ষাকাল উপস্থিত। যে দিন রাস্তায় বড় কাদা হয়, ব্রজ বাবু চাপকান ঝুলাইয়া ও ভাল জুতা পায়ে দিয়া কাদা ভাঙ্গিয়া যাওয়া অত্যন্ত ঘৃণিত কার্য্য বোধে এক আধ বেলা বকুরায় গাড়িতে উঠিতে আরম্ভ করিল। শরীরকে যত আত্মগা দাও, তত অলস হইয়া পড়ে। ছু পাঁচ দিন গাড়ী চড়িয়া ‘ব্রজ বাবু’ মনে ভাবিল,—‘দূর হোগ্গে, বর্ষা ছুটো মাস আর হেঁটে আপিস করা হয়ে ওঠে না। এ ছুটো মাস গাড়ীতেই যাওয়া যাবে, হেঁটে যাওয়াতে চাপকান নষ্ট হয়, আর জুতোর দফা একে-বারে রফা হয়ে যায়। তিন চার টাকা দিয়ে জুতো কিনে কি কাদায় ফেলে নষ্ট কোর্কো? শ্রাবণ ভাদ্র এই ছুটো মাসে আট টাকা গাড়ী ভাড়া যাবে, তা কি করা যায়। এ সব না কল্লেও মান সম্ভ্রম থাকে না।’

পূর্বে ব্রজ বাবুকে সপ্তাহে তিন বেলা করিয়া রন্ধন করিতে হইত। এক্ষণে আপিস হইতে আসিয়া একটি ছোট রকমের সেতার লইয়া পিড়িং পিড়িং করিতে বসে। সে রন্ধনের সময় রাগা ঘরে প্রবেশ করিতে উহার কোন ক্রমেই ইচ্ছা হইত না। দুই এক দিন সেতার বাজান শেষ করিয়া রাঁধিতে যাইত; কাজেই রাত্রি দুই প্রহরের কম আহারাদি হইত না। বাসার পাঁচ জন বকুরাদারের মধ্যে আর এক জন ‘বাবুকেও’ ‘ব্রজ বাবুর’

রোগে ধরিয়াছিল, দেখা দেখি সেও একটি সেতার কিনিয়া আনিয়া । আপিস হইতে আসিয়া দুই জনে মুখোমুখী হইয়া সেতার বাজাইতে আরম্ভ করিত । আহা! যে সেতারের মৃদু মধুর ধ্বনি শুনিয়া লোকের পুত্র শোক নিবারণ হয়, সেই সেতারের পিড়িং পিড়িং শব্দে ও মধ্যে মধ্যে তার চড়াওনের বন্ বন্ শব্দে বাসার আর তিন জন লোকে ছালাতন হইয়া উঠিল । ‘ব্রজ বাবু’ ও তাহার সহযোগী তিন চারিটার সমস্ত আপিসে লুচি কচুরি উদর পরিপূর্ণ করিয়া খাইত, স্নতরাং বাসায় আসিয়া আর বড় ক্ষুধার উদ্বেক হইত না, এই জন্য সেতার বাজান তাহাদের মিষ্ট লাগিত । আর তিন জন লোক সমস্ত দিন আপিসে হাড় ভাঙ্গা পরিশ্রম করিয়া বাসায় আসিয়া ছোলা ভিজ্জে ও বাতাসা খাইয়া ক্ষুধার শান্তি না হওয়াতে কাজে কাজেই সন্ধ্যার পূর্বে রন্ধন শালায় প্রবেশ করিয়া মাছের ঝোল ও ভাত তৈয়ার করিত ও সাত আটটার মধ্যে আহার করিয়া ক্ষুধানল শীতল করিত । তাহার পর শয্যায় উপবেশন করিয়া দুই চারিটা মিষ্ট গল্প করিতে ভাল লাগিত । তাহার পর পান তামাক খাইয়া নয়টা সাড়ে নয়টার মধ্যে শয়ন করিয়া সুখে নিদ্রা যাইত ; কিন্তু যে দিন ব্রজ বাবুর অথবা তাহার সহযোগীর রন্ধনের পালা পড়িত, সে দিন অন্য তিন জনের আর কষ্টের সীমা থাকিত না । এই রূপে মাসাবধি কষ্ট সহ্য করিয়া এক দিন ঐ তিন জনের মধ্যে এক জন স্পষ্টবক্তা ব্যক্তি ব্রজকে বলিলেন, ‘দেখ ভাই ব্রজ, আমরা গরিবের ছেলে । আপিসের গাধার খাটুনি খেটে ক্ষুধা তৃষ্ণায় অত্যন্ত কাতর হয়ে বাসায় আসি । ভাই, দু খানা বাতাসা আর এক মুটো ছোলা খেয়ে ক্ষুধা ভাঙ্গে না ; কাজেই সকাল সকাল এক মুটো রৈঁধে

বেড়ে খেয়ে শুয়ে পড়ি । স্বখে ঘুম টুকু হলেই আমরা ভাবি যে, পৃথিবীর সমস্ত আফ্লাদ আমোদ করা হলো ; কিন্তু ভাই, তোমরা দুই ইয়ারে আমাদের বড় কষ্ট দিতে আরম্ভ করেচো । তোমাদের রাঁপুবার পালায় দিন রাত দশটা পর্য্যন্ত সেতার বাজাবে, তার পরে রাত একটার সময় খেয়ে দেয়ে একটু শুতে যাব, তোমরা সে সময়েও দুই ইয়ারে মুখোমুখী কোরে টপ্পা ধোর্কে, তা হলে ত ভাই আর কাজ চলে না । আমরা যে অবস্থার লোক সেই অবস্থায়ই থাকা উচিত । বিদেশে চাকরী কর্তে এসেচি, দু টা না রোজগার করে বাড়ী নিয়ে যাব । যদি কিছু আমোদ আফ্লাদ কর্তে হয়, তা হলে, সেই পূজোয় ছুটিতে বাড়ী গিয়ে কোর্কো, এখানে ওশব কল্লে, পাঁচ জন লোকে চেপ্‌ড়া বলবে । যাদের এঁটের কাপড় তুলে ছু বেলা উন্নুনে কাট ঠেলতে হবে, তার হাতে ভাই, সেতার কেন ?

ভদ্রের এই মিষ্ট ভৎসনা শুনিয়া ‘ব্রজ বাবু’ তৎকালে একেবারে ভেলে বেগুণে জলিয়া উঠিল । কারণ তৎকালে তাহার হৃদয় ক্ষেত্রে সভ্যতার আলো ও বিলাস একেবারে ধক্ ধক্ করিয়া জলিয়া উঠিয়াছে ; বিশেষতঃ সেই লোকটি তাহাকে পুনঃ পুনঃ ‘গরিবের ছেলে’ বলাতে যার পর নাই অপমান বোধ হইল । ‘ব্রজ বাবু’ ক্রোধে অন্ধ হইয়া বলিয়া উঠিল, ‘আপনি এ সব না সহিতে পারেন, আমরা গিয়ে স্বতন্ত্র বাসা কোচ্ছি । সমস্ত দিন খেটে খুটে এসে একটু আমোদ আফ্লাদ কর্কো, তাতে হানি কি ? আপনি এ রসের রসজ্ঞ নন, সেই জন্যই আমাদের সঙ্গীত আলোচনায় আপনার বিরক্ত বোধ হয় । মহাশয়, সখ সকল শরীরেই আছে, আপনি বুড় হয়ে সমস্ত বিষয়

জলাঞ্জলি দিয়েচেন বলে আমরাও কি দেব নাকি ? মশারি, সেতার কেবল বড় মানুষদের জন্যে হয় নি, এতে সবারই সমান অধিকার আছে ; এ বিদ্যে যে সাধে তারই হয় । ’ সেই লোকটি ঈষৎ হাস্য করিয়া বলিল, ‘ ভাই, তুমি সাধ, তাতে আমার কিছু ক্ষতি নাই ; কিন্তু একটু তফাতে গিয়ে সাধলে ভাল হয় । তোমাদের সাধার জ্বালায় আমরা যে রোজ রাত্রে ঘুমুতে পাবো না, তা হলে তো আর চোলবে না । ’ ব্রজ বাবু এই বার বৃদ্ধের শ্লেষ বাক্য শুনিয়া একেবারে প্রতিজ্ঞা করিল, ‘ আমরা কাল সকালেই স্বতন্ত্র বাসা কোরবো । ’

রাত্রিতে দুই ইয়ারে চুপি চুপি এই পরামর্শ করিল যে, ‘ আমাদের এখন তো মাসে দশ টাকা কোরে বাসা খরচ হয়, আর আপিসেও তিন চার টাকার জলপান খাওয়া যায়, একুনে ১৪।১৫ টাকা দাঁড়াচ্ছে ; এই টাকাতেই একটা বামুণ ও একটা চাকরাণী রেখে আমাদের অনায়াসে বাসা খরচ চোলতে পারে । ’ এই কপ পরামর্শ স্থির করিয়া পর দিন প্রাতে লাল বাবুর বাজারের উপর আড়াই টাকা মাসিক ভাড়ায় এক ঘর ভাড়া হইল । পরে সাবেক বাসা হইতে দুইটা আম কাঠের সিন্ধুক, দুইটা জুগে মশারি, এক খানা ভাঙ্গা কেওড়া কাঠের তক্তা, এক খানা ছেঁড়া লেগ, দুইটা কাল বা-লিস, একটি পাতকুয়ার ঘটি, দুইটি পিতলের গেলাস, দুইটি ভোট পাতর, একটা কেঠো হুঁকা, একটি চূণ মাখা পা-ণের বাটা, ও কতকগুলি হাঁড়ি এবং দুইটি ঘেরা টোপ ঢাকা সেতার প্রভৃতি আসবাব হুতন বাসায় আসিয়া পৌঁ-ছিল । সে দিন হুতন বাসা গুছাইতে বেলা হইয়া পড়ায়,

বন্ধু দ্বয় দই ও চিড়ার ফলার করিয়া আফিসে গমন করিল। বৈকালে বাসায় আসিয়া তিন টাকা মাসিক বেতন ও খাওয়া পরায় এক জন পাচক নিযুক্ত হইল এবং একটি চাকরাণী ঠিকা মাহিনায় পাচকের সহকারী নিযুক্ত হইল। এই রূপে সমস্ত বন্দোবস্ত করিয়া বাবুরা মনের আনন্দে বারাণ্ডায় সেতার বাজাইতে বসিল। সেই সময় সম্মুখস্থ বারাণ্ডার উপর ছুই তিন জন বেশ্যা ও বেশ বিভ্রাস করিয়া আপনাদিগের ভাঙ্গা চোকির উপর উপবিষ্ট হইল।

ব্রজ বাবু ও তাহার বন্ধু শ্রীমচাঁদ বাবু সম্মুখস্থ বারাণ্ডায় সুবতী বেশ্যাদিগকে বসিতে দেখিয়া সেতারের তার পূর্কোপেক্ষা কিঞ্চিৎ চড়াইয়া লইল এবং মস্তক নাড়িয়া বাজাইতে লাগিল। বেশ্যারা বাবুদের প্রতি মধ্য মধ্য কটাক্ষ পাত করাতে নব বাবুরা দৃষ্টিবাণে জর্জরীভূত হইতে লাগিল। ক্রমে সন্ধ্যা হইল। আর দূরে দৃষ্টি চলে না দেখিয়া বাবুরা সেতার বাজানতে ক্ষান্ত হইয়া সকাল সকাল আহার করিতে গেল, সে দিন হুতন কর্মচারীরা আপন আপন কর্মে বিলক্ষণ তৎপর ছিল। পাচক আসিয়া বলিল, ‘বাবু, সমস্ত আহার সামগ্রী প্রস্তুত।’ পরিচারিকা তৎশ্রবণে আহারের স্থান করিয়া দিল, বন্ধু দ্বয় মনের আনন্দে সেই ভোট পাতরে আহার করিল। আহারান্তে বারাণ্ডায় দাঁড়াইবা মাত্র পরিচারিকা হাতে জল ঢালিয়া দিল, বাবুরা খড়িকা খাইতে না খাইতেই সে অমনি পাণের বাটা হইতে পাণ সাজিয়া রাখিল, বাবুরা আচমনান্তে বিছানার উপবেশন করিল। পরিচারিকা তৎক্ষণাৎ ভামাকু সাজিয়া হাতে দিল। সেই রাত্রি হইতেই

পরিচারিকা বন্ধু দ্বয়কে ‘বড় বাবু’ ও ‘ছোট বাবু’ বলিয়া ডাকিতে লাগিল। সে রাত্রি এই প্রকারে অতিবাহিত হইল। পর দিন প্রাতঃকালে, ‘ছোট বাবু’ ও ‘বড় বাবু’ নিদ্রা ভঙ্গে বারাণ্ডায় আসিয়া দাঁড়াইল। পরিচারিকা অতি প্রত্যুষেই আসিয়া হাজিরা দিয়াছে। সে এক ছিলিম তামাকু সাজিয়া বাবুদের হস্তে দিয়া আপন কার্য্যে নিযুক্ত হইল। দুই ইয়ারে বারাণ্ডায় দাঁড়াইয়া তামাকু খাইতেছে ও এক এক বার বেশ্যাদের বারাণ্ডার দিকে চাহিতেছে ; কিন্তু তাহাদিগের এক জনকেও দেখিতে না পাইয়া মনে মনে কিছু বিরক্ত হইতে লাগিল। বাহা ইউক, এ দিকে বেলা হইল দেখিয়া উভয়ে প্রাতঃকৃত্য সমাপনান্তে গঙ্গা স্নান করিয়া আসিল। বাসায় অন্ন প্রস্তুত হইয়াছিল, পরিচারিকা আহারাদির উদ্যোগ করিয়া দিল। বাবুরা আহারান্তে বারাণ্ডায় দাঁড়াইয়া খড়িকা খাইতেছেন, এমন সময় বেশ্যারা দুই এক জন করিয়া দেখা দিল। তাহাদিগকে দেখিয়া বাবুরা অনেক হাঁচিলেন ও কাশিলেন। তৎকালে দুই এক জন বেশ্যা তাহাদিগের প্রতি আড় নয়নে চাহিয়া একটু মুচকিয়া হাসিল। ইহাতে বন্ধু দ্বয় আপনাদিগকে ভাগ্যবান্ বিবেচনা করিল ; কিন্তু বেলা হইয়াছে, আর দাঁড়াইলে চলিবে না বলিয়া অগত্যা ইচ্ছার বিপরীতে ভাড়াভাড়ি চাপ্কান ঝুলাইয়া আপিসে যাইতে বাধ্য হইল। ব্রজ বাবু ও শ্যাম বাবু এক স্থানে কর্ম্ম করিত না, এই জন্য আপিসের ছয় ঘণ্টা কাল আর উভয়ের দেখা হইত না। সে দিন ব্রজ ও শ্যামের মনে সেই বেশ্যাদিগের মোহিনী মূর্ত্তি জাগরিত হইতে লাগিল। কাজ কর্ম্মে আর বড় মনোনিবেশ করিতে ইচ্ছা হইল না ; কিন্তু সেই দিন

ব্রজ কিঞ্চিৎ ‘উপরি রোজগার’ করিল। টাকা কটা নগদ হাতে আসিতেই মনে করিল, ‘কেঠো হুকোটা হাতে কোরে বারাণ্ডায় তামাক খেয়ে বেড়ান ভাল দেখায় না, মেয়ে মানুষগুলি মনে ভাববে কি? আজ যাবার সময় বড়বাজার থেকে একটা বাঁধা হুকো তয়ের কোরে নিয়ে যাওয়া যাবে।’ ছুটির পরে লালদিঘীর ধারে দুই বন্ধুতে সাক্ষাৎ হইল। ব্রজ শ্রামকে আপন অভিপ্রায় ব্যক্ত করিল, শুনিয়া শ্রাম তৎক্ষণাৎ তাহাতে সম্মতি দিল। দুই বন্ধুতে বড়বাজারে হুকো বৈঠক কিনিয়া লইয়া বাসায় আসিতেছে, এমন সময় সিঁদুরেপটীর রাস্তায় এক জন দুই খানা কেদারা বেচিতে যাইতেছিল। শ্রাম দর করিয়া সেই দুই খানা চোকি দুই টাকায় কিনিল। এতদ্ভিন্ন শ্রাম পূর্ক হইতে এক টাকায় দুইটা কাচের গেলাস কিনিয়া ছিল। এই সকল দ্রব্য সামগ্রী মুটের মাথায় দিবে বাসায় আনিল। বারাণ্ডায় দুই দিকে দুই খানা চোকি পাতা হইল। পরিচারিকা দুই চারি পরসার জল খাবার ঠোঁড়ায় করিয়া আনিয়া পরিশ্রান্ত ‘বাবুদের’ হাতে দিল; পরে হুতন কাচের গেলাস করিয়া জল আনিল। ‘বাবুদের’ খাবার খাওয়া শেষ হইলে, হুতন কাচের গেলাসে জল পান করিবার সময়ে আড় চক্ষে এক বার বারাণ্ডার দিকে চাহিয়া দেখিতে লাগিল যে, আমাদের এই আধিপত্য বেশীরা দেখিতেছে কি না? তাহাদিগের সে আশা পূর্ণ হইল। দেখিতে পাইল, এক জন বেশী তাহাদিগের প্রতি এক দৃষ্টে চাহিয়া চুল ঝাঁচড়াইতেছে। ‘বাবুদের’ এত কষ্টে আসবাব আনা সার্থক হইল! পরিচারিকা তৎক্ষণাৎ হুতন বাধা হুকায় তামাক আনিয়া দিল। তামাক খাওয়ার পর দুই জন মুখোমুখী হইয়া

মুতন চৌকিতে বসিল ও মধ্যস্থলে বৈঠকে বাধা হুঁকা রহিল । বন্ধু দ্বয় সেতারের আবরণ খুলিয়া গত বাজাইতে আরম্ভ করিল । এ দিকে বেশ্যারাও বেশ বিস্তার করিয়া আপন আপন স্থানে আসিয়া বসিল । ইহাতে ‘বাবুদের’ সৌভাগ্য গর্ভ একেবারে উদ্বেল হইয়া উঠিল । সেতার বাজাইতে বাজাইতে এক এক বার ‘ওরে, তামাক দিয়ে যা !’ বলিয়া হাঁক হাঁকিতেছে, আর বেশ্যাদিগের দিকে চাহিতেছে । উভয়েরই মনে মনে হইতেছে যে, ‘আমরা যে উচ্চ দরের চাকরী করি, বেশ্যাদিগের তা বিলক্ষণ বোধ হোয়েছে; কেন না, কাল অবধি ওরা আমাদের প্রতি ক্রমাগতই চেয়ে দেখেছে । এ বিষয়ে আমাদের একটু ধৈর্য ধারণ কোর্তে হবে । ওরাই উপযাচক হোক । আমরা যদি আপনা হতে যাই, তা হলে, বেশী টাকা লাগবে, আর ওরা যদি যত্ন করে আমাদের নিয়ে যায়, তা হলে, আমরা যা দেব, তাতেই রাজী হতে হবে ।’ বেশ্যাকটারও অবস্থা ভাল নহে, তাহাদেরও নিত্য উপার্জনের উপর ভরসা, একটি পয়সাও সঞ্চিত নাই । সম্মুখে ছুই জন ‘বাবু’ পাইয়া বাড়াবাড়ি হাব ভাব প্রকাশ করিতে লাগিল । তাহাদিগের মধ্যে ‘বামী’ নামী এক জন বেশ্যা একটু অন্ধকার হইলে, ‘বাবুদিগকে’ সম্বোধন করিয়া বলিল—‘ওগো বাবুরা, আজ তোমাদের সেতারের গলা ভেঙ্গে গেছে কেন ?’ ব্রজ অমনি সহর্ষে বলিল, ‘আজ আমাদের সেতার দই খেয়েছিল ।’ বামী বলিল, ‘ছি বাবু ! তোমাদের সেতারের এমন ছুখে গলা ! দই খেলে যোসে যায় ? ব্রজ বলিল, ‘ভুমি যে কাণে শুন্তে পাও না, তা আজ আমরা টের পেলুম ।’ বামী বলিল, ‘তা না হয় অনুগ্রহ করে গরিবের ঘরে এসে এক দিন

শুনায় গেলেন হয় না ? যদি কাল বলে অশ্রদ্ধা না করেন, তা হলে, আজ আমার ঘরে আপনাদের সেতার বাজাবার নেমন্তন্ন রইল ।’ শ্রাম অপেক্ষা ব্রজ কিছু বেশী রসিক ছিল, সে তৎক্ষণাৎ তাহার এই উত্তর দিল, ‘আমার কর্তে আমার বন্ধুটি সেতার বাজান ভাল’ বলিয়া শ্রামকে বলিল, ‘ইয়ার, কেমন হে যাবে ত ? বন্ধু ! জীলোকের অপমান করা উচিত নয় । ইহা অপেক্ষা উপযাচক আর কাকে বলে ? চল, আজ খাওয়া দাওয়া করে এদের হাঠ হদ্দ দেখে আসি । সুযোগ ঘটে রাত্রে থাকা যাবে ; তা না হয়, খানিক আমোদ আহ্লাদ কোরে চলে আসবো ।’ এই রূপ পরামর্শের পর আহারান্তে দুই বন্ধু একত্রিত হইয়া একটি সেতার লইয়া বেশা-লয়ে উপস্থিত হইল । ‘বাবুদিগকে’ সমাগত দেখিয়া বামী অত্যন্ত সম্ভ্রষ্ট হইয়া রীতি মত অভ্যর্থনা করিল । সেই বাটীর তিন জন বেশার মধ্যে এক জনের একটু স্বর-বোধ ছিল । সে বামীর ঘরে আসিয়া শ্রামকে একটি গভ বাজাইতে অনুরোধ করিল । শ্রামের মৎ সামান্য বাজান অভ্যাস ছিল । মনে মনে ভাবিল, ‘এরা কি আর কিছু বুঝতে পারবে ? আমি যা বাজাব তাতেই আমাকে সেতারী বলে বোধ করবে ।’ সেতারের ধনি আরম্ভ হইল । বেশাটি দুই চারি মিনিট বসিয়া হাস্য করিয়া উঠিয়া গেল । বামীর বাদ্য শুনিবার অভিপ্রায় নহে । সে যে অভিপ্রায়ে ‘বাবুদিগকে’ ডাকিয়া আনিয়াছে, তাহারই সুযোগ দেখিতে লাগিল ; কিন্তু ‘বাবুদের’ রিক্ত হস্ত । তাহারা ভাবিয়া চিন্তিয়া আঘাতে গল্প আরম্ভ করিল যথা ;—‘বামটাদ বাবু, তোমাকে এক দিন আমাদের বাগানে

নিরৈ যাব । কাল মালী বেটাকে বোলে দেব, তোমার বাড়ীতে একটা ডালি দিয়ে যাবে । আর ভাই, খেটে খেটে প্রাণ ওষ্ঠাগত হোলো! সাহেব বেটা তিন শ টাকা মাইনে দিয়ে যেন মাথা কিনে রেখেচে । আমাদের তো আর ভাই, পেটের ভাতের জন্তে চাকুরী করা নয়—সখ কোরে চাকুরি করা । তা এবার সাহেব বেটাকে বোলেচি, যদি পাঁচ শ টাকা কোরে মাইনে দিতে পার, তবেই থাকুবো, তা নইলে, মাস দুই তিনের মধ্যেই চাকুরী ছেড়ে দেব । আমারই জমিদারিতে দেড় শ টাকা মাইনে দিয়ে একটা সাহেব রেখেছি । আপনার কাজ কর্ম দেখলেই আর রক্ষে থাকে না ।’ এই কপ নানা কথাবার্তার পর ব্রজ বাবু বলিল, ‘তবে ভাই, আজ আসি, ঢের রাত হয়েছে, হয় ত কাল আবার আসুচি ।’ বামীর তখনও বিশ্বাস ছিল যে, ‘বাবুরা’ যাবার সময় কিছু দিয়ে যাবে ; কিন্তু তাহারা যখন রাত্তা পার হইয়া বাসায় প্রবেশ করিল, তখন বামী একটি দীর্ঘ নিশ্বাস ছাড়িয়া ঘরে আসিয়া বসিল । তাহারা যাইবার পরে অপর এক জন বেষ্টা আসিয়া জিজ্ঞাসা করিল, ‘কি বামচাঁদ দিদি, বাবুরা কি দিয়ে গেল ?’ বামী আপনার মান রক্ষা করিবার জন্ত বলিল, ‘আট টাকা দিয়ে গেছে ।’

ক্রমে রাত্রি প্রভাত হইলে, বাবুরা খাইয়া দাইয়া পূর্ব দিনের মত আপিস গেল । আসিবার সময় মেছোবাজার হইতে চার আনা দিয়া গোটা কত বাতাপি নেবু, ‘পাঁচ আনায় দুটি ছোট ছোট কাডলা মাছের ছানা, দুই পয়সার ডাঁটা, আর এক পয়সার টেঁড়স কিনিয়া ঝুড়ি পুরিয়া ‘বামচাঁদের’ বাটীতে একটা উড়ে মুটেকে বাগানের মালী সাজাইয়া পাঠাইয়া দিল । বাবুর বাগান থেকে ডালি আসা ‘বামচাঁদের’ ভাগ্যে কখনও ঘটে নাই

বলিয়া সেই ডালিই তাহার পক্ষে যথেষ্ট বোধ হইল। সে মুটেকে চার পয়সা বকুসিস দিয়া বিদায় করিল। তাহার পর আপন পরিচিত বেষ্টাদিগকে দুই চারিটা নেবু বর্টন করিতে লাগিল; কিন্তু মাছের বথরা বাটির বাহির হইল না, কারণ মাত্রায় অতি অল্প। এ দিকে যথা সময়ে ব্রজ বামীর বাটিতে আসিয়া উপস্থিত হইল। সে দিন শ্রাম কিছু অল্পই ছিল; এই জন্য যাইতে পারিল না। ব্রজ বামীকে একলা পাইয়া সেই রাত্রে মাখামাখি আলাপ করিয়া ফেলিল। কথাবার্তায় অনেক রাত্রি হইয়া পড়াতে সে রাত্রে আর বাসায় যাওয়া হইল না। ব্রজ ভোরের বেলায় উঠিয়া আসিবার সময় বামীর হাতে একটি টাকা দিয়া বলিল, ‘আজ রাত্রে আসিয়া তোমার একটা মাইনের বন্দোবস্ত করিয়া ফেলিব।’ প্রাতে বাসায় গিয়া ব্রজ শ্রামকে গত রাত্রের সমস্ত কথা বলিল। উভয়ে বেলা নয়টা পর্য্যন্ত বাঁধা হুঁকা হাতে করিয়া বারাণ্ডায় তামাকু খাইতে লাগিল। বামীও মাঝে মাঝে এক বার ঝাঁকি দর্শন দিয়া ও মূহু মূহু হাসিয়া ব্রজকে স্মৃথের সাগরে ভাসাইতে লাগিল। তাহার পর নিয়মিত সময়ে আহালাদি করিয়া উভয়ে আপিসে চলিয়া গেল। সন্ধ্যার সময় ব্রজ বামীর বাটিতে গিয়া এই অবধারিত করিল যে, আমি রাত্রি দশটার পরে আসিব ও বার টাকা করিয়া মাহিনা দিব। বামী তাহাতেই স্বীকৃত হইল। ব্রজর অপেক্ষা শ্রামের একটু লেখা পড়া বোধ ছিল। যদিও সে মধ্যে মধ্যে ব্রজর সহিত বামীর বাটিতে যাইত; কিন্তু সে রসে রসজ্ঞ হইত না। ব্রজ মহা আমোদ আহ্লাদে বামীকে লইয়া দুই মাস কাটাইল। এই দুই মাসের মধ্যে বামীকে আট টাকা ও একটি

ইলিশ মাছ দেওয়া হইয়াছিল মাত্র । পরে বামী গতিক দেখিয়া টাকার তাগাদা আরম্ভ করিল । ব্রজ আজ দেবো কাল দেবো করিয়া আরও পোনের দিন কাটাইল । বামী অত্যন্ত পীড়াপীড়ি করিয়া বলিল, ‘আমাকে আজ টাকা দিতেই হবে ; তা না হলে, তোমার বাসায় দশ জনের সম্মুখে তাগাদা কর্কে । তোমার যত ক্ষমতা সব টের পেয়েচি ।’ ঐ সূত্রে ব্রজ বাবুতে ও বামীতে বিলক্ষণ মারামারী হইল । ব্রজবাবু রাগ করিয়া বাসায় চলিয়া গেলে, বামী আপনার বারাণ্ডায় দাঁড়াইয়া বাহা মুখে আসিল, তাহাই বলিয়া ব্রজকে গালি দিতে লাগিল ।

এ দিকে ব্রজর যে ভিতরে ভিতরে প্রায় আড়াই শত টাকা দেনা হইয়া গিয়াছে, আমোদে সে কিছুই টের পায় নাই । বাবুর বাসার নীচে এক খানি মিঠাইওয়ালার দোকান ছিল । সেই খান হইতে প্রত্যহ দুই ইয়ারের জল-যোগের দ্রব্য লওয়া হইত । তাহার পর বামীর বাটীতে অবিরত দুই আড়াই মাস কাল খাবার লওয়া হইয়াছে, তাহাকে যে টাকা দিতে হইবে, সে সময়ে তাহা এক বারও মনে হয় নাই । মিঠাই-ওয়ালার এত টাকা হইয়াছে, তাহা শ্রামও জানিত না । সে মাসে মাসে মাছিনা পাইলেই বাসা খরচ সম্বন্ধে কড়ায় গণ্ডায় ব্রজকে বুঝাইয়া দিত । ব্রজ তাহার একটি পয়সা কাহাকেও না দিয়া অপব্যয় করিয়া ফেলিত । এতদ্ভিন্ন আপিসে ছু টাকা পাঁচ টাকা করিয়া অনেকরই নিকট ধার করিয়াছিল । বাজারে ফোড়েনের নিকট আলু, পটল, ফল, মূল, মেছুনীর নিকট মাছ, গোয়ালিনীর নিকট দুধ এবং কাপড়ওয়ালার নিকট কাপড় এই সমস্তই তিন চারি মাস ধারে চলিয়াছে ;

ব্যাপক কাল বাটীতে এক পরসাগ পাঠাইতে পারে নাই। সেখা
 দ্বী পুত্র পরিবারেরা অগত্যা অন্য উপায় না দেখিয়া হাওলাত
 বরাদ্দ করিয়া গুজরাণ চালাইয়াছে। ব্রজ যে রাত্রে বামীর গালা-
 গালি শুনিল, সেই রাত্রি প্রভাতেই মিঠাইওয়ালার খাতা লইয়া বাবুর
 নিকট হিসাব শোধ করিতে আসিল। শ্যাম বাবু মিঠাইয়ের
 খাতায় ত্রিশ টাকা খরচ দেখিয়া একেবারে আশ্চর্য্য হইয়া
 পড়িল। খাতা সম্বন্ধে মিঠাইওয়ালার সহিত ব্রজবাবুর বাখিতণ্ডা
 হইতেছে, এমন সময়ে গোয়ালিনী আসিয়া উপস্থিত হইল এবং
 কহিল, ‘আমার বার তের টাকা পাওনা হইয়াছে, আমাকে
 টাকা না দিলে, আর দুধ দিতে পারিব না।’ ও দিকে
 বারাণ্ডায় দাঁড়াইয়া বামী সমস্তই শুনিল এবং মনে নিশ্চয়
 অবধারিত করিল, ‘এ বেটা জুয়াচোর, আমাকে আর
 এক পরসাগ দিবে না, তবে আর কেন—মনের খেদ মিটা-
 ইয়া গালাগালি দিয়ে লই না, ওর আর মুখ অপেক্ষা কি?’ এই
 রূপ ভাবিয়া বামী আপনার বারাণ্ডায় দাঁড়াইয়া বলিল, ‘ওগো
 দোকানি ঠাকুর, বাবুর নামে খরচ লিখে আমাকে এক টাকার
 জলখাবার দিয়ে যাও, বাবুর কাছে টাকার ভয় নেই, তিনি মায়
 খোরাকি তিন শ টাকা মইনে পান। ওগো দোকানি ঠাকুর, বাবুর
 বাগানের ডালি টালি এক দিনও পাও নি?—মরণ আর কি!
 যত জোচ্ছোরের জায়গা কলকৈতায়। ওগো গয়লা দিদি, দোর
 চেপে বোসো, আজ রাত্রেই কাঁৎলা মাজুর গুটিয়ে পালাবে।
 দুটো সেতার আছে, বেচলে দু টাকা পাঁচ টাকা হতে পারে।’ এই
 সকল কথাবার্তা হইতেছে, এমন সময় মেছুনী রোজের মাছ দিতে
 উপস্থিত হইল। সে সমস্ত কথা শুনিয়া বলিয়া উঠিল, ‘ও মা!

আমিও যে সাত টাকা পাব !’ এই কথা বলিয়া মাছের চুবড়ি হাতে করিয়া সেই খানে বসিয়া পড়িল । মিঠাইওয়ালা বলিল, ‘বামচাঁদ, তোমাকে এ টাকার কিনারা করে দিতে হবে, আমি বাবুর ঘর চিনি নে, দোর চিনি নে, কেবল তোমার খাতিরেই দিয়েছি ।’ এই কথা শুনিয়া বামী একেবারে ক্রোধে উদ্ভূত হইয়া উঠিল এবং পূর্বাপেক্ষা শত গুণ চীৎকার করিয়া বিক্রপ ও গালি দিতে আরম্ভ করিল । একে প্রকাশ্য পথের উপর, তাহাতে বেশ্যার চীৎকার শুনিয়া অনেক লোক দাঁড়াইতে লাগিল । এই কপে একটা হলস্থূল ব্যাপার বাধিয়া উঠিল ; দেখিয়া শুনিয়া শ্যাম কিছু ক্ষণ ভূত ভবিষ্যৎ বর্তমান ভাবিল, কাহারও কথায় কোন কথা কহিল না, কেবল আপনাকে অবশ্যই ক্ষতি স্বীকার করিতে হইবে, এই চিন্তায় আকুল হইয়া উঠিল । বাবুর গুপ্তলীলা প্রকাশ হইয়া পড়াতে পাচক ও পরিচারিকা বিনয় বচনে শ্যাম বাবুকে বলিতে লাগিল, ‘বাবু, আমাদের উপায় হবে কি ? আমরা গরিব মানুষ ।’ তাহাদিগের কাতরোক্তি শুনিয়া শ্যামের কিঞ্চিৎ ক্রোধের সঞ্চার হইল এবং উদ্ভূত স্বরে ব্রজ বাবুকে বলিল, ‘কি হে, এদেরও কি মাইনেগুলো মাসে মাসে ফেলে দাও নি ?’ ইহা শুনিয়া গোয়ালিনী ও মেছুনী বলিল, ‘বাবু, আমরাও এক পয়সা পাই নি ।’ শুনিয়া শ্যাম বলিল, ‘কেমন হে ব্রজ, আমি বাসা খরচ মাস মাস তোমাকে সব চুকিয়ে দিয়েছি ?’ ব্রজ ঘাড় গুঁজিয়া স্বীকার করিল । পরে শ্যাম বলিল, ‘তবে আমি এদের কাক কাছে দেনদার নই ।’ ব্রজ বলিল, ‘না, এ সমস্ত দেনাই আমার ।’ শ্যাম বলিল, ‘কেমন গো, তোমরা সকলে শুন্নে ? আমি এখন এ

বাসা থেকে অব্যাহতি পেতে পারি ?’ এই কথা বলিয়া শ্যাম আপনার চাদর লইয়া বাহিরে চলিয়া গেল। শ্যাম বন্ধুর ব্যবহারে ষার নাই ছুঃখিত হইয়া সাবেক বাসায় আসিয়া উপস্থিত হইল। পূৰ্ব উপদেষ্টা ব্রাহ্মণ হঠাৎ শ্যামকে আগত দেখিয়া বলিলেন, ‘কি হে, এখন তোমরা কোথায় থাক ? এই দুই তিন মাসের মধ্যে কি একবার দেখা কোর্তের নেই ? তোমাদের ভালর জন্তেই দুটো উপদেশের কথা বলেছিলাম, তার জন্ত কি এত দূর কর্তে হয়!’ ব্রাহ্মণের কথা শুনিয়া শ্যাম একেবারে তাহার পা জড়াইয়া ধরিল এবং কহিল, ‘মহাশয়! আপনার উপদেশ না শুনিয়া যেমন এ বাসা পরিত্যাগ করিয়াছিলাম, তাহার উপযুক্ত ফল হইয়াছে, এক্ষণে আমার অপরাধ মার্জনা করুন।’ তাহার পরে শ্যাম ব্রজ বাবুর সমুদয় কাণ্ড ব্রাহ্মণের নিকট বর্ণন করিল। ব্রাহ্মণ শুনিয়া ‘উত্তম হইয়াছে’ বলিয়া আত্মসম্মতি প্রকাশ করিলেন না, বরং ব্রজকে রক্ষা করিবার কোন উপায় আছে কি না, শ্যামকে তাহাই জিজ্ঞাসা করিলেন। শ্যাম বলিল, ‘মহাশয়, আমরা সামান্য লোক, মাসে ২০।২৫ টাকা উপার্জন করি, ইহাতে কি প্রকারে ব্রজর উপকার করিব ? আমার বোধ হয়, সে দুই তিন শত টাকা দেনা করিয়া ফেলিয়াছে। এক্ষণে টাকা ভিন্ন আর ব্রজকে রক্ষা করিবার কোন উপায় নাই। আজি কালির মধ্যে সমস্ত পাওনাদারেরা একেবারে ব্রজর উপর নালিশ করিবে। মিঠাইওয়ালা বলিয়া গেল যে, সে একেবারে খাড়া শমন করিয়া ব্রজকে গ্রেপ্তার করিবে। পলায়ন ভিন্ন এক্ষণে তাহার আর অন্য উপায় নাই।’

এ দিকে ব্রজ পাওনাদারদিগকে নানা মতে স্তোক দিয়া

বিদায় করিল। তাহার পর ভাবিয়া চিন্তিয়া অন্য কোন উপায় না দেখিয়া স্বদেশে পলায়ন করিতে বাধ্য হইল। বাটীতে গিয়া দেখে, দুর্দশার অবধি নাই। ঘর দুই খানির খড় উড়িয়া গিয়াছে, পরিবারদিগের পরিধেয় বস্ত্র নাই, আহারাদির কষ্টে ছেলেগুলির শরীর শীর্ণ হইয়া পড়িয়াছে, পাওনাদারেরা তাগাদা করিয়া পরিবারদিগকে ব্যতিব্যস্ত করিয়া তুলিতেছে। কর্তা আজ বাটী আসিবেন, কাল বাটী আসিবেন বলিয়া পরিবারেরা এত দিন তাহাদিগকে ক্ষান্ত করিয়া রাখিয়াছিল, তাহার পর কর্তা বাটী আসিয়াছেন শুনিয়া সকল পাওনাদাররাই খাতা বগলে করিয়া আসিতে লাগিল। ব্রজর হাতে এক কড়াও নাই, কিসে নিস্তার লাভ করিবে।

ব্রজ যে দেশে বিদেশে এই রূপ অপমান হইতে লাগিল, এই অপমান হইবার বীজ কোথায়? তাহার অবস্থার দিকে দৃষ্টি না রাখিয়া কার্য্য করাই এই সমস্ত শাস্তি ভঙ্গের মূল কারণ। সে যদি আপনার সাবেক চাল পরিত্যাগ না করিত, তাহা হইলে, এই সামান্য উপার্জ্জনের উপর নির্ভর করিয়া মনের স্বখে কাল যাপন করিতে পারিত। বিলাস পরিপূরিত নগরে আসিয়া বাস করিতে হইলে, কেবল নিম্ন দিকে দৃষ্টি রাখিয়া চলিলে, বিপদে পড়িয়া কষ্ট পাইবার সম্ভাবনা থাকে না। উর্দ্ধ দৃষ্টি করিলেই মস্তক ঘুরিয়া যাইবেক, বিলাস মুর্ত্তিমান হইয়া সম্মুখে দাঁড়াইবে ও বুদ্ধির ভ্রম জন্মাইয়া দিবে। বিলাস যদি একবার অশিক্ষিত মনকে স্পর্শ করে, তাহা হইলে, আর রক্ষা নাই। ব্রজ যদি তিন টাকার জুতা কিনিতে কাল বিলম্ব করিত, তাহা হইলে, তিন চার মাসের মধ্যে তাহাকে এইরূপ দুর্দশা-

গ্রন্থ হইতে হইত না। যদি বেষ্টাদিগের বারিকের নিকট না আসিয়া কোন গৃহস্থ পল্লীতে বাস করিত, তাহা হইলে, তাহাকে বেষ্টার প্রলোভনে পড়িয়া বেষ্টা কর্তৃক অপমানিত হইতে হইত না। যদি বেষ্টার নিকট আপনাকে ধনবান্ বলিয়া প্রতিপন্ন করিবার অভিলাষ না করিত, তাহা হইলে, বাধা হুঁকা, চৌকি ও প্রড্যাহ ধোপ কাপড়ে এবং মিঠাইওয়ার দোকানে উঠনা লইবার প্রয়োজন হইত না। যদি সেতার হস্তে না করিত, তাহা হইলে, তাহাকে সাবেক বাসা পরিত্যাগ করিতে হইত না। কেবল সেতারের অনুরোধেই তাহার রন্ধন শালা ব্যাভ্রের ন্যায় বোধ হইল, হিতেচ্ছু ব্রাহ্মণের সহিত কলহের কারণ হইল, বেষ্টাগয়ে প্রবেশ করিবার সোপান হইল। সেই সেতার এবং প্রাণের প্রতিমা বামীকে ফেলিয়া যখন ব্রজ পলায়ন করিল, তখন ঐ দুই প্রিয় বস্তুকে এক বার মনে করিবারও অবসর হইল না। যখন সেতার ও বামী ব্রজ বাবুকে অর্দ্ধ প্রাস করিয়াছিল, তখন যদি তাহার কোন বিচক্ষণ বন্ধু বামীর বাটীতে যাইতে নিষেধ করিতেন, সেতার বিক্রয় করিয়া বাটীতে খরচ পাঠাইতে বলিতেন, তাহা হইলে কি ব্রজ বাবু তাহার বন্ধুর উপদেশ সেই মন্তভার সময় গ্রহণ করিত? কখনই করিত না। যখন ধন গেল, মান গেল, অপমানের এক শেষ হইল, তখন ব্রজ আপনা আপনি শাস্ত মুক্তি ধারণ করিল। লোকে যে বিলাসী হইয়া আপন মুক্তি কষ্ট পায় ও মনের শান্তি ভঙ্গ করে, ব্রজর আখ্যায়িকাই তাহার দৃষ্টান্ত স্থল।

সংসার তরঙ্গ ।

সংসার শব্দের প্রকৃতার্থ অদ্যাপি স্থির হয় নাই । ইহার আদি নাই অন্ত নাই । কেহ কেহ স্ত্রী পুত্র পরিবার লইয়া দিন পাত করাকে সংসার কহিয়া থাকেন । কেহ বা বিবাহের পরই সংসারী হইলেন, পূর্বে সংসারী ছিলেন না, এই কথার উল্লেখ করিয়া থাকেন । শাস্ত্রকারেরা এই সংসার লইয়া কত কথারই আশ্বোষন করিয়া গিয়াছেন । কেহ কেহ লিখিয়াছেন যে, এ সংসারের সমস্তই মায়াময়, ইহাতে কিছুই সার নাই । কেহ বা সংসার যাত্রা নির্বাহ করাকে অমূলক স্বপ্নের সহিত তুলনা করিয়াছেন । যেমন আমরা স্বপ্নে কখন বা সুখ কখন বা দুঃখ ভোগ করিয়া থাকি, নিদ্রা ভঙ্গের পর সেই স্বপ্ন বৃত্তান্ত স্মরণ হইলে, কখন বা হাস্য করিয়া থাকি, কখন বা ভয়ে বিহ্বল হই, স্ত্রী পুত্র লইয়া সংসার করাও তেমনি একটি অলীক স্বপ্নের ন্যায় । মৃত্যুর পর কে কোথায় থাকিবেক, তাহার কিছুই স্থিরতা নাই । আমিই বা কে ? কোথা হইতেই বা আসিয়াছি ? কেনই বা এই সংসার আবর্তনে পড়িয়া দুঃখ ভোগ করিতেছি, সুখ ভোগ করারই বা ফল কি, দুঃখ ভোগেই বা কষ্ট কি, মরিতেই বা ভয় কি, অদ্যাপি ইহার কিছুই নির্ণয় হয় নাই, কোন কালে যে হইবে, তাহারও আশা করা যায় না । কেহ কেহ এই সংসারকে রূপকে বর্ণনা করিয়া সংসারবাসী জনগণকে ঘোরতর ভ্রম প্রমাদে

নিপতিত করিয়াছেন। তাঁহারা এই সংসারকে একটি প্রকাণ্ড নদীর স্বরূপ করিয়া বর্ণনা করিয়া থাকেন। এই ভবনদী মকর কুস্তীর প্রভৃতি ভয়ঙ্কর হিংস্র জল জন্তুতে পরিপূর্ণ। এই নদীতে সর্স্করণ ভরঙ্গ তুফান হইতেছে। এই নদীর অপরাপারে সর্স্ক সুখপ্রদ একটি পরম রমণীয় স্থান আছে, কোন সুষোগে সেই স্থানে যাইতে পারিলে, শান্তি সুখ সম্ভোগ করিতে পারা যায় ; কিন্তু এই ভয়ানক নদী পার হইবার উপযুক্ত তরণী নাই ও কাণ্ডারীও নাই, কেবল ভক্তিমান লোকেরাই ভগবানের পাদপদ্মকে তরণী করিয়া ভবনদীর অপর পারে যাইতে পারে ; এতদ্ভিন্ন ভবনদীর পারে যাইবার আর উপায়ান্তর নাই। এই রূপক বর্ণনার নানা অর্থ আছে। যাঁহার যাহা ইচ্ছা হইয়াছে, তিনি সেই ভাবেই আপন বিদ্যা প্রকাশ করিয়া সংসারবাসী জনগণকে প্রকৃত ভাবে বঞ্চিত করিয়া রাখিয়াছেন।

শাস্ত্রকারেরা যে সংসারকে স্বপ্নের আয় অমূলক ও ভয়ানক নদী বলিয়া বর্ণনা করিয়াছেন, এ সমস্তই কি অলীক কথা? না, ইহাতে কিছু মাত্র সার আছে। আমার বিবেচনায় তাঁহাদিগের সেই সকল রূপক বর্ণনা অতি চমৎকার এবং আয় যুক্তি ও ধর্ম্ম সঙ্গত। এ সংসার মায়াময়, এ কথার প্রতিবাদ কে করিবে? মায়া যেমন আমাদিগকে একটা নিতান্ত অলীক পদার্থের উপর আকৃষ্ট করিয়া দেয়, এ সংসারও তদনুরূপ। ইহার দৃষ্টান্ত স্থলে বিশ্বশাসক রাজার উপাখ্যানটি সর্ব্বতোভাবে সঙ্গত বলিয়া বোধ হয়।

কোন সময়ে এই পুণ্য ক্ষেত্র ভারত ভূমে বিশ্বশাসক নামে এক জন প্রবল পরাক্রান্ত নরপতি ছিলেন। তিনি আপন

ভুক্ত বলে সমস্ত ভূপালগণকে অধীনে আনিয়া দীর্ঘ কাল এই ভারতবর্ষে রাজত্ব করিয়াছিলেন। অনেক ষাগ যজ্ঞ করিয়া বৃদ্ধাবস্থায় তাঁহার একটি পুত্র হয়। রাজা শেষ দশার পুত্র রত্নপাইয়া সমস্ত রাজ কার্য্য পরিত্যাগ করিলেন এবং সর্ব্বক্ষণ রাজা ও রাজ্ঞী সেই পুত্রের লালন পালনে ব্যতি-
ব্যস্ত হইয়া রহিলেন। দিনান্তে এক বার ঈশ্বরারাধনা করা দূরে থাকুক, নিয়মিত সময়ে স্নানাহার করিতেও কোন কোন দিন বিস্মৃত হইয়া যাইতেন। পুত্রটি ক্রমে ক্রমে যৌবন সীমায় পদার্পণ করিল। পিতা মাতার অধিক যত্নে রাজকুমারের শরীরের লাভণ্য সমধিক বৃদ্ধি পাইয়াছিল ; কিন্তু কপের সমতুল্য গুণ হয় নাই। রাজা সেই পুত্র লইয়া মনের আনন্দে কাল হরণ করিতেছেন, এমন সময় দৈব প্রতিকূলবশতঃ সর্পাঘাতে সেই পুত্রটি গতায়ু হইল। রাজা এবং রাজ্ঞী পুত্র শোকে শয্যাশায়ী হইয়া রহিলেন। রাজার এক জন বহুদর্শী বিজ্ঞ মন্ত্রী ছিলেন। তিনি রাজ্যের কুশল কামনার জন্য এক দিন রাজ সমীপে গিয়া বলিলেন, মহারাজ, যমপীড়ন যজ্ঞ আরম্ভ করুন, তাহা হইলে, মৃত পুত্র পুনঃ প্রাপ্ত হইতে পারিবেন। যজ্ঞ সম্বন্ধে মন্ত্রীর সহিত রাজার অনেক কথাবার্ত্তা হইল, এ স্থলে সে সকল বিস্তারে বর্ণন করা নিষ্প্রয়োজন। ফলতঃ মন্ত্রীর পরামর্শানুসারে রাজা কয়েক জন সুযোগ্য ব্রাহ্মণ আনাইয়া শাস্ত্র সম্মত যমপীড়ন যজ্ঞ আরম্ভ করিলেন। যজ্ঞের অন্ত্যান্ত কার্য্য সম্পন্ন করিয়া ব্রাহ্মণগণ যখন পর্য্যায় ক্রমে যম রাজকে লক্ষ্য করিয়া অষ্ট ধাতু নির্ম্মিত ঢেঁকিতে পাড় দিতে লগিলেন, তখন সেই আঘাত প্রেত পতি অসত্য বোধ করিয়া চিত্রগুপ্তকে তাহার কারণ জিজ্ঞাসা করাত্তে যম রাজের প্র-

ধান অমাত্য বিশ্বশাসক রাজার বমপীড়ন যজ্ঞের কথা আত্মপূর্বিক বর্ণন করিলেন । তৎ শ্রবণে বম রাজ অগত্যা অন্ত উপায় না দেখিয়া কিস্করগণকে কহিলেন, রাজার মৃত পুত্র কোথায় আছে, সত্ত্বর আমার নিকট আনয়ন কর । বম কিস্করেরা একটি মৎস্তরাজ পক্ষী বমের নিকট আনিয়া উপস্থিত করিল । তদ্রূপে ধর্মরাজ ক্রুদ্ধ হইয়া বলিলেন, ওরে কিস্করগণ ! তোরাও এই বিপদের সময় আমার সহিত পরিহাস করিবি ? রাজপুত্রকে না আনিয়া এই পক্ষীকে আনিয়া উপস্থিত করিলি কেন ? শুনিয়া পক্ষী কহিল, ধর্মরাজ ! আমিই সেই রাজপুত্র । রাজাকে উচিত শাস্তি দিবার জন্যই পুত্র রূপে তাহার ঔরসে জন্ম গ্রহণ করিয়াছিলাম । আপনি আমাকে সমভিব্যাহারে লইয়া সেই রাজার নিকট চলুন, রাজার সম্মুখেই আমি আপন বৃত্তান্ত আদ্যোপান্ত সমস্ত বর্ণন করিব । প্রেত পতি তাহাই করিলেন । তিনি রাজ সমীপে উপস্থিত হইয়া কহিলেন, মহারাজ ! কি জন্য অকারণ আমাকে পীড়ন করিতে আরম্ভ করিয়াছেন ? এই আপনার পুত্র গ্রহণ করুন । পক্ষী সেই সময়ে রাজ পুত্রের মূর্ত্তি ধারণ করিয়া বলিল, অহে অজ্ঞানাজ্ঞ রাজা ! তুমি কাহার শোকে অধৈর্য্য হইয়া বমপীড়ন যজ্ঞ আরম্ভ করিয়াছ ? আমি তোমার পুত্র নহি, পরম শত্রু । তোমার কি স্মরণ হয়, তুমি এক দিন যুগয়া করিতে গিয়া বিপিন মধ্যস্থিত একটি সরোবর তীরে দাঁড়াইয়াছিলে ? সেই সময়ে আমি ক্ষুধায় কাতর হইয়া বহু কষ্টে একটি ক্ষুদ্র মৎস্ত ধরিয়া আহার করিবার উপক্রম করিতেছি, এমন সময়ে তুমি শর সজ্জানে আমার প্রাণ বিনষ্ট করিলে, মুখের গ্রাস খাইতে দিলে না ? সেই আক্রোশে আমি তোমার ঔরসে পুত্র রূপে জন্ম গ্রহণ করিয়া বৈরনির্ধাত্তন

করিয়াছি। এই দেখ, আমিই সেই পক্ষী কি না? এই কথা বলিয়া রাজপুত্র তৎক্ষণাৎ মৎস্যরাজ পক্ষী হইয়া প্রেতপুরে চলিয়া গেল।

তৎপরে যম রাজ নরপতিকে কহিলেন, রাজন্, পুত্র শোকে অর্ধৈর্য্য হইয়া আপনি অকারণ পর পীড়নে রত হইয়াছেন। কে কাহার পুত্র, কে কাহার পিতা? এ মায়াময় সংসারে সকলই অনিত্য। যত দিন মনুষ্যের মায়া ভ্রম দূর না হয়, তত দিন আমার পুত্র, আমার ধন, আমার রাজ্য, এই রূপে আমার আমার করিয়া পরমাযু কল্প করে; সে যে প্রতি দিন, প্রতি দণ্ডে ও প্রতি মুহূর্ত্তে মৃত্যুর সমীপবর্তী হইতেছে, ইহা একবারও ভাবিয়া দেখে না; অভ-এব মহারাজ, আমি আপনাকে সারকথা কহিতেছি এইষে, বৃদ্ধবয়সে পুত্র শোকে কাতর হইয়া মনের শাস্তি ভঙ্গ করিবেন না। মৃত্যুকাল প্রায় আগত বিবেচনা করিয়া তত্ত্ব জানে মনোনিবেশ ককন। যদি এখনও আপনার চৈতন্যোদয় না হয়, তাহা হইলে, আপনাকে অতি অল্প দিনের মধ্যেই প্রেত পুরে গিয়া দুঃসহ নরক যন্ত্রণা ভোগ করিতে হইবে। প্রত্যক্ষ দেখিলেন এবং শুনিলেন, কে আপনার পুত্র হইয়া জন্ম গ্রহণ করিয়াছিল। এই রূপ সংসারের সমস্ত বিষয়ই জানিবেন। যাঁহারা তত্ত্বদর্শী, তাঁহারা কাহাকেও আপনার বলিয়া জ্ঞান করেন না; নৈসর্গিক কোন বস্তুতে মায়া রাখেন না; এই ক্ষণেই শোক ছুঃখ তাঁহাদিগের সমীপবর্তী হইতে পারে না। আপনি ভুজ বলে এই পুণ্যক্ষেত্র ভারতবর্ষে একাধিপত্য স্থাপন করিয়াছেন, আপনার রাজ্য লোভে এবং ধন লোভে লক্ষ লক্ষ লোকের প্রাণ বিনষ্ট হইয়াছে, বল পূর্ব্বক অনেক রাজার সর্ব্বস্ব হরণ করিয়া লইয়াছেন; কিন্তু এক্ষণে বিবেচনা করিয়া দেখুন, আপনার মৃত্যুর পর এই প্রকাণ্ড রাজ্য কাহার হইবে? এই

জন্ম বলিতেছি, আপনার অতুল বিভব মনের মানসে সংস্কার্যো ও
সংপাত্রে দুই হস্তে বিতরণ ককন। যে সকল রাজগণকে রাজ্যচ্যুত
করিয়াছিলেন, তাঁহাদিগকে পুনর্বার আপন আপন রাজ্যে প্রতি-
ষ্ঠিত ককন। আপনার এক লোভ রিপু চরিতার্থের জন্ম যে সকল
সৈন্য সামন্ত সমরশায়ী হইয়াছে, তাহাদিগের স্ত্রী পুত্র পরিবার-
গণের গ্রাসাচ্ছাদনের উপায় করিয়া দিন, তাহা হইলেই ইহ কাল
ও পর কালে সৰ্ব্ব দোষ হইতে নিস্তার লাভ করিবেন। এক্ষণে আমি
স্বস্থানে প্রস্থান করি। আপনিও যমপীড়ন যজ্ঞে কাস্ত হইয়া ঈশ্বর-
রাধনায় মনোনিবেশ ককন। এই কথা বলিয়া যম রাজ অন্তর্হিত
হইলেন। রাজারও ভ্রমাক্ষকার দূর হইয়া দিব্য জ্ঞানের উদয়
হইল। তখন তিনি এই সংসারকে নিতান্ত অসার জ্ঞান করিয়া
তত্ত্বজ্ঞানে মনোনিবেশ করিলেন।

উপরি উক্ত উদাহরণে অনেক অলীক কথা উল্লিখিত হইয়াছে।
উদাহরণ স্থলে পৌরাণিক ইতিবৃত্তের যে কোন অংশ সঙ্কলন করা
হইয়া থাকে প্রায় তৎসমুদয়ই অস্বাভাবিক; কিন্তু তাহার মধ্যে অনেক
নিগূঢ় ভাব আছে, এ কথা অবশ্যই স্বীকার করিতে হইবে। যম-
পীড়ন যজ্ঞের প্রভাবে যম রাজ স্বয়ং মৃত রাজপুত্র সমভিব্যাহারে
রাজপ্রাসাদে আসিয়া উপস্থিত হইলেন এবং রাজপুত্রের প্রে-
তাত্মা মৎস্যরূপ পক্ষী হইয়া রাজার পূৰ্ব্ব অপরাধের কথা স্মরণ
করাইয়া দিল, এই সকল অলীক কথা এক্ষণকার সত্য সংসারের
স্ববিদ্যান্ লোক কখনই সত্য বলিয়া স্বীকার করিবেন না; কিন্তু
পুরা কালের পণ্ডিতগণ যখন এই সকল উপন্যাস লিপি বদ্ধ
করিয়া গিয়াছেন, তখন এতৎ সম্বন্ধে অবশ্যই তাঁহাদিগের কোন
নিগূঢ় অভিপ্রায় থাকিবে।

সংসারের সমস্ত কার্য তন্ন তন্ন করিয়া দেখিতে গেলে, তাহার একটিরও বিশেষ মীমাংসা করিয়া উঠিতে পারা যায় না। সংসারে অকাল মৃত্যু হয় কেন? কেহ বা বাল্য কালাবধি বহু কষ্টে নানা শাস্ত্রে পণ্ডিত হইয়া উঠিলেন; কিন্তু আজন্ম কাল তাঁহার দৈন্য দশা ঘুচিল না। চিরদিন হা অন্ন! হা অন্ন! করিয়া ধনীর দ্বারে দ্বারে ভ্রমিতে হইল। আবার অন্য দিকে দেখিতে পাওয়া যায় যে, এক জন মূর্খতম একটি সাগান্য ব্যবসায় অবলম্বন করিয়া দেখিতে দেখিতে মহা ধনবান্ হইয়া উঠিল। কেহ বা লক্ষ মুদ্রা মূল ধন লইয়া ব্যবসায় কার্য আরম্ভ করিল; কিন্তু ব্যবসায় দ্বারা উপার্জন হওয়া দূরে থাকুক, যে সঞ্চিতার্থ লইয়া বাণিজ্য করিতে বসিয়াছিল, কার্য গতিকে সেই মূল ধন পর্যন্ত লোপ পাইয়া গেল। কাহারও বা অতুল ঐশ্বর্য আছে, কিন্তু শরীর ক্লম হওয়াতে সে ঐশ্বর্য ভোগ করিতে পাইল না। কেহ বা সামান্য বংশে জন্ম গ্রহণ করিয়া কেবল আপন ক্ষমতায় অতি অল্প কালের মধ্যে উচ্চ সম্মান প্রাপ্ত হইল। কেহ বা বিপুল ধন পাইয়া তাহা রক্ষা করিতে পারিল না, অবশেষে উদরার্নের জন্য লালায়িত হইয়া বেড়াইতে লাগিল। সংসারে একপ বিপর্যয় ঘটিবার কারণ কি, একগকার তত্ত্বদর্শী পণ্ডিতেরাও ইহার বিশেষ মীমাংসা করিয়া উঠিতে পারেন নাই। অনেকে এতৎ সম্বন্ধে অনেক যুক্তি দর্শাইয়া গিয়াছেন বটে, কিন্তু সে সকল যুক্তি সর্বতোভাবে আমা-দের মনঃপূত হয় না।

এতদ্দেশে শুভক্লর নামে এক জন গণিতশাস্ত্রদর্শী পণ্ডিত জন্মিয়াছিলেন। অদ্যাপি পাঠশালার গুরুমহাশয়েরা তাঁহাকে সর-স্বতীর বরপুত্র বলিয়া নমস্কার করিয়া থাকেন। তিনি সুস্বাস্থ্য

কপে অন্ধ মিলাইবার জন্য এক কড়া কড়িকে তিন ক্রান্তিতে, চারি কাকে, নব দন্তীতে, আশী তিলে ও বার শত আশী বহরে বিভক্ত করিয়া গিয়াছেন। বার শত আশী বহর চক্ষে দেখিবার সামগ্রী নহে, নব দন্তী কাঁহাকে বলে, তাহাও আমরা জানি না ; তথাচ গুরুমহাশয়ের পাঠশালায় অন্ধ কষিবার সময় ছাত্রগণ শুভঙ্করের সেই সকল প্রচলিত নিয়মের প্রতি বিশেষ দৃষ্টি রাখিয়া থাকে। সেই কপ এতদ্দেশীয় ধর্মশাস্ত্রবিৎ পণ্ডিতেরা সংসারের সমস্ত গোল-বোগ মীমাংসা করিবার জন্য অদৃষ্ট, পর কাল ও পূর্ব জন্মের ফলাফলের উপর নির্ভর করিয়া যান। এক পিতার দুই পুত্র, এক জন নানা বিদ্যায় পারদর্শিতা লাভ করিল, এক জন কিছুই শিখিতে পারিল না কেন ? একপ প্রশ্ন উপস্থিত হইলে, সেই সকল পণ্ডিত মহাশয়েরা বলিয়া থাকেন,—

“পূর্বজন্মার্জিতা বিদ্যা, পূর্বজন্মার্জিতং ধনম্।”

পূর্ব জন্মের সংস্কার বশতঃ এ জন্মে এক পুত্র অতি অল্প কালেই নানা শাস্ত্রে পণ্ডিত হইয়া উঠিল ; অন্য পুত্রের পূর্ব জন্মের সংস্কার ছিল না বলিয়া কিছুই করিয়া উঠিতে পারিল না। এক ব্যক্তি বিদ্যা বুদ্ধি বিহীন, অথচ অতুল ঐশ্বর্যের অধিপতি হইয়া নানা সুখ ভোগ করিতেছে, অন্য এক ব্যক্তি বিদ্যা বুদ্ধি সত্ত্বেও উদরাম্বের জন্য লালায়িত হইয়া বেড়াইতেছে। একপ প্রশ্নে পণ্ডিত মহাশয়েরা মীমাংসা করেন যে, পূর্ব জন্মে যে যে কপ কর্ম করিয়া আসিয়াছে, সে এ জন্মে তাহার সেই কপ ফল ভোগ করিবে ; স্বয়ং বিধাতাও সে ফল ভোগের অন্যথা করিতে পারিবেন না। যদি আমরা পূর্ব জন্ম, পর কাল ও অদৃষ্টের ফলাফলের কথা বিশ্বাস করি, তাহা হইলে, আমরা সংসারের

যে সকল গোলযোগ সৰ্ব্ব ক্ষণ ঈক্ষণ করি, তাহা আপনা আপনিই মীমাংসা করিয়া লওয়া যায় ; কিন্তু সকল সময়ে পণ্ডিত মহাশয়দিগের একপ মীমাংসা সঙ্গত বোধ হয় না । তাঁহারা যখন অদৃষ্ট মানিয়া অনেক বিষয়ের মীমাংসা করেন, তখন এক্ষণকার ভদ্রদর্শী পণ্ডিতেরা একপ আপত্তি উপস্থিত করিয়া থাকেন যে, অদৃষ্টে যাহা লিখিত হইয়াছে, তাহা অবশ্যই ঘটবে, বিধাতাও তাহার অন্তথা করিতে পারিবেন না, তবে যাগ যজ্ঞ দ্বারা আমাদের আপদ শান্তি করিতে যাওয়া নিষ্প্রয়োজন । দেব দেবীর পূজা করিয়া ধন যাক্কা, যশ যাক্কা এবং পুত্র যাক্কা করাও বাতুলের কার্য্য । আমি পূৰ্ব্ব জন্মে যে রূপ কার্য্য করিয়া আসিয়াছি ও আমার অদৃষ্টে যাহা লিখিত আছে, এ জন্মে সেই রূপ ফল ভোগ করিব, দেব দেবী দ্বারা তাহার কিছুই অন্তথা হইবে না ; তবে আমরা কোন দৈব বিপাকে পড়িয়া স্বস্তায়ন দ্বারা সেই আপদ শান্তির চেষ্টা করি কেন ? এ স্থলে পর কাল দেখাইলে চলিবে না, অর্থাৎ এ জন্মে দেব দেবীর পূজা করিয়া ধন পুত্র কামনা করিয়া রাখ, পর জন্মে তাহার ফলভোগী হইবে । এ জন্মে হাইকোর্টে একটি তুমুল মোকদ্দমা উপস্থিত হইয়াছে, তাহার শুভ ফল কামনার আমি দ্বাদশ জন ব্রাহ্মণকে কালীঘাটে স্বস্তায়ন কার্য্যে ব্রতী করিলাম, সে স্বস্তায়নের ফল কি পর জন্মে পাইব ? না, এ কথা পণ্ডিত মর্গশয়েরা কখনই বলিতে পারিবেন না ; যে হেতু, কোন ধনবান্ উৎকট পীড়ায় প্রপীড়িত হইলে, নানা স্থানের নানা দেবালয়ে স্বস্তায়ন কার্য্য আরম্ভ হয়, সে স্বস্তায়নের ফল তাঁহারা ইহ জন্মে পাইবার আশা করেন ; যদি তাহার ফল পর জন্মে হয়, তাহা হইলে, কল্প দশায় দেব দেবীর আরাধনা

করা নিষ্প্রয়োজন। ইহাতে কোন কোন ব্রাহ্মণ পণ্ডিত বলেন যে, পূৰ্ণ জন্মের ফলাফল ভোগ এই জন্মে অবশ্যই ঘটয়া থাকে, কিন্তু গ্রহ বৈগুণ্য বশতঃ আমরা সে ফল ভোগে বঞ্চিত হই; এই জন্ম সেই সকল গ্রহ শাস্তির জন্ম স্বস্ত্যয়নাদির প্রয়োজন হইয়া থাকে। এ কথাও নিতান্ত অর্থ বিহীন। যখন পূৰ্ণ জন্মের ফলাফলের উপর স্বয়ং বিধাতারও হস্ত ক্ষেপের ক্ষমতা নাই, তখন গ্রহ বৈগুণ্য বশতঃ যদি আমরা সে ফলে বঞ্চিত হই, তাহা হইলে, পর জন্মের সুখের জন্ম এ জন্মে যাগ বজ্র প্রভৃতি ব্রত করিয়া রাখাও নিষ্প্রয়োজন। কারণ আমরা আগত জন্মে কোন কূলে কোন্ লগ্নে জন্ম গ্রহণ করিব, তাহার কিছুই স্থিরতা নাই; তবেই পর জন্মে সুখ ভোগের প্রত্যাশায় এ জন্মের সমস্ত উপস্থিত সুখে জলাঞ্জলি দিয়া কঠোর ব্রতাদি করা নিতান্ত মূৰ্খের কার্য। এ দেশের শাস্ত্রকারেরা যে সকল যুক্তির পথ দেখাইয়া গিয়াছেন, এ পর্য্যন্ত তাহার কোন স্থলেই সুন্দর মীমাংসা হয় নাই।

ধর্ম শাস্ত্রের পরস্পর বিরোধ থাকাতোই আমরা এই সংসারকে অকূল পাথরের ন্যায় বিবেচনা করিয়া থাকি। তাহার কথা শুনিব, কোন্ পথে চলিব, তাহা স্থির করিতে না পারিয়া কৰ্ণ বিগীন এক খানি ক্ষুদ্র তরিতে আরোহণ করিয়া সংসার সমুদ্রে ঘুরিয়া বেড়াইতেছি। যদি উপযুক্ত কৰ্ণধার পাইতাম, তাহা হইলে, ভব সাগরের অপর পারে গিয়া সুখময় স্থানের অধিকারী হইতে পারিতাম; কিন্তু এ কাল পর্য্যন্ত উপযুক্ত কৰ্ণধার অভাবে সংসারের প্রায় কেহই সেই সুখময় স্থানের অধিকারী হইলেন না। যখন আমরা ভব সাগরের ঘোর তরঙ্গ দেখিয়া উপযুক্ত

কর্ণপারের অনুসন্ধান করি, তখন অনেক আমাদিগের সেই ক্ষুদ্র তরির নাবিক হইতে অগ্রসর হন ; কিন্তু কার্য্য কালে তাঁহারাও আমাদিগের স্থায় অকর্ম্মণ্য প্রতিপন্ন হইয়া থাকেন ।

ভব সাগর পার হইবার পক্ষে শাস্ত্রকারেরা যে সকল উপায় উদ্ভাবন করিয়া গিয়াছেন, তাহার একটিও কার্য্যকর বলিয়া বোধ হইতেছে না । তাঁহারা বলেন, ভগবানের ত্রীপাদপদ্মই এই ভয়ানক সাগর পার হইবার এক মাত্র ক্ষুদ্র তরণী । সেই ত্রীতীক্ষ্ণ তরণীতে আরোহণ করিয়া স্রোতস্বতীর অপর পারে বাইতে হয় । ভগবানের চরণ যদি ভব সাগরের এক মাত্র তরণী হইল, তাহা হইলে, সে তরণীতে ভক্তেরা কি প্রকারে আরোহণ করিবেন, কোন স্থলেই তাহার মীমাংসা করেন নাই ।

এই সংসারে ধর্ম্মশাস্ত্রের গোলযোগ একটি ভীষণ ভাষ্যধারণ করিয়াছে । ইহার সহিত সাগরের তুলনা, কিস্বা নিবিড় অরণ্যের তুলনা করিলে, এই মাত্র উপলব্ধি হয়, যেমন দৈব প্রতিকূল বশতঃ অনাবিকৃত সাগরের মধ্যে কখন কখন দুই এক খানি অর্ণবযান গিয়া পড়িলে, পোতস্থ ব্যক্তিগণ দিক্ হারা এরং পথ হারা হইয়া সেই অকূল পাথারে ভাসিয়া বেড়ায় ; সে সময়ে ঐ পোতস্থ ব্যক্তিবৃন্দের মধ্যে আপনা আপনি যিনি অধিক বুদ্ধিমান ও বহুদর্শী বলিয়া গ্লাঘা করেন, তাঁহারই পরামর্শানুসারে নাবিকগণ কার্য্য করিতে আরম্ভ করে ; কিন্তু সেই অকূল সাগরের কূল কিনারা না পাইয়া নাবিকগণ সেই পরামর্শ দাতার প্রতি অশ্রদ্ধা করিয়া অপর এক জনের পরামর্শানুসারে কার্য্য করিতে আরম্ভ করে । হয় ত, প্রথম ব্যক্তির পরামর্শ অপেক্ষা দ্বিতীয় ব্যক্তির পরামর্শ আরও অনিষ্টকর হইয়া পড়ে ।

তখন পরম্পর আর কেহই কাহারও কথা শুনে না, সকলেই স্বেচ্ছা-চারী হইয়া উঠিয়া সেই অকূল সাগরের মধ্যে এক কালে বিনষ্ট হয় ; এ সংসারের ধর্মশাস্ত্রও তদনুরূপ হইয়া উঠিয়াছে । সৃষ্টি কাল হইতে এ পর্য্যন্ত এই বিচিত্র ব্রহ্মাণ্ডের প্রকৃত ভাব কেহই বুঝিয়া উঠিতে পারেন নাই । কেবল অনুমান ও কল্পনার উপর নির্ভর করিয়া ইহ পর কাল সম্বন্ধে নানা মুনি নানা মত প্রকাশ করিয়াছেন । তাঁহাদিগের পরম্পর মত ভেদের কথা সংক্ষেপে বর্ণন করিতে গেলে, এক খানি স্বতন্ত্র পুস্তক লিখিতে হয় । ধর্ম সম্বন্ধে মত ভেদ ঘটাতে মনুজকুল অকারণ দুঃসহ দুর্দশা ভোগ করিতেছে । সকলেরই ইচ্ছা ইহ কালে অতুল সুখ ভোগ করিয়া চরমে অক্ষয় স্বর্গ লাভ করিব । ইহ কালের সুখ ভোগের সঙ্গে ধর্মশাস্ত্রের অনেক সংশ্রব আছে । মনুষ্যের অভিলষিত কার্য সিদ্ধি না হইলে, কিছুতেই সুখ বোধ হয় না । আমি যাহা ইচ্ছা করি, ধর্মশাস্ত্র তাহা করিতে বারণ করিতেছে ; আমি যাহা কখনও মনে ভাবি না, ধর্মশাস্ত্র তাহারই উপদেশ দিতেছে । যদি কেহ ইহ সংসারে সর্বতোভাবে সুখী হইবার জন্য শাস্ত্রানুসন্ধান প্রবৃত্ত হন, তাহা হইলে, ইহ জগতে আর তিনি কোন কালেই সুখ ভোগ করিতে পারিবেন না । কোন শাস্ত্র উপদেশ দিতেছে, সংসারত্যাগী সন্ন্যাসী হইয়া দেশ ভ্রমণ করিয়া বেড়াও, তাহা হইলেই চরমে পরম গতি লাভ করিতে পারিবে । তাত্ত্বিক মতে শব-সাধনের বিধি আছে, এবং বৈষ্ণব ধর্মে ইহ কালের সমস্ত সুখ পরিত্যাগ করিয়া এক হরির চরণ সার করিলেই পরম ধার্মিক হইতে পারা যায় । গৃহস্থাশ্রমে থাকিয়া ব্রতাদি করাও সামান্য কষ্টকর নহে । তবেই শাস্ত্রানুসারে চলিতে গেলে, এ জন্মে

আর সুখ ভোগের সম্ভাবনা থাকে না। কোন শাস্ত্রেই একপ আদেশ নাই যে, ইচ্ছামত ভোজন পান করিয়া আমোদ প্রমোদে কাল হরণ কর, হৃত্যুর কিঞ্চিৎ পূর্বে দশ সহস্র মুদ্রা ধর্ম্মার্থে রাখিয়া গেলেই চরমে অক্ষয় স্বর্গ প্রাপ্ত হইবে।

শাস্ত্রে একপ উল্লেখ আছে যে, পূর্ব জন্মে যে দিবস যে সময়ে যে কপ কার্য্য করিয়াছ, এ জন্মে সেই দিবস সেই সময়ে সেই সকল কার্য্যের ফলাফল ভোগ করিবে। কর্ম্ম নিবন্ধন যে সকল জীব ইহ সংসারে গতায়ত করিতেছে, তাহারা পূর্ব জন্মার্জ্জিত পাপ পুণ্যের ফল ভোগ করিবে, ইহা স্বীকার করিলাম ; কিন্তু যাঁহারা শাপ ভ্রষ্ট কিম্বা দেব কার্য্য সাধনের জন্য এক বার মাত্র অবনীতে আবির্ভূত হন, তাঁহারা কি জন্য সুখ দুঃখ ভোগ করিয়া থাকেন ? বসু অবতার ভীষ্ম বশিষ্ঠ মুনির শাপে কুক কুলে জন্ম গ্রহণ করিয়াছিলেন, তাঁহার পূর্ব জন্মার্জ্জিত পাপ পুণ্য কিছুই ছিল না, তবে তিনি কি পাপে পিতৃ রাজ্যের অধিকারী হইলেন না ? কেনই বা শরশয্যাগত হইয়া দীর্ঘ কাল বর্ণনাতীত কষ্ট ভোগ করিলেন ? যখন শাস্ত্রকারেরা বিশেষ করিয়া লিখিয়াছেন যে, পাপ ব্যতিরেকে জীবের কষ্ট ভোগ হইবে না, তবে স্বয়ং ভগবান্ রামচন্দ্র কি পাপে চির কাল কষ্ট ভোগ করিলেন ? এক সময়ে তিনি মহাপাপীর ন্যায় রাক্ষস কর্তৃক উৎপীড়িত হইয়াছিলেন, প্রিয়তমা জানকীর বিরহে বনে বনে রোদন করিয়া বেড়াইয়াছিলেন। স্বয়ং ভগবানের একপ পাপের ভোগ কি জন্য হইল ? তিনি ভোগাভোগের জন্য পূর্ব জন্মে কোন ফল সঞ্চয় করিয়া আইসেন নাই। যদি কেহ বলেন যে, মনুষ্য দেহ ধারণ করিলেই গ্রহ বৈগুণ্য বশতঃ সকলকেই দুঃখ ভোগ করিতে হয় ; তবেই

কর্ম ফলের উপর কুগ্রহের আধিপত্য চলে । একপ হইলে, গ্রহ-
গণেরই প্রাধান্য স্বীকার করিতে হয় ; কেন না, যাহা বিপুল হইলে,
মনুষ্যের কথা দূরে থাকুক, দেবগণেরও দুর্দশার অবধি থাকে না ।

আবার কতকগুলি লোক সকল কথাতাই অদৃষ্টের দোহাই
দিয়া থাকেন । অদৃষ্ট শব্দের অর্থ কি ? যাহার উপর আমাদের
দৃষ্টি চলে না, অর্থাৎ ভবিষ্যৎ ঘটনা । ভবিষ্যৎ ঘটনা যার
পর নাই কৌতুকাবহ । বোধ কর, কয়েক জন নরনারী এক খানি
ক্ষুদ্র তরলী যোগে নদী পার হইতেছে, মধ্য স্থলে নৌকা খানি জল-
মগ্ন হইল । আরোহীদিগের মধ্যে যে কয়েক জন সম্ভরণে বিলক্ষণ
পটু ছিল, তাহারাই আত্ম রক্ষা করিতে পারিল না ; যে কিছু মাত্র
সাঁতার জানিত না, সে সেই আসন্ন বিপদ হইতে নিস্তার লাভ
করিল । কোন সময়ে একটি ভগ্ন গৃহের ভিতর দুই বন্ধু একত্র
সতরঞ্চ খেলিতেছিলেন । তথায় গৃহস্থামীর একটি পঞ্চম বর্ষীয়
বালক মার্জ্জার শাবক লইয়া ক্রীড়া কৌতুক করিতেছিল ; দৈবাৎ
মার্জ্জার শাবক শিশুর হস্ত হইতে পলাইয়া সম্মুখস্থ একটি টেবি-
লের নীচে আশ্রয় লইল । বালক তাহাকে ধরিয়া আনিবার জন্য
টেবিলের নিম্নে প্রবেশ করিবা মাত্রই উপরের ছাদ ভাঙ্গিয়া
পড়িল । যে দুই জনে মনোযোগ পূর্বক সতরঞ্চ খেলিতেছিলেন,
তাঁহারা তৎক্ষণাৎ পঞ্চত্ব লাভ করিলেন ; কিন্তু বালক টেবিলের
নীচে বসিয়া থাকাতে তাহার গাত্রে কিছু মাত্র আঘাত লাগিল না ।
রানীকৃত ইষ্টক ও কাষ্ঠের মধ্যে অক্ষত শরীরে বসিয়া রহিল ।
ছাদ পড়িয়া মানুষ খুন হইল, এই সংবাদ চারি দিকে বিস্তার হইয়া
পড়াতে নিকটস্থ ক্ষুদ্র ভদ্র সমস্ত লোক ঘটনা স্থলে ছুটিয়া আসিয়া
প্রাণপণে ইষ্টক ও কাষ্ঠ সরাইতে লাগিল । ক্রমে ক্রমে দেখা

গেল, গৃহস্থামী ও তাঁহার বন্ধু মৃত পড়িয়া রহিয়াছেন ; কিন্তু ক্ষুদ্র শিশুটি ইষ্টক রাশির মধ্যে অক্ষত শরীরে উপবিষ্ট আছে । একপ ঘটনা ঘটে কেন, কে ইহার মীমাংসা করিতে পারে? এ কি পূর্ব জন্মের ফল, না গ্রহ বৈগুণ্যের কারণ, না ঈশ্বরের ইচ্ছা? যদি ঈশ্বরের ইচ্ছা বলি, তাহা হইলে, অনেকে করুণাময়কে পক্ষপাতী বলিবে । যদি গ্রহ বৈগুণ্যের কারণ বলি, কিম্বা পূর্ব জন্মের ফল বলিয়া ধরি, তাহা হইলে, কতক পরিমাণে মীমাংসা হইতে পারে, কিন্তু সর্ব বিধায়ে নহে । ইহাতে ধর্মশাস্ত্র ব্যবসায়িগণ অবশ্য বলিবেন যে, যাহাদিগের ক্ষয় কাল উপস্থিত হইয়াছিল, তাহারাই উপরি উক্ত দৈব বিপাকে মরিল, আর যাহার মৃত্যুর কাল বিলম্ব আছে, কতক গুলি সুযোগ ঘটয়া তাহাকে বাঁচাইয়া দিল । ক্ষয় কালে অবশ্য মৃত্যু ঘটিবে, ইহা সৌপ্তিক পর্বে শ্রীকৃষ্ণ ধর্ম পুত্র যুধিষ্ঠিরকে বিশিষ্ট বিধানে বুঝাইয়াছিলেন । শ্রীকৃষ্ণ বলিয়াছিলেন দেখ, মহারাজ, সময় না হইলে, কেহ কাহাকেও সংহার করিতে পারে না । দ্রৌপদীর পঞ্চ পুত্র এবং ধৃষ্টদ্যুম্ন ও শিখণ্ডী কুরুক্ষেত্রের অষ্টাদশ দিবসীয় তুমুল সংগ্রামে বিশেষরূপে লিপ্ত থাকিয়াও প্রত্যহ অক্ষত শরীরে শিবিরে প্রত্যাবর্তিত হইত; কিন্তু অদ্য ক্ষয় কাল উপস্থিত হওয়াতেই উহারা কাপুরুষ দ্রোণ পুত্রের হস্তে পশুবৎ নিহত হইল । ইহাতে অবশ্য স্বীকার করিতে হইবে যে, মৃত্যু কাল উপস্থিত না হইলে, কেহই কাহাকেও হনন করিতে পারে না ; এই জন্য প্রাক্তনই বল, আর পূর্বজন্মের ফলাফলের ভোগই বল, আর ঈশ্বরের ইচ্ছাই বল, যে যাহা বলিয়া পরিতুষ্ট হয়, তাহাদিগের তাহাই বলিবার সম্পূর্ণ অধিকার আছে ।

পূর্বে লিখিত হইয়াছে যে, জলমগ্ন হইয়া ও ইষ্টক রাশির মধ্যে পতিত হইয়া যে কয়েক জন ব্যক্তি মৃত হইল, ‘ঈশ্বরের ইচ্ছা’ এই কথা পরিত্যাগ করিয়া যদি আমরা পূর্ব জন্মের ফলাফল বা অদৃষ্ট বলিয়া মনকে পরিতুষ্ট করিতে যাই, তাহা হইলে, ‘পূর্ব কথিত ঘটনা দ্বয়ের সর্কাজ সুন্দর রূপ মীমাংসা হয় না ; কারণ ইতি পূর্বে আমরা প্রতিপন্ন করিয়াছি যে, পূর্ব জন্মের পাপ পুণ্যের ফল ইহ জন্মে ভোগ করিবার সময় কুগ্রহগণ কখন বা স্বাপক কখন বা বিপক্ক হইয়া দাঁড়ায় । স্বয়ং বিধাতা যে ফলের বাধ্য গ্রহগণ তাহারও বিপরীত করিয়া দিতেছে । পূর্ব জন্মের আবার কোন কথাই আমরা ভাল রূপ বুঝিতে পারি না । ভগবদ্বাক্যে ভগবান্ স্বয়ং বলিয়াছেন, যেমন মনুষ্য জীর্ণ বস্ত্র পরিত্যাগ করিয়া নব বস্ত্র পরিধান করে, সেই রূপ জীবাত্মা জীর্ণ কলেবর পরিত্যাগ করিয়া নূতন কলেবরে প্রবিষ্ট হয়। তবে এই রূপ আধারগত পাপ পুণ্যের ভাগী কে হইবে ? যদি বল, আত্মাই স্মৃৎ ছুঃখের ভাগী হইয়া থাকেন, তাহা হইলে, আত্মা যে ঈশ্বরের অংশ সে কথায় সর্বতোভাবে দোষ পড়িয়া যায় ।

মনুষ্য দেহ ধারণ করিয়া আমরা ভয়ানক বিপদে নিপতিত হইয়াছি । যেমন পূর্বে বলা হইয়াছে যে, অনাবিক্ষৃত সাগর মধ্যগত অর্ণবধানের আরোহিণ প্রথমতঃ যাহাকে দূরদর্শী বোধে তদীয় পরামর্শানুসারে কার্য্য করিয়াছিল, এবং তাঁহার আদেশ মতেই চলিয়া অকূল পাথারে কুল পাইবার জন্য পোত চালন করিতে আরম্ভ করিয়াছিল ; কিন্তু দুই এক দিবস কার্য্য করিয়া দেখিল যে, যিনি অধ্যক্ষ তিনিও তাহাদিগের ন্যায় অনভিজ্ঞ । তখন তাহারা সকলেই স্বেচ্ছাচারী হইয়া উঠিল, কেহ বা সমুদ্রে বস্প দিয়া প্রাণ

পরিভ্যাগ করিল, কেহ কেহ দৈবের উপর নির্ভর করিয়া স্থির-
ভাবে বসিয়া রহিল ; কিন্তু তাহাদিগের মধ্যে কতকগুলি উ-
দ্যোগী পুরুষ যত্ন ও চেষ্টা একেবারে পরিভ্যাগ করিলেন না,
পোতা চালনও করিতে লাগিলেন এবং অকূল কাণ্ডারী ঈশ্বরকেও
ডাকিতে লাগিলেন ।

এই সংসার তরঙ্গও মনুজকুলের পক্ষে সেই রূপ হইয়া
উঠিয়াছে । আমাদিগের এই দেহ রূপ ক্ষুদ্র তরি অজ্ঞান রূপ
অকূল পাথারে সর্ব্ব ক্ষণ ভাসিতেছে । যে দিকে দৃষ্টি পাত
করি, সেই দিকেই অকূল পাথার । এই বিপদে পাড়িয়া যদি
শাস্ত্রকারদিগের উপদেশের কথা স্মরণ করি, তাহা হইলে,
মনোমধ্যে আরও আতঙ্ক উপস্থিত হয় ; কেন না, সংসার
সাগর উত্তীর্ণ হওন সম্বন্ধে নানা মুনি নানা মত প্রকাশ
করিয়া গিয়াছেন । কেহ বলিয়াছেন, যাহা ঘটবার তাহা
ঘটিবে ; কেহ বলিয়াছেন, বিপদে পড়িলে ঈশ্বরকে ডাকিও ;
কেহ বলিয়াছেন, চেষ্টার অসাম্য কিছুই নাই । বিপদ কালে এই
সকল মত ভেদের কথা স্মরণ হইলে, কাহার কথা বিশ্বাস করিব,
স্থির করিয়া উঠিতে পারি না ; সেই জন্য সকলের মত পরিভ্যাগ
করিয়া একটা স্বকল্পিত উপায় উদ্ভাবন করি । এই রূপে পর্য্যায়
ক্রমে সংসারের সমস্ত লোকই ধর্ম্ম উপদেষ্ট্রগণের উপদেশ পরি-
ভ্যাগ করিয়া আপনাদিগের ইচ্ছামত পথে পরিভ্রমণ করিয়া
বেড়াইতেছে । যদি দৈব বশতঃ সেই স্বেচ্ছাচারিগণের মধ্যে কেহ
কোন স্মরণ প্রাপ্ত হন, এবং মনে মনে বিবেচনা করেন যে,
আপন বুদ্ধি অনুসারেই অকূল সংসার সাগরে কূল প্রাপ্ত হইলাম ;
যদি শাস্ত্রকারদিগের কথা শুনিয়া দুর্গম পথের পথিক হইতাম,

তাহা হইলে, একপ সুবিধা ঘটিবার কোন সম্ভাবনা থাকিত না। এক জন স্বেচ্ছাচারীকে কিয়ৎ পরিমাণে নির্ভয় দেখিয়া আর দশ জনও সেই পথে অগ্রসর হইল। অবশেষে সকলেই দেখিতে পাইল যে, আমরা যাহাকে কুল বিবেচনা করিয়াছিলাম, ইহা প্রকৃত কুল নহে, একটি স্থাপদ সঙ্কুল মায়াময় ক্ষুদ্র দ্বীপে আসিয়া উপস্থিত হইয়াছি। এখানে থাকিলে আশু বিনষ্ট হইব, অতএব স্থানান্তরে প্রস্থান করাই যুক্তি সিদ্ধ। প্রাণী মাত্রেই সংসার সাগরে পড়িয়া অবিরত ঘুরিয়া বেড়াইতেছে। দুর্বলকে সবলে বিনষ্ট করিতেছে। কেহ কোন কালে যদি একটি নিরাপদ স্থানে আসিয়া আশ্রয় গ্রহণ করে, কিন্তু বিবেচনার দোষে সেই নিরাপদ স্থানেও বিপদ পূর্ণ বোধে আবার ছুতন স্থানে গমনের চেষ্টা দেখে।

আমাদিগের এই সকল প্রলাপের প্রকৃতার্থ নিম্নে প্রকাশ করিতেছি। এই সংসার প্রকৃতই সাগরের তুল্য। পোতাধ্যক্ষ যেমন সমুদ্র পথে পোত চালন করিবার সময় পদে পদে আপদ বিপদ ভোগ করিয়া থাকেন, আমাদিগের এই দেহ রূপ ক্ষুদ্র তরণীর অধ্যক্ষও সেই রূপ সমস্ত জানিয়া শুনিয়াও মধ্যে মধ্যে সংসার রূপ সাগরের ঘোর আবর্তনে পড়িয়া বর্ণনাভীত কষ্ট ভোগ করেন। সমুদ্র পথে কি রূপে পোত চালন করিতে হয়, প্রত্যেক পোতাধ্যক্ষগণ বাল্য কাল হইতে সদৃশকর নিকট বিশিষ্ট বিধানে শিক্ষা করিয়াছেন, আবার দুই এক বার সমুদ্র পথে পরিভ্রমণ করিয়া বহুদর্শিতাও লাভ করিয়াছেন। প্রত্যেক জলখানে দিগদর্শন যন্ত্র রহিয়াছে, তাহার সম্মুখে মানচিত্র ঝুলিতেছে। পোতাধ্যক্ষ সমূহ সতর্কতার সহিত বর্ণ ধারণ করিয়া সহযোগীগণকে

প্রকৃত পথে পোত চালনের আদেশ করিতেছেন; তথাচ কখন বা কর্ণধারের অনভিজ্ঞতা, কখন বা তাঁহার অনবধানতা এবং কখন বা দৈব প্রতিকূলতা বশতঃ কত শত জলযান জলমগ্ন হইতেছে। অকুল পাথরের মধ্যে থাকিয়া অনেক সময়ে অনেক জাহাজ আগুনে পুড়িয়া ছারখার হইতেছে। আবার কখন বা গাঢ় কুজ্ঝটিকায় দশ দিক্ আচ্ছন্ন হইলে, দূরবীক্ষণ দ্বারা দূরে দৃষ্টি না চলাতে চড়ায় ঠেকিয়া বা জলমগ্ন শৈলে আঘাত লাগিয়া অনেক জলযান বিনষ্ট হইয়া থাকে। সেই রূপ আমাদিগের এই দেহ রূপ ক্ষুদ্র তরঙ্গী অনুক্ষণ ভব সাগরে ভাসমান রহিয়াছে। মন ইহার বিচক্ষণ কাণ্ডারী, জ্ঞানই এ তরঙ্গীর দিগদর্শন যন্ত্র, পরিদৃশ্যমান পৃথিবীই ইহার মানচিত্র, ও অমূল্য ছুই চক্ষুই ইহার দূরবীক্ষণ যন্ত্র। এমন কাণ্ডারী ও একপ আয়োজন সত্ত্বেও আমাদিগের দেহ তরি বিপথগামী হয় কেন? ইহার উত্তর এই যে, যদি মন বিশেষ সাবধানের সহিত দেহ তরি চালন করে, তাহা হইলে, কখনই ভব সাগরের আবর্তনে পড়িয়া ‘গেল! গেল!’ শব্দ করিয়া উঠিতে হয় না। যেমন সিন্ধু সলিল গত অর্নবযান গাঢ় কুজ্ঝটিকায় পড়িলে, কর্ণধার কর্তৃক বিপথে চালিত হয়, আমাদিগের দেহ তরির পক্ষে দারা, পুত্র প্রভৃতি পরিবারও সেই রূপ কুজ্ঝটিকা; কেবল তাহাদিগেরই জন্ত দেহ তরি পদে পদে বিপথগামী হয়।

দৈব বিড়ম্বনার উপর কোন কথাই চলে না। দূর দৃষ্টি কি অদৃষ্ট এই দুইটির উপর কাহারও হস্ত বিস্তার করিবার ক্ষমতা নাই। বিপদ দূরস্থ রহিয়াছে, এবং ধীরে ধীরে নিকটস্থ হইতেছে, আমরা তাহা অবগত হইবার কিছু মাত্র ক্ষমতা রাখি না; এই

জন্ম ভাবী বিপদ যাহাতে না ঘটে, তৎ পক্ষে নিশ্চেষ্ট হইয়া থাকি। বিবেচনা করিয়া দেখ, ভারতবর্ষের প্রধানতম রাজ প্রতিনিধি ও শাসনকর্তা লর্ড মেও বাহাদুর পোর্টব্লেয়ার পরিদর্শন করিতে যখন কলিকাতা হইতে বাহির হইলেন, তখন তিনি কিছুই জানিতে পারেন নাই যে, আগুমান দ্বীপ হইতে আর তাঁহাকে প্রত্যাবর্তিত হইতে হইবে না। দূর দৃষ্টির প্রতি দৃষ্টি চলে না বলিয়াই তিনি আনন্দ মনে আগুামানে গমন করিয়াছিলেন। যে দিন বৈকালে সিন্ধু জলে সূর্যাস্তের শোভা দর্শন মানসে পর্ষভারোহণ করেন, তখন দূর দৃষ্টি নিকটস্থ হইয়াছে এবং অদৃষ্টে যাহা ঘটিবার তাহার সমুদয় আয়োজন হইয়া রহিয়াছে, সে সময়েও তিনি তাহার বিন্দু বিসর্গ কিছুই অবগত নহেন। ছুরায়া শেয়ার আলি শত্রুপাণি হইয়া পর্ষভের নিম্নে উপবিষ্ট আছে, লর্ড বাহাদুর সূর্য্য অস্তের শোভা দেখিয়া স্বগণ সহিত হাসিতে হাসিতে নিম্নে আসিতেছেন, সেই সময় দুরন্ত যবন এক আঘাতেই তাঁহার জীবনান্ত করিল। লর্ড বাহাদুর পোর্টব্লেয়ারে আসিয়াছেন বলিয়া ক্ষণ কাল পূর্বে সেই ক্ষুদ্র দ্বীপ আনন্দ ধ্বনিতে প্রতিধ্বনিত হইতে ছিল; কিন্তু চক্ষের পলক পড়িতে না পড়িতেই সেই পোর্টব্লেয়ারে হাহাকার ধ্বনি উঠিল। দেখুন, দৈবের কি ভয়ানক কার্য্য! অদৃষ্টের কি অভাবনীয় ফল! দূরদৃষ্টি কি রূপ নিকটস্থ হইয়াছিল। যিনি ভারতবর্ষের প্রধানতম শাসনকর্তা, যাহার একটি কথায় সহস্র সহস্র অশ্বারোহী ও পদাতিক সৈন্য যুদ্ধার্থে প্রস্তুত হয়, যাহার আজ্ঞায় শত শত কামানের শব্দ ভারতের হৃৎকম্প হয়, যাহার পার্শ্বে তাঁহার সহোদর শত্রুপাণি হইয়া আসিতেছিলেন, এবং দূরদর্শী ও রাজনীতিজ্ঞ সভাসদগণ

যাঁহার চতুর্দশ বেষ্ঠন করিয়াছিল, একপ ব্যক্তিকে কি না এক জন বন্দী অনায়াসে নিহত করিয়া ফেলিল ! কেহই তাঁহার প্রাণ রক্ষা করিতে পারিল না ! অতএব দৈব প্রতিকূল হইলে, কেহই আমাদিগের রক্ষা কর্তা নাই । ভবিষ্যতে যাহা আছে, শত বর্ষ চেষ্টা করিলেও কেহই তাহা জানিতে পারিবেন না ।

এই সকল দৈব ঘটনার কর্তা কে ? ঈশ্বর, এ কথা অবশ্যই বলিতে হইবে । তিনিই আমাদিগকে রক্ষা করেন, এবং তিনিই আমাদিগকে বিনষ্ট করিয়া থাকেন । সেই ইচ্ছাময়ের ইচ্ছার প্রতিকূলে দাঁড়াইতে কাহারও ক্ষমতা নাই । তিনি স্বহস্তে কোন কার্যই করেন না । তাঁহার ধনের ভাণ্ডার নাই যে, ধন প্রার্থীদিগকে ধন দান করিবেন, তাঁহার সৈন্য সামন্ত নাই যে, প্রিয়পাত্রের পক্ষ হইয়া শত্রু দলন করিবেন, তিনি স্বয়ং কোন কালেই অস্ত্র ধারণ করেন না যে, একটি সামান্য জীবের প্রাণ হনন করিবেন । যদিও তাঁহার ধন নাই, অস্ত্র নাই, এবং পৃষ্ঠ পুরুষ কেহই নাই, তথাচ তাঁহার নিয়মেই এই সংসারের সমস্ত কার্য অতি সূচক রূপে সম্পন্ন হইতেছে । তিনি যাহা করিতেছেন, তাঁহার উপর দোষারোপ করা নিতান্ত অজ্ঞানের কার্য । তিনি জীবের শিবের জন্ত সংসারের সমস্ত কার্য একপ শৃঙ্খলাবদ্ধ করিয়া রাখিয়াছেন যে, তাহার একটির প্রতি বিশেষ মনোনিবেশ করিতে গেলে, এক বারে বিস্ময় সাগরে নিমগ্ন হইতে হয় । তিনি পক্ষপাতী নহেন, তাঁহার দয়া সকলের প্রতি সম ভাগে বিভক্ত । ঈশ্বর ও ঈশ্বরের কার্য সম্বন্ধে তর্কিকেরা চির কালই ঘোর বাধিতণ্ডা করিয়া আসিতেছেন । বিশেষতঃ, একগণকার বিবিধ বিদ্যা বিশারদ আধু-

নিক নাস্তিকের দল প্রতি কথ্যেই ঐশ্বরিক কার্যের উপর দোষ দর্শাইয়া থাকেন; কেহ বলেন, যদিও ঈশ্বর থাকেন, তাহা হইলে, কোন ক্রমেই তাঁহাকে দয়াময় বলিতে পারিব না; যে হেতু, তাঁহার ঘোর নিষ্ঠুরতার বিষয় পদে পদে আমাদিগের দৃষ্টি গোচর হইতেছে। সন্তান প্রসবের কালে প্রসূতি যে রূপ যন্ত্রণা ভোগ করে, তাহা বর্ণনাতিত। ঈশ্বর যদি দয়াময় হইতেন, তাহা হইলে, অনায়াসে সন্তান প্রসবের একটি সুস্বাদু উপায় অবধারিত করিয়া দিলে, তাঁহার দয়াময় নামের গৌরব রক্ষা হইত। সময়ে সময়ে আগ্নেয় গিরির অগ্ন্যুৎপাতে, ভূমিকম্প ও ভয়ানক ঝটিক প্রভৃতিতে অসংখ্য জীবের প্রাণ বিনষ্ট হয়। সেই সকল দৈব বিড়ম্বনায় কত শত লোক বর্ণনাতিত কষ্ট ভোগ করিয়া মৃত হইয়া থাকে। এক এক সময়ে মহামারীতে বা দুর্ভিক্ষে এক একটি বহু জনাকীর্ণ দেশ একেবারে প্রাণীশূন্য হইয়া পড়ে। স্বচক্ষে দেখা গিয়াছে, ভয়ানক দুর্ভিক্ষের সময়ে প্রসূতি ক্রোড়স্থ দুগ্ধপোষ্য শিশু সন্তানকে বিক্রয় করিয়া আপন ক্ষুধানল শীতল করিয়াছে। আহার সামগ্রীর অপ্রতুলকেই দুর্ভিক্ষ কহিয়া থাকে। যদি ঈশ্বর দয়াবান্ ও সর্বশক্তিমান্ হইতেন, তাহা হইলে, আহারাভাবে দীর্ঘ কাল যন্ত্রণা ভোগ করিয়া কখনই অসংখ্য মহাপ্রাণীর প্রাণ বিনষ্ট হইত না। তিনি যখন এই বিশ্ব রাজ্যের প্রাণিপুঞ্জকে উচিত মত আহার দানে অক্ষম, তখন তাঁহাকে সর্বশক্তিমান্ কেমন করিয়া বলিব? বর্তমান কালের নাস্তিকের দল ঈশ্বরের প্রতি এই রূপ দোষারোপ করিয়া অনেক গ্রন্থ রচনা করিয়াছেন, এবং সেই সকল গ্রন্থ পাঠ করিয়া বহু সংখ্যক শিক্ষিত যুবকও বিষম ভ্রমে নিপতিত হইতেছেন।

নাস্তিকদিগের প্রথম গুলির যথা সাধ্য উত্তর প্রদানের
অগ্রে আমরা এই বিচিত্র ব্রহ্মাণ্ডের আভ্যন্তরিক ভাব সম্বন্ধীয়
ছুই একটি উদ্ঘট গল্পের সার সংগ্রহ করিতে বাধ্য হইলাম ।
পূর্বে বলা হইয়াছে যে, ঈশ্বর স্বয়ং কোন কার্য করেন না, অন্য
ব্যক্তি দ্বারা অনেক সময়ে তাঁহার অভিপ্রায় সিদ্ধ করিয়া
থাকেন । এই সম্বন্ধে অতি প্রাচীন কালের একটি গল্প এই স্থলে
মন্নিবেশিত করা গেল ;—

পুরা কালে কোন গ্রামে একটি দরিদ্র ব্রাহ্মণ বাস করিতেন ।
তাঁহার অনেকগুলি সন্তান জন্মিয়াছিল । বহু পরিবারের অন্ন বস্ত্র
দানে ব্রাহ্মণ একেবারে অক্ষম হইয়া পড়িলেন । মধ্যে মধ্যে সেই
দরিদ্র বিপ্র সপরিবারে অনশনে থাকিতেন । ব্রাহ্মণ এক দিন
মনে মনে ভাবিলেন, শাস্ত্রকারেরা লিখিয়াছেন যে, সমস্ত দেবগণের
মধ্যে মহাদেবকেই অতি অল্প প্রয়াসে পরিতুষ্ট করিতে পারা যায় ।
তিনি অল্পে সন্তুষ্ট বলিয়াই লোকে তাঁহাকে আশুতোষ কহিয়া
থাকে ; অতএব গৃহে বসিয়া একপ যন্ত্রণা ভোগাপেক্ষা একান্ত
মনে কিছু দিন শিবের আরাধনা করিব । দেখিব, পশুপতি
আমার প্রতি কৃপা দৃষ্টি করেন কি না । এই কৃপা চিন্তার পর
ব্রাহ্মণ এক নিবিড় অরণ্য মধ্যে প্রবেশ করিয়া এক মনে ও এক
ধ্যানে দেব দেব মহাদেবের আরাধনা করিতে লাগিলেন । দিবস
ত্রয় সেই ব্রাহ্মণ গণ্ডুষ মাত্র জলও গলাধঃকরণ করেন
নাই, কেবল ছুই হস্ত উত্তোলন করিয়া মহাদেবকে ধ্যান
করিতে লাগিলেন । ব্রাহ্মণ তিন দিবস অনশনে শিবারাধনা
করাতে পার্শ্বতীনাথ আর থাকিতে পারিলেন না, উমার স-
হিত উমাকান্ত সেই বিপিন মধ্যে আসিয়া প্রবিষ্ট হইলেন ।

হর পার্কতী এক বৃক্ষতলে উপবিষ্ট হইয়া কি প্রকারে ব্রাহ্ম-
ণের দুঃখ দূর করিবেন, তাহারই উপায় উদ্ভাবন করিতে লাগি-
লেন। মহাদেব পার্কতীকে কহিলেন, দেবি, আমি ঐ দরিদ্র
ব্রাহ্মণকে দশ সহস্র মুদ্রা প্রদান করিব, কিন্তু অদ্য নহে, কল্যা
স্বর্ধ্যাস্তের পূর্বে সম্মুখস্থ শিবের মন্দিরে ব্রাহ্মণ দশ সহস্র
মুদ্রা প্রাপ্ত হইবে। মহাদেব যে সময়ে পার্কতীকে এই সকল
কথা বলিতেছিলেন, সেই সময়ে এক জন ধূর্ত বণিক ঐ বৃক্ষের
উচ্চ শাখায় বসিয়া ফল চয়ন করিতেছিল। সে মহাদে-
বের সমস্ত কথা শুনিতে পাইল। হর পার্কতী অন্তর্ধান হইলে
পর সে ধীরে ধীরে বৃক্ষ হইতে নামিল, এবং ব্রাহ্মণের নিকটে
গিয়া কহিল, ওহে ব্রাহ্মণ, তুমি কেন বনে বসিয়া অনর্থক কষ্ট
ভোগ করিতেছ? এখনকার কালে কি আর দেবতার জাগিয়া
আছেন? তুমি আমার প্রতিবেশী, অর্থকষ্ট উপস্থিত হওয়াতে ভ্রমে
পড়িয়া প্রাণ হারাইতে বসিয়াছ! আমার বাড়ীতে আইস, আমি
তোমাকে হাজার টাকা দিব; ইহাতে আমার পুণ্য হইবে, নামও
হইবে। হাজার টাকার কথা শুনিয়া ব্রাহ্মণের আত্মার পরিসীমা
রহিল না। তিনি তৎক্ষণাৎ বণিকের সমভিব্যাহারে তাহার
বাটীতে গিয়া উপস্থিত হইলেন, এবং হাজার টাকার তোড়া
আনিয়া গৃহিণীর হস্তে দিয়া আপনাকে কৃতার্থ বোধ করিলেন।

পর দিবস সন্ধ্যার কিঞ্চিৎ পূর্বে বণিক বিপিন মধ্য স্থিত
শিবালয়ের দ্বারে গিয়া উপস্থিত হইয়া দেখিল, মন্দিরের দ্বার
বন্ধ রহিয়াছে। বণিক উচ্চৈঃস্বরে কহিল, হে দেব দেব
মহাদেব! দ্বার উদ্ঘাটন করিয়া আপন প্রতিজ্ঞা পূর্ণ কর।
তোমার কথা কখন অশ্রুতা হইবার নহে; অতএব তোমার ভক্তকে

শীঘ্র শীঘ্র টাকা গুলি দিয়া বিদায় কর, দাসের সহিত পরিহাস করা প্রভুর উচিত কার্য্য নহে। বণিক পুনঃ পুনঃ চীৎকার করিতে লাগিল, কিন্তু কিছুতেই মন্দিরের দ্বার উদ্ঘাটিত হইল না। অবশেষে ক্রোধে পরিপূর্ণ হইয়া সজোরে দ্বার দেশে একটি পদাঘাত করাতে তৎক্ষণাৎ মন্দিরের দ্বার উদ্ঘাটিত হইল ; কিন্তু বণিকের পদাঘাতে কবাটের এক খানি প্রস্তর ফলক ভাঙ্গিয়া যাওয়াতে তাহার দক্ষিণ পদের উকদেশ পর্য্যন্ত কবাটের মধ্যে প্র-বিষ্ট হইয়া গেল। বণিক এক প্রহর কাল প্রাণপণ চেষ্টা করিয়াও সেই ভগ্ন কবাট হইতে আপন চরণ বাহির করিতে পারিল না। অবশেষে নিকপায় হইয়া সমস্ত রজনী সেই মন্দিরের দ্বারে পতিত রহিল। প্রত্যাষে তাহার পুত্রগণ পিতার অন্বেষণে বহির্গত হইল। বিস্তর অনুসন্ধান করিয়াও বণিক কোথায় আছে, তাহার কিছুই সংবাদ পাইল না। দিবা ছুই প্রহরের সময় এক জন কাঠুরিয়া আসিয়া বণিকের জ্যেষ্ঠ পুত্রকে সংবাদ দিল যে, আপনার পিতা বনের ভিতর শিবালয়ের দ্বারে পতিত রহিয়াছে, জীবিত কি মৃত তাহা বলিতে পারি না। এই সংবাদ প্রাপ্ত মাত্রই বণিক পুত্র ভ্রাতৃগণের সহিত শিবালয়ে গিয়া উপস্থিত হইল। দেখিল, পিতা জীবিত আছেন, কিন্তু দক্ষিণ চরণের উকদেশ পর্য্যন্ত কবাটে আবদ্ধ রহিয়াছে। তাহারা কয়েক সহোদরে একত্রিত হইয়া পিতার উদ্ধার সাধনে বিশেষ চেষ্টা করিল, কিন্তু কিছুতেই কৃতকার্য্য হইতে পারিল না। অবশেষে মন্দির অভ্যন্তরে এই দৈব বাণী হইল যে, ওরে অর্থ পিশাচের পুত্রগণ ! তোরা শত বর্ষ চেষ্টা করিলেও তোদের পিতাকে উদ্ধার করিতে পারিবি না। তোদের পিতা প্রভারণা দ্বারা ব্রহ্মস্ব হরণ করিতে

আসিয়াছিল, এক্ষণে তাহারই ফলভোগ করিতেছে। যদি তোদের পিতাকে রক্ষা করিতে চাহিস্, তাহা হইলে, পাপের প্রায়শ্চিত্ত স্বরূপ আর নয় সহস্র মুদ্রা সেই দরিদ্র ব্রাহ্মণের বাটীতে পঁহুঁছিয়া দে; নতুবা এই অবস্থাতেই ইহার মৃত্যু হইবে। তোদের পিতা চির কাল প্রবঞ্চনা দ্বারা বিপুল অর্থ সঞ্চয় করিয়াছে, এ পর্য্যন্ত তাহার এক কপর্দকও সংকার্য্যে ব্যয় করে নাই। অন্য কি কথা, আপন স্ত্রীপুত্র পরিবারগণকেও ভাল করিয়া অন্নবস্ত্র দেয় নাই। পাপের ধন কোন কালে স্থায়ী হইবার নহে। বিশেষতঃ, ক্লেশ-
 ণের ধনে অগ্নি, চোর, রাজা এবং প্রতারণার সম্পূর্ণ অধি-
 কার আছে। যাহারা সং কার্য্যের দ্বারা অর্জিত ধনের পরি-
 মিতাচারে সার্থকতা সম্পাদন করে, তাহারাই ধন ভোগের যথার্থ
 পাত্র। যাহাদিগের ধনের নিতান্ত প্রয়োজন আছে, দেবতারা তোর
 পিতার ভাণ্ডার হইতে সেই সকল লোকের অভাব মোচন করাই-
 বেন, কল্য তোদের পিতা আপনা হইতেই তাহার সূত্র পাত
 করিয়াছে। যদিও তোর আর নয় সহস্র মুদ্রা ঐ ব্রাহ্মণকে
 দান করিয়া পিতার উদ্ধার করিতে বিলম্ব করিস্, তাহা হইলে,
 অদ্য রজনীতেই দস্তু কর্তৃক তোদের সমস্ত ধন লুণ্ঠিত হইবে।
 দেবতাদিগের গৃহে সঞ্চিত ধন নাই, তাঁহারা প্রকারান্তরে এক
 জনের ধন অপর এক জনকে দেওয়াইয়া থাকেন। এই ভবের
 আভ্যন্তরিক কৌশল সমস্ত বুঝিয়া উঠা কাহারও সাধ্য নহে,
 কোন কালে কেহ তাহা জানিতে পারিবে না। এই সকল দৈব-
 বাণী শুনিয়া তৎক্ষণাৎ তাহার ঐ ব্রাহ্মণকে নয় সহস্র মুদ্রা দিয়া
 পিতার উদ্ধার সাধন করিল।

যেমন আগ্নেয় গিরির অগ্নি ১৭পাতে বহু সংখ্যক লোক একে

বারে ধনে প্রাণে বিনষ্ট হয় ; কি জন্ম একপ দুর্ঘটনা ঘটে, কেনই বা ঈশ্বর অকালে বহু সংখ্যক মহাপ্রাণীকে বর্ণনাভীত কষ্ট দিয়া এক কালে বিনষ্ট করেন, তাহার গুঢ় ভাব অবগত হইতে না পারিয়া নাস্তিকেরা যেমন ঈশ্বরকে নির্দয় ও নিষ্ঠুর বলিয়া অগ্রাহ্য করে, সেই রূপ উপরি উক্ত গল্পটিতে দেব দেব মহাদেব ঐ রূপণ বণিকের নিকট মিথ্যাবাদী ও প্রভারক হইয়াছিলেন ।

সৃষ্টি প্রকরণ সম্বন্ধে ঈশ্বরের গুঢ় অভিপ্রায় সম্যক বুঝিতে পারা মনুষ্যের সাধ্য নহে । দৈব বিড়ম্বনায় অসংখ্য প্রাণীহত্যা দেখিয়া নাস্তিকেরা কৰুণাময় ঈশ্বরকে নিষ্ঠুর বলিতে সাহসী হইয়াছে ; এ কি তাহাদিগের কম স্পর্কার কথা ! তাহারা কি এক বার ভাবিয়া দেখে না যে, আগ্নেয় গিরির অগ্ন্যুৎপাতেও ঈশ্বরের মহিমা দেদীপ্যমান রহিয়াছে । তাহারা কি জানে না যে, পৃথিবীর অভ্যন্তর নানাবিধ ধাতু মিশ্রিত অত্যুষ্ণ তরল পদার্থে পরিপূর্ণ । কখন কখন সেই তরল ধাতুতে ভয়ানক তরঙ্গ উপস্থিত হয়, তাহার কিয়দংশ বহির্গত না হইলে, সে তরঙ্গের কোন ক্রমেই শমতা হয় না ; এই জন্ম কৰুণাময় পৃথিবীর স্থানে স্থানে সেই তরল পদার্থ নির্গত হইবার জন্ম এক একটি পথ প্রস্তুত করিয়া রাখিয়াছেন, আগ্নেয় গিরি বলিয়া আমরা সেই সকল পথের নামকরণ করিয়াছি । যদি নির্দিষ্ট স্থান দিয়া পৃথিবীর অভ্যন্তরস্থ তরল ধাতু, ভস্ম ও ধূমরাশি নির্গত না হইয়া সময়ে সময়ে এক একটি নুতন স্থান ভেদ করিয়া ঐ সকল অনিষ্টকর পদার্থ নির্গত হইত, তাহা হইলে, ঈশ্বরের সৃষ্টি কৌশলের দোষ বলিয়া ধরিভাম । তিনি যখন এক একটি নির্দিষ্ট স্থানে আগ্নেয় গিরির সৃষ্টি করিয়া রাখিয়াছেন, এবং অগ্ন্যুৎপাতের দুই

তিন দিবস পূর্বে হইতে সঙ্কেত দ্বারা অগ্ন্যুৎপাত নিকটস্থ বলিয়া জানাইয়া থাকেন, তথাচ যাহারা কেবল আলস্য পরবশ হইয়া আগ্নেয় গিরির চতুর্পার্শ্ব হইতে পলায়ন না করে, তাহার জন্ম ঈশ্বরকে দোষী করা নিতান্ত মূর্খের কার্য্য। যে কোন প্রকার দৈব বিড়ম্বনা ঘটুক না কেন, অকস্মাৎ সেই মহা অনিষ্টকর ব্যাপার কখনই উপস্থিত হয় না। তিনি কি ঝটিকা, কি জলপ্লাবন, কি ভূভিক্স ঘটবার পূর্বে আভাষের দ্বারা প্রাণী মাত্রকেই সাবধান হইবার জন্য পুনঃ পুনঃ সঙ্কেত করিতে আরম্ভ করেন, তাহাতেও যাহাদিগের চৈতন্য না হয়, দৈব বিপাকে তাহারাই বিনষ্ট হইয়া থাকে।

সন্তান প্রসব সম্বন্ধে নাস্তিকেরা যে কথা উত্থাপন করে, তাহাও নিতান্ত ভ্রান্তি মূলক। প্রসূতিকে প্রসব বেদনায় কিয়ৎ ক্লম কষ্ট ভোগ করিতে হয় সত্য; কিন্তু নব প্রসূত সন্তানের মুখ দেখিলে, সে কষ্ট একেবারে দূর হইয়া যায়। যে দ্রব্য বহু কষ্টে অর্জিত, আমরা তাহারই প্রতি বিশেষ যত্ন ও স্নেহ করিয়া থাকি, অনায়াস লভ্য দ্রব্যের প্রতি সমধিক আদর করি না। বহু কষ্টে প্রসূতি সন্তানের মুখাবলোকন করিতে পান বলিয়া আপন প্রাণ অপেক্ষাও অপত্যকে অধিক মমতা করিয়া থাকেন, উহা অনায়াস লভ্য হইলে, বোধ হয়, ততদূর করিতেন না। আবার দেখিতে পাওয়া যাইতেছে, প্রসব কালীন যন্ত্রণা সমস্ত প্রাণীর এক রূপ নহে। যাহারা এককালীন অধিক শাবক বা ডিম্ব প্রসব করে, প্রসব সময়ে তাহাদিগের অতি সামান্যই যন্ত্রণা হইয়া থাকে। স্বচক্ষে দেখা গিয়াছে রাজহংসীরা চারি দিকে নৃত্য করিয়া প্রসন্ন হৃদয়ে আহারাশ্বেষণ করিতে করিতে ডিম্ব প্রসব করিয়া

থাকে । যদি মনুষ্যের আয় তাহাদিগকে প্রসব কালে যন্ত্রণা ভোগ করিতে হইত, তাহা হইলে, আহাৰ করিতে করিতে কখনই ডিম্ব প্রসব করিতে পারিত না ; তবেই প্রসব সময়ের যন্ত্রণার ক্লাস করিয়া দিতে সৰ্ব্বশক্তিমানের শক্তি আছে । মানব জাতি সম্বন্ধে যখন তাহা করেন নাই, তখন অবশ্যই ইহাতে ঈশ্বরের কোন গুঢ় অভিপ্রায় আছে, তাহা আমরা হয় ত বিশিষ্ট বিধানে বুঝিয়া উঠিতে পারি নাই ।

মহামারী ও ছুৰ্ভিক্ষে বহু প্রাণী নাশ সম্বন্ধে আমরা আরও একটি কথা বলিব । শাস্ত্রজ্ঞ পণ্ডিতেরা বিশিষ্ট বিধানে প্রমাণ করিয়াছেন যে, পাঞ্চভৌতিক শরীর বিনষ্ট হইলেও জীবাত্মা বিনষ্ট হয় না । উপস্থিত ছুৰ্ভিক্ষে বহু সংখ্যক প্রাণী নাশ হইল সত্য, কিন্তু কৰুণাময় ঈশ্বর যদি তাহাদিগকে অন্য কোন সুখময় স্থানে লইয়া বাইবার জন্য এই সুলভ উপায়ে বিনষ্ট করিয়া থাকেন, সে কথা কে বলিতে পারে ? বিশেষতঃ, এক্ষণকার বহুদর্শী পণ্ডিতেরা কহিয়া থাকেন যে, এই ভারত ভূমি বিংশতি কোটি মনুষ্যের আহাৰ দিতে সক্ষম, ইহার অধিক প্রজা বৃদ্ধি হইলেই ছুৰ্ভিক্ষের সম্ভাবনা । গত বর্ষের লোক সংখ্যার তালিকায় স্পষ্ট দেখা গিয়াছে যে, পূর্ক্সাপেক্ষা এক্ষণে ভারতে পাঁচ কোটি নর নারী অধিক জন্মিয়াছে । যদিও বৎসর বৎসর বহু সংখ্যক নর নারী মহামারীতে বিনষ্ট হইতেছে, তথাচ প্রজা সংখ্যা উন্নত ভিন্ন অবনত হইতেছে না । একপ অবস্থায় ভারত বর্ষে মহামারী ও ছুৰ্ভিক্ষে বহু সংখ্যক প্রাণী নাশ প্রয়োজন বলিয়া ধরিতে হয় । যে সকল স্থানে যুদ্ধ বিগ্রহে অধিক পরিমাণে প্রাণীনাশের সম্ভাবনা নাই, সেই সকল স্থানে Natural

check এ প্রাণী নাশ না হইলে, সংসারের ঘোর বিড়ম্বনা ঘটিবার সম্ভাবনা হয় । যেটি দৈব কর্তৃক হইয়া থাকে, তাহাকেই Positive check কহা যায় । যে সকল বিষয় সংসারের কল্যাণের জন্য আমরা আপনা আপনি করিয়া থাকি, পণ্ডিতেরা তাহাকেই Preventive check কহিয়াছেন । ভারতবর্ষীয়-গণ অতি অল্প বয়সেই বৈবাহিক সূত্রে আবদ্ধ হয় । বাহাদিগের অপত্য প্রতিপালনের কিছু মাত্র ক্ষমতা নাই, অগ্র পশ্চাৎ বিবেচনা না করিয়া কায় ক্লেশে তাহারাও একটি দার পরিত্রা করিয়া থাকে । এই সকল কারণে অন্যান্য ভূভাগ অপেক্ষা ভারতবর্ষে অধিক পরিমাণে প্রজাবৃদ্ধি হইয়া উঠিতেছে ; এই জন্যই পূর্বা-পেক্ষা এ দেশে দুর্ভিক্ষের আধিক্য হইয়া উঠিবে, ইহাতে আর বিচিত্র কি ।

মানব জাতি অপেক্ষা নিকৃষ্ট প্রাণীর মধ্যে Preventive check দেদীপ্যমান রহিয়াছে । মৎস্য জাতির ডিম্ব প্রসব করিয়া তৎক্ষণাৎ আপনাই ভক্ষণ করিয়া ফেলে । দৈবাৎ স্রোতের মুখে ছুই এক বার ডিম্ব ভাসিয়া যায় বলিয়া কি পরিমাণে মৎস্য বৃদ্ধি হইয়া থাকে, তাহা প্রত্যক্ষ দেখিতে পাওয়া যাইতেছে । যদি মৎস্য জাতির ডিম্বভক্ষণ স্বভাব সিদ্ধ না হইত, তাহা হইলে, সলিলে তাহাদিগের স্থান হওয়া ভার হইয়া উঠিত । এতদ্ভিন্ন বিড়ালী, ব্যাঘ্রী ও অন্যান্য নিকৃষ্ট প্রাণীরাও অনেক সময়ে আপন আপন শাবক ভক্ষণ করিয়া ফেলে । বানরী পুং বানর প্রসব করিলেই বানরেরা তৎক্ষণাৎ তাহাকে মারিয়া ফেলে ; এই জন্য দুই শত বা তিন শত বানরীর মধ্যে একটি বা দুইটির অধিক বানর দৃষ্ট হয় না । যদি ঠৈশবাবস্থায় পুং

বানরগুলি এই রূপে বিনষ্ট না হইত, তাহা হইলে, বানরের সংখ্যা যে কি পরিমাণে বৃদ্ধি হইত ও তদ্বারা সংসারের কতদূর অনিষ্ট ঘটিত, তাহা সহজেই বুঝিতে পারা যায় ।

সংসার তরঙ্গ আমাদের মূল প্রস্তাব । কথার প্রসঙ্গে নাস্তিক সম্প্রদায়ের ঈশ্বরের সৃষ্টি প্রকরণ সম্বন্ধে দোষারোপ করণের বিষয় উপস্থিত হইয়াছে । ধর্ম সংক্রান্ত বিপ্লব সংসারের একটি সামান্য তরঙ্গ নহে । সময়ে সময়ে এই তরঙ্গ উপস্থিত হইয়া এক একটি সুসভ্য দেশের সর্বনাশ ঘটয়া গিয়াছে । অদ্যাপি কাল্পনিক ধর্ম রূপ ঝটিকার প্রবল বেগে ভব সাগরে ভয়ানক তরঙ্গ উপস্থিত হইয়া থাকে । কেবল এক ঈশ্বরপরায়ণ ব্যক্তিবৃন্দেরই সে তরঙ্গে আতঙ্ক উপস্থিত হয় না । তাঁহারা বিশ্বাস রূপ সূদৃঢ় উপকূলের উপর দাঁড়াইয়া স্থির চিত্তে এই ভব সাগরের লহরী লীলা দর্শন করেন । যেমন পরিদৃশ্যমান সিন্ধু সলিল কি জল লবণাক্ত হইয়াছে, বা উপকূল হইতে দৃষ্টি করিলে, কি জল সাগরের অগাধ জলরাশি নীল বর্ণ দেখায়, ইহার বিশিষ্ট কারণ এ পর্য্যন্ত কেহই অবধারিত করিতে পারেন নাই ; সেই রূপ এই ভব সাগরের তরঙ্গ লহরী দেখিয়া তাহারা কি জল বিশ্বয় সাগরে নিমগ্ন হয়, তাহার তথ্যাসম্ভবান করিতে না পারিয়া মূঢ়ের ঈশ্বরের সৃষ্টি কৌশলের উপর অকারণ দোষারোপ করিয়া থাকে । যাহা আমরা বুঝিতে পারি না, তাহার অভ্যন্তরে অবশ্যই কোন নিগূঢ় ভাব আছে ; কিন্তু যাহা বুঝিবার প্রয়োজন নাই, ঈশ্বর সে সকল বিষয় বুঝিতে আমাদের ক্রমতা দেন নাই । দীর্ঘ কাল পূর্বে স্বভাব আমাদের উপর একাধিপত্য করিত, তাহার গতি রোধ করিতে কাহারও ক্ষমতা হইত না, এক্ষণে স্মার্ত্তজ্ঞত

বুদ্ধির প্রভাবে স্বভাবকে কিঙ্করের ন্যায় খাটাইয়া লইতেছি। এই জ্ঞান অনুমান করিতে পারা যায় যে, যে সকল বিষয় এক্ষণে আমাদের নিভান্ত বুদ্ধির অগম্য হইয়া রহিয়াছে, কাল প্রভাবে হয়ত সেই সকল বিষয় আমরা অনায়াসে বুঝিতে পারিব। অতএব ঈশ্বরপরায়ণ ব্যক্তিবৃন্দের উচিত এই যে, তাঁহারা যেন স্থির ভাবে ঈশ্বরের সৃষ্টি কৌশল পরিদর্শন করেন; কেন না, কোন বিষয়ে সন্দিগ্ধ চিত্ত হইয়া নিষ্ফল বাগ্যুদ্ধে প্রবৃত্ত হইয়া ঈশ্বরের প্রতি দোষারোপ করা নিভান্ত মূর্খের কার্য। যখন আমরা কে, কোথা হইতে আসিয়াছি, ও মৃত্যুর পর কোথায় গমন করিব, তাহাই স্থির করিয়া উঠিতে পারি নাই, তখন এই প্রকাণ্ড ব্রহ্মাণ্ডের প্রত্যেক কার্য প্রণালীর গূঢ় ভাব বুঝিবার চেষ্টা করা কি অনধিকার চৰ্চা নহে?

প্রত্যক্ষ পরিদৃশ্যমান সিন্ধু সলিল যখন স্থির ভাবে থাকে, তখন গলিলস্থ বাষ্পীয় পোত আরোহিণের আনন্দের পরিসীমা থাকে না। সে সময় কেহ বা আহাৰ করিতেছেন, কেহ বা স্নেহে নিদ্রা যাইতেছেন, কেহ বা পুস্তক পাঠ করিতেছেন, এবং কেহ বা স্মৃতিব্য যন্ত্র বাজাইয়া সংগীত দ্বারা শ্রোতাগণের চিত্ত বিনোদন করিতেছেন। সাগরের শান্ত ভাব দেখিয়া সকলের হৃদয়েও শান্তি দেবী মূর্তিমতী হইয়া দাঁড়াইয়া আছেন। কেহ এক বার মনেও ভাবিতেছেন না যে, এই সাগর আবার এক সময়ে ভীষণ ভাব ধারণ করিবে, তখন ইহার ভয়ানক ভরঙ্গ লহরী দেখিয়া জীবনের আশা পরিত্যাগ করিতে হইবে, প্রতিকূল অনুমান হইতে থাকিবে যে, এই বার বুঝি অগাধ জল রাশির মধ্যে পোত নিমগ্ন হইল, আর উঠিবে না, আর রক্ষা

পাইবার কোন উপায় নাই ; অন্তিম সময়ে স্ত্রী পুত্র পরিবারগণের
 কি আত্মীয় বন্ধুর সহিত সাক্ষাৎ হইল না। বহু কষ্টে যে ধন উপা-
 র্জন করিয়াছিলাম, তাহাও অতল জলে ডুবিল। এক্ষণে যদি ককণা-
 ময় ঈশ্বর কৃপাদৃষ্টি করেন, তবেই রক্ষা ; নতুবা নিস্তার লাভের
 আর উপায়ান্তর নাই। হে ককণাময় ! হে বিপদ ভঞ্জন !
 আমাদিগকে রক্ষা কর ! রক্ষা কর ! মুহুমূর্হঃ এই কপ চীৎকার
 শ্রুতি উঠিতে থাকিবে। নাবিকগণ আপনা লইয়া ব্যস্ত হইয়া উ-
 ঠিবে, কেহই কাহারও সাহায্য করিতে আসিবে না। ভব সাগরের
 অন্তর্গত মনুষ্যের দেহ কপ ক্ষুদ্র তরঙ্গীও তদনুরূপ। যখন ইহ
 সংসারে শান্তি বিরাজমান থাকে, অর্থাৎ মনুষ্যের ধন থাকে,
 জন থাকে, পূর্ণ যৌবন থাকে, ও শরীর সুস্থ থাকে, সে সময়
 মানব জাতি এই সংসারকে তৃণ তুল্য জ্ঞান করিয়া দিন যামিনী
 মনের আনন্দে শান্তি সলিলে সন্তরণ করিয়া বেড়ায় ; এক বার
 মনেও ভাবে না যে, এই সংসার সাগরে কোন সময় কুবাভাসে ঘোর
 আন্দোলিত হইয়া উঠিবে, তখন ইহার ভীষণ তরঙ্গ তুফান দেখিয়া
 এই দেহরূপ ক্ষুদ্র তরির কাণ্ডারী একেবারে কর্ণ পরিত্যাগ করিয়া
 বসিবে। তরঙ্গী ভয়ানক আবর্তনে পড়িয়া ঘুরিতে থাকিবে, তখন
 পূর্বে যে সকল সুখ ভোগ করিয়াছিলাম, তাহা কিছুই স্মরণ হইবে
 না, এই সংসারের চতুর্দিকে কেবল বিভীষিকা দর্শন হইবে। কি
 হইল ! কি হইল ! কেন এত দিন আমোদে উন্মত্ত হইয়া প্রকৃত কার্য্য
 বিস্মরণ হইয়াছিলাম ! ভব সাগরের যে একপ তরঙ্গ তুফান আছে,
 পূর্বে তাহা কিছুই অনুভব করিতে পারি নাই। ভাবিয়াছিলাম,
 চির কালই সম ভাবে যাইবে। এক্ষণে দেখিলাম যে, মনুষ্যের সুখ
 নলিনী দলান্বিত জলের ন্যায় সর্ব্বক্ষণ টল টল করিতেছে।

এই সংসার সাগর কামরূপী। এক এক সময় এই সাগর নানা ভাব ধারণ করে। কাহারও পক্ষে শান্ত, কাহারও পক্ষে অশান্ত। যখন এক জন এই সাগরে পড়িয়া ‘প্রাণ যায়!’ বলিয়া চীৎকার করিতেছে, ঠিক সেই সময়েই এই সাগরের অন্য এক দিকে আনন্দ কোলাহলের গগনভেদী ধ্বনিতে নভোমণ্ডল কম্পিত হইতেছে। এই সাগরের উপকূলে দাঁড়াইয়া কেহ বা বিনা আয়াসে দুই হস্তে রাশি রাশি বহু মূল্য বস্ত্র সংগ্রহ করিতেছে, কেহ বা তরঙ্গ লহরী যুক্ত সিঁধু জলের তলস্পর্শ করিয়াও একটি কপর্দক উদ্ধৃত করিতে পারিতেছে না। তবেই সংসার সকলের পক্ষে সমান নহে। যাহার এক দিন অতুল ঐশ্বর্য ছিল, পুত্র কলত্র ছিল, ছরদৃষ্ট বশতঃ সে সমস্ত হারাইয়া নিভান্ত দীন ভাবাপন্ন হইয়া পড়িয়াছে। যে পূর্বে দীন দরিদ্র ছিল, এক্ষণে সে ধনে জনে পরিপূর্ণ হইয়া উঠিয়াছে। অদ্য যে হাসিতেছে, কল্য তাহাকেই আবার ক্রন্দন করিতে দেখা যাইবে। এক দিবস যে নগর ধনে জনে পরিপূর্ণ ছিল, এক দিনের দৈব বিড়ম্বনা বশতঃ সেই নগর অদ্য প্রাণী শূন্য হইয়া পড়িয়াছে। কল্য যে সুস্থ শরীরে মনের আনন্দে সংগীত করিয়াছিল, অদ্য সে রোগের যন্ত্রণায় অস্থির হইয়া শয্যাবলুণ্ঠিত হইতেছে। কিছু কাল পূর্বে যে সকল স্থান মক্ভূমি বলিয়া বিখ্যাত ছিল, এক্ষণে সেই সকল স্থানেই বহু জনাকীর্ণ নগর ও উপনগর হইয়াছে। পূর্বের আশান ভূমি এক্ষণে কুসুমোদ্যান হইয়াছে, রাজ প্রাসাদ আশান ভূমিতে পরিণত হইয়াছে। তবেই এই সংসার যার পর নাই পরিবর্তনশীল; ইহা কখন কি ভাব ধারণ করিবে, তাহার কিছুই স্থিরতা নাই। এই জন্যই পণ্ডি-

তৈরা এই পরিবর্তনশীল সংসারকে কখন বা প্রচণ্ড ভরঙ্গমালা সঙ্কুল সাগরের সহিত, কখন বা ঐন্দ্রজালিক ক্রীড়ার সহিত, এবং কখন বা একেবারে সমস্তই অলীক বলিয়া বর্ণন করিয়াছেন । যাঁহারা জ্ঞান চক্ষে এই সংসার সাগরের ভরঙ্গ তুকান দর্শন করিয়া প্রফুল্ল চিত্তে হাস্য করেন, তাঁহারাই ধন্য ; নতুবা অজ্ঞানের পক্ষে এই জগত কখন কুসুম শয্যা, কখন বা অগ্নিকুণ্ড বলিয়া বোধ হয় ।



আত্মতত্ত্ব ।



যে রাজ্যের রাজা আপন রাজ্য খণ্ডের সবিশেষ তত্ত্বানু-সন্ধান না লইয়া নিশ্চিন্ত ভাবে বিলাস ভোগ করেন, তাঁহার রাজ্য অচির কাল মধ্যেই শত্রু হস্ত গত হয় । যে গৃহস্থামী প্রত্যহ আপন সংসারের তত্ত্বানুসন্ধান না লন, তাঁহার পরিবারের মধ্যে নানা দোষ ও সংসারে মহা বিশৃঙ্খল ঘটিয়া সর্বস্বতোভাবে তাঁহাকে ব্যাধিত করে । যে কৃষক স্বকীয় ভূমি খণ্ডের বিশেষ তত্ত্ব অবগত না হইয়া বীজ বপন করে, তাহার সে ভূমিতে কোন কালেই সুন্দর শস্য উৎপন্ন হয় না । যে গৃহে কালসর্প বাস করে, সেই গৃহের অধিকারী উক্ত সর্পের বিনাশ সাধন না করিয়া যদি অকুতোভয়ে সসর্প গৃহে বাস করে, তাহা হইলে, তাহাকে অবশ্যই সর্পাঘাতে মরিতে হয় । যদি কেহ অন্ধকারাচ্ছন্ন গৃহে আলোক না লইয়া প্রবেশ করে, তাহা হইলে, সে যে গৃহাভ্যন্তরস্থ কোন কঠিন দ্রব্যের আঘাতে ধরাতলশায়ী হইবে,

ইহা আশ্চর্যের বিষয় নহে। সেই রূপ যিনি এই ভৌতিক দেহ রাজ্যের সমস্ত তদন্ত, ও বাহ্য জগতের সহিত ইহার সমস্ত সম্বন্ধ অবগত হইবার প্রয়াস না পাইয়া অজ্ঞানাক্রমে ইতস্ততঃ পরিভ্রমণ করেন, তাঁহার দেহ রাজ্যে নানা প্রকার বিশৃঙ্খল ঘটে, ও তিনি মোহাদি শত্রু কর্তৃক আক্রান্ত হইয়া পদে পদে কষ্টভোগ করিয়া থাকেন।

শাস্ত্রকারেরা লিখিয়াছেন যে, আমাদিগের এই দেহ রাজ্যে আত্মাই সর্বোচ্চ; যদিও তিনি কোন বিষয়ে লিপ্ত নহেন, তথাচ স্বভাবের রীতি অনুসারে তাঁহাকে দেহবাসী হইয়া সুখ দুঃখের ভাগী হইতে হয়। দেহ যে প্রকারে বিনষ্ট হউক না কেন, আত্মা অক্ষত ভাবে সে দেহ পরিত্যাগ করিয়া দেহান্তরে প্রবিষ্ট হইতে পারেন, আত্মার কোন কালেই বিনাশ নাই। সে যাহা হউক, সকল মনুষ্যেরই এক মনে ও এক ধ্যানে সর্বাগ্রে আপনাকে চিনিয়া তৎপরে সংসারের অপরাপর বিষয়ের তত্ত্বানু-
সন্ধানেনে প্রবৃত্ত হওয়া, এবং সমস্ত জগতের সহিত একটি মাত্র মনুষ্যের কত দূর সংস্রব আছে, তন্ন তন্ন করিয়া তাহা জানা উচিত। আত্মজ্ঞান হীন লোকেরা কবন্ধের ন্যায় এই সংসার ক্ষেত্রে বিচরণ করে; এই জন্ত প্রতিকণ তাহাদিগের বিপদ ও দুঃখ ঘটিবার সম্পূর্ণ সম্ভাবনা। পূর্বে বলা হইয়াছে যে, আলোক ব্যতীত অন্ধকার গৃহে প্রবিষ্ট হইলে, যেমন পদে পদে নানা বিঘ্ন ঘটিবার সম্ভাবনা থাকে, সেই রূপ আত্মজ্ঞান বিহীন হইয়া সংসার ক্ষেত্রে বিচরণ করিতে গেলে, কোন অবস্থাতেই মানবের ঈ লাভের সম্ভাবনা থাকে না। নিকৃষ্ট প্রাণিগণের আত্মজ্ঞান নাই, এজন্য তাহারা পদে পদে বিপদে পতিত হয়। পক্ষীর

মধ্যে কাক ও চতুষ্পদ পশুর মধ্যে শৃগাল অভ্যস্ত ধূর্ত হইলেও মনুষ্যের নিকট সৰ্ব্বদা প্রভাবিত হইয়া থাকে ; সেই রূপ আত্ম-তত্ত্ব বিহীন, অথচ সাংসারিক কার্য্যে বিলক্ষণ চতুর ব্যক্তির বহু কাল ধূর্ততা দ্বারা শত শত লোককে প্রভাবিত করিয়া অবশেষে আপনারাই স্বকীয় জালে নিপাতিত হইয়া সমূলে বিনষ্ট হয় ; কিন্তু যাহাদিগের আত্মজ্ঞান আছে, অথচ সাংসারিক চতুরতার লেশ মাত্র জানেনা, তাহারা সেই জ্ঞান প্রভাবে শত সহস্র ধূর্তের নিকট বিনা আয়াসে আত্ম রক্ষা করিতে পারেন । বিনা তত্ত্বজ্ঞানে কেহই আপনা আপনি ভাল হইতে পারেন না । যিনি আপনাকে আপনি ভাল করিয়া চিনিয়াছেন, আপনার দোষ গুণের সমালোচনা আপনা আপনি করিতে পারেন, তিনিই আত্মতত্ত্বের অধিকারী হন ।

আমরা যে সৰ্ব্বদা ‘আমি আমি’ করিয়া ব্যতিব্যস্ত হইতেছি, আমার বাটী, আমার ঘর, আমার পুত্র কলত্র, ও আমার শরীর ভাবিয়া মনোমধ্যে ইহারই সৰ্ব্বদা আন্দোলন করিতেছি ; কিন্তু বিশেষ বিবেচনা করিয়া দেখিতে গেলে, ইহার কেহই আমার নহে । অন্য কি কথা, আমার দেহ এবং অঙ্গ প্রত্যঙ্গগুলিও আমার বশ নহে, তাহারা স্বভাব সম্মত হইয়া স্বভাবেরই কার্য্য করিতেছে । যাহার যে কার্য্য স্বভাব কর্তৃক নির্ণীত হইয়াছে, সে তাহাই করিবে । আমার আদেশে চক্ষু কথা কহিবে না, কণ দর্শন করিবে না, ও হস্তদ্বয় শরীর বহন করিয়া এক স্থান হইতে অন্য স্থানে গমন করিবে না । যে সকল অঙ্গ প্রত্যঙ্গ লইয়া আমি দেহী শব্দে বাচ্য হইয়াছি, তাহারাই যখন আমার নহে, ও আমি যে কে, তাহারই যখন স্থিরতা নাই, তখন আর কাহাকে

আমি ‘আমার’ বলিয়া শ্লাঘা করিব ? স্ত্রী পুত্র কি আমার ? এবং আমিই কি তাহাদের ? তাহাই বা কেমন করিয়া বলিব । শাস্ত্রানুসারে যে স্ত্রী আমার অর্দ্ধাঙ্গের অধিকারী হইয়াছেন, যাঁহার সুখ স্বচ্ছন্দতার জন্য আমি এই সংসার ক্ষেত্রে না করিতেছি এমনত কার্য্যই নাই, যিনি পুত্রবতী হইলে, আমার যথা সর্ব্বস্বের অধিকারিণী হন, তিনিই কি আমার ? কাল আগত হইলে, তিনি কি আমার জন্য লোকান্তরে গমন করিতে প্রস্তুত থাকিবেন ? না, মুহূর্ত্ত কালের জন্যও না । আমি যত কেন যত্ন করি না, যত কেন স্নেহ করি না, আমার সহধর্ম্মিণী কিছুতেই আমার বাধ্য হইতে পারিবেন না, ইচ্ছা সত্ত্বেও তিনি আমার আজ্ঞানুবর্ত্তিনী হইবেন না, তাঁহাকে কালের বাধ্য হইয়া চলিতে হইবেই হইবে । আত্মীয়, বান্ধব, পুত্র, কন্যা প্রভৃতি সকলেই সেই কালের আজ্ঞাবহ, আমি স্বয়ংও তদীয় অবাধ্য হইতে পারিব না । সে যখন ডাকিবে, তখনই তাহার পশ্চাদ্বর্ত্তী হইতে হইবে, আর সাংসারিক কোন বিষয়ের প্রতি দৃষ্টি করিবার অবসর প্রাপ্ত হইব না । বহু কষ্টে যে বিষয় বিতব করিয়াছি, তাহা সমস্তই পড়িয়া থাকিবে, তাহার এক কপর্দকও সঙ্গে যাইবে না । আমি কোথা হইতে আসিয়াছিলাম, এক্ষণেই বা কোথায় যাইতেছি, এবং যদি কোন স্থান থাকে, সেই স্থানে গিয়াই বা আমার কি অবস্থা ঘটবে, এ কাল পর্য্যন্ত তাহার কিছুই স্থির হইল না; তবে দেখিয়া শুনিয়া এই স্থির সিদ্ধান্ত করিয়াছি, এক দিবস এই জগৎ পরিত্যাগ করিতে হইবেই হইবে ; কিন্তু কবে যে, ত্যাগ করিতে হইবে, তাহার দিন স্থির নাই ।

বাহ্য জগতের সহিত অদৃশ্য জগতের অনেক সাদৃশ্য আছে ;

শাস্তিকারেণা অনুমান দ্বারা সেই গুলি কল্পনা করিয়া লইয়াছেন । বিশেষতঃ, পৌরাণিক মতে পৃথিবীর সহিত স্বর্গ রাজ্যের সমস্ত বিষয়েরই সাদৃশ্য দেখিতে পাওয়া যায় । স্বর্গে রাজা আছেন, তাঁহার হয় হস্তী ও সৈন্য সামন্ত আছে, তাঁহার প্রমোদ কানন আছে, তিনি কখন কখন শত্রু কর্তৃক রাজ্যচ্যুত হন, আবার যুদ্ধ বিগ্রহ করিয়া আপন রাজ্য উদ্ধার করেন, যুদ্ধ বিগ্রহে লিপ্ত হইয়া মানবের ন্যায় তাঁহাকে কখন কখন শোক দুঃখে অভিভূত হইতে হয়, স্বর্গের রাজা স্বর্গবাসী প্রজাপুঞ্জের সদস্য কার্যের বিচার করিয়া থাকেন, এবং উচিত বিধানে পাপের দণ্ড ও পুণ্যের পুরস্কার করেন । ইহ জগতেও সেই রূপ দেখিতেছি, ইহ জগতের রাজাও পাপ পুণ্যের বিচার করিয়া থাকেন । যদি কেহ ইচ্ছা পূৰ্ণক নরহত্যা করে, তাহা হইলে, রাজা কিম্বা রাজপ্রতিনিধি বিচার করিয়া তাহার প্রাণ দণ্ডের আদেশ করিয়া থাকেন, এবং কোন্ দিবস বধ্য ভূমিতে তাহার প্রাণান্ত হইবে, তাহা অবধারিত করিয়া দেন ; কিন্তু আমাদের যে কবে প্রাণান্ত হইবে, তাহার দিন অবধারিত নাই ; সেই জন্য সকলে মৃত্যুর কথা একেবারে বিস্মৃত হইয়া চিরজীবীর ন্যায় কার্য্য করিতে আরম্ভ করিয়াছে । এটি সৃষ্টিকর্ত্তার একটি চমৎকার কৌশল, ইহা অবশ্যই স্বীকার করিতে হইবে ; কিন্তু অজ্ঞান লোকেরাই তাঁহার সেই কৌশলে ভুলিয়াছে, তত্ত্বদর্শী লোককে তিনি ভুলাইতে পারেন নাই । তত্ত্বদর্শী লোকেরা সংসারকে নিতান্ত মায়াময় জ্ঞান করিয়া প্রতিক্ষণ মৃত্যুর জন্য প্রস্তুত হইয়া আছেন । জ্ঞানবলে তাঁহারা জীবন ও মৃত্যুকে সমান জ্ঞান করিয়া থাকেন, তাঁহারা শরীরের অস্তিত্বই স্বীকার করেন না । তাঁহারা বলেন যে, যেমন সমুদ্র জলের ঘোর

আবর্তনে বুদ্ধবুদ্ধ সৃষ্টি হয়, সেই গুলি কিয়ৎ ক্ষণ স্রোত জলে ভাসিয়া আবার জলেই লয় প্রাপ্ত হইয়া যায়, আমাদিগের এই নর দেহও সেই রূপ। ভূভগণ সৰ্বদা সংসার আবর্তনে ঘুরিতেছে, সেই আবর্তন হইতে জল বুদ্ধবুদ্ধের ন্যায় প্রাণী সকল সমুৎপন্ন হইয়া কিয়ৎ ক্ষণ এই সংসার ক্ষেত্রে ক্রীড়া করিয়া আবার সেই ভূতেই লয় প্রাপ্ত হইতেছে। ষাঁহাদিগের এই রূপ জ্ঞান আছে, তাঁহারা এই সংসারকে অকিঞ্চিৎকর বোধ করিয়া প্রতিক্ষণ চরম ভাবিয়া থাকেন, মোহে মুগ্ধ হইয়া কিছুতেই লিপ্ত হন না।

পূর্বে উক্ত হইয়াছে, ধনই বল, কিস্তী স্ত্রী পুত্র পরিবারই বল, ইহা কিছুই প্রকৃত প্রস্তাবে আমার নহে, কেবল মায়ায় মুগ্ধ হইয়া ‘আমার আমার’ করিতেছি। জ্ঞানীরা জ্ঞান অস্ত্রে সেই মায়া জাল ছিন্ন করিয়া এই সংসারের কিছুতেই লিপ্ত হন না, অর্থাৎ ‘আমার’ বলিয়া ধরেন না। যখন প্রতিক্ষণ দেখিতেছি যে, সংসারের কিছুই চিরস্থায়ী নহে, আজ এক ব্যক্তি সামান্য অবস্থা হইতে উচ্চ পদাধিকার হইল, তাহার সম্পদের সীমা রহিল না, ধনগর্বে সংসারের লোককে তৃণতুল্য জ্ঞান করিতে লাগিল, ধনের অহঙ্কারে যত্ন একেবারে ভুলিয়া গেল; কিছু দিন পরে আবার সেই ব্যক্তিই অশেষ দুর্দশা ভোগ করিল। কিছু কাল পূর্বে যে স্থানে নদী প্রবল বেগে প্রবাহিত হইয়াছিল, এক্ষণে সেই সকল স্থান শস্তক্ষেত্র হইয়াছে। পূর্বে যে সকল মহাবীরের বীরদর্পে ধরিত্রীর হৃৎকম্প হইয়াছিল, ষাঁহারা সাম্রাজ্য স্থাপনের জন্য নির্দয় হৃদয়ে অসংখ্য মহাপ্রাণীর প্রাণ নষ্ট করিয়াছিলেন, এক্ষণে তাঁহাদিগের সমাধি মন্দির মাত্র নাম রক্ষা করিতেছে।

এই সংসারে ভূত সমষ্টি ব্যতিরেকে আর কিছুই নাই, তাহার স্বভাবের আবর্তনে অবিরত ঘুরিতেছে। সেই ভূত সমষ্টির একত্র সংযোগের নাম জন্ম, বিচ্ছিন্ন হওয়ার নাম মৃত্যু। পাঠকগণ, অনেকেই কাগজ প্রস্তুত করণের যন্ত্র দেখিয়া থাকিবেন। সেই যন্ত্রের প্রথম প্রক্রিয়ার স্থানে একটি প্রকাণ্ড চৌকা আছে, সেই চৌকাটি নানাবিধ উপকরণে পরিপূর্ণ। জল ও অগ্নির শক্তিতে তৎসমুদয় একত্র মিলিত হইয়া যন্ত্র মধ্যে প্রবিষ্ট হইতেছে। নানা প্রক্রিয়ার পর তাহা হইতে এক খণ্ড কাগজ নির্গত হইয়া থাকে। সেই কাগজ খণ্ড মনুষ্যের হস্ত গত হইলে, কার্য্য গতিকে তাহার নানা অবস্থা ঘটে, দীর্ঘ কালের পর তাহা একেবারে অকর্ষ্য্য হইয়া যায়। সে সময় কেহ বা দক্ষ করিয়া ফেলে, কেহ বা খণ্ড খণ্ড করিয়া দূরে নিক্ষেপ করিয়া থাকে। তৎ কালে আমরা ভাবিয়া থাকি যে, দক্ষ দ্বারা কাগজ খণ্ড বিনষ্ট হইয়া গেল ; কিন্তু তাহার একটি পরমাণুও নষ্ট হইল না। পূর্বে যে ভূত সমষ্টি হইতে সেই কাগজ উৎপন্ন হইয়াছিল, দক্ষ করবার সময়ে সেই ভূত সমষ্টি আপন আপন অংশ আকর্ষণ করিয়া লইল। আমাদের এই ভৌতিক দেহ সমুৎপন্ন হইবার প্রক্রিয়াও সেই কাগজ প্রস্তুত করণ যন্ত্রের সমতুল্য। আমরা যে সকল সামগ্রী আহাৰ করিয়া জীবন ধারণ করি, তাহার প্রত্যেক দ্রব্যের মধ্যে ভূত সমষ্টি আশ্রয় করিয়া আছে। আহাৰ সামগ্রী উদরস্থ হইলে, পাক যন্ত্রে পরিপাক হইয়া শরীর রক্ষার জন্য যাহা যাহা প্রয়োজন, তাহা নানা স্থানে বিভক্ত হইয়া পড়িল। কতক রক্ত হইল, কতক মাংস হইল, কতক অস্থি হইল, আবার অসারাংশ মলরূপে নির্গত হইয়া গেল।

রক্ত হইতে বীৰ্য্য উৎপন্ন হয়, সেই বীৰ্য্য শোণিত সংযোগে একটি বুদ্ধবুদ্ধাকার ধারণ করে। তাহার পর জননীর আহারের সাহায্যে সেই বুদ্ধবুদ্ধাকারের ক্রমে ক্রমে অবয়ব গঠিত হইতে থাকে, অর্থাৎ আহারীয় দ্রব্যের সার ভাগ শরীরস্থ যন্ত্রের নানা প্রক্রিয়া দ্বারা সেই উদরস্থ জীবের রক্ত মাংস ও অস্থি প্রভৃতির পুষ্টি সাধন করিতে থাকে। শোণিত শুক্রের সংযোগ অবধি জীব শরীরের সম্পূর্ণ অবয়ব হওয়া পর্য্যন্ত জননীর এক জঠর যন্ত্রে যে কত প্রকার প্রক্রিয়া হইতে থাকে, তাহার শতাংশের একাংশও বর্ণন করা মনুষ্যের সাধ্যায়ত্ত নহে। জীবের জঠরে জীবের সৃষ্টির ন্যায় অদ্ভুত ব্যাপার আর কিছুই দৃষ্টি গোচর হয় না। সেই অদ্ভুত প্রক্রিয়া দ্বারা সৃষ্ট জীব সমূহের মধ্যে আমিও একটি জীব। আমি কি জন্ম সৃষ্ট হইয়াছি, না হইলেই বা সংসারের কি ক্ষতি বৃদ্ধি হইত, এ পর্য্যন্ত তাহা স্থির করিয়া উঠিতে পারি নাই; তবে এই মাত্র উপলব্ধি হয় যে, আমা দ্বারা আর কতকগুলি মহাপ্রাণীর পরম্পরের সাহায্য জন্ম আমি সৃষ্ট হইয়াছি। যখন স্পষ্ট দেখা যাইতেছে যে, এই পরিদৃশ্যমান জগতের কীটানুকীটের দ্বারাও ঐশ্বরের অভিশ্রুতি সাধিত হইতেছে, তখন আমার উৎপত্তিরও অবশ্য কোন বিশিষ্ট কারণ আছে, তাহাতে সংশয় নাই।

একগুণে আমি কে, তাহারই তত্ত্বানুসন্ধান প্রবৃত্ত হইলাম। এই দেহ কি আমার? না, ‘আমি’ শব্দের অন্য কোন অর্থ আছে? এই ভৌতিক দেহে যদি আমার আমিত্ব থাকিত, তাহা হইলে, এ শরীর কখনই স্বভাবের বশীভূত হইয়া চলিত না। যখন এই শরীরকে আমি ‘আমার’ বলিয়া গণ্য করি, হয় ত

উৎকণ্ঠা আমার সেই গৰ্জা খর্ব্ব হইতে পারে । আমি যুদ্ধে পূর্বে মনে করিয়াছিলাম, অদ্য নদী তীরে সন্ধ্যা সমীরণ সেবন করিতে যাইব ; কিন্তু বাটী হইতে বহির্গত হইবার কিঞ্চিৎ পূর্বে আমার শিরঃপীড়া উপস্থিত হওয়াতে, যন্ত্রণায় অস্থির হইয়া পড়িলাম । শরীরের এক অঙ্গে পীড়া উপস্থিত হইল বলিয়া অচ্যাত্ত অঙ্গ প্রত্যঙ্গ সেই কষ্টে ক্লিষ্ট হইয়া পড়িল ; সুতরাং সন্ধ্যা সমীরণ সেবনে আর বহির্গত হইতে পারিলাম না । এক জন ভূত্যের উপর আমার যত দূর আধিপত্য চলে, তাহার শতাংশের একাংশও আপন শরীরের উপর চলে না । শরীর প্রকৃতির বশ হইয়া যাহা করিবে, আমাকে তাহারই অনুগত হইয়া চলিতে হইবে । তবেই শরীরের উপর আমার ‘আমিত্ব’ নাই । তবে আমি কে ? এই সম্বন্ধে মহাপ্রাজ্ঞ শঙ্করাচার্য্য যাহা বলিয়াছেন, নিম্নে তাহারই সারাংশ সঙ্কলন করা গেল ;—

ষোড়শ বর্ষ বয়ঃক্রম কালেই শঙ্করাচার্য্য এক জন ধীশক্তি সম্পন্ন পণ্ডিত হইয়া উঠিয়াছিলেন । পণ্ডিত মণ্ডলী তাঁহাকে যখন যে প্রশ্ন করিতেন, তিনি দ্বি ভাবে তাহার উত্তর দিতেন । এক দিন এক জন পণ্ডিত তাঁহাকে জিজ্ঞাসা করিয়াছিলেন,— মহাত্মন, আপনি কে, তাহা কি স্থির করিয়াছেন ? তৎক্ষণে তিনি কহিলেন, ‘স নিত্যোপলব্ধি স্বরূপো মহাত্মা ।’ পণ্ডিতবর পুনরায় বলিলেন, সে কি রূপ ? শঙ্করাচার্য্য কহিলেন, যেমন বহু সংখ্যক সরাব স্থিত জলে সূর্য্যের প্রতিবিম্ব পড়িয়া বহু সংখ্যক সূর্য্য পরিদৃশ্যমান হন, আমিও সেই রূপ ঈশ্বরাত্মার একটি প্রতিবিম্ব মাত্র । যেমন কুন্তকারেরা মৃত্তিকার সরাব প্রস্তুত করিয়া থাকে, স্বভাব আমার এই শরীরটিও সেই রূপ পঞ্চ ভূতে

নিৰ্মাণ করিয়াছেন, এবং ঈশ্বর আত্মা রূপে এই দেহের মধ্যে বিরাজমান রহিয়াছেন । যেমন জল পরিপূরিত সরাব গুলি একটি যষ্টি দ্বারা ভগ্ন করিয়া ফেলিলে, আর সূর্য্যের প্রতিবিম্ব দৃষ্টি গোচর হয় না, এবং সরাবের উপর যে আঘাত পড়ে, তাহা সূর্য্যকে স্পর্শ করিতে পারে না, সেই রূপ এই নশ্বর শরীর যখন বিনষ্ট হয়, তদভ্যন্তরস্থ চৈতন্যাংশও ঈশ্বরে লয় হইয়া যায় । মনুষ্য শরীর ধ্বংস দ্বারা আত্মার কিছু মাত্র ক্ষতি বুদ্ধি হয় না, তিনি যে রূপ সেই রূপেই থাকেন ।

অবিনশ্বর আত্মাই বা কে ? এ রূপ প্রশ্ন হইতে পারে । এতৎ সম্বন্ধে ভগবদ্গীতায় লিখিত আছে, শরীর অপেক্ষা ইন্দ্রিয়-গণ শ্রেষ্ঠ, ইন্দ্রিয়গণ অপেক্ষা মন শ্রেষ্ঠ, মন অপেক্ষা সংশয় শূন্য বুদ্ধি শ্রেষ্ঠ ; সেই বুদ্ধি অপেক্ষা শ্রেষ্ঠকেই আত্মা বলা যায় । সেই আত্মা সামান্য বুদ্ধির অগোচর, অথচ সর্বত্র বিরাজমান । যেমন সমীরণ সর্বত্র সঞ্চারিত হইতেছে, অথচ আমরা চক্ষে দেখিতে পাই না, কেবল ত্রুৎ দ্বারা অনুভব করিতে পারি, সেই রূপ আত্মার অস্তিত্ব কেবল তত্ত্বদর্শী মহাত্মা লোকেরা মনে ধারণা করিতে পারেন ; এতদ্ভিন্ন আত্মার অস্তিত্ব প্রমাণের আর উপায়ান্তর নাই । যদি কোন তार्কিক লোক বলেন যে, আমি আত্মার অস্তিত্ব স্বীকার করিব না ; তাহা হইলে, প্রমাণ প্রয়োগ দর্শাইয়া তাঁহাকে বুঝাইয়া দেওয়া সহজ নহে । আত্মার অস্তিত্ব যিনি স্বয়ং না বুঝেন, তাঁহার সে বিষয় প্রতীতি করান কাহারও সাধ্যায়ত্ত নহে ।

ঈশ্বর জ্ঞান ও আত্মতত্ত্ব উভয়ই সহজে কাহারও বোধগম্য হয় না । ঈশ্বর রূপা ব্যতিরেকে ঈশ্বর জ্ঞান কোন্ কালে কাহার

হইয়াছে ? তর্ক দ্বারা ঈশ্বর তত্ত্ব নির্ণয় কখনই হইতে পারে না । বিশ্বাস ব্যতিরেকে সেই বিশ্বপতিকে প্রাপ্ত হইবার আর উপায়ান্তর নাই । এই জগতের সৃষ্টি কৌশল আলোচনা করিয়া যাঁহার মনে দৃঢ় বিশ্বাস জন্মে যে, এই বিচিত্র ব্রহ্মাণ্ডের অবশ্য এক জন সৃষ্টি কর্তা আছেন—তিনি অনাদি, সর্ব ব্যাপী, তুলনা রহিত, পবিত্র, ও চৈতন্য স্বরূপ, এবং তিনিই আত্ম রূপে প্রত্যেক জীবের মধ্যে অবস্থান করিতেছেন, তিনিই ঈশ্বরকে প্রত্যক্ষ দেখিতে পাইবেন, এবং তাহা হইলেই তাঁহার আপনা আপনি আত্মজ্ঞান হইবে । তখন তিনি জ্ঞান চক্ষু দেখিতে পাইবেন যে, এই সংসারের স্থাবর জঙ্গম প্রভৃতি সমস্ত বস্তুই সেই পরমাত্মার অংশ মাত্র । আমরা নিরন্তর মায়া মোহে বিমোহিত হইয়া নানা রূপ কল্পনা করিতেছি, নানা পথের পথিক হইতেছি ; যে সকল বস্তু আমার নহে, সেই সকল বস্তুই ‘আমার আমার’ করিয়া ব্যতিব্যস্ত হইতেছি ; কিন্তু আত্মার আমি, ও আত্মা আমার, ইহা ভিন্ন আমি কাহারও নহি, এবং আমারও কেহ নহে ।

জগৎ আত্মায়, মনে এই দৃঢ় বিশ্বাস জন্মিলে, মন নির্মল হয়, এবং কিছুই অপবিত্র বলিয়া বোধ হয় না । আত্মপর বিবেচনাই মনোমালিন্যের ও শাস্তি ভঙ্গের একটি প্রধান কারণ । যাঁহাদিগের সত্ত্বগুণ প্রবল, তাঁহারা সেই শ্রেষ্ঠ গুণের প্রভাবে ইহ সংসারে কাহাকেও পর দেখেন না । আপন সন্তানের প্রতি যে রূপ স্নেহ করেন, একটি নিকৃষ্ট প্রাণীকে স্পর্শ করিলে, পুরাণাদি শাস্ত্রের মতে পাপ স্পর্শ হয়, তাহাকেও সেই রূপ স্নেহে লালন পালন করিয়া থাকেন । এতৎ সম্বন্ধে মহাত্মা শঙ্করাচার্য্য

একটি চমৎকার দৃষ্টান্ত দর্শাইয়াছিলেন । এক দিন তিনি ভ্রমণ করিতে করিতে দেখিলেন, একটি কুকুর কৰ্দমে পড়িয়া রহিয়াছে, কৰ্দম হইতে আত্মাঙ্কার করিবার যৎপরোনাস্তি চেষ্টা পাইতেছে ; কিন্তু কোন মতে কূতকার্য্য হইতে পারিতেছে না । তদ্বৃষ্টে দয়ার্দ্ৰ চিত্ত শঙ্করাচার্য্য সেই কৰ্দম পূরিত দুৰ্গন্ধময় স্থানে গিয়া কুকুরটিকে ক্রোড়ে লইয়া শুষ্ক ভূমিতে আনয়ন করিলেন, এবং তথা হইতে স্বক্কে তুলিয়া একটি জলাশয়ে লইয়া গিয়া তাহার গাত্র ধৌত করিতে আরম্ভ করিলেন । সেই জলাশয়ে এক জন প্রাচীন ব্রাহ্মণ স্নান করিতেছিলেন, তিনি ব্রাহ্মণ তনয়কে একপ নিকৃষ্ট পশুর সেবা করিতে দেখিয়া ভৎসনা করিয়া বলিলেন, ওহে অবোধ ব্রাহ্মণ ! তুমি কি করিতেছ ? যে কুকুর স্পর্শ করিলে ব্রাহ্মণের শরীর অপবিত্র হয়, তুমি সেই কুকুরের গাত্রের কৰ্দম ধৌত করিতেছ ? তোমার পাপের ইয়ত্তা নাই । তৎশ্রবণে শঙ্করাচার্য্য হাস্য করিয়া বলিলেন, “ আত্মজ্ঞান পথি বিচরিতাং কো বিধি কো নিষেধঃ । ” শঙ্করাচার্য্যের এই অর্থ পূরিত বাক্যটি শ্রবণ করিয়া বৃদ্ধ ব্রাহ্মণ মনে মনে বিবেচনা করিলেন, এই ব্রাহ্মণও সামান্য ব্যক্তি নহে ; এই সামান্য একটি কথায় প্রকৃত তত্ত্বজ্ঞানের সারাংশ সঙ্কলন করিল । ব্রাহ্মণ নীর হইতে তীরে উঠিয়া শঙ্করাচার্য্যের নিকটে উপস্থিত হইলেন, এবং বলিলেন, ব্রাহ্মণ, তুমি কে, আমাকে পরিচয় দাও । শঙ্করাচার্য্য কহিলেন, আমি কুকুরের ন্যায় ঈশ্বরের একটি সৃষ্ট পদার্থ । আমি কুকুর স্পর্শ করিয়াছি বলিয়া আপনি পূর্বে যে ভৎসনা করিলেন, সেটি নিতান্ত অযুক্ত । এক্ষণে বিবেচনা করিয়া দেখুন, যাহার আত্মজ্ঞান জন্মিয়াছে, যে তত্ত্ব পথের পথিক হইয়াছে,

তাহার পক্ষে কিছুই বিধিও নাই, এবং কিছুই নিষেধও নাই। শাস্ত্রকারেরা যে সকল বিধি লিপিবদ্ধ করিয়া গিয়াছেন, তৎ সমুদয়ই অজ্ঞানের পক্ষে, জ্ঞানীর পক্ষে কোন কথাই লিপিবদ্ধ হয় নাই। হে ব্রাহ্মণ, আমাদিগের এই শরীর ভূত সমষ্টি দ্বারা সৃষ্ট, ইহা আপনি অবশ্য স্বীকার করিয়া থাকেন, এবং “যত্র জীব তত্র শিব” বোধ হয় এ মহাবাক্যেরও অবমাননা করেন না; তবে কুকুরস্পর্শে ব্রাহ্মণের শরীর অপবিত্র হইবে কেন, আপনাকে এই কথাটি ভাল করিয়া বুঝাইয়া দিতে হইবে। বৃদ্ধ ব্রাহ্মণ বলিলেন, তুমি কি বলিতেছ, পড়িয়া শুনিয়া কি তোমার এই জ্ঞান জন্মিয়াছে? ব্রাহ্মণ শরীরে ও ঘৃণিত পশু কুকুরে কি প্রভেদ, তাহা কি আবার বুঝাইয়া দিতে হইবে। শঙ্করাচার্য্য কহিলেন, মহাশয়, পড়িয়া শুনিয়া যত দূর জ্ঞান সঞ্চয় করিয়াছি, তাহাতে কুকুরের সহিত আমার কি প্রভেদ একপ কথা কিছুই লিখিত নাই; তবে তত্ত্বজ্ঞানীদিগের মুখে শুনিয়াছি যে, “যত্র জীব তত্র শিবরূপেণ নারায়ণঃ” এ কথা যদি সত্য হয়, তাহা হইলে, আমিও নারায়ণ, আপনিও নারায়ণ, এবং এই কুকুরও নারায়ণ। মহাশয়, বিবেচনা করিয়া দেখুন, এই কুকুর কদমে পড়িয়া প্রায় গতাস্থ হইয়াছিল, বহু যত্নে আমি ইহার প্রাণ রক্ষা করিয়াছি, এই কার্যের দ্বারা পুণ্য না হইয়া কুকুর স্পর্শজনিত আমাকে পাপের ভাগী হইতে হইবে? ব্রাহ্মণ কহিলেন, নিকৃষ্ট প্রাণীর প্রাণ রক্ষা করাতে ধর্ম আছে, এ কথা আমি অবশ্য স্বীকার করি; তাহা বলিয়া কি কুকুরকে অস্পর্শীয় পশু বলিয়া স্বীকার করিব না? কুকুরের সেবা শুশ্রূষা করা ব্রাহ্মণের ধর্ম নহে, ব্রাহ্মণের পক্ষে যে সকল নিয়ম আছে, তৎ সমুদয় অগ্রে প্রতিপালন করিতে হইবে। নিকৃষ্ট

জাতিরাই কুকুরের সেবা করিবে, ব্রাহ্মণের পবিত্র হস্ত দেব সেবার জন্ত নিৰ্ম্মিত হইয়াছে। অতএব হে বিপ্র ভনয়, তুমি কুকুরের স্পর্শ রক্ষা করিয়া যে পুণ্য সঞ্চয় করিয়াছ, কুকুর স্পর্শ-জনিত পাপ তাহা অপেক্ষাও অধিক বলিয়া জানিবে। অতএব ঐ ঘৃণিত পশুকে পরিত্যাগ করিয়া সত্বরে গঙ্গা স্নান করিয়া আইস, ও ত্রিবিম্ব স্মরণ কর ; নচেৎ সন্ধ্যা বন্দনাতে তোমার কোন অধিকার থাকিবেক না, তোমার এক্ষণে চণ্ডালত্ব প্রাপ্তি হইয়াছে। শঙ্করাচার্য্য বলিলেন, এক কুকুর স্পর্শেই আমার ব্রাহ্মণত্ব একেবারে নষ্ট হইয়াছে, শাস্ত্রানুসারে আমি চণ্ডাল হইয়াছি ; এক্ষণে স্মরণীয় সলিলে এই পাপ দেহ ধোত করিলে, পুনরায় ব্রাহ্মণত্ব প্রাপ্ত হইব। স্মরণীয় পবিত্র সলিল যখন চণ্ডালকে ব্রাহ্মণ করিতে পারেন, তখন অদ্য আমি শতাবধিক চণ্ডাল সমভিব্যাহারে গঙ্গাস্নান করিতে যাইব, এবং আমার সহিত তাহাদিগকেও ব্রাহ্মণ করিয়া আনিব। স্নানে যাইবার সময় এই কুকুরকেও সমভিব্যাহারে লইয়া যাইব, গঙ্গাজলে ধোত করিলে ইহারও কুকুরত্ব থাকিবে না।

শঙ্করাচার্য্যের কথা শুনিয়া বৃদ্ধ ব্রাহ্মণের কিঞ্চিৎ ক্রোধের সঞ্চার হইল। তিনি উন্নত স্বরে বলিলেন, রে অবোধ বালক ! তুমি আমার সহিত কি সাহসে তর্ক করিতে প্রবৃত্ত হইয়াছিস্ ? তুমি কি জানিস্ না যে, জন্ম জনিত দোষ কি গঙ্গা জলে ধোত হইতে পারে ? শঙ্করাচার্য্য হাস্য করিয়া কহিলেন, তবে জন্ম জনিত উৎকৃষ্টতাও কুকুর স্পর্শে নষ্ট হইতে পারে না। আমি যখন ব্রাহ্মণুলে জন্ম গ্রহণ করিয়াছি, তখন কুকুর স্পর্শে সে ব্রাহ্মণত্বের স্থানি হইবে কেন ? অনুমানে বোধ হইতেছে, আপনি এক জন

পৌরাণিক । পৌরাণিকদিগের অসংলগ্ন কথ্যভেদেই আপনার দৃঢ় বিশ্বাস হইয়াছে । ভাল, বিবেচনা করিয়া দেখুন দেখি, যদি জন্ম জনিত দোষ কিছুতেই ক্ষয় না হয়, তাহা হইলে, অষ্টাদশ পুরাণ কর্তা বেদব্যাস ধীবর কন্টার গর্ভে জন্ম গ্রহণ করিয়া কি প্রকারে ব্রাহ্মণ হইলেন ? মহাত্মা বিহুর্ শূদ্রাণীর গর্ভে জন্ম গ্রহণ করিয়া ব্রাহ্মবীর্য্যে সমুদ্ভূত হইয়াও কি জন্ম মাত্ৰ জনিত দোষে দূষিত হইয়া রহিলেন ? ব্রাহ্মণ কহিলেন, বেদব্যাস সাক্ষাৎ নারায়ণ, তিনি বেদার্থ প্রচার করিবার জন্তই অবনীতে আবির্ভূত হইয়াছিলেন ; তাঁহার জন্ম বিষয় লইয়া তর্ক করিলে, আমরা পাপ পক্ষে নিপতিত হইব । তুমি নিতান্ত বালক, শাস্ত্রের ভাবার্থ কিছুই বুঝ না ; এই জন্ম অনর্থক তর্ক করিতে প্রবৃত্ত হইয়াছ । বিবেচনা করিয়া দেখ, শ্রীকৃষ্ণ ক্ষত্রকুলে জন্ম গ্রহণ করিয়া কি জন্ম ব্রাহ্মণের নমস্কা হইয়াছিলেন ? স্বয়ং নারায়ণ সংসারের উপকার সাধন জন্ম যে ভাবে জন্ম গ্রহণ ককন না কেন, সে সকল বিষয় লইয়া তর্ক করায় কিছু মাত্র প্রয়োজন নাই । তিনি যে স্বয়ং ঈশ্বর, তাঁহার কার্য্যই তাহার সাক্ষ্য দিতেছে । বেদব্যাস যে সামান্য মনুষ্য নহেন, অষ্টাদশ পুরাণই তাহার দৃষ্টান্ত স্থল ।

শঙ্করাচার্য্য কহিলেন, পুরাণ লইয়া অনর্থক তর্ক বিতর্কের প্রয়োজন নাই ; কারণ পুরাণই কাল প্রভাবে সর্ব্ব অনিষ্টের মূল হইয়া উঠিয়াছে । আপনি বহুদর্শী বৃদ্ধ ব্রাহ্মণ, ইতি পূর্বে নিজ মুখেই বলিয়াছেন, আমি পুরাণ ব্যবসায়ী ; সুতরাং পুরাণে আপনার বিলক্ষণ বোধাদিকার আছে, তাহাতে আর সন্দেহ নাই । যে পুরাণ মুক্তি পথের কণ্টক, তাহা লইয়া আমার তর্ক করিতে ইচ্ছা হয় না । ব্রাহ্মণ বলিলেন, তুমি আমার সহিত অত্যন্ত

ধৃষ্টতা করিতে আরম্ভ করিতেছ। পুরাণ মুক্তি পথের কণ্টক কিসে হইল? শঙ্করাচার্য্য কহিলেন, আপনার প্রশ্নের উত্তর দিবার পূর্বে আমি একটি প্রশ্ন করিতেছি। ভাল, আপনি বলুন দেখি, এই কুকুরের এমন নীচ জন্ম কেন হইল? ব্রাহ্মণ সদর্পে বলিলেন, পূর্ব জন্মে কঠোর পাপ করিয়াছিল, তাহাতেই এই জন্মে কুকুর যোনিতে জন্ম গ্রহণ করিয়াছে, এবং লোকের দ্বারে দ্বারে উচ্ছিষ্ট ভোজন করিয়া বেড়াইতেছে। তুমি পূর্ব জন্মে অধিক পুণ্য করিয়াছিলে, সেই পুণ্যেই উৎকৃষ্ট ব্রাহ্মণ দেহ প্রাপ্ত হইয়াছ। শঙ্করাচার্য্য বলিলেন, মহাশয়, কি পাপে কুকুর জন্ম হয়? উত্তরে ব্রাহ্মণ বলিলেন, যাহারা দেব দ্রব্য অপহরণ করিয়া খায়, ব্রাহ্মণ সেবার অগ্রে ভোজন করে, তাহারাই কুকুর হইয়া জন্ম গ্রহণ করিয়া থাকে। শঙ্করাচার্য্য বলিলেন, উত্তম কথা, কিন্তু আদিতে কি ঈশ্বর উৎকৃষ্ট ব্রাহ্মণ ব্যতিরেকে অন্য কোন নিকৃষ্ট প্রাণীর সৃষ্টি করেন নাই? যদি তাহা করিয়া থাকেন, শাস্ত্রে ইহার প্রমাণ প্রাপ্ত হওয়া যায়, তাহা হইলে, পাপ ব্যতিরেকে কি জন্ম কুকুরের সৃষ্টি হইল? বিষ্ঠাভোগী কীটানু-কীটেরও আদি কাল পর্য্যন্ত শাস্ত্রে বর্ণনা আছে। পাপ ব্যতিরেকে এই সকল নিকৃষ্ট প্রাণীর উৎপত্তি হওয়া কি আপনার অসম্ভব বলিয়া বোধ হয় না? ব্রাহ্মণ বলিলেন, আদিতে সকল প্রাণীই পবিত্র ছিল, কেবল কালের প্রভাবে প্রাণী পুঞ্জের পুণ্য ধ্বংস হইয়া পাপের বৃদ্ধি হইতেছে। শঙ্করাচার্য্য বলিলেন, আপনার কথার ভাবার্থ বুঝিতে পারিতেছি না, আপনি বিস্তারে বুঝাইয়া দিন যে, আদি কাল পর্য্যন্ত শাস্ত্রে পাপ পুণ্যের কথা উল্লেখ আছে কি না? ভিন্ন ভিন্ন যুগে পাপ পুণ্যের ভিন্ন ভিন্ন প্রকরণ

আছে কি না ? ব্রাহ্মণ বলিলেন, যুগ ভেদে কাল ভেদে সকল বিষয়েরই পরিবর্তন হইয়া আসিতেছে, তাহাতে আর সংশয় নাই। সত্য যুগে ধর্ম্মাধর্ম্মের যে রূপ নিয়ম ছিল, পাপের যে রূপ দণ্ড বিধান ছিল, ত্রেতায় তাহার অনেক পরিবর্তন হইয়া যায়। দ্বাপরে তদপেক্ষা হ্রাস হয়, কিন্তু কলিতে সত্য যুগের নিয়ম আর কিছুই নাই; কারণ এক্ষণকার লোকের অন্ন আয়ু ও অন্ন ভোগ; সূতরাং সত্য ও ত্রেতার ধর্ম্মানুষ্ঠান কলিযুগের লোক কি প্রকারে করিবে; এই কারণেই ধর্ম্মশাস্ত্রবেত্তারা পৃথক্ পৃথক্ যুগের পৃথক্ পৃথক্ নিয়ম অবধারিত করিয়াছেন।

শঙ্করাচার্য্য বলিলেন, তবে কি সমুদয় শাস্ত্রই মনুষ্য প্রণীত ? তাঁহারা কি লোকের অবস্থা বুঝিয়া ধর্ম্ম কর্ম্মের অনুষ্ঠান করিবার আদেশ করিয়া গিয়াছেন ? কেন না, আমার জ্ঞানগুণক বলিয়াছেন যে, সত্যের কোন কালে পরিবর্তন নাই, সত্য অনন্ত কাল সত্যই থাকিবে। যাহা কালীনিক, তাহা দেশ ভেদে কাল ভেদে অবশ্যই পরিপবর্তিত হইয়া যাইবে। সেই সত্য স্বরূপ, জ্ঞান স্বরূপ, আত্মায় ঈশ্বর আদিতে যে রূপ ছিলেন, অস্ত কালেও সেই রূপ থাকিবেন, কোন কালেই তাঁহার পরিবর্তন নাই। এই কথাই সত্য, এবং এই সত্য কথা লইয়া যাহারা সেই আত্মায় ঈশ্বরের অনুসন্ধান করেন, তাঁহারা ইখার্থ ঈশ্বর পরায়ণ সাধু ব্যক্তি। এই সহজ কথা বিশ্বাস করিলে, সহজেই আত্মতত্ত্ব অবগত হইতে পারা যায়। তাহা না করিয়া কালীনিক ধর্ম্মশাস্ত্র পাঠে মন কলুষিত করিয়া চির কাল ভ্রমপথে পরিভ্রমণ করা কি জ্ঞানবানের কর্তব্য কার্য্য ? মহাশয়, পুনর্বার বলিতেছি, ঈশ্বর এক, আত্মায়, ও সর্ব ভূতের আশ্রয় স্থল। এই পরিদৃশ্যমান

জগৎ তাঁহা হইতেই উৎপত্তি, এবং তাঁহাতেই নিরুত্তি হইয়া থাকে ।
 নিষ্কাম হইয়া তাঁহার উপাসনা করাই প্রকৃত উপাসনা । সত্য ও
 জ্ঞান স্বরূপ ঈশ্বরের উপাসনায় ঘুপ, দীপ, নৈবেদ্য ও বলির
 প্রয়োজন নাই । নিৰ্জ্জনে একাসনে বসিয়া এক মনে তাঁহাকে
 ধ্যান করিলে, আত্মার প্রকৃত তত্ত্ব অনায়াসে প্রাপ্ত হওয়া যায় ।
 আত্মার উপাসনা কি, অজ্ঞ জনেরা তাহা সহজে বুঝিয়া উঠিতে
 পারে না বলিয়াই আড়ম্বর যুক্ত ধৰ্ম্মে সহজে তাহাদের আস্থা হইয়া
 থাকে । অজ্ঞদিগকে আয়ত্তে রাখিবার জন্যই হিন্দু শাস্ত্রকারেরা
 আড়ম্বর যুক্ত ধৰ্ম্মের কল্পনা করিয়া গিয়াছেন ; স্তবরাং
 পূর্বের সত্য ধৰ্ম্মের লোপ হইবার উপক্রম হইতেছে । মহাশয়,
 বিবেচনা করিয়া দেখুন দেখি, স্থির চিত্তে নিৰ্জ্জনে বসিয়া সেই
 নিন্ত্য ও সত্য ঈশ্বরের উপাসনা করিতে কয় জন লোকের ক্ষমতা
 আছে? যাহাদিগের চিত্ত চঞ্চল, তাহারা কি একাসনে মুহূর্ত্ত
 কাল নিৰ্জ্জনে অবস্থান করিতে পারে? কিন্তু আড়ম্বর যুক্ত ধৰ্ম্ম
 অজ্ঞ লোকের এত দূর চিত্ত আকর্ষণ করিয়াছে যে, দেব দেবীর
 সম্মুখে অজ, মেঘ ও মহিষ প্রভৃতি বলিদান দিবার সময় তাহা-
 দিগের ক্ষুধা তৃষ্ণা বর্জিত হইয়া যায় । রাজপথে হরি সঙ্কীৰ্ত্তন
 বহির্গত হইলে, নৃত্য গীতে এত দূর উন্মত্ত হইয়া উঠে যে, স্বেদ-
 জলে শরীর আর্দ্র হইয়া গেলেও তাহারা তাহাতে ক্রক্ষেপ করে
 না । উক্ত রূপ ধৰ্ম্মে রাগ, দ্বেষ, ও দম্ব আপনা আপনি আসিয়া
 উপস্থিত হয় । পুরাণাদি শাস্ত্র এই কাল্পনিক ধৰ্ম্মের প্রবর্তক ও
 উত্তেজক ; উহা কৰ্ম্ম ফল দেখাইয়া অজ্ঞ লোককে নিৰ্কাণ মুক্তির
 পথ হইতে দূরস্থ করিয়া রাখিয়াছে, তাহারা ভোগ বাসনায় না
 করিতেছে, একপ কার্য্যই নাই । পুরা কালে অশ্বমেধাদি যজ্ঞে যুদ্ধ

বিগ্রহে লক্ষ লক্ষ লোকের প্রাণান্ত হইত । প্রবল পরাক্রান্ত নর-পতিরা শত অশ্বমেধ করিয়া ইন্দ্রত্ব পদ লইবার জন্য ব্যতিব্যস্ত হইতেন । শাস্ত্র নির্দিষ্ট যজ্ঞ করিতে কেহই ত্রুটি করেন নাই ; কিন্তু কোন কালে কাহারও অদৃষ্টে ইন্দ্রত্ব পদ লাভ হয় নাই । নরপতিগণ ছুরাশার দাস হইয়া অনর্থক যুদ্ধ বিগ্রহে লিপ্ত হইতেন ; এক জনের ইন্দ্রত্ব পদ লাভের জন্য অকারণ অসংখ্য লোক কালের কবল শায়ী হইত । এই কলিযুগে অশ্বমেধ যজ্ঞের বিধি নাই, তথাচ স্বর্গভোগ কামনায় রাজগণ রাজসিক বিধানে শত শত ছাগ মহিষ মেঘ প্রভৃতি দেব দেবীর নিকট বলি প্রদান করিয়া থাকেন । “অহিংসা পরমো ধর্মঃ” এই মহাবাক্য কল্লিত স্বর্গলাভের জন্য সাধারণ লোকে একেবারে বিস্মৃত হইয়া গিয়াছে । কর্ম করিয়া ফলভোগী হইব, এই ছুরাশার দাস হইয়া এক্ষণকার লোক বাহ্য আড়ম্বরের সহিত কর্ম করিবার মানসে উৎকট পাপ দ্বারা ধন উপার্জন করিতেও কিছুমাত্র কুণ্ঠিত হয় না ।

শাস্ত্রে কথিত আছে যে, এক কর্মই আমাদেরকে অনন্ত কাল সংসার আবর্তনে ফেলিয়া রাখে । কর্মফল ভোগের জন্যই পুনঃ পুনঃ জন্ম মৃত্যু হয় । দুঃকর্মই হউক বা সৎকর্মই হউক, এক বার মাত্র করিলে, কোটিকল্প তাহার ফল ভোগ করিতে হইবে । তন্মধ্যে উক্ত আছে—

“দেহে বিনষ্টে তৎকর্ম পুনর্দেহে প্রলভ্যতে ।

যথা ধেনু সহস্রেষু বৎস বিন্ধতি মাতরম ॥”

যেমন সহস্র ধেনুর মধ্যে একটি মাত্র বৎস থাকিলে, সে তাহার নিজ মাতাকে জানিয়া লয় ; সেই রূপ কর্মের ফলাফল দেহ হইতে দেহান্তরে গিয়া থাকে । দেহীর পুনর্জন্ম কোথা হই-

রাছে, অর্থাৎ কর্মফল বৎসের জ্বায় তাহা অনুসন্ধান করিয়া লইতে পারে। ধন ব্যয়ে মুক্তির সম্ভাবনা নাই, কর্মকাণ্ড করিয়াও মুক্তি হয় না। যত দিন জীবাত্মায় ও পরমাত্মায় এক জ্ঞান না হইবে, তত দিন জীবের নির্ক্ষণ মুক্তির কোনও সম্ভাবনা নাই। কেবল এক ভোগাভিলাষের জন্যই মানবগণ কর্মকাণ্ড করিয়া থাকে। যদিও বেদে কর্মকাণ্ডের কথা উল্লেখ আছে, কিন্তু তাহার রীতি পদ্ধতি স্বতন্ত্র। স্মৃতি শাস্ত্র বেত্তারা সেই বেদোক্ত কর্মকাণ্ড একেবারে লগুতও করিয়া দিয়াছেন। তাঁহারা মানবের স্বর্গলাভের এত স্থলভ উপায় দেখাইয়া গিয়াছেন যে, অতি সামান্য পুণ্য কার্য্য করিলে, লোকের আর নরক যন্ত্রণার ভয় থাকে না। যেমন লোকে এক বার মাত্র শিবরাত্রির ব্রত করিলে, মৃত্যুর পর শিবলোকে ও অনন্ত ব্রতের ফলে বিষুলোকে গমন করিবে এবং যোগে গঙ্গাস্নান করিলে, কোটিকল্প স্বর্গভোগ হইবে, শাস্ত্রে ইহার ভূরি ভূরি প্রলোভন আছে। স্মৃতি শাস্ত্রে এবং পুরাণাদি শাস্ত্রে কেবল ভোগের কথাই লিখিত হইয়াছে, নির্ক্ষণ মুক্তির কিছুই বিশেষ উক্তি নাই। তত্ত্বদর্শী পণ্ডিতেরা লিখিয়াছেন যে, ভোগাভিলাষের জন্যই কর্ম করিতে ইচ্ছা হয়, কর্ম হইতে ক্রোধাদির উৎপত্তি হয়, ক্রোধ হইতে অভিমান, অভিমান হইতে অবिवেক, অবিবেক হইতে অজ্ঞানের উৎপত্তি হইয়া থাকে। যে আপনাকে আপনি জ্ঞাত নহে, সেই অজ্ঞান; একপ অজ্ঞানাকার দূর হওয়া সহজ ব্যাপার নহে।

বেদেও কর্মকাণ্ডের কথা উল্লেখ আছে সত্য, কিন্তু পৌরাণিকেরা শুদ্ধ কর্মকাণ্ডের প্রাধান্য দেখাইয়া সাধারণ লোককে ভ্রমে

নিপতিত করিগাছেন । কৰ্ম করিতে গেলেই, আপনি আপনি ঘোর আড়ম্বর আসিয়া উপস্থিত হয় । কোন আধুনিক পুরাণে লিখিত আছে যে, কলিতে দুর্গোৎসব করিলে, অশ্বমেধ যজ্ঞের ফল প্রাপ্ত হওয়া যায় ; সেই জন্য কলিতে সাত্বিক, রাজসিক ও তামসিক মতে দুর্গোৎসব হইয়া থাকে । সত্ত্ব গুণাবিত ব্যক্তির সাত্বিক ভাবে পূজায় ব্রতী হইলে, সাত্বিক বিধানানুযায়ী পূজার সমস্ত সামগ্রী সংগ্রহ করিতে পারেন না ; স্তবরাং দেবী পূজার অঙ্গহীন জন্য ক্রুতীকে ছুরদৃষ্টের ভাগী হইতে হয় । রাজসিক বিধানের পূজায় অহঙ্কার, মাৎসর্য্য, ক্রোধ এবং দম্ভ মুক্তিমান হইয়া দাঁড়ায় । তামসিক বিধানে কেবল বাহ্য আড়ম্বর ভিন্ন আর কিছুই নাই । তবেই বিবেচনা করিয়া দেখিলে, কালর অশ্বমেধ দুর্গোৎসব করিতে গিয়া উপাসকগণকে পদে পদে ছুরদৃষ্টের ভাগী হইতে হয় কি না ? দুর্গা দেবীর ত্রিবিধ উপাসকেরা এই মন্ত্রে আপনাদিগের অভীষ্ট সিদ্ধির কামনা করিয়া থাকেন যথা—

“ রূপং দেহি যশো দেহি ভাগ্যং ভগবতি দেহি মে ।

পুত্রান্ দেহি ধনং দেহি সৰ্ব্বান্ কামাঞ্চ দেহি মে । ”

উপরি উক্ত প্রার্থনায় “মুক্তিং দেহি” একপ প্রার্থনা নাই । কেনই বা থাকিবে ? যাহারা ভোগাভিলাষের প্রার্থী, তাহারা নিৰ্কাণ মুক্তির প্রার্থনা করিবে কেন ? ভোগাভিলাষী হইয়া ইহ জগতে বসবাস করিতে গেলে, আমরা কোন অবস্থাতেই নির্ভয়ে ও শাস্তির সহিত কাল হরণ করিতে পারি না । কারণ ভোগে রোগ ভয় আছে, কুলে চ্যুতি ভয় হইয়া থাকে, বিত্তি ভোগে চির কাল রাজাকে ভয় করিয়া চলিতে হয়, মানে দৈন্য ভয় আপনা

আপনি আসিয়া উপস্থিত হইয়া থাকে ; এতদ্ভিন্ন বলে রিপু ভয়, কপে নারী ভয়, শাস্ত্রে বাদী ভয়, গুণে খল ভয়, এবং শরীর ধারণে যম ভয় চির কালই আছে । কেবল আত্মতত্ত্বে মনো-নিবেশ করিলে, কোন কালে কোন ভয় থাকে না, যে স্থানে ভয় নাই, সেই স্থানেই আনন্দ ও শান্তি ।

পরিশেষে শঙ্করাচার্য্য ব্রাহ্মণকে বলিলেন, হে ব্রাহ্মণ, আত্ম-তত্ত্বদর্শী লোকেরাই একেবারে ভয়শূন্য হইয়া থাকেন । তাঁহাদিগের রাজ ভয় নাই, দম্বা ভয় নাই, জাতি ভয় নাই । অন্য কি কথা, তত্ত্বদর্শী লোকেরা মরিতেও ভয় করেন না ; কেবল সেই সচ্চিদা-নন্দ ব্রহ্মে আত্ম সমর্পণ করিয়া মনের আনন্দে কাল হরণ করেন । যাঁহারা এই সংসারকে ব্রহ্মময় দেখেন, তাঁহারা এই কুক্কুরকে কি বলিয়া অপবিত্র জ্ঞান করিবেন ? যাঁহার মন অপবিত্র, সে এই সংসারে নানা অপবিত্র বস্তু দর্শন করে । যাঁহার মন নিষ্কল হইয়াছে, তিনি জগতের কোন বস্তুই অপ-বিত্র জ্ঞান করেন না । মহাশয়, আপনার বয়স অধিক হইয়াছে, মৃত্যুর অধিক কাল বিলম্ব নাই, এক্ষণেও আপনার তত্ত্ব জ্ঞানের উদয় হয় নাই । আপনি কি জানেন না যে, মহা প্রলয় কালে এই সমস্ত জগৎ ঈশ্বরে লয় হইবে ? সে সময় কি তিনি অপবিত্র বস্তুগুলি আপনাতে লয় হইতে দিবেন না ? বাছিয়া অন্যত্র নিক্ষেপ করিবেন ? মহাশয়, যত দিন আপনার অহং তত্ত্ব না উদয় হইতেছে, তত দিন আপনি তত্ত্বদর্শী লোকের কার্য্য দেখিয়া বিব্রত হইবেন, ইহা বিচিত্র নহে ।

শঙ্করাচার্য্যের কথা শুনিয়া ব্রাহ্মণ বিশ্বয় সাগরে নিমগ্ন হই-লেন, এবং সবিনয়ে কহিলেন,—বাপু, তুমি কে, আমাকে যথার্থ

পরিচয় দাও। তোমার কথা বার্তা শুনিয়া বোধ হইতেছে যে, তুমি সামান্য ব্যক্তি নহ। শঙ্করাচার্য্য তাঁহাকে প্রকৃত পরিচয় দেওয়াতে, ত্রাঙ্কণ গেই দিন অবধি তত্ত্বজ্ঞানামূলীলনে প্রবৃত্ত হইলেন।

বিবেক ও বৈরাগ্য।

পৃথিবীর চতুষ্খণ্ডের মধ্যে এই পুণ্য ক্ষেত্র ভারত ভূমির পুরা কালের পণ্ডিতগণ বিবেক ও বৈরাগ্যের উপর যত দূর পাণ্ডিত্য প্রকাশ করিয়া গিয়াছেন, বোধ হয়, পৃথিবীর অন্য কোন দেশের লোক কর্তৃক এক্ষপ হয় নাই। বিশেষ বিবেচনা করিয়া দেখিতে গেলে, ইউরোপ খণ্ডে বর্ত্তমান কালে বিবেক ও বৈরাগ্যের কথা এক দিনের জন্যও কোন সমাজে উত্থাপিত হয় না। ভারতবর্ষে বিবেক ও বৈরাগ্যের নাম আছে, গ্রন্থ আছে, এবং অনেক উপদেষ্টাও আছেন; কিন্তু প্রকৃত প্রস্তাবে বিবেক ও বৈরাগ্য লোকের মনে উদয় হওয়া স্মকঠিন।

একণে দেখা যাউক, কোন্ শাস্ত্রানুযতী হইয়া চলিলে, আমরা শান্তি স্মখের অধিকারী হইতে পারি। প্রথমভঃ, নীতি শাস্ত্রের আশ্রয় লইলাম; কিন্তু তাহাতেও বিবেক ও বৈরাগ্যের উদয়ের কোন সম্ভাবনা নাই। বাল্য কলাবধি আমরা অনেক নীতিগর্ভ পুস্তক পাঠ করিলাম, ও নীতিজ্ঞ লোকের মুখে অনেক নীতি কথা শুনিলাম, কিন্তু তাহাতেও আমাদের চিত্ত শুদ্ধি হইল না,

হৃদয়ে শান্তি আসিয়া আশ্রয় করিল না । যদি প্রকৃত প্রস্তাবে ধর্মশাস্ত্রের বিধানানুসারে ধর্ম কর্মে রত হই, তাহা হইলে, কি মন নির্মল হইবে, চিত্তের চাঞ্চল্য দূর হইবে ? তাহাই বা কিরূপে সম্ভব বলিয়া ধরি । প্রথমতঃ, ধর্ম শাস্ত্রের নিয়মগুলি অতিশয় কষ্টসাধ্য ; ধর্ম কর্মের আয়োজন করিতে লোকদিগকে যৎপরোনাস্তি ব্যতিব্যস্ত হইতে হয় । বিশেষতঃ, উপাসনা ভেদে এক ধর্মাক্রান্ত লোক অন্য ধর্মাক্রান্ত লোকের সহিত চির কালই বাধিতগু করিয়া আসিতেছে । আবার ধর্ম লইয়া কোন কোন সময়ে এক সম্প্রদায়ী অস্ত্র ধারণ করিয়া অন্য সম্প্রদায়ীর সহিত সমরে প্রবৃত্ত হইয়া থাকে । তবেই ধর্মের জন্য যদি অস্ত্রধারী হইয়া সমরে প্রবৃত্ত হইতে হয়, তাহা হইলে, সে ধর্মে বৈরাগ্য ও শান্তি কোথায় পাইব ? সুতরাং স্বীকার করিতে হইবে যে, ধর্মেও শান্তি নাই । তবে কি গৃহত্যাগ করিয়া অরণ্যে প্রবেশ করিয়া কুটীরে বাস করিলে বিবেক, বৈরাগ্য ও শান্তি আমার হৃদয় মন্দিরে বিরাজমান হইবে ? তাহারই বা সম্ভাবনা কই ? পুরাণাদি পাঠ করিয়া দেখা গিয়াছে, মহর্ষিগণ চির কাল পবিত্র তপোবনে বাস করিয়াছেন, হরীতকী, আমলকী ও গলিত পত্র ভক্ষণে প্রাণ ধারণ করিয়াছেন, শীতে জল মধ্যে ও গ্রীষ্মে চারিদিকে অনল জ্বালিয়া পঞ্চতপা করিয়াছেন, এক কথায় বলিতে গেলে, ইন্দ্রিয় নিগ্রহ করিবার জন্য মহামহোপাধ্যায় মহর্ষিগণ সাধ্যানুসারে চেষ্টার ক্রটি করেন নাই ; তথাচ তাঁহাদিগের মধ্যে অনেকে অঙ্গুরাগের চাতুরীজালে পড়িয়া যোগভ্রষ্ট হইয়াছেন, কেহ বা সামান্য কারণে ক্রোধের পরতন্ত্র হইয়া এক এক জন মহাশয় ও শরগাগত প্রতিপালক রাজার সর্বনাশ করিয়া-

ছেন। আবার দেখিতে পাওয়া যায়, কোন ঋষি অমৃত এক ঋষির সহিত শত্রুতা করিয়া তাঁহার পুত্র কলত্রাদির প্রাণ বিনাশ করিয়াছেন। চুর্কাসার ঋষি কোপন স্বভাব ঋষি পুরাণাদি শাস্ত্রে আর দেখিতে পাওয়া যায় না। তিনি ব্রহ্মতেজে ও ভপোবলে লঘু পাপে লোককে গুরু দণ্ড দিতেন। পরাশর অমৃত ঋষির কন্যাকে হরণ করিতে কিছু মাত্র কুণ্ঠিত হন নাই। যদি অরণ্যে বাস, গলিত পত্র ভোজন ও ইন্দ্রিয় নিগ্রহ করিয়াও সংসার-ত্যাগী ঋষিদিগের এই রূপ বিভ্রম ঘটিয়া থাকে, তাহা হইলে, গৃহ ত্যাগ করিয়া অরণ্যে প্রবেশ করিলে, আমাদের কি ফল হইবে? বাহার শরীরে ক্রোধ আছে, কাম আছে, এবং হিংসা ঘেষ আছে, তাহার মনে কি প্রকারে শান্তি স্থান প্রাপ্ত হইবে? বাহার কমাগুণ নাই, তাহাকে বিবেকী কি প্রকারে বলিব? বাঁহারা মধ্যে মধ্যে রাজপ্রাসাদে প্রবিষ্ট হইয়া নরপতিগণের পূজা গ্রহণ করিতেন, তথায় কিঞ্চিৎ সেরা সেবার ক্রটি হইলে, শাস্তি দিয়া আসিতেন, তাঁহাদিগের আবার বৈরাগ্য কোথায়? তবেই বোধ হইতেছে যে, সৰ্ব্বত্যাগী হইয়া অরণ্যে বাস করিলেও সৰ্ব্বভোগ্যে শান্তি সম্ভোগের সম্ভাবনা নাই। তবে কোথায় শান্তির দেখা পাইব? কি প্রণালীতে অর্চনা করিলে, শান্তিদেবী আমার প্রতি প্রসন্ন হইবেন? এই সংসারে কোন কালে কেহই কি শান্তি লাভ করিতে পান নাই? তবে ভরকের দাস হইয়া আমাদেরই কি সকল বিষয়ে সন্দেহ উপস্থিত হইতেছে? যে সকল স্থানে অমুগুণ শান্তিদেবী বিরাজিত হইতেছেন, আমি মনো-মধ্যে নিরর্থক ভরু করিয়া কি সেই সকল স্থানের সমীপবর্তী হইতে পারিতেছি না? নীতিজেরা বলিয়াছেন, অধ্যবসায় সহ-

কারে চেষ্টা করিলে, যিনি যে কণা বাসনা করেন, তাঁহার তাহা অবশ্যই সিদ্ধ হয়।

যদিও গৃহ পরিত্যাগের বিকল্পে আমরা অনেক কথা বলিলাম, তথাচ মহাত্মব ব্যক্তিবৃন্দের কথা একেবারে অলীক ও বুদ্ধি বিহীন বলিয়া বোধ হয় না। তাঁহারা চির কাল এক ভাবে বলিয়া আসিতেছেন যে, অরণ্যবাসী মুনি ঋষিরাই যে শান্তিসুখ সন্তোগ করিয়া থাকেন, গৃহীর পক্ষে কোন কালেই তাহা ঘটিয়া উঠিবার নহে। এই সার কথা উপরেও অনেকে একপ তর্ক উপস্থিত করেন যে, এক শান্তিসুখের জন্য সকলের সংসার ভাগ করা ঈশ্বরাভিপ্রেত নহে; সকলেরই সংসারে বিরাগ হইলে, সংসার চলিবে কেন? একপ তর্কের উত্তরে অবশ্য বলা যাইতে পারে যে, সংসার চলুক আর নাই চলুক, তাহাতে আমার কতি বুদ্ধি কি? এত কাল যে চলিল, তাহাতেই বা সাধারণের কি উপকার হইয়াছে? সাধারণ কথায় বাহাকে সাংসারিক সুখ বলিয়া থাকে, সকলের ভাগ্যে তাহা ঘটিবার নহে। তবে জন কতক লোকের সুখের জন্য জগৎ শুদ্ধ লোক কষ্ট ভোগ করিবে কেন? বিবেচনা করিয়া দেখ, দিল্লীশ্বর সাজাহানের ময়ূরাসন প্রস্তুত কালে কত লোকের সর্বনাশ হইয়াছিল। তিনি সর্বতোভাবে সুখী হইবার জন্য প্রায় সমস্ত ভারতবাসীকে যৎপরোনাস্তি পীড়ন করিয়া ছিলেন। তবে কতিপয় রাজা ও প্রধান লোকের জন্য পৃথিবীর অধিকাংশ লোক মস্তকের ঘর্ষ পদভঙ্গে নিক্ষেপ করিবে কেন? যাহাদিগের সুখের সম্ভাবনা আছে, তাহারাই সংসার ককক। যাহাদিগের পক্ষে এ সংসার হিংস্রজন্তু পূর্ণভয়ানক অরণ্য তুলা, তাঁহারা যে স্থানে শান্তিদেবী বিরাজমান হইতেছেন, সেই স্থানে গিয়া মনঃ

প্রাণ শীতল করিবেন। যেখানে অনায়াসলভ্য ফলমুখে উপর্যুপ করিতে পাইবেন, সেইখানেই যাইবেন। যেখানে ক্রোধ, মদ, ঘেব নাই, হিংসা নাই, অহঙ্কার নাই, মন্ত নাই, আত্মসমীক্ষা নাই, এবং পীড়ন নাই, সেই সুখময় ও শান্তিপ্রদ স্থানে গিয়াই জীবনের অবশিষ্ট কাল এক ঈশ্বরচিন্তায় অতিবাহিত করিবেন।

বাহার ধন নাই ও প্রভুত্ব নাই, এ সংসার তাহার পক্ষে বিস্ময় ভড়াগ, প্রজ্বলিত অনলকুণ্ড ও কালসর্পের বিবর ; এ ভয়ানক স্থান তাহার পক্ষে আশু পরিভ্রাজ্য। যদি কেহ বলেন, অরণ্যের কষ্ট সংসারীরা সহজে সহ্য করিতে পারে না ; এ কথা নিতান্ত অন্তায় ও অমূলক। ইহা সত্য যে, শস্যের অভাবে অরণ্য বাসীকে তৃণশস্যায় শয়ন করিতে হয়, উপাধানের অভাবে বাহুর উপর মস্তক রাখিতে হয়, উপাদেয় বস্তুর অভাবে বনফল ও গুলিত পত্র ভক্ষণ করিতে হয়, জলপাত্রের অভাবে অঞ্জলি পূরিয়া জল পান করিতে হয় এবং গৃহের অভাবে গিরিগুহায় ও তরুকেটরে বাস করিতে হয় ; কিন্তু বিবেচনা করিয়া দেখিতে গেলে, ধনহীন গৃহস্থেরা সংসারাত্রমে থাকিয়াও ত এই সকল কষ্ট ভোগ করে। উত্তম শস্যের অপ্রভুলে তাহারা তৃণশস্যায় (মাছুর বা কুশাসনে) শয়ন করে, উত্তম বস্ত্রের অপ্রভুলে জীর্ণ ও মলিন বস্ত্র পরিধান করে, উপাদেয় খাদ্য সামগ্রীর অভাবে যথা কালে শাক সংযোগে কদম্ব ভোজন করে, উত্তম জলপাত্রের অভাবে মৃণ্ময়পাত্র ব্যবহার করে, আহার তাহাদের বাসগৃহ দেখিলে, তাহা অপেক্ষা গিরিগুহা শত অংশে উৎকৃষ্ট বলিয়া বোধ হয়। নির্ধনের পক্ষে গৃহ অপেক্ষা বনের সমস্ত বিষয় অনায়াসলভ্য ; কিন্তু গৃহে থাকিলে, সেই কদম্ব, তৃণশয্যা, ও ভগ্ন কুটীর প্রভৃতিরও আয়োজন করিয়া

লইতে লাঞ্ছনার অবধি থাকে না। একপ অবস্থাপন্ন লোকের সংসার অপেক্ষা অরণ্যে বাস যখন অধিক শান্তিপ্রদ, তখন এ সংসার তাহাদিগের পক্ষে আশু পরিত্যাগ করাই যুক্তি।

অন্য এক সম্প্রদায় বলেন যে, দারিদ্র অবস্থাপন্ন হইলেও একেবারে হতাশ হওয়া ও গৃহ ত্যাগ করা নিতান্ত কাপুরুষের কার্য। ধৈর্যের সহিত সাংসারিক কষ্ট সহ্য কর, এবং অধ্যবসায়ের সহিত আপনার উন্নতিকল্পে যত্নশীল হও, তাহা হইলে, সমস্ত দরিদ্রের মধ্যে অন্ততঃ দশ জনেরও অবস্থার পরিবর্তন ঘটিবার সম্ভাবনা আছে। একপ প্রশ্নের আর এক পক্ষীয় লোক এই প্রত্যুত্তর দেন যে, আমরা দরিদ্রের সম্মান বটি, কিন্তু বাল্য কালাবধি সমূহ যত্ন ও পরিশ্রমের সহিত বিশেষ রূপে বিদ্যার্জন করিয়াছি ; তথাপি এ পর্যন্ত সমাজে আদরণীয় হইতে পারিলাম না ; কেন পারিলাম না ? কতকগুলি পক্ষপাতী লোকে আমাদিগকে মস্তক উন্নত করিতে দিবেছে না। তাহারা মূর্থ ধনীদিগের যথেষ্ট পূজা করে, কিন্তু আমাদের দুঃখে দুঃখও প্রকাশ করে না ; যে হেতু, আমরা সহায় ও সম্পদ বিহীন। যখন সম্পদই সংসারের এক মাত্র পূজ্য হইয়া উঠিয়াছে, তখন সম্পদ ও সহায় বিহীন লোকের কোন কালেই উন্নতির সম্ভাবনা নাই। সংসার আমাদের দিকে চাহিল না, আমরা সংসারের দিকে চাহিব কেন ? সংসারে থাকিয়া সামান্য অর্থের জন্য নীচাশয় ধনীদিগের স্তুতি পাঠ করিয়া বেড়াইব কেন ? আমরা সংসারের সমস্ত সম্পদ ও সহায়বিহীন লোক লইয়া অন্ততঃ বাস করিব। ধনীরা আমাদের প্রয়োজনীয় বিষয় আপনারাই প্রস্তুত করিয়া লউক। ধনীর আধিপত্য ধনীরাই দেখুক,

আমরা স্বভাবের শোভা সন্দর্শনে আত্মা ও মন সর্বভোভাবে তৃপ্ত করিয়া জীবনযাত্রা নির্বাহ করিব, তথাচ এ পাপ সংসারে থাকিব না ।

পৃষ্ঠকগণ, একপ ভাবিবেন না যে, জগৎ শুদ্ধ লোক সংসারে অপ্রজ্ঞা করিয়া অরণ্যে প্রবেশ করিবে । কাহার সাধ্য এই মায়া-ময় সংসার পরিত্যাগ করে ! কখনও কখনও দুই চারি জনের মনে সংসার বৈরাগ্য উদয় হয় সত্য, কিন্তু সে মনের ভাব অতি অল্প কালেই লোপ পাইয়া থাকে । যখন সংসারে বিলক্ষণ অপ্রতুল হইয়া পড়ে, উত্তমর্গগণ ভাড়া করিতে আরম্ভ করে, গৃহিণীর বাক্যবাণে শরীর জর্জরীভূত হয়, সেই সময় এক এক বার মনো-মধ্যে কণপ্রভার ন্যায় সংসার ত্যাগের কল্পনা উপস্থিত হয় ; কিন্তু সেই অপ্রতুল কিছু মাত্র হ্রাস হইলেই, আর পূর্বের ভাব স্মরণ হয় না । এক মায়াই হইয়াছে আমাদের চরণের দৃঢ় লৌহ শৃঙ্খল । এই শৃঙ্খল ভাঙিয়া সংসার ত্যাগ করা কি সামান্য জ্ঞানের কার্য্য ! পুরাণ ও ইতিহাসাদিতে দেখিতে পাওয়া যায়, এক এক জন রাজা তাঁহাদিগের বিপুল বিভব ও বিস্তীর্ণ রাজ্য সম্বন্ধে সংসারকে তৃণতুল্য জ্ঞান করিয়া অরণ্যে প্রবেশ করিয়াছিলেন । তাঁহারা ইথার্থ বিবেকী, এবং তাঁহারা বৈরাগ্য ধর্ম্মের পরাকাষ্ঠা দর্শাইয়া গিয়াছেন । বাহাদিগের বিষয় নাই, বিভব নাই, এক কথায় সংসারে কিছু মাত্র স্থখ নাই, কিন্তু যদি কখন হয়, এই এক আশার উপর নির্ভর দুঃসহ দুর্দশা ভোগ করিতেছে, তথাচ এ পাপ সংসার পরিত্যাগ করিতে চাহেনা । আশার কি চমৎকার শক্তি ! আশা কল্পতরু হইয়া নির্ধনকে ধন দিতেছে, পুত্র-হীনকে পুত্র দিতেছে, চির রোগীকে সুস্থ করিতেছে, এবং চির-

বিরহী লক্ষ্মণের একত্র সম্মিলনে দুঃসহ বিরহ-বেদনা এক কালে দূর করিয়া দিতেছে। যিনি এই আশাকে মানবের মনে আবিস্কৃত করাইয়াছেন, তিনিই ধন্য। যদি এই আশা ক্ষুদ্র ভদ্র সমস্ত লোকের মনে না থাকিত, তাহা হইলে, অক্লেশে বহু সংখ্যক লোক এই সংসার পরিত্যাগ করিয়া যে নিবিড় অরণ্যে বাস করিত, তাহাতে আর সংশয় নাই।

যত কণ লোকে স্বার্থ ত্যাগ করিতে না পারিবে, তত কণ কেহই শান্তি ভোগ করিতে পাইবে না। এক স্বার্থই হইয়াছে আমাদের মনঃপ্রাণ আকুল করিবার প্রধান হেতু। যেমন বিষ্ণু দশ অবতার হইয়া সংসারের লোককে বিমোহিত করিয়াছিলেন, ভগবতী দশ মহা বিদ্যার রূপ ধারণ করিয়া মহাযোগী মহাদেবের মন আকুলিত করিয়া তুলিয়াছিলেন, সেই রূপ এক স্বার্থই এই সংসারে নানা মূর্ত্তি ধারণ করিয়া মোহাজ্ঞ ব্যক্তিবৃন্দকে ব্যতিব্যস্ত করিয়া তুলিতেছে। যদি স্বার্থ ত্যাগ করিতে পার, তাহা হইলে, অনেকাংশে মোহাজ্ঞকার দূর হইবে, বৈরাগ্য আসিয়া আপনা আপনি মনোমন্দিরে উদ্ভিত হইবে, এবং চিন্তা স্থির ভাব ধারণ করিবে। কেবল এক স্বার্থ লইয়াই সংসারে অশ্রু-কণ তুমুল কাণ্ড উপস্থিত হইতেছে। রাজার রাজা য যুদ্ধ কেন? স্বার্থের জন্ত; জাতি বিরোধ ও ভ্রাতৃ বিরোধ উপস্থিত হয় কেন? স্বার্থের জন্ত; বিদেশ বাসে মহা কষ্ট ভোগ করিতে হয় কেন? কেবল এক স্বার্থের জন্ত; লোকে হিতাহিত জ্ঞান শূন্য হইয়া পরস্পর হরণ করিতে উদ্যত হয় কেন? পরপীড়ক হয় কেন? পরদারা হরণ করে কেন? স্বার্থ ভিন্ন ইহার আর কিছুই কারণ নাই। সেই স্বার্থ একেবারে পরিত্যাগ কর, অনেকাংশে মন শান্ত হইবে।

পূর্বে বলি হইয়াছে যে, নীতি শিকায় মনের শান্তি হইবে না, ধর্ম কন্ঠে মনের শান্তি হইবে না, নানা শাস্ত্রে পাণ্ডিত্য লাভ করিলেও শান্তির দর্শন পাইবে না, অরণ্য বাসেও একেবারে প্রবৃত্তির নিবৃত্তি হইবে না । সুযোগ পাইলেই মন মত্ত হইবে, মনের দোষে দীর্ঘ কালের জপ তপ এক দিনে ভ্রষ্ট হইয়া যাইবে । মনুষ্য দেহ ধারণ করিয়া একেবারে শান্তি ভোগ এক প্রকার অসম্ভব বলিয়া ধরিতে হয় । তবে কি শান্তি ভোগের উপায় নাই ? আছে, কিন্তু সে উপায় অবলম্বন করা সামান্য লোকের কার্য্য নহে । অগ্রে আপনার মনকে পরীক্ষা কর, মনকে সর্ব্বতোভাবে আয়ত্ত কর, তাহার পর শান্তি ভোগের আশা করিও । মনুষ্যের মন দিল্লীর ছর্তু বাদশাহদিগের অপেক্ষাও অশাসিত, মত্ত মাতঙ্গ অপেক্ষাও ছর্তু । এই ভয়ানক মনকে যদি কায়-মনোযত্নে সম্পূর্ণ আয়ত্ত করিতে পার, তাহা হইলেই বিবেক, বৈরাগ্য ও শান্তির দর্শন পাইবে ।

ঈশ্বরের প্রতি প্রগাঢ় প্রীতির সঞ্চার, এবং ভোগবাসনার নিবৃত্তি না হইলে, এই সংসারকে কখনই মায়াময় ও অসার জ্ঞান হয় না । শাক্য সিংহের মনে প্রথমতঃ এই রূপ চিন্তা উপস্থিত হয়, আমি পিতৃ রাজ্যের অধীশ্বর হইব, আমার ভাণ্ডার ধন রত্নে পরিপূর্ণ হইবে, সহস্র সহস্র লোকের উপর আমি একাধিপত্য করিব, প্রজালোকে আমাকে ধার্মিক ও প্রজা বৎসল কুপাল বলিয়া অনুরাগ করিবে, তথাচ আমার মনে শান্তির উদয় হইবে না । এক্ষণে এই সকল মূখ্য সম্ভোগ নিতান্ত অলীক বলিয়া বোধ হইতেছে । যদিও আমি রাজা হইব, সংঘারে প্রভুত্ব লাভ করিব, আমার ভাণ্ডারে ধনের অপ্রতুল হইবে

না, যখন যাহা অভিশাপ করিব, প্রায় তৎক্ষণাৎ তাহা সম্পন্ন হইয়া যাইবে ; কিন্তু আমি ইহা একবার ভাবিতেছি না যে, আমাকে এক দিবস মৃত্যু মুখে পতিত হইতেই হইবে । রোগ, শোক, জরা ও মৃত্যু এই চারটির হস্ত হইতে আমি কখনই নিস্তার লাভ করিতে পারিব না । কেবল আমি পারিব না একপন্থে, মানব মাত্রেই পারিবে না ; ঐ চারিটি বিষয় ক্ষুদ্র ভদ্র, পাপী পুণ্যাত্মা, উচ্চ নীচ এবং ধনী দরিদ্র সকলের পক্ষেই সমান, কাহারও প্রতি অনুকূল এবং কাহারও প্রতি প্রতিকূল নহে । যদি সংসারের নিয়ম এই রূপ হইল, তখন আমাতে ও এক জন পর্ণশালা নিবাসী ভিক্ষুকে প্রভেদ কি ? তাহার যদি সুস্থ শরীর হয়, আর আমি রাজ্যেশ্বর হইয়া যদি আমার শরীর কণ্ড হয়, তাহা হইলে, আমার অবস্থা তাহার অবস্থা অপেক্ষা অনেক পরিমাণে নিকৃষ্ট বলিয়া ধরিব । যেখানে ইহ সংসারে জরা জীর্ণ, রোগ শোক, ও মৃত্যু হইতে কাহারও নিস্তার নাই, সেখানে আবার রাজা প্রজায় প্রভেদ কি ? রাজা বলিয়া আমি যে ঐশ্বর্যের অহঙ্কার করি, কল্য শোকে উত্তপ্ত হইলে, সেই ঐশ্বর্য্য ভোগ বিষয় বোধ হইবে । এই শরীর জরা জীর্ণ হইলে, এই অখণ্ড ভ্রমগুলের একাধিপত্য পাইলেও সাংসারিক সুখ ভোগের কিছু মাত্র ক্ষমতা থাকিবে না । শরীরের গ্রন্থি সকল শিথিল হইয়া পড়িবে, মল মূত্র পরিভ্যাগের স্থান অস্থান বোধ থাকিবে না, উপাদেয় খাদ্য সামগ্রী ভোজন করিলেও তাহা পরিপাক পাইবে না, স্নেহাভ্যাসে শরীর আচ্ছন্ন হইয়া থাকিবে, এবং জ্ঞান বুদ্ধি বিলুপ্ত প্রায় হইয়া যাইবে । আমার এই শরীর জরায় জীর্ণ হইবার আর অধিক কাল বিলম্ব নাই ; কিন্তু ভোগাভিশাপ সম

রত হয় । এমন সময় হঠাৎ প্রবল বাত্যা উপস্থিত হইলে, সাগরের অসীম জলরাশি একেবারে ভীষণ ভাব ধারণ করে । তখন তাহার ভয়ঙ্কর তরঙ্গ দেখিয়া জলযানস্থিত লোকের শরীরের শোণিত শুষ্ক হইয়া যায় । সেই রূপ এই সংসার সাগরস্থিত মনুষ্যাগণ যখন ধনে জনে পরিপূর্ণ হইয়া উঠে, তখন একেবারে হিতাহিত জ্ঞানশূন্য হইয়া যায় । মনে মনে ভাবে, আমাদিগের ধন অপ-
 র্যাপ্ত, পরমায়ু অনন্ত, শরীর অক্ষয় ; যত কেন অত্যাচার করি
 না, কিছুতেই আমাদিগের এই বলিষ্ঠ শরীর ক্ষয় প্রাপ্ত হইবে না ।
 কিন্তু যখন কাল কুটিল ভাব ধারণ করে, তখন এক দিকে ধন নাশ;
 অন্য দিকে পুত্র কলত্রাদির অকাল মৃত্যু, শরীরে রোগ ও জাতি-
 গণের প্রাভুর্ভাব এক কালে ঘটিয়া উঠায়, যে ব্যক্তি কিছু কাল
 পূর্বে সংসারকে পরম সুখের স্থান বলিয়া স্থির করিয়াছিল, এক্ষণে
 তাহার সেই অমৃতময়ী পৃথিবীকে বিষময়ী বলিয়া বোধ হইতে
 লাগিল । সমুদ্র মন্থনে যেমন সর্ক্যাগ্রে স্খাভাও উঠিয়াছিল,
 তাহার পর অতিরেক মন্থনে হলাহল ও অগ্নি সমুপ্থিত হইয়া
 সুরাসুরগণকে ব্যতিব্যস্ত করিয়া তুলিয়াছিল, সেই সময়ে কেবল
 ষোগীর অগ্রগণ্য মহাদেব সেই বিষ পান করিয়া সকলের ভয়
 ভঞ্জন করিয়াছিলেন, সংসার সিদ্ধিও তদনুসারে । যৌবন কালে
 বিদ্যাবলে উপর নির্ভর করিয়া প্রথমতঃ প্রায় সকলেই শাস্ত্র ও
 শিষ্ট ভাবে ধীরে ধীরে সংসার সাগর মন্থনে প্রবৃত্ত হয়, তাহাতে
 অবশ্যই পরিশ্রমের পুরস্কার স্বরূপ যে যে রূপ পাত্র সে সেই রূপ
 রত্ন লাভ করিতে থাকে । ক্রমে ধন হইতে অহঙ্কার ও অভিলাষ
 উপস্থিত হইয়া পড়ে, সেই সময় অনেকে বিবেক বিহীন হইয়া
 ' আরও মন্থন কর ! আরও মন্থন কর ! এক্ষণে যাহা পাইলে, ইহা

অপেক্ষা আরও অধিক পাওয়া যাইবে’—এই রূপ চীৎকার করিতে আরম্ভ করে; কিন্তু অতিরেক মন্থনে যেমন সাগরে হলাহল উঠিয়াছিল, সংসার সাগরেও সেই রূপ অমৃতের বিনিময়ে গরল উঠিয়া পড়ে। কখন বা শোক জনিত, কখন বা নৈরাশ্র বশতঃ, কখন ধনক্ষয় জন্ম, কখন বা রুগ্ন শরীর হেতু, কখন বা শত্রু-ভয়ে এই সূখপূর্ণ সংসারকে দুঃসহ দুঃখময় বলিয়া বোধ হইতে থাকে। দেবদেব মহাদেবের ন্যায় যিনি সেই তীব্র কালকূট পান করিয়াও স্থির থাকিতে পারেন, তিনিই যথার্থ তত্ত্বজ্ঞানী; নতুবা সেই বিষের আলায় অস্থির হইয়া কেহ বা আত্মনাশ করে, কেহ বা একেবারে ভগ্নোৎসাহ হইয়া যায়, কাহারও বা উন্মাদ দশা ঘটে, এবং কেহ কেহ বা বিষের আলায় জর্জরিত হইয়া কোথায় যাইব, কি করিব, কিসে সুস্থ হইব, এই রূপ ভাবিতে ভাবিতে অসহ্য যন্ত্রণাভোগ করে। ইদৃশ অবস্থাপন্ন লোকেরা কি করিয়া প্রকৃত শান্তিসুখের অধিকারী হইবে? যখন সংসার সিদ্ধু মন্থনে সুধাভাণ্ড পাওয়া গিয়াছিল, তখন যদি তাহারা মনে মনে ভাবিয়া রাখিত যে, অদ্য যে হস্তে সুধাভাণ্ড গ্রহণ করিতেছি, কল্য হয় ত আবার সেই হস্তেই বিষপাত্র গ্রহণ করিতে হইবে; অতএব প্রথমাবধিই অমৃত ও গরলকে সমতুল্য ভাবিয়া রাখি, তাহা হইলে, আর চরমে কষ্ট পাইতে হইবে না। যিনি সংসারের তরঙ্গ দেখিয়া মন বিচলিত না করেন ও সংসারের শান্তি দেখিয়া আত্মদে উন্মত্ত হইয়া নির্ভয়ে যথেষ্টাচারে প্রবৃত্ত না হন, তিনিই সকল অবস্থাতে সম ভাবে কাল যাপন করিতে পারেন।

এই সংসারে সুখ ও দুঃখ বলিয়া কোন স্বভাব পদার্থ নাই। অগ্নি আর জল এ দুইটি আমরা চাক্ষুষ প্রত্যক্ষ করি-

তেছি। অগ্নির দাহিকা শক্তি আছে এবং জলের স্নিগ্ধকারিতা শক্তি আছে। এই দুইটি পদার্থই সংসারের নিত্য প্রয়োজনীয়। কাব্যকারেরা অগ্নিকে দুঃখের সহিত ও জলকে সুখের সহিত তুলনা করিয়া থাকেন; কিন্তু সে দুইটি মনে মনে কল্পনা করিয়া লইতে হয় এই মাত্র। আমি কি সুখের নাম দুঃখ ও দুঃখের নাম সুখ রাখিতে পারি? না, এক্ষণে আর তাহা পারি না, পূর্বকার সময় হইলে পারিতাম; কেন না, সুখ এবং দুঃখের একেবারে অধিকার নির্ণয় হইয়া গিয়াছে। যে সকল বিষয়কে সংসারের লোক সুখ বলে, তাহাকে আর দুঃখ বলিবার যো নাই। পূর্বে বলা হইয়াছে যে, সুখ দুঃখ দৃশ্যমান পদার্থ নহে। যেমন মনকে আমরা চক্ষে দেখিতে পাই না, কিন্তু মন আমাদের শরীরে অবস্থান করিতেছে, ইহা বিলক্ষণ অনুমান করিতে পারি; সুখ দুঃখও সেই রূপ আনুমানিক পদার্থ। যেমন মনের কতকগুলি গুণ আছে, সেই রূপ সুখ দুঃখেরও কতকগুলি অধিকার নির্ণয় আছে। এক্ষণে সেই সকল বিষয়ের হেতুবাদ করিবার প্রয়োজন হইতেছে;—

মনের অভিলাষ সর্বতোভাবে পূর্ণ হওয়ার নাম সুখ, এতদ্ভিন্ন সুখের আর সাধারণ নামকরণ কিছুই হইতে পারে না; আর মনের অভিলাষ পূর্ণ না হওয়ারই দুঃখ। কিন্তু যখন প্রত্যেক লোকের অবস্থা ভেদে, সময় ভেদে, মনের অভিলাষ স্বতন্ত্র হয়, তখন একের সুখে সকলের সুখ এবং একের দুঃখে সকলের দুঃখ ইহা কি রূপে সম্ভব হইতে পারে। আমি বাহাকে পরম সুখ বলিয়া জ্ঞান করি, অন্য এক জন হয় ত সেই সুখকে দুঃখের একশেষ বলিয়া গণ্য করিতে পারে। বোধ কর, এক

জন সুরাপায়ী কোন ধনবান্ কর্তৃক নিমন্ত্রিত হইল যে, অদ্য তুমি আমার উদ্যানে সন্ধ্যার পর আসিয়া সুরা সেবন করিবে। একপ নিমন্ত্রণ পাইয়া উক্ত সুরাপায়ীর আর আহ্বাদের পরিসীমা রহিল না। সে ভাবিল, কয়েক দিন হইতে মনের যাহা অভিলাষ হইয়াছিল, অদ্য তাহা পূর্ণ হইল। অন্য দিকে সেই ধনী আর একটি ব্রাহ্মণ পণ্ডিতকে বল পূর্বক আপন উদ্যানে লইয়া গিয়াছেন, এবং পুনঃ পুনঃ কহিতেছেন যে, যদি তুমি হস্ত বদনে আমাদিগের সহিত সুরা সেবনে যোগ না দাও, তাহা হইলে, তোমার কণ্ঠের অবধি থাকিবে না ; এই কারণে হয় ত তোমার জীবনান্ত পর্য্যন্ত ঘটিতে পারে। এক বিষয়ে এক জনের সুখ ও অন্য জনের দুঃখ উপস্থিত কি জন্ত হইল ? ব্রাহ্মণ পণ্ডিত ভাবিলেন, যত্ন পর্য্যন্ত স্বীকার করিব, তথাচ ধর্ম্য নষ্ট করিয়া সুরা পান করিতে পারিব না। সুরাপায়ী ভাবিতেছে যে, যদি প্রত্যহ এই রূপ সুরা সেবন হয়, তাহা হইলে, আমার কোন কষ্টই থাকে না। যাহা হউক, অদ্য আমার পক্ষে সুপ্রভাত, তাহাতে আর সংশয় নাই। যে সকল লোক বহু কষ্টে কেবল এক সাংসারিক সুখের জন্ত দেশ বিদেশে ধন উপার্জন করিয়া বেড়াইতেছে, তাহাদের সর্বদা এই চিন্তা প্রবল হয় যে, যদি কিছু ধন সঞ্চয় করিতে পারি, তাহা হইলেই মনের সমস্ত অভিলাষ পরিপূর্ণ হইবে, মনের সাধ মিটাইয়া সুখ ভোগ করিব। অন্য এক জন বিনা আয়াসে বিপুল ধনের অধীশ্বর হইয়া দেখিল যে, সংসারে সুখের লেশ মাত্র নাই ; এই জন্ত সে সংসারের উপস্থিত সুখকে সুখ বলিয়াই ধরিল না, এবং সন্ন্যাস ধর্ম্য গ্রহণ করিয়া পরমার্থ চিন্তায় রত হইল। কোন ব্যক্তি হিন্দুর অথবা ভোজনে পরম পরিচোষ লাভ করে, এবং

তাহার মন প্রত্যহ সেই সকল হিন্দুশাস্ত্র নিষিদ্ধ সামগ্রী আহাৰ করিতে অভিলাষ করে, জ্ঞান এক জন সেই সকল খাদ্য সামগ্রীর নাম শুনিলেই হৃদয় তুলিয়া থাকে । উন্নত মনের সুখ উন্নত ও অবনত মনের সুখ অবনত । কেহ যদি এক খানি ভগ্ন পর্ণকুটির নূতন ভূগে আচ্ছাদন করিতে পারে, তাহা হইলে, তাহার আর আচ্ছাদনের পরিসীমা থাকে না ; কেহ বা দুই লক্ষ টাকা ব্যয় করিয়া এক সুন্দর অটালিকা প্রস্তুত করার পর দেখিতে পাইল যে, তাহা অপেক্ষা তাহার এক জাতি উৎকৃষ্ট বাটী প্রস্তুত করিয়াছে, তখন তাহার নিজ বাটীতে বসবাস করিয়া আর সুখ বোধ হইল না, তদপেক্ষা তাহার সেই জাতিকেই সুখী বোধ করিতে লাগিল । কোন ব্যক্তি বহু কষ্টে অর্থ উপার্জন করিয়া মধ্য বয়সে একটি গুণবতী সুন্দরী কামিনীর পাণি গ্রহণ করিয়া মনে মনে যার পর নাই সুখী হইলেন ; পক্ষান্তরে আবার বিস্তীর্ণ রাজ্যের অধীশ্বরগণ আপন আপন অন্তঃপুরে বহু সংখ্যক সৰ্ব্বাঙ্গ সুন্দরী ললনাগণকে একত্র সমবেত করিয়া রাখিয়াও এক দিনের জ্ঞান সুখী হইলেন না । দিল্লীশ্বর আলাউদ্দীন শত শত স্ত্রীকপা কামিনীর পাণি গ্রহণ করিয়াও এক চিত্তোরেণ্বরী পদ্মিনীর জ্ঞান মনোমধ্যে কিছু মাত্র স্থানান্তর করিতে পারেন নাই ; তবেই সুখ দুঃখ সকলের পক্ষে সমান নহে । যাহার যেকপ মন, যেকপ কচি ও যেকপ স্বভাব সে সেই মত বিষয়েই স্থানান্তর করে । যখন সুখ দুঃখের স্থিরতা হইল না, তখন সকল অবস্থাতেই মনের স্বচ্ছন্দতা রক্ষা করা সৰ্ব্বতোভাবে কর্তব্য ; তাহা হইলে, আর কোন বিষয়েই অসুখী হইতে হয় না । বাঁহারা অটালিকার বিনিময়ে পর্ণকুটীরে বাস করেন, উপা-

দেয় খাদ্যের বিনিময়ে ফল মূল ভক্ষণ করেন, বহু মূল্য পরি-
চ্ছদের বিনিময়ে বস্ত্রকল পরিধান করিয়া সমান তৃপ্তি লাভ
করেন, তাঁহাদিগের মনেই শাস্তি থাকিতে পারে ; নতুবা
শান্তির স্থান আর কোথাও নাই। যদি শাস্তিদেবী কোথাও থাকেন,
তাহা হইলে, পৰ্ণকূটরেই আছেন, রাজপ্রাসাদে নাই। মন যে
খানে অবনত, সেই খানেই শাস্তি বিরাজমান। উৰ্দ্ধ দৃষ্টি করিলে,
পদে পদে মনের শাস্তিভঙ্গ হইবে ; এই জন্ত স্নেহে সম ভাবে
ভোগ করিতে শিক্ষা কর, তাহা হইলে, শাস্তি স্নেহ অমূল্য
করিতে পাইবে।

তিরস্কার ও স্তুতিবাদকে সমান জ্ঞান করা সামান্য মনু-
ষ্যের কার্য্য নহে ; একপ মনুষ্য নাই বলিলেও অত্যাশ্চর্য্য হইবে
না। বর্তমান সময়ে স্তুতি ও তিরস্কারই সৰ্ব্বনাশের পথ হইয়া
উঠিয়াছে। তিরস্কারের সামান্য অর্থ দোষের সমালোচনা। যদি
কেহ নিতান্ত আপনার ভাবিয়া আমাকে তিরস্কার করিতে আরম্ভ
করেন, তাহা হইলে, আমার বিরক্তির ইয়ত্তা থাকে না। যদিও
সেই তিরস্কারকারী আমাকে একটিও অযথা কথা বলিলেন না,
আমার শরীরে যে সকল দোষ আছে, তিনি তাহারই উল্লেখ
করিলেন, তথাচ আমার তাহা সহ্য হইল না। আমি অস্বাভাবিক
কার্য্য করিব, সৰ্ব্বদা পাপপথে বিচরণ করিব ; কিন্তু লোকে
আমাকে সদাচারী বলিয়া স্তুতি করুক—অধিকাংশ লোকের
এই রূপ মনোগত অভিলাষ। আমি সুরা পান করি, অকার্য্য
করি ; কিন্তু কোন চাটুকার আসিয়া যদি আমাকে এই
বলিয়া স্তুতি করিতে আরম্ভ করে,—মহাশয়, আপনার ছায়
দেব ভুল্য এক্ষণকার কালে আর দেখিতে পাওয়া যায় না ;

আপনার পুণ্যেই সংসার চলিতেছে । একগকার সুরাপায়ী ও অস-
চ্চরিত্র লোকগুলার পাপেই সংসার ছার খার হইয়া যাইতেছে ।
আপনার ত্রায় জন কতক পুণ্যাত্মা লোক এই ধরাধামে ন'
থাকিলে, এত দিন পৃথিবী রসাতলগত হইত । উক্ত চাটুকার
প্রকারান্তরে আমাকে বিলক্ষণ বিক্রপ করিল, ও স্তুতির সঙ্গে
সঙ্গে বাস্তবিকই নিন্দা করিল ; কিন্তু আমি ধনগর্বে তাহার
সেই কথাগুলি আপনার পক্ষে সত্য বলিয়া ধরিয়া লইলাম ।
আমার মনে হয় ত তৎ কালে এই রূপ ভাবের আবির্ভাব হইল
যে, আমার দোষের কথা এ ব্যক্তি কিছুই অবগত নহে ; সুতরাং
আমি স্তাবকের উপর যথোচিত সম্ভ্রষ্ট হইলাম ।

একগকার ধনাঢ্য লোকের চরিত্রের সহিত দেব চরিত্রের কিছু
মাত্র প্রভেদ দেখি না ; কারণ পুরাণাদিতে দেখিতে পাওয়া যায়,
যিনি যখন যে দেবতার স্তব করিয়াছেন, তখন তিনিই তাঁহাকে
হর্তা কর্তা বিধাতা ও সর্ব দেবের পূজ্য বলিয়া জ্ঞান করিয়াছেন ।
দেবতাদিগের বর প্রদানও একগকার ধনাঢ্য লোকের সমতুল্য ।
তাঁহার চাটুবাক্যে মোহিত হইয়া পরম শত্রুর প্রতিও প্রসন্ন
হইয়াছেন । দেখ, ভগবান্ রামচন্দ্রের বনিতাপহারী রক্ষঃকুলপতি
দশানন সম্মুখ সংগ্রামে এক প্রকার পরাস্ত হইয়া যখন তাঁহার স্তব
আরম্ভ করিলেন, তখন তিনি সেই পরম শত্রু দশাননেন স্তুতি
বাক্যে প্রসন্ন হইয়া সীতা উদ্ধারের আশা একেবারে পরিত্যাগ
করিয়া বসিলেন । একগকার ধনিগণ যেমন চাটুকারদিগের প্রতি
ক্লেণে কষ্ট ও ক্লেণে তুষ্ট হইয়া থাকেন, তৎ কালের দেবতারাও
তদনুরূপ ছিলেন । রাবণের স্তুতিতে রামচন্দ্র ধনু ও অস্ত্র
পরিত্যাগ করিয়া বসিলেন এবং মনে মনে ভাবিলেন, বরং

সীতাকে পরিভ্যাগ করিয়া যাইব, তথাচ একপ ভক্তের প্রতি
 অন্ত্রভ্যাগ করিতে পারিব না। এমন সময়ে দশানন দুই সরস্বতী
 কর্তৃক উত্তেজিত হইয়া কর্কশ স্বরে রামচন্দ্রকে কহিলেন, অরে ভণ্ড
 তপস্বি! আমি আমার ইষ্টদেবের স্তব করিলাম, আর তুই ভাবিলি
 ভয় পাইয়া দশানন আমাকে স্তব করিল? এ কি তোর সামান্য ভ্রম!
 এই দেখ, এখনই তোর শিরশ্ছেদন করিয়া ইন্দ্রজিৎ ও কুন্তকর্ণের
 শোক বিস্মৃত হই। এই কয়েকটি কর্কশ কথা শ্রবণ মাত্রেই রাম-
 চন্দ্রের ক্রোধ শত গুণে বর্দ্ধিত হইয়া উঠিল, এবং তৎক্ষণাৎ অস্ত্র
 ধারণ করিয়া পূর্বে বাহাকে পরম ভক্ত বলিয়া ধার্য্য করিয়াছিলেন,
 তাহারই প্রতি অস্ত্র প্রয়োগে তৎপর হইলেন। রামচন্দ্রের স্মার
 ইন্দ্রাদি দেবভারাও সময়ে সময়ে স্তাবকের প্রতি যার পর নাই
 প্রসন্ন হইয়াছিলেন, তাহার পর আবার সেই সকল ভক্তের বিনাশ
 জন্য যে সকল কষ্ট ভোগ করিয়াছিলেন, তাহা বর্ণনাভীত;
 কিন্তু আমাদিগের যোগীশ্রেষ্ঠ মহাদেব সে প্রকৃতির দেবতা
 ছিলেন না। তিনি অল্পে সন্তুষ্ট হইতেন বলিয়া লোকে তাঁহাকে
 আশুতোষ বলিয়া থাকেন। কথিত আছে, মহাদেব প্রত্যহ
 ভিক্ষা করিয়া আনিয়া জ্বীপুত্র পরিবারের ভরণ পোষণ করি-
 তেন। যখন তিনি সর্ক শরীরে ভস্ম লেপন, সর্পের দ্বারা
 জটা বন্ধন, ভিক্ষার ঝুলি ও শিলা ডমক লইয়া রূষে আরোহণ
 পূর্বক ‘ভিক্ষাং দেহি’ বলিয়া গৃহস্থগণের দ্বারে দ্বারে বেড়া-
 ইতেন, তখন অজ্ঞান বালকেরা তাঁহার প্রতি কিরূপ দৌরাভ্য
 করিত, নিম্নে বর্ণিত হইল;

“কেহ বলে ওই এল শিব বুড়া বাপ,

কেহ বলে বুড়াটি খেলাও দেখি সাপ।

রত হয় । এমন সময় হঠাৎ প্রবল বাত্যা উপস্থিত হইলে, সাগরের অসীম জলরাশি একেবারে ভীষণ ভাব ধারণ করে । তখন তাহার তরঙ্গর তরঙ্গ দেখিয়া জলযানস্থিত লোকের শরীরের শোণিত শুষ্ক হইয়া যায় । সেই রূপ এই সংসার সাগরস্থিত মনুষ্যাগণ যখন ধনে জনে পায়পূর্ণ হইয়া উঠে, তখন একেবারে হিতাহিত জ্ঞানশূন্য হইয়া যায় । মনে মনে ভাবে, আমাদিগের ধন অপ-
র্যাপ্ত, পরমাণু অনন্ত, শরীর অক্ষয় ; যত কেন অত্যাচার করি না, কিছুতেই আমাদিগের এই বলিষ্ঠ শরীর ক্ষয় প্রাপ্ত হইবে না । কিন্তু যখন কাল কুটিল ভাব ধারণ করে, তখন এক দিকে ধন নাশ, অন্য দিকে পুত্র কলত্রাদির অকাল মৃত্যু, শরীরে রোগ ও জাতি-
গণের প্রাচুর্য্য এক কালে ঘটিয়া উঠায়, যে ব্যক্তি কিছু কাল পূর্বে সংসারকে পরম সুখের স্থান বলিয়া স্থির করিয়াছিল, এক্ষণে তাহার সেই অমৃতময়ী পৃথিবীকে বিষময়ী বলিয়া বোণ হইতে লাগিল । সমুদ্র মন্থনে যেমন সর্সাগ্রে সুধাভাণ্ড উঠিয়াছিল, তাহার পর অতিরেক মন্থনে হলাহল ও অগ্নি সমুখিত হইয়া সুরাসুরগণকে ব্যতিব্যস্ত করিয়া তুলিয়াছিল, সেই সময়ে কে-
ল যোগীর অগ্রগণ্য মহাদেব সেই বিষ পান করিয়া সকলের ভয় ভঞ্জন করিয়াছিলেন, সংসার সিন্ধুও তদনুরূপ । যৌবন কালে বিদ্যাবলের উপর নির্ভর করিয়া প্রথমতঃ প্রায় সকলেই শান্ত ও শিষ্ট ভাবে ধীরে ধীরে সংসার সাগর মন্থনে প্রবৃত্ত হয়, তাহাতে অবশ্যই পরিভ্রমের পুরস্কার স্বরূপ যে যে রূপ পাত্র সে সেই রূপ রত্ন লাভ করিতে থাকে । ক্রমে ধন হইতে অহঙ্কার ও অতিলোভ উপস্থিত হইয়া পড়ে, সেই সময় অনেকে বিবেক বিহীন হইয়া
'আরও মন্থন কর ! আরও মন্থন কর ! এক্ষণে সাহা পাইলে, ইহা

অপেক্ষা আরও অধিক পাওয়া যাইবে’—এই রূপ চীৎকার করিতে আরম্ভ করে; কিন্তু অতিরিক্ত মন্থনে যেমন সাগরে হলাহল উঠিয়াছিল, সংসার সাগরেও সেই রূপ অমৃতের বিনিময়ে গরল উঠিয়া পড়ে। কখন বা শোক জনিত, কখন বা নৈরাশ্র বশতঃ, কখন ধনক্ষয় জন্ম, কখন বা রোগ শরীর হেতু, কখন বা শত্রু-ভয়ে এই সুখপূর্ণ সংসারকে দুঃসহ দুঃখময় বলিয়া বোধ হইতে থাকে। দেবদেব মহাদেবের স্তায় যিনি সেই ভীত কালকূট পান করিয়াও স্থির থাকিতে পারেন, তিনিই যথার্থ তত্ত্বজ্ঞানী; নতুবা সেই বিষের জ্বালায় অস্থির হইয়া কেহ বা আত্মনাশ করে, কেহ বা একেবারে ভগ্নোৎসাহ হইয়া যায়, কাহারও বা উন্মাদ দশা ঘটে, এবং কেহ কেহ বা বিষের জ্বালায় জর্জরিত হইয়া কোথায় যাইব, কি করিব, কিসে সুস্থ হইব, এই রূপ ভাবিতে ভাবিতে অসহ্য যন্ত্রণা ভোগ করে। ঐদৃশ অবস্থাপন্ন লোকেরা কি করিয়া প্রকৃত শান্তিস্থখের অধিকারী হইবে? যখন সংসার সিদ্ধি মন্থনে সুখাভাও পাওয়া গিয়াছিল, তখন যদি তাহারা মনে মনে ভাবিয়া রাখিত যে, অদ্য যে হস্তে সুখাভাও গ্রহণ করিতেছি, কল্য হয় ত আবার সেই হস্তেই বিষপাত্র গ্রহণ করিতে হইবে; অতএব প্রথমাবধিই অমৃত ও গরলকে সমতুল্য ভাবিয়া রাখি, তাহা হইলে, আর চরমে কষ্ট পাইতে হইবে না। যিনি সংসারের তরঙ্গ দেখিয়া মন বিচলিত না করেন ও সংসারের শান্তি দেখিয়া আক্লাদে উন্মত্ত হইয়া নির্ভয়ে যথেষ্টাচারে প্রবৃত্ত না হন, তিনিই সকল অবস্থাতে সম ভাবে কাল যাপন করিতে পারেন।

এই সংসারে সুখ ও দুঃখ বলিয়া কোন স্বতন্ত্র পদার্থ নাই। অগ্নি আর জল এ দুইটি আমরা চাক্ষুষ প্রত্যক্ষ করি-

তেছি। অগ্নির দাহিকা শক্তি আছে এবং জলের স্নিগ্ধকারিতা শক্তি আছে। এই দুইটি পদার্থই সংসারের নিত্য প্রয়োজনীয়। কাব্যকারেরা অগ্নিকে দুঃখের সহিত ও জলকে সুখের সহিত তুলনা করিয়া থাকেন ; কিন্তু সে দুইটি মনে মনে কল্পনা করিয়া লইতে হয় এই মাত্র। আমি কি সুখের নাম দুঃখ ও দুঃখের নাম সুখ রাখিতে পারি ? না, এক্ষণে আর তাহা পারি না, পূর্বকার সময় হইলে পারিভাম ; কেন না, সুখ এবং দুঃখের একেবারে অধিকার নির্ণয় হইয়া গিয়াছে। যে সকল বিষয়কে সংসারের লোক সুখ বলে, তাহাকে আর দুঃখ বলিবার যো নাই। পূর্বে বলা হইয়াছে যে, সুখ দুঃখ দৃশ্যমান পদার্থ নহে। যেমন মনকে আমরা চক্ষে দেখিতে পাই না, কিন্তু মন আমাদের শরীরে অবস্থান করিতেছে, ইহা বিলক্ষণ অনুমান করিতে পারি ; সুখ দুঃখও সেই রূপ আনুমানিক পদার্থ। যেমন মনের কতকগুলি গুণ আছে, সেই রূপ সুখ দুঃখেরও কতকগুলি অধিকার নির্ণয় আছে। এক্ষণে সেই সকল বিষয়ের হেতুবাদ করিবার প্রয়োজন হইতেছে ;—

মনের অভিলাষ সর্বতোভাবে পূর্ণ হওয়ার নাম সুখ, একান্ত সুখের আর সাধারণ নামকরণ কিছুই হইতে পারে না ; আর মনের অভিলাষ পূর্ণ না হওয়ারই দুঃখ। কিন্তু যখন প্রত্যেক লোকের অবস্থা ভেদে, সময় ভেদে, মনের অভিলাষ স্বতন্ত্র হয়, তখন একের সুখে সকলের সুখ এবং একের দুঃখে সকলের দুঃখ ইহা কি রূপে সম্ভব হইতে পারে। আমি যাহাকে পরম সুখ বলিয়া জ্ঞান করি, অন্য এক জন হয় ত সেই সুখকে দুঃখের একশেষ বলিয়া গণ্য করিতে পারে। বোধ কর, এক

জন সুরাপায়ী কোন ধনবান্ কর্তৃক নিমন্ত্রিত হইল যে, অদ্য তুমি আমার উদ্যানে সন্ধ্যার পর আসিয়া সুরা সেবন করিবে। একপ নিমন্ত্রণ পাইয়া উক্ত সুরাপায়ীর আর আত্মাদের পরিসীমা রহিল না। সে ভাবিল, কয়েক দিন হইতে মনের যাহা অভিলাষ হইয়াছিল, অদ্য তাহা পূর্ণ হইল। অন্য দিকে সেই ধনী আর একটি ব্রাহ্মণ পণ্ডিতকে বল পূর্বক আপন উদ্যানে লইয়া গিয়াছেন, এবং পুনঃ পুনঃ কহিতেছেন যে, যদি তুমি হাস্ত রদনে আমাদিগের সহিত সুরা সেবনে যোগ না দাও, তাহা হইলে, তোমার কণ্ঠের অবধি থাকিবে না; এই কারণে হয় ত তোমার জীবনান্ত পর্য্যন্ত ঘটিতে পারে। এক বিষয়ে এক জনের সুখ ও অন্য জনের দুঃখ উপস্থিত কি জন্য হইল? ব্রাহ্মণ পণ্ডিত ভাবিলেন, মৃত্যু পর্য্যন্ত স্বীকার করিব, তথাচ ধর্ম্ম নষ্ট করিয়া সুরা পান করিতে পারিব না। সুরাপায়ী ভাবিতেছে যে, যদি প্রত্যহ এই রূপ সুরোগ হয়, তাহা হইলে, আমার কোন কষ্টই থাকে না। যাহা হউক, অদ্য আমার পক্ষে সুপ্রভাত, তাহাতে আর সংশয় নাই। যে সকল লোক বহু কষ্টে কেবল এক সাংসারিক সুখের জন্য দেশ বিদেশে ধন উপার্জন করিয়া বেড়াইতেছে, তাহাদের সর্বদা এই চিন্তা প্রবল হয় যে, যদি কিছু ধন সঞ্চয় করিতে পারি, তাহা হইলেই মনের সমস্ত অভিলাষ পরিপূর্ণ হইবে, মনের সাধ মিটাইয়া সুখ ভোগ করিব। অন্য এক জন বিনা আয়াসে বিপুল ধনের অধীশ্বর হইয়া দেখিল যে, সংসারে সুখের লেশ মাত্র নাই; এই জন্য সে সংসারের উপস্থিত সুখকে সুখ বলিয়াই ধরিল না, এবং সম্যাস ধর্ম্ম গ্রহণ করিয়া পরমার্থ চিন্তায় রত হইল। কোন ব্যক্তি হিন্দুর অথবা ভোজনে পরম পরিচোষ লাভ করে, এবং

তাহার মন প্রত্যহ সেই সকল হিন্দুশাস্ত্র নিষিদ্ধ সামগ্রী আহার করিতে অভিলাষ করে, অন্য এক জন সেই সকল খাদ্য সামগ্রীর নাম শুনিলেই ঞ্জকার তুলিয়া থাকে । উন্নত মনের সুখ উন্নত ও অবনত মনের সুখ অবনত । কেহ যদি এক খানি ভগ্ন পর্ণকুটির হুতন ভূণে আচ্ছাদন করিতে পারে, তাহা হইলে, তাহার আর আচ্ছাদনের পরিসীমা থাকে না ; কেহ বা দুই লক্ষ টাকা ব্যয় করিয়া এক সুন্দর অট্টালিকা প্রস্তুত করার পর দেখিতে পাইল যে, তাহা অপেক্ষা তাহার এক জাতি উৎকৃষ্ট বাটি প্রস্তুত করিয়াছে, তখন তাহার নিজ বাটিতে বসবাস করিয়া আর সুখ বোধ হইল না, তদপেক্ষা তাহার সেই জাতিকেই সুখী বোধ করিতে লাগিল । কোন ব্যক্তি বহু কষ্টে অর্থ উপার্জন করিয়া মধ্য বয়সে একটি গুণবতী সুন্দরী কামিনীর পাণি গ্রহণ করিয়া মনে মনে যার পর নাই সুখী হইলেন ; পক্ষান্তরে আবার বিস্তীর্ণ রাজ্যের অধীশ্বরগণ আপন আপন অন্তঃপুরে বহু সংখ্যক সর্কাজ সুন্দরী ললনাগণকে একত্র সমবেত করিয়া রাখিয়াও এক দিনের জন্য সুখী হইলেন না । দিল্লীশ্বর আলাউদ্দীন শত শত সুরূপা কামিনীর পাণি গ্রহণ করিয়াও এক চিতোরেশ্বরী পদ্মিনীর জন্য মনোমধ্যে কিছু মাত্র সুখানুভব করিতে পারেন নাই ; তবেই সুখ দুঃখ সকলের পক্ষে সমান নহে । যাহার যেকপ মন, যেকপ কচি ও যেকপ স্বভাব সে সেই মত বিষয়েই সুখানুভব করে । যখন সুখ দুঃখের স্থিরতা হইল না, তখন সকল অবস্থাতেই মনের স্বচ্ছন্দতা রক্ষা করা সর্বতোভাবে কর্তব্য ; তাহা হইলে, আর কোন বিষয়েই অসুখী হইতে হয় না । যাঁহারা অট্টালিকার বিনিময়ে পর্ণকুটিরে বাস করেন, উপা-

দেয় খাদ্যের বিনিময়ে ফল মূল ভক্ষণ করেন, বহু মূল্য পরি-
চ্ছদের বিনিময়ে বস্ত্রকল পরিধান করিয়া সমান তৃপ্তি লাভ
করেন, তাঁহাদিগের মনেই শান্তি থাকিতে পারে ; নতুবা
শান্তির স্থান আর কোথাও নাই। যদি শান্তিদেবী কোথাও থাকেন,
তাহা হইলে, পর্ণকুটীরেই আছেন, রাজপ্রাসাদে নাই। মন যে
খানে অবনত, সেই খানেই শান্তি বিরাজমান। উর্দ্ধ দৃষ্টি করিলে,
পদে পদে মনের শান্তিভঙ্গ হইবে ; এই জন্ত সুখ দুঃখ সম ভাবে
ভোগ করিতে শিখা কর, তাহা হইলে, শান্তি সুখ অমুভব
করিতে পাইবে।

তিরস্কার ও স্তুতিবাদকে সমান জ্ঞান করা সামান্য মনু-
ষ্যের কার্য্য নহে ; একপ মনুষ্য নাই বলিলেও অত্যাক্তি হইবে
না। বর্ত্তমান সময়ে স্তুতি ও তিরস্কারই সর্ব্বনাশের পথ হইয়া
উঠিয়াছে। তিরস্কারের সামান্য অর্থ দোষের সমালোচনা। যদি
কেহ নিভাস্ত আপনার ভাবিয়া আমাকে তিরস্কার করিতে আরম্ভ
করেন, তাহা হইলে, আমার বিরক্তির ইয়ত্তা থাকে না। যদিও
সেই তিরস্কারকারী আমাকে একটিও অবধা কথা বলিলেন না,
আমার শরীরে যে সকল দোষ আছে, তিনি তাহারই উল্লেখ
করিলেন, তথাচ আমার তাহা সহ্য হইল না। আমি অন্তায়
কার্য্য করিব, সর্ব্বদা পাপপথে বিচরণ করিব ; কিন্তু লোকে
আমাকে সদাচারী বলিয়া স্তুতি ককক্—অধিকাংশ লোকের
এই রূপ মনোগত অভিলাষ। আমি সুরা পান করি, অকার্য্য
করি ; কিন্তু কোন চাটুকর আসিয়া যদি আমাকে এই
বলিয়া স্তুতি করিতে আরম্ভ করে,—মহাশয়, আপনার ছায়
দেব তুল্য একগুণকার কালে আর দেখিতে পাওয়া যায় না ;

আপনার পুণ্যেই সংসার চলিতেছে । এক্ষণকার সুরাপায়ী ও অস-
চরিত্র লোকগুলার পাপেই সংসার ছার খার হইয়া বাহিতেছে ।
আপনার জায় জন কতক পুণ্যাত্মা লোক এই ধরাগামে না
থাকিলে, এত দিন পৃথিবী রসাতলগত হইত । উক্ত চাটুকার
প্রকারান্তরে আমাকে বিলক্ষণ বিদ্রুপ করিল, ও জ্বতির সঙ্গে
সঙ্গে বাস্তবিকই নিন্দা করিল ; কিন্তু আমি ধনগর্বে তাহার
সেই কথাগুলি আপনার পক্ষে সত্য বলিয়া ধরিয়া লইলাম ।
আমার মনে হয় ত তৎ কালে এই রূপ ভাবের আবির্ভাব হইল
যে, আমার দোষের কথা এ ব্যক্তি কিছুই অবগত নহে ; সুতরাং
আমি স্তাবকের উপর যথোচিত সমুদ্র হইলাম ।

এক্ষণকার ধনাঢ্য লোকের চরিত্রের সহিত দেব চরিত্রের কিছু
মাত্র প্রভেদ দেখি না ; কারণ পুরাণাদিতে দেখিতে পাওয়া যায়,
যিনি যখন যে দেবতার স্তব করিয়াছেন, তখন তিনিই তাঁহাকে
হর্তা কর্তা বিধাতা ও সর্ব দেবের পূজ্য বলিয়া জ্ঞান করিয়াছেন ।
দেবতাদিগের বর প্রদানও এক্ষণকার ধনাঢ্য লোকের সমতুল্য ।
তাঁহারা চাটুবাক্যে মোহিত হইয়া পরম শত্রুর প্রতিও প্রসন্ন
হইয়াছেন । দেখ, ভগবান্ রামচন্দ্রের বনিভাপহারী রক্ষসকুলপতি
দশানন সম্মুখ সংগ্রামে এক প্রকার পরাস্ত হইয়া যখন তাঁহার স্তব
আরম্ভ করিলেন, তখন তিনি সেই পরম শত্রু দশাননেন জ্বতি
বাক্যে প্রসন্ন হইয়া গীতা উদ্ধারের আশা একেবারে পরিত্যাগ
করিয়া বসিলেন । এক্ষণকার ধনিগণ যেমন চাটুকারদিগের প্রতি
ক্ষণে কষ্ট ও ক্ষণে তুষ্ট হইয়া থাকেন, তৎ কালের দেবতারাও
তদনুরূপ ছিলেন । রাবণের জ্বতিতে রামচন্দ্র ধনু ও অস্ত্র
পরিত্যাগ করিয়া বসিলেন এবং মনে মনে ভাবিলেন, বরং

সীতাকে পরিত্যাগ করিয়া যাইব, তথাচ একপ ভক্তের প্রতি
 অস্বত্যাগ করিতে পারিব না। এমন সময়ে দশানন দুই সরস্বতী
 কর্তৃক উত্তেজিত হইয়া কর্কশ স্বরে রামচন্দ্রকে কহিলেন, অরে তপ
 তপস্বি! আমি আমার ইষ্টদেবের স্তব করিলাম, আর তুমি ভাবিলি
 ভয় পাইয়া দশানন আমাকে স্তব করিল? এ কি তোর সামান্য ভ্রম!
 এই দেখ, এখনই তোর শিরশ্ছেদন করিয়া ইন্দ্রজিৎ ও কুন্তকর্ণের
 শোক বিম্বৃত হই। এই কয়েকটি কর্কশ কথা শ্রবণ মাত্রেই রাম-
 চন্দ্রের ক্রোধ শত গুণে বর্দ্ধিত হইয়া উঠিল, এবং তৎক্ষণাৎ অস্ত্র
 ধারণ করিয়া পূর্বে যাহাকে পরম ভক্ত বলিয়া ধার্য্য করিয়াছিলেন,
 তাহারই প্রতি অস্ত্র প্রয়োগে তৎপর হইলেন। রামচন্দ্রের ন্যায়
 ইন্দ্রাদি দেবতারাও সময়ে সময়ে স্তাবকের প্রতি যার পর নাই
 প্রসন্ন হইয়াছিলেন, তাহার পর আবার সেই সকল ভক্তের বিনাশ
 জন্য যে সকল কষ্ট ভোগ করিয়াছিলেন, তাহা বর্ণনাতীত ;
 কিন্তু আমাদের যোগীশ্রেষ্ঠ মহাদেব সে প্রকৃতির দেবতা
 ছিলেন না। তিনি অল্পে সন্তুষ্ট হইতেন বলিয়া লোকে তাঁহাকে
 আশুতোষ বলিয়া থাকেন। কথিত আছে, মহাদেব প্রত্যহ
 ভিক্ষা করিয়া আনিয়া স্ত্রীপুত্র পরিবারের ভরণ পোষণ করি-
 তেন। যখন তিনি সর্ষ শরীরে ভক্ষ্য লেপন, সর্পের দ্বারা
 জটা বন্ধন, ভিক্ষার ঝুলি ও শিলা ডমক লইয়া ঘূষে আরোহণ
 পূর্বক ‘ভিক্ষাং দেহি’ বলিয়া গৃহস্থগণের দ্বারে দ্বারে বেড়া-
 ইতেন, তখন অজ্ঞান বালকেরা তাঁহার প্রতি কিকপ দৌরাভ্য
 করিত, নিম্নে বর্ণিত হইল ;

“ কেহ বলে ওই এল শিব বুড়া কাপ,

কেহ বলে বুড়াটি খেলাও দেখি সাপ।

কেহ বলে জটা হতে বার কর জল,
কেহ বলে জল দেখি কপালে অনল ।
কেহ বলে ভাল করে শিঙ্গাটি বাজাও,
কেহ বলে ডমরু বাজায়ে গীত গাও ।
কেহ বলে নাচ দেখি গাল বাজাইয়া,
ছাই মাটি কেহ দেয় গায় ফেলাইয়া ।”

মহাদেব বালকগণের এই সকল কথা শুনিতে শুনিতে হাস্য
মুখে অল্প পথে গমন করিতেন । যে মহাদেবের ভুজবলে কত
বার ইন্দ্রের ইন্দ্রত্ব রক্ষা পাইয়াছিল, সমুদ্র মন্থন কালে যে মহা-
দেব কালকূট কণ্ঠস্থ করিয়া দেব দেবীগণের আশঙ্কা দূর করিয়া-
ছিলেন, যে মহাদেব সক্রোধে ত্রিশূল ধারণ করিলে ব্রহ্মাও
কাঁপিয়া উঠিত, সেই মহাদেব ভিকালক অগ্নে জীবন ধারণ করি-
তেন, স্বর্গধাম পরিত্যাগ করিয়া কৈলাস পর্বতে বাস করিতেন,
মণি মাণিক্যের প্রতি দৃষ্টিপাত না করিয়া অস্থি মালায় কণ্ঠ
বিভূষিত করিতেন, বস্ত্রের বিনিময়ে ব্যাস্ত্রচর্ম্ম পরিধান করি-
তেন, এবং নিন্দা ও স্তুতি সমান জ্ঞান করিতেন । অত-
এব দেবদেব মহাদেব এবং বাল-বৈরাগী শুকদেবের ন্যায় যাঁহারা
স্তুতি ও তিরস্কার সমান জ্ঞান করিতে পারিবেন, ইহ সংসারে
ধাকিয়াও তাঁহাদিগের মনে অনেক পরিমাণে শান্তি থাকিতে
পারে ।

এই সম্বন্ধে আমরা গুটি কতক পুরা কালের মহুষ্যের কথা
উদাহরণ স্থলে গ্রহণ করিতেছি । পণ্ডিত চূড়ামণি সক্রেন্টিস
স্তুতি ও নিন্দা উভয়ই সমান জ্ঞান করিতেন । তিনি বলি-
তেন,—আমাকে নিন্দা করিলে, সে নিন্দায় অকারণ ব্যথিত

হইব কেন ? যদি সে আমার যথার্থ দোষ উল্লেখ করে, তাহা হইলে, তাহাকে বন্ধুর মধ্যে গণ্য করা উচিত ; কেননা, আমাদিগের পিতা মাতা ও গুরু জনেরাই দোষের উল্লেখ করিয়া ভৎসনা করিয়া থাকেন। আর আমি যে দোষে দোষী নহি, 'নিন্দুক'েরা যদি আমার প্রতি সেই সকল দোষারোপ করে, তাহা হইলে, সে সকল ব্যক্তিকে উন্নত জ্ঞান করিয়া হাস্ত্য করা উচিত। এই মর্মে শাস্ত্রশতকেও একটি চমৎকার কবিতা আছে, তাহার ভাবার্থ এই ;—“ যদি কেহ আমার নিন্দা করিয়া পরিতোষ লাভ করে, তাহাতে আমি দুঃখিত নহি ; বরং অযত্ন সুলভ অনুগ্রহ ভাজন হইলাম। দেখ, লোকে বহু দুঃখে যে ধন উপার্জন করে, তাহা বিতরণ করিয়া অন্তের তুষ্টি সম্পাদন পূর্বক আপনার মঙ্গল কামনা করিয়া থাকে ; আমি যদি তাহা অক্লেশে ও বিনা অর্থ বায়ে পাই, তাহা হইলে, আপনাকে ভাগ্যবান্ বিবেচনা করিব। ” আর এক জন পণ্ডিত কহিয়াছেন ;—

ঝাঁঝারা চাটুকারের কথায় কর্ণপাত করেন না ও নিন্দুকের সহিত একাসনে বসেন না, তাঁহারাই শাস্ত্রমুখ লাভ করিবার যোগ্য পাত্র। স্তুতি ও নিন্দা এই দুইটি সমাজের কণ্টক স্বরূপ। সংসারে যে সমুদয় অনিষ্ট ঘটতেছে, তৎ সমুদায়ের ভিত্তিতেই চাটুকার ও নিন্দুক আছে। যখন শূর্ণগথা লক্ষণ কর্তৃক অপমানিত হইয়া লঙ্কাপুরে প্রবেশ করে, তখন সে মনে মনে এই রূপ ভাবিতে ভাবিতে গিয়াছিল যে, সহোদরকে যৎপরোনাস্তি ভৎসনা করিব ; কেননা, লঙ্কাধিপতির ক্রোধানল প্রজ্বলিত করিতে না পারিলে, আমার অভীষ্ট সিদ্ধ হইবে না। এক মাত্র নিন্দাই ক্রোধের উদ্দীপক। এই যুক্তি স্থির করিয়া

শূৰ্পণখা রাজ সভায় প্রবিষ্ট হইল, এবং কৰ্কশ বচনে মহোদরকে বলিল, যে রাজা দিন যামিনী স্ত্রীমণ্ডলী মধ্যে বাস করে, অচির কাল মধ্যেই সে রাজ্য ভ্রষ্ট হয় । লঙ্কাধিপতিরও তাহাই ঘটিতেছে । আমাদিগের অধিকৃত স্থান কি না তুই জন সামান্য মনুষ্য আসিয়া অধিকার করিয়া লইল ! কামুকের আবার রাজ্য কেন ? যে দিন যামিনী স্ত্রী সেবায় অহুরক্ত, কোন্ কালে তাহার সম্মান রক্ষা হয় ? ভ্রাতঃ, তুমি ঘরে বসিয়া আপনাকে বড় দেখিতেছ, আর মন্দোদরীর দাসত্ব করিতেছ । যাহারা রাবণের ভগিনীর নামা কর্ণ ছেদন করিল, এখনও তাহারা জীবিত আছে, এই আশ্চর্য্য ! ভগিনীর এই সকল কটুক্তি শুনিয়া রক্ষঃ-কুলপতি আরক্ত নয়নে কহিলেন, তুই আমার সম্মুখে দাঁড়াইয়া যে সকল কটু বাক্য বলিতেছিস, কেবল মহোদরা বলিয়াই তাহা সহ্য করিলাম, নতুবা এক্ষণেই তোঁর শিরশ্ছেদন করিয়া ফেলিতাম । আমি কি রাজ্য শাসনে অক্ষম ? শীঘ্র বল, কে আমার অধিকৃত স্থানে উপদ্রব করিতেছে ? কে তোঁর নামা কর্ণ ছেদন করিয়াছে ? যদি এই দণ্ডে তাহার সমুচিত শাস্তি বিধান করিতে না পারি, তাহা হইলে, আমাকে যেন আর কেহ বিশ্ব-বিজয়ী বলিয়া সম্বোধন না করে । মহোদরের ক্রোধ উদ্দীপ্ত হইয়াছে দেখিয়া শূৰ্পণখা সমস্ত ঘটনা বর্ণনা করিল । রাবণ শুনিয়া তৎক্ষণাৎ সীতাহরণে বহির্গত হইলেন ।

এ সম্বন্ধে আর পৌরাণিক দৃষ্টান্তের প্রয়োজন নাই । বর্তমান সময়ে পদে পদে দেখিতে পাওয়া যাইতেছে, কেবল এক নিন্দার ভয়ে অনেক অজ্ঞ লোক আপনার ক্ষমতার অতিরিক্ত কার্য্য করিয়া মনের শান্তি ভঙ্গ করে । কেহ কেহ বা কেবল

আপনার স্তুতিবাদ শুনিবার জন্য অকাভরে অর্থ ব্যয় করিয়া থাকে। এই রূপ লোককে সাধারণ কথায় ‘নাম পাগলা’ বলে। ‘নাম পাগলা’ লোকের অত্র পশ্চাৎ জ্ঞান নাই, হিতাহিত জ্ঞান নাই, ও কর্তব্যাকর্তব্য জ্ঞান নাই। আমাকে কিসে লোকে পুণ্যাত্মা বলিবে, কিসে লোকে দাতা বলিবে, “কিসে লোকে ধনাঢ্য বলিবে, সৰ্ব্বদা এই চিন্তাতেই নিমগ্ন থাকে, এবং নাম কিনিবার অনুরোধে আপনার ধনও নষ্ট করে। ধন ক্ষয়ে এবং বিরোধে যে রূপ মনের শান্তি ভঙ্গ হয়, একপ আর কিছুতেই হয় না। তবেই স্তুতি ও নিন্দার মধ্যে একটিতে ধন ক্ষয় ও অপরটিতে মনের গ্লানি আনিয়া উপস্থিত করে। যে স্তুতি ও নিন্দা সমান জ্ঞান করিবার মানসে জ্ঞানবান্ ব্যক্তির। সমুহ চেষ্টা করিয়া থাকেন, ভিক্ষুকের। তাহা অনেকাংশে অনায়াসে শিক্ষা করে। যাচকদিগকে আমরা যত কেন নিন্দা করি না, কিছুতেই তাহাদের মনের গ্লানি হয় না, মনোমধ্যে কিছু মাত্র ক্রোধ জন্মে না, সেই সকল কটুক্তি অনায়াসে সহ্য করিয়া তাহারা আপন অভীষ্ট সিদ্ধির জন্য দাঁড়াইয়া থাকে। যদি শত সহস্র কটু বাক্য বলিয়া অবশেষে তাহাদিগের অভীষ্ট পূর্ণ হয়, তাহা হইলে, ভিক্ষুকের আর আনন্দের পরিসীমা থাকে না। পাঠক, আপনি যদি সেই ভিক্ষুককে যথোচিত স্তব স্তুতি করিয়া রিক্ত হস্তে বিদায় করিতে চাহেন, তাহা হইলে, সে স্তুতিতে তাহাদিগের মনের প্রযুক্ততা জন্মে না; তবেই নিন্দা ও স্তুতি তৎ কালে তাহাদের পক্ষে সমান হয়।

এক জন চতুর ব্যক্তি বলিয়াছিলেন, যে সকল লোক স্তবে তুষ্ট হয়, কিম্বা নিন্দাবাদ শুনিয়া ক্রুদ্ধ হইয়া উঠে, একপ লোক যদি

মহাধনবান্ হয়, তাহা হইলে, তাহাকে অল্প কালের মধ্যে দরিদ্র করিয়া দিতে পারি। যে ব্যক্তি ব্যঙ্গ স্তুতি শুনিতে বিরক্ত হয় না, তাহাকে অজ্ঞায়াসে চতুরেরা নষ্ট করিতে পারে। স্তুতি ও নিন্দা সুহৃদ্ভেদের এক অমোঘ অস্ত্র স্বরূপ। বিষ্ণুশর্ম্মার হিতোপদেশে তাহা পদে পদে প্রকাশ পাইয়াছে। কিন্তু যাহা-দিগের ধৈর্য্য, বীর্য্য, গাম্ভীৰ্য্য ও সত্যের দিকে দৃষ্টি আছে, তাহার স্তুতি বাক্য শুনিয়া মনকে উল্লাসিত করেন না এবং কটু কথা বা নিন্দাবাদ শ্রবণে সহসা কুপিত হইয়া উঠেন না। রামচন্দ্র ভরতের স্তুতি বাক্যে পিতৃসত্য প্রতিপালনে পরাঙ্মুখ হন নাই ও বালি রাজার মৰ্ম্মভেদী কটু কথা অনায়াসে সহ্য করিয়া তাহাকে চরম চিন্তায় মনোনিবেশ করিতে পদে পদে উপদেশ দিয়াছিলেন। কটু বাক্য সহ্য করিতে অক্ষম বলিয়াই কুরুপতি দুৰ্য্যোধন একাকী ভীমসেনের সহিত সম্মুখ সংগ্রামে প্রবৃত্ত হইয়াছিলেন। দুৰ্য্যোধন যখন কুরুক্ষেত্র সমরে সৰ্ব্বতোভাবে পরাস্ত হইয়া দ্বৈপায়ন ব্রহ্মে আত্ম গোপন করিয়াছিলেন, যুধিষ্ঠির চর মুখে সেই সম্বাদ প্রাপ্ত হইয়া সসৈন্তে ব্রহ্মের তীরে উপস্থিত হইলেন; কিন্তু দুৰ্য্যোধনের কোন চিহ্নই দেখিতে পাইলেন না। অবশেষে তিনি হতাশ হইয়া মন্ত্রী চূড়ামণি শ্রীকৃষ্ণকে জিজ্ঞাসা করিলেন, হে কৃষ্ণ! তুমি দুৰ্য্যোধনের সহিত সাক্ষাৎ লাভ যে কঠিন হইয়া উঠিল। সে এই গভীর ব্রহ্মের যে কোথায় রহিয়াছে, তাহার কোন চিহ্নই লক্ষ্য হইতেছে না। শ্রীকৃষ্ণ কহিলেন, চিন্তিত হইবেন না, ইহার সন্ধান করিতেছি। আপনি এই ব্রহ্মের তীরে দাঁড়াইয়া উচ্চস্বরে দুৰ্য্যোধনকে গালি দিতে আরম্ভ করুন, তাহা হইলে, অক্লেশে তাহার সাক্ষাৎ পাই-

বেন । শ্রীকৃষ্ণের উপদেশানুসারে ধর্মপুত্র যুধিষ্ঠির ত্রয়ো-
ধনকে ভৎসনার সহিত এই রূপ নিন্দা কুরিতে ও কটু বাক্য
বলিতে লাগিলেন ;—

“এত শুনি যুধিষ্ঠির বলিল রাজাকে,—
‘জলের ভিতর কেন আছ মায়া পাকে ?
ভ্রাতৃ বন্ধু আত্মীয়েরে মারিয়া পামর,
আপনার প্রাণ লাগি হইলে কাতর !
উঠ উঠ নরাদম দুষ্ট কুরুবর,
ভয় পরিহারি কর আসিয়া সমর ।
নিজ বাহু বলে তুমি শাসিলে সংসার,
এক্ষণে হইলে কেন কুলের অঙ্গার ?
আপনি পণ্ডিত বট জান ধর্মাদর্ম,
ভূপতির যোগ্য নহে পলায়ন কর্ম ।
সমর সাগর যেই নাহি হয় পার,
মনে ভাবি দেখ তার জীবন অসার ।
ইষ্ট বন্ধু সখা আর সখ্যকী মাতুল,
সবারে মারিয়া তুমি করিলে নির্মূল ;
মরিয়াছে মহাযোদ্ধা উনশত ভাই,
কেমনে জীবন আশা কর মম ঠাঁই ?
হইলে যে ধর্ম ছাড়ি অধর্ম আচারী,
প্রাণ লয়ে লুকাইলে রণ পরিহারি ?
কর্ণ শকুনির যত শুনিলে বচন,
তার ফল ভুঞ্জ এবে পাপী ত্রয়োদন ।’

এতেক কটুক্তি যদি করিলেন ধর্ম্ম,
শুনি কোপে ছলিলেক দুর্ঘোষন মর্ম্ম :—

‘ধিক্ মম বীরত্বে অসার ভুজ ভার,
হেন নিন্দা বাক্যনাগ সহে না আমার !’

ঘন শ্বাস ছাড়িয়া বলিলা ক্রোধ মনে,
‘নিপ্পাণ্ডবা পৃথিবী করিব আজি রণে ।

শুন যুধিষ্ঠির তুমি সৈন্তেতে বেষ্টিত,
একেশ্বর আছি আমি পদাতি রহিত ।

একাকী করিব রণ শুন ধর্ম্মরায়,
অনিয়ম সমর করিলে পাপ তায় ।’

সুবর্ণ সাঁজোয়া বীর হৃদয়েতে ধরি,
দীপ্তিমান্ কুববর যেন হেম গিরি ।

ভুজবলে বিদারিয়া জল গুণনিধি,

উঠিল মৈনাক যেন হ’তে জলনিধি ।”

দুর্ঘোষন যে ভাবে দ্বৈপায়ন ব্রুদে অবাস্থিতি করিতেছিলেন, যুধি-
ষ্ঠির বহু দিন অনুসন্ধান করিলেও তাহা জানিতে পারিতেন
না ; কিন্তু কর্কশ বাক্য মহামানী দুর্ঘোষনের পক্ষে অসহ্য হই-
য়াছিল বলিয়াই তিনি আপনা হইতে প্রবল শত্রুর সম্মুখে আসিয়া
উপস্থিত হইয়াছিলেন । বরং মৃত্যু হয়, হইবে, তথাচ দুর্সাক্য
সহ্য করিতে পারিব না, এই ভাবিয়া দুর্ঘোষন শত্রুগণের সহিত
একাকী যুদ্ধে প্রবৃত্ত হইয়াছিলেন । পক্ষান্তরে, দ্যুত ক্রীড়ার
সময় দুঃশাসন ও কর্ণ ধর্ম্মাত্মা যুধিষ্ঠিরকে যেকপ বিক্রপ
করিয়াছিল, এক জন হীন বল ব্যক্তিও তাহা সহ্য করিতে পারে
না । যুধিষ্ঠির এক বার মাত্র ইঙ্গিত করিলেই, ভীম ও দনঞ্জয়

সেই ক্ষণেই কুব্জ সভার সমস্ত জনগণকে অতি অল্প কালের মধ্যে নিপাত করিয়া ফেলিতেন ; কিন্তু একপক্ষ ক্ষমতা স্বত্বেও যুধিষ্ঠির অসময় জানিয়া ধৈর্য্যের সহিত জ্ঞাতির দুর্সাক্য সহ্য করিয়াছিলেন । সেই জন্যই তিনি চরমে পুনর্বার হস্তিনার সিংহাসন লাভ করেন । চুর্যোধন সর্বতোভাবে হীনবীৰ্য্য হইয়াও দান্তিক স্বভাব বশতঃ জ্ঞাতির দুর্সাক্য সহ্য করিতে পারিলেন না বলিয়াই অবশেষে ভীমের পদাঘাত পর্য্যন্ত সহ্য করিয়া মৃত্যু মুখে নিপতিত হইলেন ।

ইহা দ্বারা স্পষ্ট প্রমাণ হইতেছে যে, মনুষ্য মাত্রেরই স্তুতি ও নিন্দা সমান জ্ঞান করা উচিত । স্তুতি বাক্যে সম্ভূষ্ট হওয়া ও নিন্দাবাদে উগ্র মূর্ত্তি ধারণ করায় বিশেষ অনিষ্ট ঘটিয়া থাকে । নির্দোষ ব্যক্তির সময় একটি সামান্য কথা সহ্য করে না, কিন্তু অসময়ে তাহাদিগকেই তাহা অপেক্ষা শত গুণ অপমান সহ্য করিতে দেখা যায় । চাটুকীর অযথা স্তবে কণ পাতি করিয়া মনুষ্যের কথা দূরে থাকুক, দেবতারও সময়ে সময়ে অসহ্য কষ্ট ভোগ করিয়াছেন । অশুরেরা অন্তরের সহিত তপস্বী করিতে প্রবৃত্ত হইত না, কেবল আপন আপন অভীষ্ট সিদ্ধির জন্যই প্রধান প্রধান দেবগণকে স্তুতি করিত । দেবতারও সেই কপটদিগের কপটতার মুখে হইয়া দুর্ভাগ্যগণকে মনোমত বর প্রদান করিতেন ; তাহার পর সেই অশুরগণেরই দৌরাত্ম্যে আপনার স্থান ছাড়িয়া পলাইবার পথ পাইতেন না । এক্ষণে বিপুল ধনের অধীশ্বরগণকেই দেবতার স্থায় ধরিলাম । তাহার প্রভাবকগণের অযথা স্তুতি বাক্যে মুগ্ধ হইয়া অনেক সময়ে সেই নরপ্রভগণের দ্বারা সর্বস্বান্ত হইয়া-

ছেন। চাটুকারেরা সময় বুঝিয়া ধনবান্গণকে কৌশলে নিন্দা ও স্তব করে, যিনি সেই সকল কথায় কর্ণ পাত করিয়া কষ্ট বা তুষ্ঠ হন, পদে পদে তাঁহাদিগের মনের শান্তি ভঙ্গ হইয়া থাকে। প্রশংসা লাভের জন্য সংকার্য্য ও নিন্দাবাদ শুনিয়া কলহে প্রবৃত্ত হওয়া দুইই সমান; অতএব যদি শান্তি স্মৃখ সম্ভোগের অভিলাষ থাকে, তাহা হইলে, স্তুতি ও নিন্দা সমান জ্ঞান কর। মনের শান্তি থাকিলে, বিবেক ও বৈরাগ্য আপনি আসিয়া উপস্থিত হইবেক।

সংসারবাসী জনগণ যাহা দুষ্প্ৰাপ্য তাহাই অধিক মূল্যবান্ বলিয়া জ্ঞান করে। মৃত্তিকা ব্যতিরেকে আমাদিগের মুহূর্ত্ত কাল চলে না। মাতৃগর্ভ হইতে এই মৃত্তিকাতেই নিপতিত হইয়াছি। যখন অক্ষম ছিলাম, তখন জড়ের ন্যায় মৃত্তিকাতেই পড়িয়া থাকিতাম। মৃত্তিকাই আমাদিগের শরীর পোষণ করিতেছে। সেই মৃত্তিকা আমরা দুই পদে দলন করিয়া থাকি। এই সংসারে মৃত্তিকারূপে নিতান্ত প্রয়োজন, তাহা এক বারও ভাবিয়া দেখি না। জল, বায়ু, অগ্নির প্রতিও আমরা মৃত্তিকার ন্যায় অনাস্থা প্রকাশ করিয়া থাকি। যে সকল পদার্থ লইয়া আমাদিগের দেহ, যাহা না হইলে, আমরা কণ কাল প্রাণ ধারণ করিতে পারি না, প্রায় সেই সকল বস্তুর প্রতিই সর্বদা অনাদর করিয়া থাকি। শরীর ধারণ পক্ষে যে সকল জব্যের কিছু মাত্র প্রয়োজন নাই, তাহাই আমাদিগের আদরের ধন। যিনি অঙ্গরীয়কে সংলগ্ন করিয়া এক টুকরা হীরক অঙ্গুলিতে ধারণ করিতে পারেন, তাঁহার আর অহঙ্কারের পরিসীমা থাকে না। এক অহঙ্কার ব্যতিরেকে হীরক আর আমাদিগকে কি দিতে পারে? প্রয়োজনের মধ্যে

হীরার ধারে কাচ কাটা যায় এই মাত্র। এই নিষ্প্রয়োজন দ্রব্যের জন্য কত শত লোক লালায়িত হইতেছে, তাহার ইয়ত্তা নাই। হীরক খনির মধ্যে জন্মিয়া থাকে; সেই হীরকের অল্প-সম্বন্ধে শত সহস্র লোক দিন যামিনী উৎকট পরিশ্রম করিতেছে। হীরক মৃত্তিকা সম্ভূত, তণ্ডুলও মৃত্তিকা সম্ভূত। তণ্ডুল ভক্ষণে জীবন ধারণ হয়; কিন্তু হীরক মুখে রাখিলে মৃত্যু পর্য্যন্ত ঘটিয়া থাকে। যে দ্রব্য অনায়াসে আমাদিগের প্রাণ নষ্ট করিতে পারে, আমরা তাহাই যত্ন সহকারে হৃদয়ে ধারণ করি।

হীরক দ্বারা কাচ কর্তন হইয়া থাকে। হীরকের ধার ব্যতিরেকে আর কোন অস্ত্রেই সহজে কাচ কাটা যায় না। তবেই সংসারে হীরক দ্বারা একটা উপকার সাধিত হইতেছে; কিন্তু মুক্তা দ্বারা কি উপকার সাধিত হয়? কি জন্যই বা অগাধ জলধি হইতে প্রাণের আশা পরিত্যাগ করিয়া মানবগণ মুক্তা পাইবার আশায় শুক্তি তুলিতে যায়? শুনিয়াছি যে, পূর্ব কালে মুসলমান বাদশাহগণ মুক্তা ভক্ষ্য করিয়া চূণ প্রস্তুত করিয়া সেই চূণ দিয়া তাম্বুল ভক্ষণ করিতেন। যদি চূণের জন্যই মুক্তার প্রয়োজন হয়, তাহা হইলে, সে কার্য্য সামান্য প্রস্তর খণ্ডের দ্বারা সম্পন্ন হইতে পারিত, মুক্তা ভক্ষ্য দ্বারা চূণ প্রস্তুত করার কিছু মাত্র প্রয়োজন ছিল না; তথাচ যে মুসলমান বাদশাহগণ প্রস্তরের চূণ পরিত্যাগ করিয়া মুক্তার চূণ ব্যবহার করিতেন, সে কেবল তাঁহাদিগের অহঙ্কার মাত্র। বৈদ্যক গ্রন্থের মতে কোন কোন ঔষধ প্রস্তুত করণ কালে মুক্তা ভক্ষ্মের প্রয়োজন হয়; একপ স্থলে হীরক অপেক্ষা মুক্তার প্রয়োজন অধিক বলিয়া ধরিতে হইবে। কিন্তু কেবল এক ঔষ-

ধের জন্ম কি বৎসর বৎসর সহস্র সহস্র লোক পারস্য উপ-
সাগরে ও সিংহল দ্বীপের নিকটস্থ নির্দিষ্ট স্থানে মুক্তা তুলিতে
যায় ? না, তাহা নহে । ঔষধের উপযুক্ত মুক্তা জনপদের
কোন কোন অকৃত্রিম জলাশয়েও জন্মিয়া থাকে । বিশেষতঃ,
মুক্তা ভস্ম ও স্বর্ণ ভস্ম যে সকল ঔষধে ব্যবহার হইয়া থাকে,
তাহা সাধারণের জন্ম নহে । যাঁহারা মুক্তার চূর্ণ সংযোগে
তাম্বুল ভক্ষণ করিয়া থাকেন, স্বর্ণ ও মুক্তার ঔষধ তাঁহাদিগেরই
জন্ম প্রস্তুত হইয়া থাকে ; কারণ অধিক মূল্যবান্ না হইলে,
ধনবান্ লোকের কোন পদার্থই মনোনীত হয় না । ধনাঢ্য
লোকের চক্ষু থাকিতে চক্ষু নাই । যাঁহার অধিক মূল্য তাঁহারা
তাহাকেই সারবান্ বলিয়া জ্ঞান করেন । এই জন্ম নির্ধন ও
ধনী এই দুই সম্প্রদায়ের মধ্যে সকল বিষয়েই তারতম্য দৃষ্ট হয় ।
কদলী পত্রে অন্নাহার করিলেও চলিতে পারে, কিন্তু ধনীরা
তদ্বিনিময়ে স্বর্ণ ও রৌপ্য পাত্র ব্যবহার করিয়া থাকেন । অল্প
মূল্যের শীতবস্ত্রে শীত নিবারণ হয়, কিন্তু ধনীদিগের শীত বস্ত্রের
মূল্য অধিক হইয়া থাকে । এক পয়সা মূল্যের এক পাঁচ পাঁচনে
নির্ধনের যে রোগ আরোগ্য হয়, ধনীর সেই রোগ দুই সহস্র
মুদ্রা ব্যয়েও আরোগ্য হয় না । যদি কোন কণ্ঠ ধনীর গৃহে
এক জন স্নযোগ্য কবিরাজ উপস্থিত হইয়া তাঁহার প্রকৃত
রোগের ঔষধের মূল্য অবধারিত করেন, তাহা হইলে, সেই
কবিরাজকে হাশ্ব্যাস্পদ হইয়া ফিরিয়া আসিতে হয় । নবাব
আলিবর্দী খাঁ ঘোটকারোহণে নগর ভ্রমণ করিতে অভ্যস্ত ভাল
বাসিতেন । তিনি এক দিন তাঁহার মন্ত্রীকে জিজ্ঞাসা করি-
লেন যে, এমন কোন মাদক দ্রব্য আছে, যাঁহা সেবন গাত্রেই

আমার মনের বিলক্ষণ প্রফুল্লতা জন্মে ? যদি থাকে, তাহা হইলে, আমি অশ্ব পৃষ্ঠে আরোহণ করিবার পূর্বে প্রত্যহ সেই মাদক দ্রব্য সেবন করিব। মন্ত্রী কহিলেন, জাঁহাপনা, আমি কল্য ইহার ব্যবস্থা করিয়া দিব। পর দিন প্রত্যুষে মন্ত্রী এক কলিকা গাঁজা প্রস্তুত করিয়া স্বয়ং সিংহদ্বারে উপস্থিত রহিলেন। নবাব সাহেব অশ্বারোহণে বায়ু সেবনার্থে বহির্গত হইতেছেন, এমন সময়ে মন্ত্রী কহিলেন, জাঁহাপনা, গত কল্য যে রূপ মাদক সেবনের অভিলাষ প্রকাশ করিয়াছিলেন, তাহা প্রস্তুত করিয়া রাখিয়াছি। নবাব আগ্রহের সহিত মন্ত্রীর হস্ত হইতে গাঁজার ছুঁকী লইয়া তাহার ধূম পান করিলেন, ও মস্তক সঞ্চালনের দ্বারা কহিলেন, ইহা বড় চমৎকার দ্রব্য। তৎপরে মূল্যের কথা জিজ্ঞাসা করিতে মন্ত্রী কহিলেন, ইহার মূল্য ষৎসামান্য, অর্দ্ধ পয়সা মাত্র। অর্দ্ধ পয়সার কথা শ্রবণ মাত্রেই নবাব সাহেব হাস্য করিয়া কহিলেন, তবে আমি একপ ষৎসামান্য মূল্যের মাদক দ্রব্য কি করিয়া খাইব ? স্বার্থপর মন্ত্রী হইলে, এক ছিলিম গাঁজা খাওয়াইয়া নবাব সাহেবের নিকট সহস্র মুদ্রা গ্রহণ করিতে পারিতেন, এবং তাহা হইলে, নবাব সাহেবেরও গাঁজার প্রতি শ্রদ্ধা হইত। এই রূপে বড় মানুষে সকল বিষয়েরই মূল্য বৃদ্ধি করিয়া দেন। যাহা বড় মানুষে চাহেন, তাহারই মূল্য অধিক ; সেই কারণেই হীরক ও মুক্তার মূল্য বৃদ্ধি হইয়াছে। যদি বড় মানুষে ব্যবহার না করিতেন, তাহা হইলে, কোন কালেই হীরা মুক্তার এত আদর হইত না, এবং বই কণ্ঠে কেহ তাহা সংগ্রহ করিতেও যাইত না।

জ্ঞানবান্ লোকেরা আমার বস্তুর কোন্ কালে আদর করি-

যাচ্ছেন ? যাহা ব্যতীত জীবন ধারণ হয় না, যাহা ব্যতীত
 জ্ঞানের উন্নতি হয় না, যাহা ব্যতীত ঈশ্বর আরাধনা হয় না,
 তাহাই তাঁহাদিগের নিকট মূল্যবান্ । এক জন রাজা দৈবাৎ
 কোন তপস্বীর কুটীরে উপস্থিত হইয়াছিলেন । তিনি তাপসের
 ধর্মনিষ্ঠা ও ঈশ্বরের প্রতি প্রগাঢ় ভক্তি দেখিয়া, সবিনয়ে কহি-
 লেন, তপোধন, আপনার ঈশ্বর ভক্তি দেখিয়া আমি যৎপরো-
 নাস্তি পরিতুষ্ট হইয়াছি ; এক্ষণে আপনাকে আমার একটি অভি-
 লাষ পূর্ণ করিতে হইবে । আপনার গলদেশে যে বৃহৎ বৃহৎ
 কদ্রাক্ষের মালা রহিয়াছে, তাহার বিনিময়ে আপনি এক গাছি
 মুক্তার মালা পরিধান ককন, এবং আপনার কমণ্ডলুটি স্বর্ণে
 মণ্ডিত করাইয়া লউন । রাজার প্রস্তাব শুনিয়া তপোধন হাস্য
 করিয়া কহিলেন, রাজন্, আমি এমন কি অপরাধ করিয়াছি যে,
 আপনি আমাকে তস্কর দ্বারা বিনষ্ট করাইবার প্রয়াস পাই-
 তেছেন ? মুক্তার মালা তাপসের কণ্ঠ ভূষণ নহে ও স্বর্ণ পাত্রও
 তাপসের জল পাত্রের যোগ্য নহে ; কেননা, মণি মাণিক্য
 অহঙ্কারের উদ্দীপক । আমি যদি অদ্য একটি উত্তম শয্যা
 শয়ন করি, তাহা হইলে, কল্য আর যুগ চর্য্যে শয়ন করিতে ইচ্ছা
 হইবেক না ; অদ্য যদি স্বর্ণ পাত্রে জল পান করি, তাহা হইলে,
 কল্য অলাবু পাত্রে জল পান করিতে ঘৃণা বোধ হইবে ।
 আপনি যদি আমাকে এক গাছি মুক্তার মালা পারিতোষিক স্বরূপ
 প্রদান করিয়া যান, তাহা হইলে, তাহাতে কেবল আমার
 অহঙ্কার হইবে । বহু কষ্টে অহঙ্কার ও ঈর্ষার হস্ত হইতে
 নিস্তার লাভ করিয়াছি, এক একটি বিলাস পরিত্যাগ করিতে
 এক একটি বৎসর গিয়াছে । গুরু গৃহে বহু কাল যোগ শিক্কা

করিয়াছিলাম; কিন্তু পুস্তক পাঠে কিছু মাত্র ফল দর্শে নাই। ভাহার পর এই বিপিন মধ্যে যোগামন করিয়া ইন্দ্রিয়গণের যথোচিত নিগ্রহ করিতে আরম্ভ করায়, তাহারা একে একে আমার বশে আসিয়াছে। আমার এক্ষণে কেবল ভগুবানের চরণ ব্যতিরেকে আর সমস্ত পদার্থই অকিঞ্চিৎকর বলিয়া বোধ হয়। আপনি যে মুক্তার মালার প্রলোভন দেখাইতেছেন, আমি তাহা শুদ্ধ হরীতকী অপেক্ষাও হেয় জ্ঞান করি; কেননা, আমার শুদ্ধ হরীতকীর যে শক্তি আছে, আপনার বহু মূল্যের মুক্তার মালার সে শক্তি নাই। হরীতকী তৎক্ষণে জুই এক দিবস প্রাণ ধারণ হইতে পারে, আপনার মুক্তার মালা গ্রহণ করিলে, অদ্যই তৎক্ষণে আমার প্রাণ বিনষ্ট করিয়া যাইবে। রাজন, ঐশ্বর্য্যই সমস্ত অনিষ্টের মূল; এই জন্মই জ্ঞানবান্ লোকেরা ঐশ্বর্য্যের দাস হইতে চাহেন না। সংসারে কেহ কাহারও শত্রু নহে, কেবল এক ঐশ্বর্য্যই ধনাঢ্য লোকের শত্রু সংগ্রহ করিয়া দেয়। আপনি যদি কোপীন ধারণ করিয়া অরণ্য মধ্যে পরিভ্রমণ করেন, তাহা হইলে, কেহই আপনার প্রতি তীক্ষ্ণ দৃষ্টিক্ষেপ করিবে না, কিন্তু এই রাজপরিচ্ছদ ধারণ করিয়া আপনি তৎক্ষণে পরিপূরিভ বিপিনে পরিভ্রমণ করিলে, অচিরে প্রাণে বিনষ্ট হইবেনই হইবেন। ধনে কত দূর শান্তি ভঙ্গ হয় ও ধনের অভাবে কি রূপ দিব্য জ্ঞান হয়, তাহার একটি আখ্যানিকা বলিতেছি, শ্রবণ করুন;—

এক ব্যক্তি বহু কষ্টে শত মুদ্রা সঞ্চয় করিয়াছিল। মুদ্রা-গুলি গণনা করিবার সময় ক্ষণ কালের জন্য তাহার মন প্রফুল্ল হইয়া উঠিল, এবং মনে করিল, আমি এক শত টাকা সংগ্রহ

বিবেক ও বৈরাগ্য

করিয়াই এত দূর আনন্দ অনুভব করিতেছি, কিন্তু ~~যাযাবির~~ সহস্র মুদ্রা আছে, তাহার কত দূর আনন্দ ভোগ করে, ~~আমি~~ এক বার দেখিতে হইবে। এই রূপ চিন্তা করিতে করিতে সেই ব্যক্তির মনে সহসা ভয় আসিয়া উপস্থিত হইল। ভাবিল, আমি সহস্র মুদ্রার চিন্তা করিতেছি কি, এই শত মুদ্রাই রক্ষা করা আমার পক্ষে ভার হইয়া উঠিবে; কেননা, আমার লোক বল নাই, শরীরও তাদৃশ বলিষ্ঠ নহে। যদি তৎকরেরা ইহার বিম্ভু বিসর্গ জানিতে পারে, তাহা হইলে, আমার এই বহু কষ্টের সঞ্চিত ধন বল পূর্বক কাড়িয়া লইয়া যাইবে। এই টাকাগুলি এক জন বিশ্বস্ত লোকের বাটিতে রাখিয়া আসি; কারণ এই ভগ্ন কুটীরে এত টাকা রাখা কোন ক্রমেই যুক্তি সিদ্ধ নহে। এই রূপ ভাবিয়া সে তৎক্ষণাৎ পল্লীস্থ কোন বিশ্বস্ত লোকের বাটিতে টাকাগুলি রাখিয়া আসিল; কিন্তু কুটীরে পুনঃ প্রবেশ করিবা মাত্রই তাহার মনঃ প্রাণ ব্যাকুল হইয়া উঠিল। ভাবিল, কি করিলাম! আপনার বুদ্ধির দোষে সর্বনাশ করিলাম! এত কষ্টের টাকা এক জনকে হাতে তুলিয়া দিয়া আসিলাম! যদি সে বলে, আমার কাছে রাখিয়া যাও নাই, তাহা হইলে, আমি তাহার কি করিতে পারিব? এই রূপ প্রতি-কূল চিন্তায় মগ্ন হইয়া সে ব্যক্তি সমস্ত রজনীর মধ্যে এক বারও নিদ্রা যাইতে পারিল না। প্রভাতে উঠিয়া সেই প্রতিবেশীর নিকটে গিয়া কহিল, মহাশয়, আমার টাকা গুলি দিন; এই টাকায় আমি এক খণ্ড ভূমি ক্রয় করিব। প্রতিবেশী তৎক্ষণাৎ টাকাগুলি আনিয়া দিলেন। উহা পুনঃ প্রাপ্ত হইবা মাত্রই সে একেবারে আত্মদে উন্মত্ত হইয়া উঠিল; কিন্তু সে

আজ্ঞাদিও ক্ষণ কালের মধ্যে তিরোহিত হইয়া গেল। পুনর্বার ভয় আসিয়া উপস্থিত হওয়াতে ভাবিল, প্রতিবেশীর নিকট টাকাগুলি রাখা নিতান্তই নির্যোধের কার্য্য হইয়াছিল, আমার এতগুলি টাকা হইয়াছে, এ কথা ভ কেহই জানিত না ; প্রতিবেশী কি পাঁচ জনের নিকট গল্প করিতে ক্ষান্ত হইবে ? এখন যদি নগদ টাকা না রাখিয়া এই টাকায় ধান্য ক্রয় করিয়া রাখি, তাহা হইলে, ইচ্ছা চোরে লইয়া যাইতে পারিবে না।

পর দিন সে শত মুদ্রার ধান্য ক্রয় করিয়া একটি মরাই বাঁধিয়া রাখিল ; কিন্তু ধান্য ক্রয় অবধি পূর্ক্যাপেক্ষা তাহার মন আরও চঞ্চল হইয়া উঠিল, প্রায় সমস্ত রাত্রি এক গাছি যষ্টি হস্তে করিয়া কুটীরের বহির্ভাগে বসিয়া থাকিত। প্রতিবেশীরা গৃহে অগ্নি জ্বালিলেই সে অকারণ তাহাদিগের সহিত বাধিতত্তা উপস্থিত করিত। প্রতিক্ষণ সে ভাবিত, যেন পল্লীতে আগুন লাগিয়াছে। এই রূপে হৃদয় মধ্যে অগ্নিভয় উপস্থিত হওয়ায়, সে মনে মনে ভাবিল, ধান্যের মরাই আর রাখিব না ; কোন্ দিন একেবারে হৃত সর্বস্ব হইয়া যাইব ? ধান্য বিক্রয় করিয়া গুটি কতক দুগ্ধবতী গাভী ক্রয় করি ; তাহা হইলে, টাকাকে টাকা বজায় থাকিবে, এবং দুগ্ধ বিক্রয় করিয়া আরও দশ টাকা লাভের সম্ভাবনা হইবে। এই ভাবিয়া সে ধান্য বিক্রয় করিয়া পর দিনেই চারিটি দুগ্ধবতী গাভী ক্রয় করিল। গাভী কয়েকটি গৃহে আনিয়া ভাবিল, যদি ইহার একটি মরিয়া যায়, তাহা হইলেই সর্বনাশ !—না, গাভী ক্রয় করিয়া ভাল কাজ করিলাম না। এমন কোন দ্রব্য ক্রয় করিয়া রাখি, যাহার উপর চোর্য্য ভয়, অগ্নিভয় প্রভৃতি কোন ভয়েরই সম্ভাবনা নাই। পর দিন সে

চারিটি গাভী বিক্রয় করিয়া ফেলিল, ও টাকাগুলি পুনরায় একটি পোঁটলা বাঁধিয়া ধাত্তোর জালার ভিতর লুকাইয়া রাখিল, এবং প্রতি রজনীতে উঠিয়া দুই চারি বার জালার গায়ে হাত বুলাইতে লাগিল। যে দিন অবধি তাহার হস্তে এক শত টাকা আসিয়াছে, সেই দিন হইতে সে আর কুটীর পরিত্যাগ করিয়া স্নান করিতেও যায় না। তাহার মূতন ভাব দেখিয়া প্রতিবেশীরা আশ্চর্য্য হইল। এক দিন কয়েক জন লোক একত্র হইয়া বলাবলি করিল যে, নিধিরাম আর কুটীরের বাহির হয় না কেন? পূর্বে ত লোকের বাড়ীতে ভাত চাহিয়া খাইত। গৃহস্থদিগের গৃহে কোন সমারোহের কাজ কর্ম্ম হইলে, নিধিরাম পরম আত্মাদের সহিত তাহাতে আসিয়া যোগ দিত। পূর্বে সন্ধ্যার সময় কুটীরের দ্বারে বসিয়া মনের আনন্দে রামপ্রসাদী গীত গাহিত; কিন্তু এক্ষণে কেহ ডাকিলেও কথা কয় না; সর্বদা চিন্তাযুক্ত হইয়া কুটীরের দ্বারে বসিয়া থাকে। সদানন্দ নিধিরাম এই রূপ নিরানন্দ হইয়াছে কেন, ইহার কারণ অনুসন্ধান করিতেই হইবে।

ক্রমে নিধিরামের টাকার কথা প্রতিবেশীরা সকলেই জানিতে পারিল। কয়েক জন চতুর প্রতিবেশী এক দিন পরামর্শ করিল যে, অদ্য রজনীতে আমরা নিধিরামের টাকাগুলি হরণ করিয়া লইয়া আসিব। দেখি, নিধিরাম টাকার শোকে কি করে? যদি টাকার শোকে সে মর মর হইয়া পড়ে, তাহা হইলে, সেই সময় উহাকে টাকাগুলি প্রত্যর্পণ করিয়া উহার প্রাণ রক্ষা করিব। দিনের বেলায় এই পরামর্শ স্থির হইয়া রহিল, রজনীতে কয়েক জন বলবান্ যুবা বল পূর্ব্বক নিধি-

রামের টাকা কাড়িয়া লইয়া প্রস্থান করিল। নিধিরাম টাকার শোকে সমস্ত রজনী যতবৎ কুটীরে পড়িয়া রহিল। প্রভাত্রে উঠিয়া ভাবিল, আর এখানে থাকিয়া কি করিব ? যে দেশে টাকা আছে, সেই দেশে গমন করি। যদি পুনরায় টাকা করিতে পারি, তাহা হইলেই, জন্ম ভূমিতে আগিব ; নতুবা জন্মের মত নিধিরাম বাটী পরিত্যাগ করিল। এই ভাবিয়া কাঁথা, লাঠী ও জলপাত্র লইয়া নিধিরাম কুটীরের বাহির হইল, এবং কোন নগরে যাইবার অভিপ্রায়ে ক্রমাগত চলিতে লাগিল। দুই ক্রোশ পথ যাইতে না যাইতেই তাহার এক জন প্রতিবেশী যুবা দম্য বেশে আসিয়া নিধিরামের কাঁথা, লাঠী ও জলপাত্র কাড়িয়া লইল। এই ঘটনার পর নিধিরাম কিয়ৎ কণ এক বৃক্ষতলে স্তব্ধ হইয়া বসিয়া রহিল। সেই সময়ে হঠাৎ আর এক জন লোক আসিয়া নিধিরামের পরিধেয় বস্ত্র খানি কাড়িয়া লইল। নিধিরাম উলঙ্গ হইয়া সেই বৃক্ষতলে বসিয়া ভাবিতে লাগিল, উলঙ্গ হইয়া কি প্রকারে লোকালয়ে যাইব ? এক্ষণে লজ্জা আবরণের উপায় কি ? এই কপে ভাবিয়া চিন্তিয়া সম্মুখস্থ এক কদলী কাননে প্রবিষ্ট হইয়া শুষ্ক এক খানি কলার খোলা কলার ছোটায় বাঁধিয়া নিধিরাম শুভ কণে লজ্জা আবরণ করিল। কোপীন পরিধান করিয়া নিধিরাম কদলী কাননের বহির্ভাগে আসিয়া মনে মনে ভাবিল, আর আমাকে দম্য কর্তৃক আক্রান্ত হইতে হইবে না। এ কি ! আমার মন যে একেবারে ভয় শূন্য হইয়াছে। কি জন্ত একপ হইল ? ওহো ! বুঝিয়াছি, পূর্বেও ভয় ছিল না, এবং এক্ষণেও নাই। মধ্য কিছু দিন পাছে আমার টাকাগুলি কেহ লয়, এই ভয়ে ভীত হইয়াছিলাম।

একণে টাকার সহিত, অবশেষে জলপাত্র, কস্থা ও যষ্টির সহিত এবং সর্বশেষে আমার পরিধেয় বস্ত্র খানির সহিত আমার সমস্ত ভয় দূরীভূত হইয়া গেল। তবে কি এক অর্থই সমস্ত ভয়ের কারণ ? আজ ত আমার মন একেবারে শান্ত হইয়াছে, আমি অকুতোভয়ে এই জন শূন্য স্থানে উপবিষ্ট রহিয়াছি; কই আমি ত সাবধান হইতেছি না ? একণে ঘিলক্ষণ বৃষ্টিতে পারি-
জাম যে, কেবল ধনের জন্যই সংসারে লোকের শাস্তি থাকে না। ধনের জন্যই রাজা প্রজাপীড়ন করিয়া থাকেন, ধনের জন্যই রাজায় রাজায় যুদ্ধ বিগ্রহ উপস্থিত হয়, ধনের জন্যই সহোদরে সহোদরে বিচ্ছেদ ঘটয়া থাকে, ধনের জন্যই দম্ভ্যরা নরহত্যা পাপে লিপ্ত হয়, এবং এক ধনের জন্যই নিধিরাম শর্মা ভগ্ন কুটীরে আবদ্ধ হইয়াছিলেন। আর আমি ধন চাহি না, এখন এই কোপীন পরিয়া সেই নিত্য ধনের অনুসন্ধান করিব। তবে এই মাত্র আশ্রয় যে, আমি ইচ্ছা পূর্বক সত্য পথের পথিক হইতে পারি নাই দম্ভ্যরাই বল পূর্বক আমাকে কোপীন পরিধান করাই-
য়াছে। আমার স্ত্রী ছিল না, পুত্র কন্যা ছিল না, উন্নত আটা-
লিকা ছিল না, কেবল শত মুদ্রা ও ছিন্ন কস্থার মায়ায় ভগ্ন কুটীরে পড়িয়া থাকিতাম। যাঁহারা অভুল বিভব অকিঞ্চিৎকর পদার্থের
ত্যাগ জ্ঞান করিয়া স্বেচ্ছায় কোপীন ধারণ করেন, তাঁহারাই সাধু। আমি যদি কিছু কাল তাঁহাদিগের দাসত্ব করিতে পারি, তবেই কৃতার্থ হইব। দম্ভ্যগণ আমার শত্রু নহে, তাঁহারা ষথার্থই মিত্রের কার্য্য করিয়াছে। একণে আমার কাচ ও কাঞ্চন সমান জ্ঞান হইতেছে, আর আমার মরিতেও ভয় নাই, আমি আর রাজাকেও ভয় করি না। ওঃ ! গৃহবাস কি ভয়ানক কষ্টকর !

হে নরপতে, কেবল এক ঐশ্বর্য্য ভোগ লালসাতেই মানবগণ সংসারিক দুর্দশা ভোগ করে। কেবল মনুষ্য কেন, ঐশ্বর্য্য ভোগী হইয়া দেবরাজ ইন্দ্রও সময়ে সময়ে দুঃসহ দুর্দশা ভোগ করিয়াছিলেন ; কিন্তু ঐশ্বর্য্য ভোগী পরম যোগী মহাদেবের প্রীতি কেহই কোন কালে কটাক্ষ পাত করে নাই। পুরন্দর কত বার শত্রু কর্তৃক স্বর্গচ্যুত হইয়াছেন ; কিন্তু মহাদেবকে কেহ কখন কৈলাসচ্যুত করিবার চেষ্টা করে নাই। রাজন্, আমি যে রূপ নিশ্চিন্ত হইয়া পরাৎপরের আরাধনা করিতেছি ; বোধ হয়, আপনি একপ নিশ্চিন্ত ভাবে রাজ্য ভোগ করিতে পারিতেছেন না। আপনি অর্থের দাস, কিন্তু অর্থ আপনার দাস নহে। দিগ্বিজয় করিয়া নানা স্থানের ধন রত্ন আনিয়া রাজকোষে সঞ্চয় করিয়াছেন, এবং সেই গুলি ‘আমার’ বলিয়া আত্মগ্লাঘা করিতেছেন ; কিন্তু ভাবিয়া দেখুন, এই সংসারে কে কাহার ? ধন রত্ন এবং রাজ্য খণ্ড আপনার হওয়া দূরে থাকুক, আপনার এই দেহও আপনার নহে। যেমন ধন জন পরিপূর্ণ আপনার রাজ্য পাছে শত্রু কর্তৃক অপহৃত হয়, এই আশঙ্কায় শশব্যস্ত হইয়া আছেন, সেই রূপ নিশ্চয় স্থির করিয়া রাখুন, আপনার এই সুন্দর দেহের সারাংশ এক দিন প্রবল শত্রু কর্তৃক অপহৃত হইবে। তাহার পর আপনার পুত্র কলত্রাদি অনায়াসে এই সুন্দর শরীর অনলে ভস্মীভূত করিয়া ফেলিবে। অদ্য যে রত্নাদি আপনার হস্তে আসিয়াছে, তৎসমুদায় দৃষ্টি করিয়া আহ্লাদে উন্মত্ত হইতেছেন ; কিন্তু কল্য হয় ত আপনাকে শোক সাগরে নিমগ্ন করিয়া সেই সকল রত্নাদি অন্তের হস্তগত হইতে পারে। এই জন্যই বলিতেছি যে, কাচ ও কাঞ্চনে সমান জ্ঞান

না করিলে, কোন কালেই মনের শান্তি হয় না। আমাদের চক্ষে এক্ষণে মুক্তার মালা ও রুদ্রাক্ষ মালা সমান বলিয়া বোধ হইয়াছে। আমাদিগকে আর স্ত্রীপুঞ্জের দাসত্ব করিতে হয় না, ধন রত্ন নাই বলিয়া শত্রু ভয়ে ভীত হইতে হয় না, কোন প্রকার অধিকার রাখি না বলিয়া ভূস্বামীর পীড়ন সহ্য করিতে হয় না ; এই জগত্ই শান্তি দেবী অমুকুণ আমাদের হৃদয় মন্দিরে বিরাজিত হইতেছেন। অতএব ঐশ্বর্যের লালসা একেবারে পরিত্যাগ করিতে না পারিলে, কোন ক্রমেই আপনার মনের শান্তি হইবে না।

ভাপসের মুখে এই সকল তত্ত্বজ্ঞানের কথা শুনিয়া রাজার মনে কিঞ্চিৎ জ্ঞানের উদয় হইল। তিনি সবিনয়ে বলিলেন, হে ভাপস, আমি এক বিস্তীর্ণ রাজ্য খণ্ড পাইয়াছি, ধন রত্নেরও আমার অপ্রতুল নাই ; তথাচ আমার ভোগ লালসা নিবৃত্ত হইতেছে না কেন? ভাপস কহিলেন, রাজন্, অগ্নিতে সৰ্ব্ব কণ স্ফুটাহতি দিলে, কোন্ কালে অগ্নি নির্ঝাঁগ হইয়া থাকে? ভোগ লালসাও প্রবলিত হৃতাশনের আয়, তাহাতে যত আহতি দিবেন, ততই প্রবল হইয়া উঠিবে ; কোন কালেই তাহার নিবৃত্তি হইবে না। আপনি ত রাজ্যভোগে লিপ্ত হইয়া আছেন, যখন জ্ঞানগুরু শুকদেব গোস্বামী এক খানি ছিন্ন কস্মার মায়া পরিত্যাগ করিতে পারেন নাই, তখন আপনি যে এই অতুল ঐশ্বর্য সহজে পরিত্যাগ করিতে পারিবেন না, ইহা কিছু আশ্চর্য্যের বিষয় নহে। রাজা কহিলেন, হে মহাভাগ, সে কথা আমার নিকট বিস্তারে বর্ণন করুন।

তাপস কহিলেন, নরনাথ, বেদব্যাস নন্দন শুকদেব পিতার নিকট নানা শাস্ত্র অধ্যয়ন করিয়া অবশেষে যোগ শিক্ষা করিবার অভিলাষে ব্যতিব্যস্ত হইলেন। পুত্রের অভিলাষ জ্ঞাত হইয়া মহর্ষি বেদব্যাস কহিলেন, বৎস, তোমার যদি নিতান্তই যোগ শিখিবার অভিলাষ হইয়া থাকে, তাহা হইলে, মহা প্রাজ্ঞ জনক ঋষির নিকট গমন কর। পিতার উপদেশানুসারে শুকদেব জনক ঋষির ভবনে উপস্থিত হইলেন। জনক ঋষি শুকদেবকে নিতান্ত বালক দেখিয়া সহাস্য আস্ত্র জিজ্ঞাসা করিলেন, ব্রহ্মন্, তুমি কি অভিপ্রায়ে আমার নিকট আগমন করিয়াছ? শুকদেব কহিলেন, কিঞ্চিৎ যোগ শিক্ষা করিবার অভিপ্রায়ে আগা হইয়াছে। ঋষিরাজ কহিলেন, উত্তম বল। এই রূপে শুকদেব রাজর্ষির নিকট যোগাভ্যাসে নিযুক্ত হইলেন।

এক দিন গুরু ও শিষ্য একাসনে সমাসীন হইয়া যোগ শাস্ত্রের আলোচনা করিতেছেন, এমন সময়ে অল্প দূরে অগ্নি জলিয়া উঠিল। বৈশ্বানর ভীষণ মূর্তি ধারণ করিয়া ক্রমে ক্রমে রাজর্ষি জনকের নানাবিধ দ্রব্য সামগ্রী ভস্মীভূত করিয়া অগ্নসর হইতে লাগিল। অগ্নি দেখিয়া শুকদেব কহিলেন, গুরো, ভূত্যাগণকে অনল নির্কীর্ণ করিতে আদেশ করুন; নতুবা এই অনল দ্বারা সমুহ অনিষ্ট উৎপাদিত হইবে। ঋষিরাজ সে কথাই কিছুই উত্তর দিলেন না; পূর্বের ন্যায় স্থির ভাবে যোগ শাস্ত্রের কথা কহিতে লাগিলেন। শুকদেব দেখিলেন, অনল ক্রমে ক্রমে নিকটবর্তী হইতেছে, তখন তিনি ভয় প্রযুক্ত আপনার কহা খানি দূরে নিক্ষেপ করিলেন। জনক ঋষি তদ্রূপে কহিলেন, ঋষিকুমার, এ কি করিলে? সামান্য কহার মমতা

পরিভাগ করিতে পারিলে না ? তবে তুমি কি প্রকারে যোগাভ্যাস করিবে ? সৰ্ব্ব ভ্যাগী হইতে না পারিলে, যোগশাস্ত্রের অধিকারী হইতে পারা যায় না । আমি যদিও রাজত্ব করিতেছি, কিন্তু কিছুতেই লিপ্ত নহি । শুকদেব গুরুর কথায় লজ্জিত হইয়া কস্থা খানি অগ্নিতে নিক্ষেপ করিলেন । ইহাতে জনক ঋষি হাস্য করিয়া কহিলেন, বৎস, এ আবার কি করিলে ? তুমি এখনও চিত্ত শুদ্ধি করিতে পার নাই, এখনও তোমার স্তুতি তিরস্কার সমান জ্ঞান হয় নাই ; আমার এই সামান্য তিরস্কার তোমার অসহ্য হইয়াছে । গুরুর কথা শুনিয়া শুকদেব বিশ্বয় সাগরে নিমগ্ন হইয়া কহিলেন, শুকদেব, আপনার কথার ভাবার্থ আমি কিছুই বুঝিতে পারিতেছি না, এই অজ্ঞ জনকে জ্ঞান দান করুন । এক্ষণে বুঝিতে পারিতেছি, যোগশাস্ত্র শিক্ষা করা যার পর নাই সূকঠিন । জনক ঋষি কহিলেন, অদ্য এই খানেই বিশ্রাম । কল্য হইতে আমি তোমাকে সাধ্যানুসারে যোগ শিক্ষা দিব ।

পর দিন শুকদেব যথা সময়ে গুরুর নিকট উপস্থিত হইয়া দেখিলেন, তিনি এক সৰ্ব্বাঙ্গ সুন্দরী ষোড়শী যুবতীকে গাঢ় আলিঙ্গন করিয়া রহিয়াছেন । গুরুর কদাচার দেখিয়া তিনি কিঞ্চিৎ বিমর্ষ হইয়া অবনত মস্তকে রহিলেন । ঋষিরাঙ্গ শিষ্যের মনোগত ভাব বুঝিয়া গম্ভীর স্বরে নিম্ন লিখিত কবিতাটি আবৃত্তি করিলেন,—

“গৃহাতি দষ্টৈঃ স্তম্ভমাখুমোতুঃ

পুণ্ড্রেষু কাষ্ঠেষু নিবসন্তি ভৃগ্বাঃ ।

আলিঙ্গিতে স্ত্রীঃ স্নাতং মনুষ্যঃ

প্রবৃতি রেষা মনসঃ প্রধানা ॥ ৩

হে শিষ্য, মার্জারগণ যে স্ত্রীক দন্তে ইন্দুর চর্ষণ করিয়া থাকে, উদ্ভারা ধারণ ও বহন করিবার সময় স্বীয় শাবকের গাত্রে দন্ত বিদ্ধ করে না। ভ্রমরগণ প্রস্ফুটিত স্নকোমল পুষ্পে বসিয়া মধু পান করে, তাহাতে পুষ্পের কিছু মাত্র অনিষ্ট হয় না ; কিন্তু তাহারাই কঠিন গুল্ম কাষ্ঠে বসিয়া শত শত হিঙ্গ করিয়া থাকে। মানবগণ যে প্রবৃত্তির অধীন হইয়া প্রেমময়ী পত্নীকে হৃদয়ে ধারণ করে, সম্পূর্ণ বিভিন্ন প্রবৃতি বশে সেই হৃদয়েই বাৎসল্য রসের আধার স্নেহময়ী দুহিতাকে ধারণ করিয়া পুলকিত হয় ; অতএব মনুষ্যের মনে প্রবৃত্তিই প্রধান। আমি যখন সেই প্রবৃত্তির নিবৃত্তি করিয়াছি, তখন এই ষোড়শীকে হৃদয়ে ধারণ করিতে কিছু মাত্র কুণ্ঠিত নহি। আর একটি কথা বলিতেছি, মনো-যোগ পূর্বক শ্রবণ কর, রক্তজবার নিকট একটি মুক্তা রাখিলে, মুক্তাটি রক্তিমাতাময় হইয়া থাকে ; কিন্তু মুক্তার প্রভার রক্তজবা কখন শ্বেতবর্ণ হয় না। ইহা দ্বারা বুঝিয়া লইতে হইবে যে, নিকৃষ্টের দোষের ভাগ উৎকৃষ্টে বর্তে ; কিন্তু উৎকৃষ্টের গুণ নিকৃষ্টে বর্তে না। দেখ, আমি এই মূর্তিমান্ কামাগ্নি তুল্য কামিনীকে হৃদয়ে ধারণ করিয়াছি, তাহাতে আমার মনের কিছু মাত্র ভাবান্তর হইতেছে না, প্রত্যুত স্নেহরসে হৃদয় স্নিগ্ধ হইয়া আসিতেছে। হে শিষ্য, মূর্তিকা কিম্বা দাক নির্ম্মিত, অথবা চিত্রিত নারীমূর্তি দেখিয়া অনেক সৈর্য্যাহীন পুরুষের চিত্ত বিকার ঘটে ; কিন্তু প্রকৃত রমণী হৃদয়ে ধারণ করিয়াও সাধুজনেরা মনের শান্তি রক্ষা করিতে পারেন। আমার হৃদয়স্থিতা রমণীকে

কাষ্ঠময়ী প্রতিমা বলিয়া জানিও, এবং আমার সর্কাদে যে মণি মুক্তার আভরণ রহিয়াছে, এ সমুদায় আমার পক্ষে শুষ্ক হরীতকী ফল বলিয়া জানিও । আমি মৃতও নহি, জীবিতও নহি, আমি গৃহীও নহি, আমি সন্ন্যাসীও নহি ; আমার শঙ্কা নাই, জন্ম নাই, জাতি নাই, শত্রু নাই, শিষ্য নাই, বন্ধু নাই, বান্ধব নাই, পিতা মাতা প্রভৃতি সংসার বন্ধন কেহই নাই । আমি অসংলিপ্ত ভাবে ইহ লোকে কাল যাপন করিতেছি ।

হে শিষ্য, অগ্রে অহং তত্ত্ব দূর কর, তাহার পর অনায়াসেই যোগ শাস্ত্রের মথার্থ মৰ্ম্ম বুঝিতে পারিবে । আমার বলিয়া কিছুই জ্ঞান করিও না ; তোমার ছিল, এক্ষণে আমার হইল, ইহাও ভাবিও না । তুমিও তোমার নহ, এবং আমিও আমার নহি, কেবল সেই চৈতন্য স্বরূপ এক ঈশ্বরই সমস্ত । আরও বিবেচনা করিয়া দেখ, অনায়াস লভ্য এক খানি প্রস্তর আনিয়া ভাস্করেরা একটি কল্পিত দেব মূর্ত্তি গঠন করিল । কোন ধনাঢ্য লোকে সেই মূর্ত্তি মূল্য দিয়া ক্রয় করিয়া আনিল, ও একটি উৎকৃষ্ট মন্দির প্রস্তুত করিয়া সেই মূর্ত্তি তাহার অভ্যন্তরে স্থাপন পূর্ব্বক আপনাকে কৃতার্থ বোধ করিল । ভাবিয়া দেখ, কল্পিত মূর্ত্তি যদি মূর্ত্তিদাতা হইতে পারিত, তাহা হইলে, কল্পনা বশে দরিদ্র গনুষ্যে যে রাজ্য ভোগ করে, তাহাও সত্য বলিয়া বিবেচিত হওয়া উচিত । পূর্ব্বে যে প্রস্তর খণ্ডের এক কপর্দকও মূল্য ছিল না, এক্ষণে সেই প্রস্তরে দেবমূর্ত্তি গঠিত হওয়ায়, উহা মূল্যবান হইয়া উঠিল । আবার সেই মূর্ত্তি যখন মন্দিরে প্রতিষ্ঠিত হয়, তখন তাহাই নরের ধর্ম্ম অর্থ কাম মোক্ষ চতুর্কর্গ ফলদাতা হইল । সেই রূপ যখন মুক্তা সমুদ্র গর্ভে ও হীরক মেদিনী গর্ভে ছিল, তখন তাহার এক কপর্দকও

মূল্য ছিল না, এক্ষণে জ্ঞানি লোকেরা এক বদরী ফলের বিনিময়েও তাহা ক্রয় করিতে বাসনা করেন না; কিন্তু অজ্ঞানান্ধ ধনিগণ সেই সকল অকিঞ্চিৎকর পদার্থ বহু মূল্যে ক্রয় করিয়া আপনাদিগের অহঙ্কার বৃদ্ধি করে। আমার বিবেচনায় হীরক, মুক্তা ও মাণিক্য এবং স্বর্ণ রৌপ্যাদি মনুষ্যকে এক অহঙ্কার ভিন্ন আর কিছুই প্রদান করিতে সক্ষম নহে। অহঙ্কার যেমন আমাদের শত্রু বৃদ্ধি করে, সে রূপ আর কিছুতেই করে না; অতএব ঐ সকল দ্রব্য উচ্চ মূল্যে ক্রয় করিয়া কেবল পদে পদে আমাদের শত্রুর আশঙ্কা করিতে হয়। জ্ঞানি জনেরা সেই জন্তই তৎ সমুদায় পরিত্যাগ পূর্বক অমূল্য জ্ঞান রত্ন হৃদয় ভাণ্ডারে রাখিয়া পরমানন্দে শান্তি ভোগ করিয়া থাকেন।

এই সকল জ্ঞানগর্ভ কথা শুনিয়া শুকদেব কহিলেন, আমার যথেষ্ট হইয়াছে, আর আপনাকে অধিক ক্লেশ স্বীকার করিতে হইবে না। ইহা বলিয়া শুকদেব আপন পরিধেয় বন্ধন পরিত্যাগ করিয়া দিগম্বর বেশে জনকপুর হইতে বহির্গত হইলেন।

যে ভূপাল পূর্ব কথিত তাপসের নিকট তত্ত্ব কথা শুনিতে ছিলেন, তাঁহার মনোমধ্যে কাঁচ ও হীরক খণ্ডকে সমান, এবং কণ্ঠভূষণ মুক্তামালাকে অতি অকিঞ্চিৎকর পদার্থ বোধ হওয়াতে, তিনি কহিয়া উঠিলেন, কি ভয়ানক ভ্রম! এই সকল অকিঞ্চিৎকর পদার্থের জন্ত আমরা অহঙ্কার করি? এই সকল পদার্থের প্রতি আমাদের এত দূর যত্ন? এই সকল পদার্থ অপচয় হইলে, আমাদের মনঃপীড়ার অবধি থাকে না? ইহাদিগেরই জন্ত আমরা শশব্যস্ত? এই আমার কণ্ঠভূষণ মুক্তামালা দূরে নিক্ষেপ করিলাম। এই সকল পদার্থ ই এখন আমাদের শত্রু অপে-

ক্ষাও শত্রু, ও শাস্তি ভঞ্জে প্রধানতম কারণ, তখন আর ইহাতে কিছু মাত্র প্রয়োজন নাই। এই সকল কথার পর রাজা রাজর্ষি হইয়া তাপসের সহিত কুটীরে বাস করিতে লাগিলেন।

• পাঠকগণ, যেমন সর্বস্ব অপহৃত হইয়া নিধিরামের দিব্য জ্ঞান উদয় হওয়াতে, তাহার শাস্তি লাভ হইয়াছিল, মনে আর কিছু মাত্র ভয় ছিল না, সেই রূপ তাপসের যোগমার্গের কথা শুনিয়া পূর্ব কথিত রাজার মুক্তাদিকে বদরী ফলবৎ জ্ঞান হইল। তিনি সংসারের মায়াজাল ছেদন করিয়া প্রকৃত ঈশ্বরপ্রেমিক হইয়া উঠিলেন, এবং অমূল্য শাস্তি লাভ করিলেন; কেননা, যিনি ঈশ্বরকে সর্বতোভাবে জ্ঞাত হইয়াছেন, তিনি তাঁহাকেই পরম রত্ন জ্ঞানে তদীয় প্রেমে মুগ্ধ হইয়া থাকেন, এবং এই সকল ধন রত্নকে অতি অকিঞ্চিৎকর পদার্থ বোধ করেন। উক্ত অসার বস্তু লাভে বা ক্ষয়ে তিনি কখনই আকুলিত হন না; সুতরাং তাঁহার মনে অনুক্ষণ শাস্তি দেবী বিরাজ করিতে থাকেন। অতএব যদি ইহ সংসারে শাস্তি ভোগের ইচ্ছা থাকে, তাহা হইলে, এক খণ্ড হীরক ও এক খণ্ড কাচকে সমান জ্ঞান করা উচিত; অকিঞ্চিৎকর পদার্থ লাভে বা ক্ষয়ে কদাচ আকুল হওয়া কর্তব্য নহে।

মেদিনী মণ্ডলে থাকিয়া কালের উচিত কার্য্য কর, কিন্তু কিছুতেই লিপ্ত হইও না। ভ্রমরগণ প্রফুল্ল শতদলের মধু পান করিয়াও বেড়ায়, আবার শুষ্ক কাষ্ঠ কর্তন করিতেও ক্রটি করে না; কিন্তু পিপীলিকা ও মক্ষিকাগণ মিষ্ট রসের আশ্বাদ পাইয়া প্রাণ থাকিতেও আর সে স্থান পরিত্যাগ করিতে চাহে

মা। এই জন্মই বলিতেছি, কালের উচিত কার্য্য কর, কিন্তু কিছুতেই অস্তরের সহিত লিপ্ত হইও না।

কৃষ্ণের জীবনী পাঠে জ্ঞাত হওয়া যায় যে, তিনি কালের উচিত কার্য্য করিতে কোন সময়ে ত্রুটি করিডেন না। কৈশোরে ব্রজাঙ্গনাদিগের প্রেমে মুগ্ধ হইয়া কৃষ্ণ যে ভাবে দিন যামিনী নারী মণ্ডলোতে কাল হরণ করিডেন, তদ্বারা তাঁহাকে নিভাস্ত্র অপদার্থ বলিয়া কাহার না বোধ হইবে? তাহার পর পিতৃ-শত্রু কংসরাজকে নিপাত করিবার জন্ম মথুরা যাত্রা করিলেন, তখন ব্রজাঙ্গনাদিগের প্রেম একেবারে যমুনার জলে ভাসিয়া দিয়া বীর বেশে মথুরা রাজধানীতে উপস্থিত হইলেন। সেখানে কংসকে নিপাত, পিতা মাতাকে কারামুক্ত ও মাতামহ উগ্রসেনকে পুনরায় রাজ্যে স্থাপন করিয়া বিদ্যার্জ্জনে অমুরাগী হইয়া উঠিলেন। কিছু কালের মধ্যে নানা বিদ্যার ব্যুৎপত্তি লাভ করিয়া প্রবল শত্রু জরাসন্ধের সহিত দীর্ঘ কাল সংগ্রামে লিপ্ত থাকেন। সে সময়েও তিনি মথুরায় আসিয়া কংস কিঙ্করী কুজ্জার প্রণয় পাশে আবদ্ধ হইয়াছিলেন। তৎপরে জরাসন্ধ পুনঃ পুনঃ মথুরা আক্রমণ আরম্ভ করাতে শ্রীকৃষ্ণ মাতামহ উগ্রসেন ও যাদবগণকে লইয়া সমুদ্রতীরস্থ একটি নিরাপদ স্থান মনোনিীত করেন, এবং তাহার দ্বারকা নগর নাম দিয়া রাজ্য উগ্রসেনের রাজ-লিংহাসন স্থাপিত করিলেন। দ্বারকায় আসিবার সময় শ্রীকৃষ্ণ অত্যন্ত আত্মীয় বন্ধু বান্ধবগণকে সমভিষ্যাহারে আনিয়াছিলেন, কিন্তু কুজ্জাকে জীবনের অনিশ্চিত কাল কৃষ্ণ বিরহ যন্ত্রণাভোগ করিতে হইয়াছিল। তিনি প্রকৃত প্রস্তাবে দ্বারকায় উপনিবেশ সংস্থাপন করিয়া পর্য্যায় ক্রমে কাকুণী প্রভৃতি আটটি স্বৰূপা

রমণীর পাণি গ্রহণ করেন । তৎপরে দুর্দান্ত নরকরাজকে গিন্ঠ
বরিয়া তদীয় অন্তঃপুর হইতে বহু সংখ্যক বন্দিণী কামিনীগণকে
দ্বারকায় আনিয়াছিলেন । তৎকালের ব্যবস্থানুসারে সেই
সকল কামিনী শ্রীকৃষ্ণেরই পরিণীতা হইয়াছিল । কাল ক্রমে শ্রীকৃষ্ণ
'ষ্ণের পুত্র পৌত্র ও প্রপৌত্রাদিতে যতুকুল বিলক্ষণ বর্দ্ধিত হইয়া
উঠে । তাহার ভুক্তবলে ও অর্থবলে উন্নত হইয়া সংসারে ঘোর
অত্যাচার আরম্ভ করে । ইহাতে তিনি কৌশলে আপন সম্মুখে
আপনার বিপুল বংশ ধ্বংস করিয়া অবশেষে জ্যেষ্ঠ ভ্রাতা বল-
ভদ্রের সহিত মানব জাতি সঞ্চার করিয়াছিলেন । যখন যাদবেরা
বাকণী পানে উন্নত হইয়া পরস্পর বিবাদারম্ভ করে, তখন শ্রীকৃষ্ণ
তাহাদিগকে নিবৃত্ত না করিয়া পদে পদে উত্তেজিত করিয়া-
ছিলেন । তাঁহার পুত্র পৌত্রাদিগণ যখন পরস্পর যুদ্ধ করিয়া
একে একে সমরাজ্যে শয়ন করিতে লাগিল, তখন তিনি
দূরে দাঁড়াইয়া তাহাদিগের মৃত্যু দেখিতে লাগিলেন, আপনার
বংশনাশ হইতেছে বলিয়া অক্ষেপণ করিলেন না ।

কৃষ্ণ চরিত্রে যদিও অনেক অস্বাভাবিক ও অসংলগ্ন কথা
আছে, কিন্তু আমরা তাহার এই মাত্র সার ভাগ গ্রহণ করিতেছি
যে, তিনি বাল্যে যৌবনে ও বৃদ্ধ কালে প্রকৃত সংসারীর
ন্যায় সমস্ত কার্য্যই করিয়াছিলেন ; কিন্তু কোন কালে কিছুতেই
লিপ্ত হন নাই । এই সংসার যে অলীক ও মায়াময়, তাহা তিনি
আত্ম কার্য্যের দ্বারা সকলকে জানাইয়া গিয়াছেন । কু-
পাওব বুদ্ধার্থে প্রস্তুত হইলে, অর্জুন দ্বাভ্যায় বন্ধুগণকে প্রতি-
দ্বন্দ্বী দেখিয়া মায়ায় মুগ্ধ হইয়া পড়িলেন । সেই সময় অর্জুনকে
শ্রীকৃষ্ণ যে সকল বোনের কথা বলিয়াছিলেন, এক্ষণে ভগবদ্বাক্যের

তাহা পাঠ করিয়া এই সংসারকে নিতান্ত অলীক ও মায়াময় বলিয়া
 কাহার না উপলব্ধি হইবে? ত্রীকৃষ্ণ অর্জুনকে পদে পদে
 বলিয়াছিলেন যে, মখে, কালের উচিত কার্য্য কর, ক্ষত্রিয় ধর্ম্মে
 জলাঞ্জলি দিয়া ধনুর্কাণ পরিত্যাগ করিও না। এ সময় যদি সম্মুখ
 যুদ্ধে পরাঙ্মুখ হও, তাহা হইলে, ইহ কালও পর কাল দুই কাল নষ্ট
 করা হইবে। যদি আপাততঃ সম্মুখ যুদ্ধে বিরত হও, তাহা হইলে,
 কৌরবেরা তোমাকে আর বীর পুরুষের মধ্যে গণ্য করিবে না।
 তাহাদিগের নিতান্ত বিশ্বাস হইবে যে, তুমি ভয় প্রযুক্তই ভীষ্মের
 সহিত সম্মুখ সংগ্রামে বিরত হইলে। পূর্বে ভূজবলে যে প্রতিপত্তি
 লাভ করিয়াছিলে, অদ্য তাহা বিনষ্ট করিতে বসিয়াছ; সুতরাং
 ইহা দ্বারা ইহ কাল নষ্ট করা ভিন্ন আর কি বলিব? আবার
 ক্ষত্রিয় হইয়া সম্মুখ যুদ্ধে বিরত হইলে, নরকগামী হইতে হয়,
 তাহাও তুমি বিশিষ্ট রূপে অবগত আছ। আমি দাক্ষকের মুখে
 শুনিয়াছি, স্তম্ভদ্রা হরণ কালে যখন আমার পুত্র পৌত্রগণ
 তোমাকে যুদ্ধার্থে আহ্বান করিল, তুমি তৎকালে বীরদর্পে দাক্ষ-
 ককে বলিয়াছিলে, সারথি, শীঘ্র রথ ফিরাও, ক্ষত্রিয়গণ আমাকে
 যুদ্ধার্থে আহ্বান করিতেছে। সে সময় দাক্ষক তোমার স্ত্রায়
 মায়ায় মুগ্ধ হইয়া বলিয়াছিল, বীরবর, আমি রথ ফিরাইতে
 পারিব না। তুমি এই রথে উপবিষ্ট হইয়া কৃষ্ণের পুত্রগণের
 প্রতি অস্ত্র নিক্ষেপ করিবে, তাহা আমি কখনই দেখিতে পারিব
 না; অতএব আমরা স্তম্ভদ্রার সহিত ইন্দ্রপ্রস্থে প্রস্থান করি।
 দাক্ষকের এই কথায় তুমি ক্রোধে উন্মত্ত হইয়া কহিয়াছিলে,
 কি, আমি শৃগালের স্ত্রায় পলায়ন করিব? ক্ষত্রিয় হইয়া যুদ্ধে
 বিরত হইব?

সখে, স্তভদ্রা হরণ কালে প্রবল পরাক্রান্ত যাদবগণের সহিত ক্ষত্রিয় ধর্মের অতুরোধে সংগ্রাম করিতে চাহিয়াছিলে, অদ্য কি বলিয়া সেই ধর্ম বিসর্জন করিতে যাইতেছ ? তবে কি আমাদিগের অপেক্ষা আততায়ী দুর্ব্যোধন তোমার প্রিয় হইল ? আততায়ীকে বিনাশ করা ত শাস্ত্র নিষিদ্ধ নহে । শাস্ত্রকর্তা-গণ লিখিয়াছেন, যে সকল লোকে গৃহে অগ্নি দেয়, বিষ পান করায়, ধনাদি অপহরণ করে, পদচ্যুত করে, ও বন পূর্বক সহধর্মিণীকে হরণ করিবার চেষ্টা পায়, তাহারাই আততায়ী । বলে ছলে ও কৌশলে এই রূপ আততায়ীকে অবশ্য বিনষ্ট করিবে । পূর্বে যে কয়েকটি আততায়ীর লক্ষণ বলিলাম, তোমাদের প্রতি দুর্ব্যোধন ইহার কোন্টি করিতে বাকি রাখিয়াছে ? সেই ভয়ানক আততায়ীকে সম্মুখ যুদ্ধে পাইয়া তুমি কি বলিয়া তাহাকে সংহারে বিরত হইতেছ ? যাহারা আততায়ীর সাহায্য করে, তাহারাই আততায়ী । কুরু পাণ্ডের সহিত ভীষ্মের কি সমান সম্বন্ধ নহে ? দ্রোণাচার্য্য কি তোমাদিগেরও শিক্ষাগুরু নহেন ? তবে তাঁহারা কি বলিয়া তোমাদিগের বিনাশার্থে অস্ত্রধারী হইয়াছেন ? যে হেতু, তাঁহারা কর্তব্য বিমূঢ় নহেন, তাঁহারা অন্নদাতা দুর্ব্যোধনের সাহায্যার্থে প্রাণ পর্যন্তও পণ করিয়াছেন । সখে, আমি তোমাকে সার কথা কহিতেছি, এই অষ্টাদশ অকোহিণী সেনা অষ্টাদশ দিবসের মধ্যে অবশ্যই বিনষ্ট হইবে ; যে হেতু, কাল ইহাদিগকে সমর ক্ষেত্রে আহ্বান করিয়াছে । তোমার ক্ষোষ্ঠভাতের পুত্র দুর্ব্যোধন কেবল মাত্র কালের বশবর্তী হইয়া পূর্ব কথা সমস্ত বিস্মরণ হইয়াছে । মৈত্র ঋষির অভিশাপ উহার মনে নাই, ~~বৈশি~~

নারদেরও ভবিষ্যদ্বাণী উহার স্মরণ হইতেছে না। মহাত্মা ভীষ্ম
 দুর্যোধনকে পদে পদে বলিয়াছেন যে, স্বয়ং ইন্দ্র আসিয়া যদি
 তোমার সহায়তা করেন, তথাচ তুমি পাণ্ডববিজয়ী হইতে পারিবে
 না; দুর্যোধন তাহাতেও সন্মুখ সংগ্রামে বিরত হইল না। কি
 জ্ঞাত হইল না? উহার কাল পূর্ণ হইয়াছে বলিয়া। সখে, এই
 যুদ্ধে তুমি কেবল মাত্র নিমিত্তের ভাগী হইবে নতুবা এই
 সমস্ত সৈন্যই অচিরে নিধন প্রাপ্ত হইবে। অতএব হে অর্জুন,
 তুমি মায়ায় মুগ্ধ হইও না, মুক্ত পুরুষের ন্যায় কার্য্য কর। কে
 কাহাকে বিনষ্ট করিতে পারে? কে বা কাহার শত্রু? কালই
 সকলের অরি, কালই সকলকে বিনষ্ট করিয়া থাকে। ক্ষত্রিয়
 কুল নিধন হইবার সময় উপস্থিত হইয়াছে, ইহাদিগকে সমরশায়ী
 করিবার তুমি উপলক্ষ মাত্র হইবে। মোহাক্ষ বাক্তিরাই আমার
 আগার করিয়া সংসার রূপ কারাগারে আবদ্ধ হয়। তোমার যুদ্ধ
 ক্ষেত্রে 'আসিয়া একপ মোহ উপস্থিত হইবে, তাহা আমি
 স্বপ্নেও ভাবি নাই। অর্জুন, সমাগত যোদ্ধৃগণের যদি পর-
 মায়ু থাকে, তাহা হইলে, তোমার অন্ত্রাঘাতে কখনই বিনষ্ট হইবে
 না; আর যদি কাল আগত হইয়া থাকে, তাহা হইলে, ভীমসেনের
 এক হুঙ্কার ধ্বনি উপলক্ষ করিয়া দুর্যোধনের একাদশ অকৌহিনী
 সেনা সমরাজ্ঞে শয়ন করিবে, তাহাতে আর সংশয় নাই।

ক্লেশের এই সকল যোগ কথা শুনিয়া অর্জুনের মোহাক্ষ-
 কার দূর হইল। তিনি সর্বপে গাণ্ডীব ধারণ করিয়া যুদ্ধার্থে
 প্রস্তুত হইলেন। সংসার বিমুক্ত পুরুষ ব্যতিরেকে কেহ
 কাহারও মোহ পাশ ছিন্ন করিতে পারে না, ত্রীকূষ সর্ব বিধায়
 সংসারী হইয়াও সংসারের কোন বিষয়েই লিপ্ত ছিলেন না,

ভগবদ্বাক্যে তাহা বিশেষ প্রমাণ হইয়াছে । তিনি যদিও সংসারীর ন্যায় সকল কার্য্যই করিতেন, কিন্তু এই সংসার যে অলীক ও মায়াময় তাহা তিনি বিলক্ষণ অবগত ছিলেন ।

বৌদ্ধধর্ম মতে দেহের বিনাশই জীবের মুক্তি । সেই অনায়াস লভ্য মুক্তির জন্য কেবল অজ্ঞ জনেরাই ক্রিয়া কাণ্ড জপ তপ করিয়া অনর্থক শরীরকে কষ্ট দিয়া থাকে । এই মত খণ্ডন করিয়া এক জন মহাপুরুষ লিখিয়াছেন যে, যদি “মৃত্যুরেব মুক্তিরিতি” এই কথা যথার্থ হয়, তাহা হইলে, শূকরেরাও কেন মুক্তি লাভ করুক না ? পূর্বোক্ত মহাত্মার মতে যাহার ব্রহ্মজ্ঞান নাই, তাহার মুক্তি কি রূপে সম্ভবে ? মৃত্যুর পর যাহা হইবে হউক, কিন্তু জীবমুক্তির স্বরূপ লক্ষণ এই ;—

“জীবঃ শিব সর্বমেব ভূতে ভূতে ব্যবস্থিতঃ ।

একমেবা ভি পশ্যন্তি জীবমুক্ত স উচ্যতে ॥”

অর্থাৎ জীব মাত্রেরই শিব স্বরূপ ; কারণ এক মাত্র পর ব্রহ্মই সর্ব ভূতে বিরাজিত আছেন । এই রূপে যিনি সর্ব ক্ষণ সর্বত্র পরমাত্মাকে দর্শন করেন, তিনিই জীবমুক্ত কথিত হইয়া থাকেন ।

“কর্ম সর্বত্র আদিষ্টং ন জানামি চ কিঞ্চন ।

কর্ম ব্রহ্ম বিজানাতি জীবমুক্ত স উচ্যতে ॥”

যাঁহার কর্মকাণ্ড প্রভৃতিতে কিছু মাত্র জ্ঞান থাকুক বা না থাকুক, কিন্তু সমুদায় কর্মকেই ব্রহ্ম স্বরূপ বলিয়া জানেন, তাঁহাকেই জীবমুক্ত কহা যাইতে পারে ।

“সর্ব ভূতে স্থিতং ব্রহ্ম ভেদাভেদৌ ন বিদ্যতে ।

একমেবাভি পশ্যন্তি জীবমুক্ত স উচ্যতে ॥”

যিনি আত্মাকে সর্ব ভূতস্থ জানিয়া এই জগৎ সংসারকে ব্রহ্মময় দেখিতেছেন, যিনি উৎকৃষ্ট ও নিকৃষ্ট প্রাণীর মধ্যে কিছুই প্রভেদ দেখেন না, তিনিই জীবনুজ্জ্বল পুরুষ। যেমন উজ্জ্বল প্রভাকর শত সহস্র জল পাত্রে প্রতিবিম্বিত হন, অথচ তাহার একটিতেও লিপ্ত নহেন, পরমাত্মাও সেই রূপ সকল প্রাণীর হইয়া সংসার স্মলভ স্মৃৎ ছুঃখে লিপ্ত নহেন। যাহার এই রূপ তত্ত্বজ্ঞান জন্মিয়াছে, তিনিই মুক্ত পুরুষ; কেননা, সাংসারিক স্মৃৎ ছুঃখে তাঁহাকে অভিভূত করিতে পারে না, এবং স্বর্গ, পর কাল ও মুক্তির জন্মও তিনি ব্যতিব্যস্ত নহেন।

“শরীরং কেবলং কৰ্ম্মশোক মোহাদি বর্জিতম্।

শুভাশুভ পরিভ্যাগী জীবনুজ্জ্বলঃ স উচ্যতে ॥”

যিনি এই সংসারের যাবদীয় কার্য্য শোক মোহাদি রহিত হন ও কার্য্য সকলের শুভাশুভ ফলের কামনা পরিভ্যাগী হইয়া কেবল সংসার যাত্রা নির্বাহ জন্ম প্রবৃত্ত কার্য্য সমাধা করেন, তাঁহাকেই জীবনুজ্জ্বল পুরুষ বলা যাইতে পারে।

আত্মতত্ত্ব জ্ঞান হইলে, সংসার যে সম্পূর্ণ মায়াময় ইহা বিশেষ রূপ হৃদয়ঙ্গম হইয়া থাকে। ইহা স্থির চিত্তে বিবেচনা করা উচিত যে, পৃথিবীর কোন বস্তুরই প্রকৃত তত্ত্বজ্ঞান আমাদিগের নাই, কেবল তাহাদিগের কতকগুলি গুণ আমরা পঞ্চ জ্ঞানেন্দ্রিয় দ্বারা অবগত হই এই মাত্র। ইহ সংসারে সকল অবস্থারই পরিবর্তন ঘটিয়া থাকে। অদ্য যে ব্যক্তি রাজ সিংহাসনে উপবিষ্ট হইয়া শত শত লোকের উপর আধিপত্য করিতেছেন, কল্য আবার হয় ত তিনিই ভিখারী হইতে পারেন। অদ্য যে স্থানে নদী প্রবল প্রবাহে প্রবাহিত হইতেছে, কিছু

কাল পরে হয় ত সেই স্থানে একটি বহু জনাকীর্ণ নগর হইতে পারে । এই যে রক্ত মাংসের সুন্দর শরীর অদ্য সংসারের সুখ দুঃখ ভোগ করিতেছে, নানা শোভা দর্শন করিতেছে, অহঙ্কারে উন্নত প্রায় হইয়া পৃথিবীকে তৃণ তুল্য জ্ঞান করিতেছে, হয় ত, কল্য সেই শরীরই চৈতন্য রহিত হইয়া ভস্ম রাশিতে পরিণত হইবে । অতএব এই সংসারের তাবদীয় বস্তুই অলীক, কেবল সেই চৈতন্য স্বরূপ জগদীশ্বরই এক মাত্র সত্য পদার্থ । যে ব্যক্তি মনে এই রূপ অটল বিশ্বাস ও ঈশ্বরে দৃঢ় ভক্তি রাখিয়া ন্যায় যুক্তি সহকারে জীবনের কর্তব্য কার্য সকল নির্বাহ করেন, এবং আনন্দে উন্নত বা শোক মোহ ও মৃত্যু ভয়ে অভিভূত না হন, তিনিই জীবন্মুক্ত পুরুষ, ও সেই ব্যক্তিই অনেকাংশে শান্তি সুখের অধিকারী হইয়া পৃথিবীতে পরম সুখে জীবন যাপন করিতে সমর্থ হইবেন ।

বিজ্ঞান-শান্তি-কুসুম সমাপ্ত ।



থাকিত না। এই জন্ত বলিতেছি যে, কে কোন্ অবস্থাকে স্থখ বলিয়া ধরে, তাহা স্থির করা কঠিন।

এই সংসারের প্রাণী মাত্রেই এক ভাবে অবস্থান করিতে পারে না। যেমন অনন্ত ব্রহ্মাণ্ডের সমস্ত বিষয়ই মুহূৰ্ত্তে পরিবর্তন হইতেছে, সেই রূপ ভৌতিক মনুষ্য শরীরাত্মন্তরস্থ মনও কোন প্রকারে এক ভাবে দীর্ঘ কাল অবস্থান করে না। যে ব্যক্তি বাল্য কালাবধি পরম স্থখে লালিত ও পালিত হইয়াছে, সৰ্ব্বদা উপাদেয় সামগ্রী ভোজন করিয়া থাকে, সুরম্য অট্টালিকায় বাস করে; এই রূপে দীর্ঘ কাল সেই এক ভাবে কাল যাপন করিয়া তাহার মন একটি পরিবর্তনের জন্ত ব্যগ্র হইয়া উঠে। এ রূপ অনেক দেখা গিয়াছে যে, ধনাঢ্য লোকের সন্তানেরা অমৃত তুল্য দুগ্ধ পান করিতে নানা প্রকার আকার উপস্থিত করে। খাদ্যের এই কণ্ঠে তাহাদিগকে দুগ্ধ পান করাইয়া থাকে। সেই সময় যদি কোন নিধনের পুত্র রাজ পথে দাঁড়াইয়া মুড়ী খাইতে থাকে, তাহা হইলে, সেই ধনী সন্তানেরা ঐ দরিদ্র লোকের সন্তানের ন্যায় মুড়ী খাইবার জন্ত ব্যগ্র হইয়া উঠে। কখন কখন কিস্কর কিস্করী দ্বারা উক্ত দ্রব্য ক্রয় করাইয়া উপাদেয় জ্ঞানে আহাৰ করিয়া থাকে। এ দিকে যে দরিদ্র সন্তানেরা চির কাল মুড়ী চৰ্কণ করিয়া থাকে, তাহারা ধনী সন্তানদিগের ন্যায় উপাদেয় সামগ্রী প্রাপ্ত হইলে, যে রূপ আনন্দের সহিত ভোজন করিতে আরম্ভ করে, তদৃষ্টে তাহাদিগকে সেই সকল দ্রব্য খাওয়াইতে কোন্ সদাশয় ব্যক্তির ইচ্ছা না জন্মে?

ব্রহ্মা স্ত্রীলোকদিগের মুখে গল্প শুনিয়াছি যে, এক জন ধনাঢ্য লোক দৈব বিপাকে পড়িয়া কোন দরিদ্র ব্রাহ্মণের বাটীতে রাত্রি

কালে অতিথ্য স্বীকার করিয়াছিল। ব্রাহ্মণ সপরিবারে রজনীতে নেবু ও খুঁড়ের ডাল পোড়া দিয়া পান্তা ভাত খাইয়া থাকেন, অতিথিকেও সেই অন্ন ব্যঞ্জন আহার করিতে দিয়া ব্রাহ্মণ সবিনয়ে বলিলেন, মহাশয়, আমার অপরাধ লইবেন না। দুই বেলা আমাদিগের গ্রামের কোন ব্যক্তির বাটীতেই রন্ধন কার্য হয় না। রজনীতে এই স্থানের সকলেই পান্তা ভাত খাইয়া থাকেন; অতএব রাত্রি কালে উপবাসী না থাকিয়া যাহা কিঞ্চিৎ পারেন, আহার করুন। সেই ধনাঢ্য লোক তৈল লবণ সংযুক্ত খুঁড়ের ডাল পোড়া দিয়া উদর পূরিয়া পান্তা ভাত খাইলেন। আচমনান্তে গৃহস্থকে বলিলেন, মহাশয়, আজ আমার যে রূপ তৃপ্তির সহিত ভোজন হইল, বোধ হয়, জন্মাবচ্ছিন্নে এ রূপ সুস্বাদু অন্ন ব্যঞ্জন কখনও ভোজন করি নাই। বাটী গিয়া প্রত্যহ রজনীতে এই রূপ অন্ন ব্যঞ্জন আহার করিব। কথিত ভাগ্যবন্ত লোক বাটী আসিয়া পাচককে 'আদেশ করিলেন যে, গত রজনীতে আমি যে রূপ অন্ন ব্যঞ্জন আহার করিয়াছি, অদ্য রজনীতে তাহাই করিয়া দাও। তাহাকে পান্তা ভাত বলিয়া থাকে। নেবু ও খুঁড়ের ডাল পোড়া দিয়া তাহা খাইতে হয়। পাচক বলিল, অদ্য কি প্রকারে পান্তা ভাত হইতে পারে; যাহা বলিলেন, কল্যাণসমুদয় আয়োজন করিয়া দিব। পর দিবস রজনীতে তাহাই হইল; কিন্তু উক্ত ব্যক্তি তাহা আহার করিয়া পূর্ক দিনের মত তৃপ্ত হইলেন না। পুনঃ পুনঃ বলিতে লাগিলেন, এ সকল সামগ্রী সেই ব্রাহ্মণের বাটীতে যে রূপ সুস্বাদু হইয়াছিল, অদ্য সে রূপ বোধ হইল না। পাচক বলিল, মহাশয়, দৈবাৎ এক দিন সেই সকল সামগ্রী আহার করিয়াছিলেন বলিয়াই উপাদেয় জ্ঞান হইয়াছিল, অদ্য আর

সে রূপ হইবে কেন ? ভাল, অদ্য আমাকে ক্ষমা করুন, সেই ব্রাহ্মণের বাটীতে যে রূপ তৃপ্তি পূরক ভোজন করিয়াছিলেন, তাহা অপেক্ষাও উপাদেয় দ্রব্য কল্য রজনীতে ভোজন করাইব। পাচকের কথায় ধনবান্ পরিতুষ্ট হইলেন ।

পর দিন বৈকালে পাচক ধনবানের নিকট একটি টাকা চাহিয়া লইয়া কতকগুলি দ্রব্য সামগ্রী ক্রয় করিয়া আনিল ও পাক গৃহের দ্বার রুদ্ধ করিয়া দিয়া যাহা কিছু প্রস্তুত করিতে হয়, তৎসমুদয় করিয়া রাখিল । রজনী অষ্ট ঘটিকার সময় ধনবান্ আহার করিতে চাহিলেন । পাচক একটি শ্বেত প্রস্তরের বড় বাটী তাঁহার সম্মুখে ধরিয়া দিল । ধনবান্ তাহার কিয়দংশ আহার করিয়াই একেবারে আশ্চর্য্য হইয়া গেলেন ও বলিলেন, ওহে, তুমি এ অমৃত তুল্য সামগ্রী কোথায় পাইলে ? কি জন্মই বা এত কাল এ রূপ ভোজনে আমাকে বঞ্চিত করিয়া রাখিয়াছিলে ? এখন প্রতি রজনীতেই আমাকে এই সামগ্রী প্রস্তুত করিয়া দিও । পাচক বলিল, না মহাশয়, তাহা আমি পারিব না । অদ্য যে দ্রব্য আহার করিয়া পরিতুষ্ট হইলেন, তাহা উপযুক্ত পরি তিন চারি দিবস খাইলেই আপনার তত দূর ভাল লাগিবে না ও স্বাস্থ্য ভঙ্গ হইয়া পড়িবে । বিশেষতঃ, যে যে দ্রব্যের সংযোগে আমি এই উপাদেয় সামগ্রী প্রস্তুত করিয়াছি, তাহার নাম শুনিলেই আপনি আর আহার করিতে চাহিবেন না ; যে হেতু, আপনি দীর্ঘ কাল বাত রোগে সমূহ কষ্ট ভোগ করিতেছেন । আমি যে যে দ্রব্যের সংযোগে ইহা প্রস্তুত করিয়াছি, অ্রবণ করুন, পক্ক কদলী, দধি, পাতি নেবু, চিনি ও চিপটক ; বাত রোগ গ্রস্ত ব্যক্তির পক্ষে এ সমুদয়ই বিষ তুল্য ।

মহাশয়, আপনি প্রত্যহ রজনীতে যে সকল দ্রব্য আহার করিয়া থাকেন, তাহা সকলই সুসামগ্রীতে প্রস্তুত হয় ও তৎসমুদয় আহার করিয়া দিন দিন আপনার শরীর সবল ও সুস্থ হইয়া উঠিতেছে । এই এক রজনীর মন্দ সামগ্রী ভোজনে আপনার কি অপকার হইবে বলিতে পারি না । বাবু পাচকের অর্থ পরিপূরিত কথা শুনিয়া অত্যন্ত পরিতুষ্ট হইলেন । বলিলেন, তুমি ষথার্থ বলিয়াছ । কি রসনার তৃপ্তিকর, কি নয়নের তৃপ্তিকর, কি মনের তৃপ্তিকর সকল বস্তুই আমাদিগের পক্ষে স্বাস্থ্য-প্রদ ও সুখকর নহে ; ইহা জানিয়া শুনিয়াও আমাদিগের অখাদ্য ভোজনে কখনও কখনও তৃপ্তি বোধ হইয়া থাকে । যেমন মনুষ্যের মন সর্বদা পরিবর্তনশীল, তেমনি আমাদিগের রসনাও নিত্য নূতন সামগ্রীর স্বাদ গ্রহণ করিতে ইচ্ছা করে । রসনার তৃপ্তি বোধ হইলে, ভাল মন্দ জ্ঞান থাকে না । দীর্ঘ কাল অমৃত তুল্য দুধ পান করিয়া আমার এক্ষণে সেই দুধ বিষবৎ জ্ঞান হইয়াছে । ভোজনের সময় দুধের বাটি দেখিলেই বিরক্ত বোধ হয় । যদি দুধের বিনিময়ে এক ভাণ্ড দধি খাইতে পাই, তাহা হইলে, রসনা পরিতুষ্ট হয় সত্য ; কিন্তু শরীরের অভ্যন্তরস্থ রোগ ভীষণ ভাব ধারণ করিয়া উঠিবে । এই জন্ত চিকিৎসকের আজ্ঞাবহ হইয়া আমাকে নিতান্ত সুপথ্য সামগ্রীগুলি ইচ্ছার বিপরীতে আহার করিতে হইতেছে । চিকিৎসক বলিয়াছেন, যদি এই রূপ নিয়মে চির কাল চলেন, তাহা হইলে, ঐ উৎকট ব্যাধি আর বল করিতে পারিবে না । তথাচ কেবল এক রসনার তৃপ্তির জন্ত সময়ে সময়ে আমি সমূহ যন্ত্রণা ভোগ করিয়া থাকি । যখন কুপথ্য ভোজনে বসি, তখন আর

পূর্বের কষ্ট কিছুই মনে থাকে না। আমার স্থায় সংসারে বহু সংখ্যক লোক কেবল এক মৃতন প্রিয় হইয়া অসীম সুখ সত্ত্বেও পদে পদে কষ্ট ভোগ করিয়া থাকে। কেহ বা দীর্ঘ কাল পুষ্টিকর অথচ উপাদেয় দ্রব্য সামগ্রী আহার করিয়া সে আহারে পরিভ্রষ্ট হন না; সেই জন্ত সুপথ্যের বিনিময়ে কুপথ্য ভোজন আরম্ভ করিয়া কিছুদিন পরিতোষ লাভ করেন; কিন্তু অল্প দিনেই তাহার ফল ভোগ করিবার সময় কি করিয়াছি বলিয়া আক্ষেপ করিতেও ক্রটি করেন না। কেবল এক ভোজন সম্বন্ধে কেন, কি আহার, কি বিলাস, সর্ব বিষয়েই মনুষ্যের মন পরিবর্তনের ইচ্ছা করে। সে পরিবর্তন ভালই হউক বা মন্দই হউক সে বিষয় বিবেচনা করিয়া লইতে অনেকের ক্ষমতা নাই; কিন্তু মনে যাহা ইচ্ছা হইয়াছে, সেই বিষয়ের সংযোগ হইলেই পরম সুখ বোধ হয়, না হইলে, মনঃপীড়ার অবধি থাকে না।

এক জন বৈজ্ঞানিক পণ্ডিত বলিয়াছেন যে, মনুজকুলকে পর্যায় ক্রমে সুখ দুঃখ ভোগ করিতে হইবেই হইবে। চির কাল এক ভাবে কেহই অতিবাহিত করিতে পারেন না। দেখ, শুশ্রূ নিশুশ্রু দৈত্য আপনাদিগের ভুজ বলে ত্রিজগতে একাধিপত্য স্থাপন করিয়াছিল। অশ্রু কি কথা, দেবতাদিগের সহিত যজ্ঞভাগ পর্যাস্ত গ্রহণ করিয়া নিজ বুদ্ধির দোষে অবশেষে পুত্র শোকে, ভ্রাতৃ শোকে ও বন্ধু বান্ধবের শোকে জর্জরীভূত হইয়া কাল কপা কাল কামিনীর হস্তে নিহত হয়। একপ মৃত্যু মুখে নিপতিত হইবার কারণ কি? শুশ্রু ত্রিলোকের অধীশ্বর হইয়াও সর্বতোভাবে তৃপ্তি লাভ করিতে পারে নাই। যে দিন স্মগ্রীব নামক এক জন সৈনিক দৈত্যাধিপতি শুশ্রুকে সংবাদ দিল, মহারাজ, আমি হিমা-

জয় শিখরে একটি রমণী রত্ন দেখিয়া আইলাম । আপনি অন্যান্য সমস্ত ধনেরই অধিকারী হইয়াছেন বটে ; কিন্তু তাদৃশ রমণী রত্নে অদ্যাপি বঞ্চিত আছেন । এই কথা শুনিয়া শুস্ত স্মগ্রীবকে বলিল, তুমি এক্ষণেই তাহাকে আমার নিকট আনিয়ন কর । স্মগ্রীব বলিল, আমি আপনার অনুমতির অপেক্ষা করি নাই ; কিন্তু সে রমণীর প্রতিজ্ঞার কথা শুনিয়া আশ্চর্য্য হইয়াছি । সে মুক্ত কণ্ঠে বলিতেছে যে, যে আমাকে সম্মুখ সংগ্রামে পরাস্ত করিবে, তাহারই গলায় বরমাল্য দিব । এই কথা শুনিয়া শুস্ত হাস্য করিতে করিতে বলিল, কি আশ্চর্য্য কথা, রমণী আমার অধিকারে থাকিয়া দৈত্য-গণের সহিত সমর প্রার্থনা করিতেছে ! যাও, ধুম্রলোচন, তুমি এখনই গমন কর ; সেই কামিনীর প্রতিজ্ঞা পূর্ণ করিয়া অবিলম্বে আমার সম্মুখে আনিয়া উপস্থিত করিবে, দেখিও, যেন কাল বিলম্ব না হয় । দৈত্য পতির আদেশে ধুম্রলোচন স্বসৈন্তে দেবীর সম্মুখবর্তী হইবা মাত্রই তাঁহার একটি মাত্র হুক্মারে স্বগণ সহিত ভস্মাভূত হইয়া গেল । শুস্ত ধুম্রলোচনের মৃত্যুর কারণ শুনিয়া বিস্ময় সাগরে নিমগ্ন হইল । দৈত্য পতি পর্য্যায় ক্রমে রক্তবীজ প্রভৃতি প্রধান প্রধান সেনাপতিগণকে যুদ্ধে পাঠাইল ; কিন্তু কেহই সমর ক্ষেত্র হইতে প্রত্যাবর্ত্তিত না হওয়াতে অবশেষে প্রাণ সম সহোদর নিশুস্তকে রণ ক্ষেত্রে পাঠাইয়া দিল । যখন নিশুস্তও কাল কামিনীর সহিত সম্মুখ যুদ্ধে সমরশায়ী হইল, তখন শুস্ত একেবারে শোক সাগরে নিমগ্ন হইয়া প্রিয় বিয়োগ জনিত কষ্ট কাহাকে বলে, তাহা বিলক্ষণ অনুভব করিতে লাগিল । অবশেষে শোকে, দুঃখে, অপमानে ও ক্রোধে উন্মত্ত হইয়া স্বয়ং যুদ্ধ স্থলে উপস্থিত হইল । কিয়ৎক্ষণ সেই কালরূপা কামিনীর

সহিত সংগ্রাম করিয়া সেও গভায়ু হইয়া সমরাজ্যে শয়ন করিল। এক দৈত্য পতি শুস্তের দৃষ্টান্ত দ্বারা বিলক্ষণ বোধ হইতেছে যে, এ সংসারে কেহই সম ভাবে চির কাল সুখ ভোগ করিতে পারে না। লোকে সমস্ত সুখ সত্ত্বেও কোন না কোন সময় কোন একটা মনোবৃত্তির নিতান্ত বশবর্তী হইয়া দুঃখ ভোগ করিতে থাকে।

পাঠকগণ, ইতিহাসাদিতে পাঠ করিয়াছেন, কত শত রাজ-পুত্র কেবল মাত্র খেয়ালের বশবর্তী ও কামনার দাস হইয়া সমস্ত সুখ সত্ত্বেও বর্ণনাভীত মনোদুঃখ ভোগ করিয়াছেন। বর্তমান সময়ে লোকের শারীরিক সুস্থতা, সংসারে সুপ্রতুল, প্রিয়বাদিনী ভার্য্যা প্রভৃতি সত্ত্বেও দেখিতে পাওয়া যায় যে, অনেক লোক আপনার মনঃকল্লিত কতকগুলি কামনার বশবর্তী হয়। তাহারা সেই অনর্থক অভিলাষগুলি সম্পন্ন করিতে গিয়া পাপ পথের পথিক হইয়া আপন মনের শান্তি ভঙ্গ করে। অধিকাংশ লোকে সমস্ত সুখ সত্ত্বেও কি জন্ম সুখী হয় না, এ প্রস্তাবে তদ্বিষয়ে আর অধিক বাক্য বিস্তারের প্রয়োজন নাই। যত ক্ষণ পর্য্যন্ত লোকের মন সম্পূর্ণ রূপে আয়ত্ত না হইবে, প্রবৃত্তিকে নিবৃত্ত করিবার ক্ষমতা না ধরিবে, মনের কামনা ত্যাগ করিতে না পারিবে, তত দিন তাহাদিগের পদে পদে মনের শান্তি ভঙ্গ হইবার ও মানসিক তাপ ঘটবার বিলক্ষণ সম্ভাবনা আছে। ইহ সংসারে যে ব্যক্তি ঈশ্বরের প্রতি স্থির ভক্তি রাখিয়া সকল অবস্থা স্থির ভাবে সহ্য করিতে পারেন, সংসারের তরঙ্গে আকুলিত না হন, মনকে সৰ্ব্বতোভাবে আয়ত্ত করিতে পারেন, যে যে কার্য্য করিলে, শারীরিক অসুস্থতা ও মানসিক গ্লানি প্রভৃতি উৎপন্ন হয়, সেই সকল কার্য্য

একেবারে পরিত্যাগ করিতে পারেন, শরীর রক্ষার্থ যাহা প্রয়োজন, তাহার সংযোগ হইলেই, পরিতুষ্ট থাকেন ও কামনার দাস হইয়া নানা পথের পথিক না হন, তিনিই এই সুখ দুঃখ পরিপূর্ণ সংসারে শান্তি সুখ ভোগের অধিকারী হইতে পারেন ।

মনুষ্য বিবেচনার দোষে কষ্ট পায় ।

আমরা পুনঃ পুনঃ বলিয়াছি, সভ্য সংসারের অনেক মনুষ্য অলীক অভাব বৃদ্ধি দ্বারা মনের শান্তি সুখ ভঙ্গ করিয়া থাকে । সামান্য অবস্থার লোক যদি আপন অবস্থার দিকে তীক্ষ্ণ দৃষ্টি রাখিয়া সংসার যাত্রা নির্বাহ করে, তাহা হইলে, সকল অবস্থাতেই শান্তির সম্ভাবনা আছে । মনুষ্য আপন প্রবৃত্তি চরিতার্থ করিতে গিয়া ভবিষ্যতে কি হইবে, তাহা এক বারও মনে ভাবে না, প্রবৃত্তি প্রবাহে পড়িয়া ভবিষ্যৎকে একেবারে ভুলিয়া যায় । প্রথমে বিলাস হইতেই অহঙ্কার উপস্থিত হয় ও অহঙ্কারই মনুষ্যকে আপনার অবস্থা ভুলাইয়া দিয়া কুপথগামী করে । . .

পাঠকগণ, মনে ককন, কোন নিম্ন ব্যক্তির কলিকাতার একটি কার্যালয়ে দশ টাকা বেতনের কার্য্য হইল । সে কার্য্যটিতে মাসিক ছুই চারি টাকা উপরি আয়েরও সম্ভাবনা আছে ; কিন্তু সকল মাসে সমান হইয়া উঠে না । উক্ত ব্যক্তির বাস একটি ক্ষুদ্র পল্লীগ্রামে । সে স্থানে চারি পাঁচ জন পরিবার লইয়া সাত আট টাকা মাসিক ব্যয়ে এক প্রকার গুজরাণ হইতে পারে । পল্লীগ্রামের স্ত্রীলোকেরা পতির নিকট হইতে পূজার সময় যদি এক জোড়া ছুই আনার চুড়ি, এক খানি দেড় টাকার শাটী ও

এক আনার মাথাঘষা পাইলেই, আর আঙ্কাদের পরিসীমা থাকে না, আপনাকে সৌভাগ্যশালিনী বিবেচনা করিয়া পতি সেবায় নিযুক্ত হয়। অল্পে তাহাদিগের মন সন্তুষ্ট হইবার কারণ কি? না, পল্লীগ্রামে ধনবান্ লোক প্রায় নাই। পুজার সময় প্রায় সকল স্ত্রীলোকেই শাঁখা শাড়ী পরিয়া আমোদ আঙ্কাদ করে ও বহু দিনান্তে পতির আগমনই তাহাদিগের পক্ষে যথেষ্ট সন্তোষের কারণ হয়। এই স্ত্রুথের সংসারে কেবল উক্ত ‘চাকুরে বাবু’ শরীরে সভ্যতার বীজ প্রবেশ করিয়া সমৃদ্ধ অস্ত্রুথের আবাস করিয়া তুলিল। ‘বাবু’ যখন প্রথম কলিকাতায় আসিয়া দশ টাকা বেতনের একটি চাকুরী পাইয়াছিল ও প্রথম মাসেই একেবারে নগদ দশ টাকা হাতে পায়, তখন মনে মনে একপ অহুমান করিয়াছিল যে, ইহার উপর আর পাঁচটি টাকা বৃদ্ধি হইলেই আমার যথেষ্ট হইবে। পাঁচ টাকায় এখান কার বাসা খরচ নিরুসাহ করিব ও অবশিষ্ট দশটি করিয়া টাকা বাটিতে পাঠাইব, তাহা হইলেই, পরিবারেরা পরম স্ত্রুথে দিন পাত করিতে পারিবে এবং আমারও এখানে বাসা খরচের কোন কষ্ট হইবে না। দেশস্থ পাঁচ জনের সহিত একত্র থাকিব, পাঁচ পাঁচে পঁচিশ টাকা হইলে, পাঁচ জনের সুন্দর রূপে বাসা খরচ চলিবেক। প্রথম দুই চারি মাস তাহাই হইল, অর্থাৎ সেই ব্যক্তি দশ আনার ধান পরিধান করিত, ছয় আনার মলমলের দোছোট করিত, ছয় আনার একটি পিরাণে গাত্র আবরণ করিত ও ছয় আনার চটি জুতা পায়ে দিত। রাস্তায় কাদা হইলে, সেই জুতা কাগজে মুড়িয়া বগলে করিয়া আপিসে যাইত। বাসা খরচ সম্বন্ধে এক বেলা মাছের ঝোল ও ভাত হইত, আর

এক বেলা ডাল, চচ্চড়ি ও তেঁতুলের অখল দিয়া আহার করিত । বিকালে আপিস হইতে আসিয়া ছোলা ভিজান ও বাতাসা জল-যোগ হইত । বাসা খরচের সমস্ত সামগ্রীই নগদ ক্রয় করিত, দেশে-বিদেশে কাহারও নিকট একটি পয়সাও ঋণ ছিল না । ক্রমে কলিকাতার সভ্যতা দৃষ্টে তাহার মনে মনে বিলাস বৃদ্ধি হইতে লাগিল । আপিসের সহযোগীদিগের পরিচ্ছদ দেখিয়া মনে মনে ভাবিল, ইহারাও মাসে দশ পনের টাকা উপার্জন করে, আমারও আয় তদনুরূপ ; তবে ইহাদিগের পরিচ্ছদ নক প্রকারে একপ হয় । মনে এই রূপ কল্পনার উদয় হইবা মাত্রই সহযোগী-দিগের সহিত দশ আনার খান পরিয়া বসিতে একটু একটু লজ্জার সঞ্চার হইতে লাগিল ; কিন্তু মহুয্য স্বভাব এই যে, একটা সূত্র না পাইলে, হঠাৎ পূর্বের চাল পরিত্যাগ করিতে লজ্জিত হইয়া থাকে । সেই সময়ে উহাকে সহযোগীর মধ্যে দুই এক জন এই ভাবে উত্তেজনা দিতে আরম্ভ করিল, ‘ব্রজ বাবু, তুমি ছয় আনার চটি জুতা পায়ে দাও কেন ? লাক্‌চাঁদির বাড়ীর সাড়ে তিন টাকা দিয়ে এক জোড়া জুতো কেন, ছমাস খুব পোহতে পার্কে । এই দেখ, কাদার সময় চটি জুতো হাতে করে আনতে হয় ; কিন্তু সে জুতো পায়ে দিয়ে জল কাদা ভেঙ্গে চলে এস, কিছুতেই কিছু হবে না । তুমি কি ভাব মোটা কাপড় বেশী দিন টেকে, এই দেখ, আমি চার খানা কুঠীর ধুতি এই তিন বৎসর করেছি, একটু দাম লেগেচে বটে ; কিন্তু অনেক দিন ধরে ত পর্চি । কাপড় চোপড়গুলো একটু ভাল করা চাই হে, তা না হলে, সাহেব শুভরা মানে না, মজুর মনে করে ।’ এই সকল উত্তেজনা বাক্যে ব্রজ বাবুর মন একটু নরম হইয়া

উঠিল। মনে মনে ভাবিল,—‘এঁরা যে কথা বল্চেন, সকলই সত্য।’ ফিরে মাসের মাহিনা পাইয়া তিন টাকা দিয়া এক জোড়া জুতা কিনিয়া পায়ে দিল, ভাল জুতা পায়ে দেবার কত সুখ তাহা অনুভব করিল। তার ফিরে মাসে শাদা ধুতি ও চাপকান হইল এবং আপিসে দুই এক পয়সার খাবার খাইতেও শিখিল। ক্রমে বর্ষাকাল উপস্থিত। যে দিন রাস্তায় বড় কাদা হয়, ব্রজ বাবু চাপকান ঝুলাইয়া ও ভাল জুতা পায়ে দিয়া কাদা ভাঙ্গিয়া যাওয়া অত্যন্ত ঘৃণিত কার্য্য বোধে এক আধ বেলা বকুরায় গাড়িতে উঠিতে আরম্ভ করিল। শরীরকে যত আত্মগা দাও, তত অলস হইয়া পড়ে। ছু পাঁচ দিন গাড়ী চড়িয়া ‘ব্রজ বাবু’ মনে ভাবিল,—‘দূর হোগ্গে, বর্ষা ছুটো মাস আর হেঁটে আপিস করা হয়ে ওঠে না। এ ছুটো মাস গাড়ীতেই যাওয়া যাবে, হেঁটে যাওয়াতে চাপকান নষ্ট হয়, আর জুতোর দফা একে-বারে রফা হয়ে যায়। তিন চার টাকা দিয়ে জুতো কিনে কি কাদায় ফেলে নষ্ট কোরো? শ্রাবণ ভাদ্র এই ছুটো মাসে আট টাকা গাড়ী ভাড়া যাবে, তা কি করা যায়। এ সব না কল্পেও মান সম্ভ্রম থাকে না।’

পূর্বে ব্রজ বাবুকে সপ্তাহে তিন বেলা করিয়া রন্ধন করিতে হইত। এক্ষণে আপিস হইতে আসিয়া একটি ছোট রকমের সেতার লইয়া পিড়িং পিড়িং করিতে বসে। সে রন্ধনের সময় রাগা ঘরে প্রবেশ করিতে উহার কোন ক্রমেই ইচ্ছা হইত না। দুই এক দিন সেতার বাজান শেষ করিয়া রাঁধিতে যাইত; কাজেই রাত্রি দুই প্রহরের কম আহারাদি হইত না। বাসার পাঁচ জন বকুরাদারের মধ্যে আর এক জন ‘বাবুকেও’ ‘ব্রজ বাবুর’

রোগে ধরিয়াছিল, দেখা দেখি সেও একটি সেতার কিনিয়া আনিল । আপিস হইতে আসিয়া দুই জনে মুখোমুখী হইয়া সেতার বাজাইতে আরম্ভ করিত । আহা! যে সেতারের মৃদু মধুর ধ্বনি শুনিয়া লোকের পুত্র শোক নিবারণ হয়, সেই সেতারের পিড়িং পিড়িং শব্দে ও মধ্যে মধ্যে তার চড়াওনের বন্ বন্ শব্দে বাসার আর তিন জন লোকে ছালাতন হইয়া উঠিল । ‘ব্রজ বাবু’ ও তাহার সহযোগী তিন চারিটার সমস্ত আপিসে লুচি কচুরি উদর পরিপূর্ণ করিয়া খাইত, স্নতরাং বাসায় আসিয়া আর বড় ক্ষুধার উদ্বেক হইত না, এই জন্য সেতার বাজান তাহাদের মিষ্ট লাগিত । আর তিন জন লোক সমস্ত দিন আপিসে হাড় ভাঙ্গা পরিশ্রম করিয়া বাসায় আসিয়া ছোলা ভিজ্জে ও বাতাসা খাইয়া ক্ষুধার শান্তি না হওয়াতে কাজে কাজেই সন্ধ্যার পূর্বে রন্ধন শালায় প্রবেশ করিয়া মাছের ঝোল ও ভাত তৈয়ার করিত ও সাত আটটার মধ্যে আহার করিয়া ক্ষুধানল শীতল করিত । তাহার পর শয্যায় উপবেশন করিয়া দুই চারিটা মিষ্ট গল্প করিতে ভাল লাগিত । তাহার পর পান তামাক খাইয়া নয়টা সাড়ে নয়টার মধ্যে শয়ন করিয়া সুখে নিদ্রা যাইত ; কিন্তু যে দিন ব্রজ বাবুর অথবা তাহার সহযোগীর রন্ধনের পালা পড়িত, সে দিন অন্য তিন জনের আর কষ্টের সীমা থাকিত না । এই রূপে মাসাবধি কষ্ট সহ্য করিয়া এক দিন ঐ তিন জনের মধ্যে এক জন স্পষ্টবক্তা ব্যক্তি ব্রজকে বলিলেন, ‘দেখ ভাই ব্রজ, আমরা গরিবের ছেলে । আপিসের গাধার খাটুনি খেটে ক্ষুধা তৃষ্ণায় অত্যন্ত কাতর হয়ে বাসায় আসি । ভাই, দু খানা বাতাসা আর এক মুটো ছোলা খেয়ে ক্ষুধা ভাঙ্গে না ; কাজেই সকাল সকাল এক মুটো রৈঁধে

বেড়ে খেয়ে শুয়ে পড়ি । স্বখে ঘুম টুকু হলেই আমরা ভাবি যে, পৃথিবীর সমস্ত আফ্লাদ আমোদ করা হলো ; কিন্তু ভাই, তোমরা দুই ইয়ারে আমাদের বড় কষ্ট দিতে আরম্ভ করেচো । তোমাদের রাঁপুবার পালায় দিন রাত দশটা পর্য্যন্ত সেতার বাজাবে, তার পরে রাত একটার সময় খেয়ে দেয়ে একটু শুতে যাব, তোমরা সে সময়েও দুই ইয়ারে মুখোমুখী কোরে টপ্পা ধোর্কে, তা হলে ত ভাই আর কাজ চলে না । আমরা যে অবস্থার লোক সেই অবস্থায়ই থাকা উচিত । বিদেশে চাকরী কর্তে এসেচি, দু টা না রোজগার করে বাড়ী নিয়ে যাব । যদি কিছু আমোদ আফ্লাদ কর্তে হয়, তা হলে, সেই পূজায় ছুটিতে বাড়ী গিয়ে কোর্কো, এখানে ওশব কল্লে, পাঁচ জন লোকে চেপ্‌ড়া বলবে । যাদের এঁটের কাপড় তুলে ছু বেলা উন্নুনে কাট ঠেলতে হবে, তার হাতে ভাই, সেতার কেন ?

ভদ্রের এই মিষ্ট ভৎসনা শুনিয়া ‘ব্রজ বাবু’ তৎকালে একেবারে ভেলে বেগুণে জলিয়া উঠিল । কারণ তৎকালে তাহার হৃদয় ক্ষেত্রে সভ্যতার আলো ও বিলাস একেবারে ধক্ ধক্ করিয়া জলিয়া উঠিয়াছে ; বিশেষতঃ সেই লোকটি তাহাকে পুনঃ পুনঃ ‘গরিবের ছেলে’ বলাতে যার পর নাই অপমান বোধ হইল । ‘ব্রজ বাবু’ ক্রোধে অন্ধ হইয়া বলিয়া উঠিল, ‘আপনি এ সব না সহিতে পারেন, আমরা গিয়ে স্বতন্ত্র বাসা কোচ্ছি । সমস্ত দিন খেটে খুটে এসে একটু আমোদ আফ্লাদ কর্কো, তাতে হানি কি ? আপনি এ রসের রসজ্ঞ নন, সেই জন্যই আমাদের সঙ্গীত আলোচনায় আপনার বিরক্ত বোধ হয় । মহাশয়, সখ সকল শরীরেই আছে, আপনি বুড় হয়ে সমস্ত বিষয়

জলাঞ্জলি দিয়েচেন বলে আমরাও কি দেব নাকি ? মশারি, সেতার কেবল বড় মানুষদের জন্যে হয় নি, এতে সবারই সমান অধিকার আছে ; এ বিদ্যে যে সাধে তারই হয় । ’ সেই লোকটি ঈষৎ হাস্য করিয়া বলিল, ‘ ভাই, তুমি সাধ, তাতে আমার কিছু ক্ষতি নাই ; কিন্তু একটু তফাতে গিয়ে সাধলে ভাল হয় । তোমাদের সাধার জ্বালায় আমরা যে রোজ রাত্রে ঘুমুতে পাবো না, তা হলে তো আর চোলবে না । ’ ব্রজ বাবু এই বার বৃদ্ধের শ্লেষ বাক্য শুনিয়া একেবারে প্রতিজ্ঞা করিল, ‘ আমরা কাল সকালেই স্বতন্ত্র বাসা কোরবো । ’

রাত্রিতে দুই ইয়ারে চুপি চুপি এই পরামর্শ করিল যে, ‘ আমাদের এখন তো মাসে দশ টাকা কোরে বাসা খরচ হয়, আর আপিসেও তিন চার টাকার জলপান খাওয়া যায়, একুনে ১৪।১৫ টাকা দাঁড়াচ্ছে ; এই টাকাতেই একটা বামুণ ও একটা চাকরাণী রেখে আমাদের অনায়াসে বাসা খরচ চোলতে পারে । ’ এই রূপ পরামর্শ স্থির করিয়া পর দিন প্রাতে লাল বাবুর বাজারের উপর আড়াই টাকা মাসিক ভাড়ায় এক ঘর ভাড়া হইল । পরে সাবেক বাসা হইতে দুইটা আম কাঠের সিন্ধুক, দুইটা জুগে মশারি, এক খানা ভাঙ্গা কেওড়া কাঠের তক্তা, এক খানা ছেঁড়া লেগ, দুইটা কাল বা-লিস, একটি পাতকুয়ার ঘটি, দুইটি পিতলের গেলাস, দুইটি ভোট পাতর, একটা কেঠো হুঁকা, একটি চূণ মাখা পা-ণের বাটা, ও কতকগুলি হাঁড়ি এবং দুইটি ঘেরা টোপ ঢাকা সেতার প্রভৃতি আসবাব হুতন বাসায় আসিয়া পৌঁ-ছিল । সে দিন হুতন বাসা গুছাইতে বেলা হইয়া পড়ায়,

বন্ধু দ্বয় দই ও চিড়ার ফলার করিয়া আফিসে গমন করিল। বৈকালে বাসায় আসিয়া তিন টাকা মাসিক বেতন ও খাওয়া পরায় এক জন পাচক নিযুক্ত হইল এবং একটি চাকরাণী ঠিকা মাহিনায় পাচকের সহকারী নিযুক্ত হইল। এই রূপে সমস্ত বন্দোবস্ত করিয়া বাবুরা মনের আনন্দে বারাণ্ডায় সেতার বাজাইতে বসিল। সেই সময় সম্মুখস্থ বারাণ্ডার উপর ছুই তিন জন বেশ্যা ও বেশ বিভ্রাস করিয়া আপনাদিগের ভাঙ্গা চোকির উপর উপবিষ্ট হইল।

ব্রজ বাবু ও তাহার বন্ধু শ্রীমচাঁদ বাবু সম্মুখস্থ বারাণ্ডায় সুবতী বেশ্যাদিগকে বসিতে দেখিয়া সেতারের তার পূর্কোপেক্ষা কিঞ্চিৎ চড়াইয়া লইল এবং মস্তক নাড়িয়া বাজাইতে লাগিল। বেশ্যারা বাবুদের প্রতি মধ্য মধ্য কটাক্ষ পাত করাতে নব বাবুরা দৃষ্টিবাণে জর্জরীভূত হইতে লাগিল। ক্রমে সন্ধ্যা হইল। আর দূরে দৃষ্টি চলে না দেখিয়া বাবুরা সেতার বাজানতে ক্ষান্ত হইয়া সকাল সকাল আহার করিতে গেল, সে দিন হুতন কর্মচারীরা আপন আপন কর্মে বিলক্ষণ তৎপর ছিল। পাচক আসিয়া বলিল, ‘বাবু, সমস্ত আহার সামগ্রী প্রস্তুত।’ পরিচারিকা তৎশ্রবণে আহারের স্থান করিয়া দিল, বন্ধু দ্বয় মনের আনন্দে সেই ভোট পাতরে আহার করিল। আহারান্তে বারাণ্ডায় দাঁড়াইবা মাত্র পরিচারিকা হাতে জল ঢালিয়া দিল, বাবুরা খড়িকা খাইতে না খাইতেই সে অমনি পাণের বাটা হইতে পাণ সাজিয়া রাখিল, বাবুরা আচমনান্তে বিছানায় উপবেশন করিল। পরিচারিকা তৎক্ষণাৎ ভামাকু সাজিয়া হাতে দিল। সেই রাত্রি হইতেই

পরিচারিকা বন্ধু দ্বয়কে ‘বড় বাবু’ ও ‘ছোট বাবু’ বলিয়া ডাকিতে লাগিল। সে রাত্রি এই প্রকারে অতিবাহিত হইল। পর দিন প্রাতঃকালে, ‘ছোট বাবু’ ও ‘বড় বাবু’ নিদ্রা ভঙ্গে বারাণ্ডায় আসিয়া দাঁড়াইল। পরিচারিকা অতি প্রত্যুষেই আসিয়া হাজিরা দিয়াছে। সে এক ছিলিম তামাকু সাজিয়া বাবুদের হস্তে দিয়া আপন কার্যে নিযুক্ত হইল। দুই ইয়ারে বারাণ্ডায় দাঁড়াইয়া তামাকু খাইতেছে ও এক এক বার বেশ্যাদের বারাণ্ডার দিকে চাহিতেছে ; কিন্তু তাহাদিগের এক জনকেও দেখিতে না পাইয়া মনে মনে কিছু বিরক্ত হইতে লাগিল। বাহা ইউক, এ দিকে বেলা হইল দেখিয়া উভয়ে প্রাতঃকৃত্য সমাপনান্তে গঙ্গা স্নান করিয়া আসিল। বাসায় অন্ন প্রস্তুত হইয়াছিল, পরিচারিকা আহারাদির উদ্যোগ করিয়া দিল। বাবুরা আহারান্তে বারাণ্ডায় দাঁড়াইয়া খড়িকা খাইতেছেন, এমন সময় বেশ্যারা দুই এক জন করিয়া দেখা দিল। তাহাদিগকে দেখিয়া বাবুরা অনেক হাঁচিলেন ও কাশিলেন। তৎকালে দুই এক জন বেশ্যা তাহাদিগের প্রতি আড় নয়নে চাহিয়া একটু মুচকিয়া হাসিল। ইহাতে বন্ধু দ্বয় আপনাদিগকে ভাগ্যবান্ বিবেচনা করিল ; কিন্তু বেলা হইয়াছে, আর দাঁড়াইলে চলিবে না বলিয়া অগত্যা ইচ্ছার বিপরীতে ভাড়াভাড়ি চাপ্কান ঝুলাইয়া আপিসে যাইতে বাধ্য হইল। ব্রজ বাবু ও শ্যাম বাবু এক স্থানে কর্ম করিত না, এই জন্য আপিসের ছয় ঘণ্টা কাল আর উভয়ের দেখা হইত না। সে দিন ব্রজ ও শ্যামের মনে সেই বেশ্যাদিগের মোহিনী মূর্তি জাগরিত হইতে লাগিল। কাজ কর্মে আর বড় মনোনিবেশ করিতে ইচ্ছা হইল না ; কিন্তু সেই দিন

ব্রজ কিঞ্চিৎ ‘উপরি রোজগার’ করিল। টাকা কটা নগদ হাতে আসিতেই মনে করিল, ‘কেঠো হুকোটা হাতে কোরে বারাণ্ডায় তামাক খেয়ে বেড়ান ভাল দেখায় না, মেয়ে মানুষগুলি মনে ভাববে কি? আজ যাবার সময় বড়বাজার থেকে একটা বাঁধা হুকো তয়ের কোরে নিয়ে যাওয়া যাবে।’ ছুটির পরে লালদিঘীর ধারে দুই বন্ধুতে সাক্ষাৎ হইল। ব্রজ শ্রামকে আপন অভিপ্রায় ব্যক্ত করিল, শুনিয়া শ্রাম তৎক্ষণাৎ তাহাতে সম্মতি দিল। দুই বন্ধুতে বড়বাজারে হুকো বৈঠক কিনিয়া লইয়া বাসায় আসিতেছে, এমন সময় সিঁদুরেপটীর রাস্তায় এক জন দুই খানা কেদারা বেচিতে যাইতেছিল। শ্রাম দর করিয়া সেই দুই খানা চোকি দুই টাকায় কিনিল। এতদ্ভিন্ন শ্রাম পূর্ক হইতে এক টাকায় দুইটা কাচের গেলাস কিনিয়া ছিল। এই সকল দ্রব্য সামগ্রী মুটের মাথায় দিবে বাসায় আনি। বারাণ্ডায় দুই দিকে দুই খানা চোকি পাতা হইল। পরিচারিকা দুই চারি পরসার জল খাবার ঠোঁড়ায় করিয়া আনিয়া পরিশ্রান্ত ‘বাবুদের’ হাতে দিল; পরে হুতন কাচের গেলাস করিয়া জল আনি। ‘বাবুদের’ খাবার খাওয়া শেষ হইলে, হুতন কাচের গেলাসে জল পান করিবার সময়ে আড় চক্ষে এক বার বারাণ্ডার দিকে চাহিয়া দেখিতে লাগিল যে, আমাদের এই আধিপত্য বেশীরা দেখিতেছে কি না? তাহাদিগের সে আশা পূর্ণ হইল। দেখিতে পাইল, এক জন বেশী তাহাদিগের প্রতি এক দৃষ্টে চাহিয়া চুল ঝাঁচড়াইতেছে। ‘বাবুদের’ এত কষ্টে আসবাব আনা সার্থক হইল! পরিচারিকা তৎক্ষণাৎ হুতন বাধা হুকায় তামাক আনিয়া দিল। তামাক খাওয়ার পর দুই জন মুখোমুখী হইয়া

মুতন চৌকিতে বসিল ও মধ্যস্থলে বৈঠকে বাধা হাঁকা রহিল । বন্ধু দ্বয় সেতারের আবরণ খুলিয়া গত বাজাইতে আরম্ভ করিল । এ দিকে বেশ্যারাও বেশ বিস্তার করিয়া আপন আপন স্থানে আসিয়া বসিল । ইহাতে ‘বাবুদের’ সৌভাগ্য গর্ভ একেবারে উদ্বেল হইয়া উঠিল । সেতার বাজাইতে বাজাইতে এক এক বার ‘ওরে, তামাক দিয়ে যা !’ বলিয়া হাঁক হাঁকিতেছে, আর বেশ্যাদিগের দিকে চাহিতেছে । উভয়েরই মনে মনে হইতেছে যে, ‘আমরা যে উচ্চ দরের চাকরী করি, বেশ্যাদিগের তা বিলক্ষণ বোধ হোয়েছে; কেন না, কাল অবধি ওরা আমাদের প্রতি ক্রমাগতই চেয়ে দেখেছে । এ বিষয়ে আমাদের একটু ধৈর্য্য ধারণ কোর্ত্তে হবে । ওরাই উপযাচক হোক । আমরা যদি আপনা হতে যাই, তা হলে, বেশী টাকা লাগবে, আর ওরা যদি যত্ন করে আমাদের নিয়ে যায়, তা হোলে, আমরা যা দেব, তাতেই রাজী হতে হবে ।’ বেশ্যাকটারও অবস্থা ভাল নহে, তাহাদেরও নিত্য উপার্জ্জনের উপর ভরসা, একটি পয়সাও সঞ্চিত নাই । সম্মুখে ছুই জন ‘বাবু’ পাইয়া বাড়াবাড়ি হাব ভাব প্রকাশ করিতে লাগিল । তাহাদিগের মধ্যে ‘বামী’ নামী এক জন বেশ্যা একটু অন্ধকার হইলে, ‘বাবুদিগকে’ সম্বোধন করিয়া বলিল—‘ওগো বাবুরা, আজ তোমাদের সেতারের গলা ভেঙ্গে গেছে কেন ?’ ব্রজ অমনি সহর্ষে বলিল, ‘আজ আমাদের সেতার দই খেয়েছিল ।’ বামী বলিল, ‘ছি বাবু ! তোমাদের সেতারের এমন ছুখে গলা ! দই খেলে যোসে যায় ? ব্রজ বলিল, ‘ভুমি যে কাণে শুন্তে পাও না, তা আজ আমরা টের পেলুম ।’ বামী বলিল, ‘তা না হয় অনুগ্রহ করে গরিবের ঘরে এসে এক দিন

শুনায় গেলেন হয় না ? যদি কাল বলে অশ্রদ্ধা না করেন, তা হলে, আজ আমার ঘরে আপনাদের সেতার বাজাবার নেমন্তন্ন রইল ।’ শ্রাম অপেক্ষা ব্রজ কিছু বেশী রসিক ছিল, সে তৎক্ষণাৎ তাহার এই উত্তর দিল, ‘আমার কৰ্ত্তে আমার বন্ধুটি সেতার বাজান ভাল’ বলিয়া শ্রামকে বলিল, ‘ইয়ার, কেমন হে যাবে ত ? বন্ধু ! জীলোকের অপমান করা উচিত নয় । ইহা অপেক্ষা উপযাচক আর কাকে বলে ? চল, আজ খাওয়া দাওয়া করে এদের হাঠ হদ্দ দেখে আসি । সুযোগ ঘটে রাত্রে থাকা যাবে ; তা না হয়, খানিক আমোদ আহ্লাদ কোরে চলে আসবো ।’ এই রূপ পরামর্শের পর আহারান্তে দুই বন্ধু একত্রিত হইয়া একটি সেতার লইয়া বেশা-লয়ে উপস্থিত হইল । ‘বাবুদিগকে’ সমাগত দেখিয়া বামী অত্যন্ত সম্ভ্রষ্ট হইয়া রীতি মত অভ্যর্থনা করিল । সেই বাটীর তিন জন বেশার মধ্যে এক জনের একটু স্বর-বোধ ছিল । সে বামীর ঘরে আসিয়া শ্রামকে একটি গত বাজাইতে অনুরোধ করিল । শ্রামের মৎ সামান্য বাজান অভ্যাস ছিল । মনে মনে ভাবিল, ‘এরা কি আর কিছু বুঝতে পারবে ? আমি যা বাজাব তাতেই আমাকে সেতারাী বলে বোধ করবে ।’ সেতারের ধনি আরম্ভ হইল । বেশাটি দুই চারি মিনিট বসিয়া হাস্য করিয়া উঠিয়া গেল । বামীর বাদ্য শুনিবার অভিপ্রায় নহে । সে যে অভিপ্রায়ে ‘বাবুদিগকে’ ডাকিয়া আনিয়াছে, তাহারই সুযোগ দেখিতে লাগিল ; কিন্তু ‘বাবুদের’ রিক্ত হস্ত । তাহারা ভাবিয়া চিন্তিয়া আঘাতে গল্প আরম্ভ করিল যথা ;—‘বামটাদ বাবু, তোমাকে এক দিন আমাদের বাগানে

নিশ্চয় যাব । কাল মালী বেটাকে বোলে দেব, তোমার বাড়ীতে একটা ডালি দিয়ে যাবে । আর ভাই, খেটে খেটে প্রাণ ওষ্ঠাগত হোলো! সাহেব বেটা তিন শ টাকা মাইনে দিয়ে যেন মাথা কিনে রেখেচে । আমাদের তো আর ভাই, পেটের ভাতের জন্তে চাকুরী করা নয়—সখ কোরে চাকুরি করা । তা এবার সাহেব বেটাকে বোলেচি, যদি পাঁচ শ টাকা কোরে মাইনে দিতে পার, তবেই থাকুবো, তা নইলে, মাস দুই তিনের মধ্যেই চাকুরী ছেড়ে দেব । আমারই জমিদারিতে দেড় শ টাকা মাইনে দিয়ে একটা সাহেব রেখেছি । আপনার কাজ কর্ম দেখলেই আর রক্ষে থাকে না ।’ এই কপ নানা কথাবার্তার পর ব্রজ বাবু বলিল, ‘তবে ভাই, আজ আসি, ঢের রাত হয়েছে, হয় ত কাল আবার আস্টি ।’ বামীর তখনও বিশ্বাস ছিল যে, ‘বাবুরা’ যাবার সময় কিছু দিয়ে যাবে ; কিন্তু তাহারা যখন রাত্তা পার হইয়া বাসায় প্রবেশ করিল, তখন বামী একটি দীর্ঘ নিশ্বাস ছাড়িয়া ঘরে আসিয়া বসিল । তাহারা যাইবার পরে অপর এক জন বেষ্টা আসিয়া জিজ্ঞাসা করিল, ‘কি বামচাঁদ দিদি, বাবুরা কি দিয়ে গেল?’ বামী আপনার মান রক্ষা করিবার জন্ত বলিল, ‘আট টাকা দিয়ে গেছে ।’

ক্রমে রাত্রি প্রভাত হইলে, বাবুরা খাইয়া দাইয়া পূর্ব দিনের মত আপিস গেল । আসিবার সময় মেছোবাজার হইতে চার আনা দিয়া গোটা কত বাতাপি নেবু, পাঁচ আনায় দুটি ছোট ছোট কাডলা মাছের ছানা, দুই পয়সার ডাঁটা, আর এক পয়সার টেঁড়স কিনিয়া ঝুড়ি পুরিয়া ‘বামচাঁদের’ বাটিতে একটা উড়ে মুটেকে বাগানের মালী সাজাইয়া পাঠাইয়া দিল । বাবুর বাগান থেকে ডালি আসা ‘বামচাঁদের’ ভাগ্যে কখনও ঘটে নাই

বলিয়া সেই ডালিই তাহার পক্ষে যথেষ্ট বোধ হইল। সে মুটেকে চার পয়সা বকুসিস দিয়া বিদায় করিল। তাহার পর আপন পরিচিত বেষ্টাদিগকে দুই চারিটা নেবু বর্টন করিতে লাগিল; কিন্তু মাছের বথরা বাটির বাহির হইল না, কারণ মাত্রায় অতি অল্প। এ দিকে যথা সময়ে ব্রজ বামীর বাটিতে আসিয়া উপস্থিত হইল। সে দিন শ্রাম কিছু অল্পই ছিল; এই জন্য যাইতে পারিল না। ব্রজ বামীকে একলা পাইয়া সেই রাত্রে মাখামাখি আলাপ করিয়া ফেলিল। কথাবার্তায় অনেক রাত্রি হইয়া পড়াতে সে রাত্রে আর বাসায় যাওয়া হইল না। ব্রজ ভোরের বেলায় উঠিয়া আসিবার সময় বামীর হাতে একটি টাকা দিয়া বলিল, ‘আজ রাত্রে আসিয়া তোমার একটা মাইনের বন্দোবস্ত করিয়া ফেলিব।’ প্রাতে বাসায় গিয়া ব্রজ শ্রামকে গত রাত্রের সমস্ত কথা বলিল। উভয়ে বেলা নয়টা পর্য্যন্ত বাঁধা হুঁকা হাতে করিয়া বারাণ্ডায় তামাকু খাইতে লাগিল। বামীও মাঝে মাঝে এক বার ঝাঁকি দর্শন দিয়া ও মূহু মূহু হাসিয়া ব্রজকে স্নেহের সাগরে ভাসাইতে লাগিল। তাহার পর নিয়মিত সময়ে আহালাদি করিয়া উভয়ে আপিসে চলিয়া গেল। সন্ধ্যার সময় ব্রজ বামীর বাটিতে গিয়া এই অবধারিত করিল যে, আমি রাত্রি দশটার পরে আসিব ও বার টাকা করিয়া মাহিনা দিব। বামী তাহাতেই স্বীকৃত হইল। ব্রজর অপেক্ষা শ্রামের একটু লেখা পড়া বোধ ছিল। যদিও সে মধ্যে মধ্যে ব্রজর সহিত বামীর বাটিতে যাইত; কিন্তু সে রসে রসজ্ঞ হইত না। ব্রজ মহা আমোদ আহ্লাদে বামীকে লইয়া দুই মাস কাটাইল। এই দুই মাসের মধ্যে বামীকে আট টাকা ও একটি

ইলিশ মাছ দেওয়া হইয়াছিল মাত্র । পরে বামী গতিক দেখিয়া টাকার তাগাদা আরম্ভ করিল । ব্রজ আজ দেবো কাল দেবো করিয়া আরও পোনের দিন কাটাইল । বামী অত্যন্ত পীড়াপীড়ি করিয়া বলিল, ‘আমাকে আজ টাকা দিতেই হবে ; তা না হলে, তোমার বাসায় দশ জনের সম্মুখে তাগাদা কর্কে । তোমার যত ক্ষমতা সব টের পেয়েচি ।’ ঐ সূত্রে ব্রজ বাবুতে ও বামীতে বিলক্ষণ মারামারী হইল । ব্রজবাবু রাগ করিয়া বাসায় চলিয়া গেলে, বামী আপনার বারাণ্ডায় দাঁড়াইয়া বাহা মুখে আসিল, তাহাই বলিয়া ব্রজকে গালি দিতে লাগিল ।

এ দিকে ব্রজর যে ভিতরে ভিতরে প্রায় আড়াই শত টাকা দেনা হইয়া গিয়াছে, আমোদে সে কিছুই টের পায় নাই । বাবুর বাসার নীচে এক খানি মিঠাইওয়ালার দোকান ছিল । সেই খান হইতে প্রত্যহ দুই ইয়ারের জল-যোগের দ্রব্য লওয়া হইত । তাহার পর বামীর বাটীতে অবিরত দুই আড়াই মাস কাল খাবার লওয়া হইয়াছে, তাহাকে যে টাকা দিতে হইবে, সে সময়ে তাহা এক বারও মনে হয় নাই । মিঠাই-ওয়ালার এত টাকা হইয়াছে, তাহা শ্রামও জানিত না । সে মাসে মাসে মাছিনা পাইলেই বাসা খরচ সম্বন্ধে কড়ায় গণ্ডায় ব্রজকে বুঝাইয়া দিত । ব্রজ তাহার একটি পয়সা কাহাকেও না দিয়া অপব্যয় করিয়া ফেলিত । এতদ্ভিন্ন আপিসে ছু টাকা পাঁচ টাকা করিয়া অনেকরই নিকট ধার করিয়াছিল । বাজারে ফোড়েদের নিকট আলু, পটল, ফল, মূল, মেছুনীর নিকট মাছ, গোয়ালিনীর নিকট দুধ এবং কাপড়ওয়ালার নিকট কাপড় এই সমস্তই তিন চারি মাস ধারে চলিয়াছে ;

ব্যাপক কাল বাটীতে এক পরসাগ পাঠাইতে পারে নাই। সেখা
 দ্বী পুত্র পরিবারেরা অগত্যা অন্য উপায় না দেখিয়া হাওলাত
 বরাদ্দ করিয়া গুজরাণ চালাইয়াছে। ব্রজ যে রাত্রে বামীর গালা-
 গালি শুনিল, সেই রাত্রি প্রভাতেই মিঠাইওয়ালার খাতা লইয়া বাবুর
 নিকট হিসাব শোধ করিতে আসিল। শ্যাম বাবু মিঠাইয়ের
 খাতায় ত্রিশ টাকা খরচ দেখিয়া একেবারে আশ্চর্য্য হইয়া
 পড়িল। খাতা সম্বন্ধে মিঠাইওয়ালার সহিত ব্রজবাবুর বাখিতগু
 হইতেছে, এমন সময়ে গোয়ালিনী আসিয়া উপস্থিত হইল এবং
 কহিল, ‘আমার বার তের টাকা পাওনা হইয়াছে, আমাকে
 টাকা না দিলে, আর দুধ দিতে পারিব না।’ ও দিকে
 বারাণ্ডায় দাঁড়াইয়া বামী সমস্তই শুনিল এবং মনে নিশ্চয়
 অবধারিত করিল, ‘এ বেটা জুয়াচোর, আমাকে আর
 এক পরসাগ দিবে না, তবে আর কেন—মনের খেদ মিটা-
 ইয়া গালাগালি দিয়ে লই না, ওর আর মুখ অপেক্ষা কি?’ এই
 রূপ ভাবিয়া বামী আপনার বারাণ্ডায় দাঁড়াইয়া বলিল, ‘ওগো
 দোকানি ঠাকুর, বাবুর নামে খরচ লিখে আমাকে এক টাকার
 জলখাবার দিয়ে যাও, বাবুর কাছে টাকার ভয় নেই, তিনি মায়
 খোরাকি তিন শ টাকা মইনে পান। ওগো দোকানি ঠাকুর, বাবুর
 বাগানের ডালি টালি এক দিনও পাও নি?—মরণ আর কি!
 যত জোচ্ছোরের জায়গা কলকৈতায়। ওগো গয়লা দিদি, দোর
 চেপে বোসো, আজ রাত্রেই কাঁৎলা মাজুর গুটিয়ে পালাবে।
 দুটো সেতার আছে, বেচলে দু টাকা পাঁচ টাকা হতে পারে।’ এই
 সকল কথাবার্তা হইতেছে, এমন সময় মেছুনী রোজের মাছ দিতে
 উপস্থিত হইল। সে সমস্ত কথা শুনিয়া বলিয়া উঠিল, ‘ও মা!

আমিও যে সাত টাকা পাব !’ এই কথা বলিয়া মাছের চুবড়ি হাতে করিয়া সেই খানে বসিয়া পড়িল । মিঠাইওয়ালা বলিল, ‘বামচাঁদ, তোমাকে এ টাকার কিনারা করে দিতে হবে, আমি বাবুর ঘর চিনি নে, দোর চিনি নে, কেবল তোমার খাতিরেই দিয়েছি ।’ এই কথা শুনিয়া বামী একেবারে ক্রোধে উদ্ভূত হইয়া উঠিল এবং পূর্বাপেক্ষা শত গুণ চীৎকার করিয়া বিক্রপ ও গালি দিতে আরম্ভ করিল । একে প্রকাশ্য পথের উপর, তাহাতে বেশ্যার চীৎকার শুনিয়া অনেক লোক দাঁড়াইতে লাগিল । এই রূপে একটা হলস্থূল ব্যাপার বাধিয়া উঠিল ; দেখিয়া শুনিয়া শ্যাম কিছু ক্ষণ ভূত ভবিষ্যৎ বর্তমান ভাবিল, কাহারও কথায় কোন কথা কহিল না, কেবল আপনাকে অবশুই ক্ষতি স্বীকার করিতে হইবে, এই চিন্তায় আকুল হইয়া উঠিল । বাবুর গুপ্তলীলা প্রকাশ হইয়া পড়াতে পাচক ও পরিচারিকা বিনয় বচনে শ্যাম বাবুকে বলিতে লাগিল, ‘বাবু, আমাদের উপায় হবে কি ? আমরা গরিব মানুষ ।’ তাহাদিগের কাতরোক্তি শুনিয়া শ্যামের কিঞ্চিৎ ক্রোধের সঞ্চার হইল এবং উদ্ভূত স্বরে ব্রজ বাবুকে বলিল, ‘কি হে, এদেরও কি মাইনেগুলো মাসে মাসে ফেলে দাও নি ?’ ইহা শুনিয়া গোয়ালিনী ও মেছুনী বলিল, ‘বাবু, আমরাও এক পয়সা পাই নি ।’ শুনিয়া শ্যাম বলিল, ‘কেমন হে ব্রজ, আমি বাসা খরচ মাস মাস তোমাকে সব চুকিয়ে দিয়েছি ?’ ব্রজ ঘাড় গুঁজিয়া স্বীকার করিল । পরে শ্যাম বলিল, ‘তবে আমি এদের কাক কাছে দেনদার নই ।’ ব্রজ বলিল, ‘না, এ সমস্ত দেনাই আমার ।’ শ্যাম বলিল, ‘কেমন গো, তোমরা সকলে শুন্নে ? আমি এখন এ

বাসা থেকে অব্যাহতি পেতে পারি ?’ এই কথা বলিয়া শ্যাম আপনার চাদর লইয়া বাহিরে চলিয়া গেল। শ্যাম বন্ধুর ব্যবহারে ষার নাই ছুঃখিত হইয়া সাবেক বাসায় আসিয়া উপস্থিত হইল। পূৰ্ণ উপদেষ্টা ব্রাহ্মণ হঠাৎ শ্যামকে আগত দেখিয়া বলিলেন, ‘কি হে, এখন তোমরা কোথায় থাক ? এই দুই তিন মাসের মধ্যে কি একবার দেখা কোর্তের নেই ? তোমাদের ভালর জন্তেই দুটো উপদেশের কথা বলেছিলাম, তার জন্ত কি এত দূর কর্তে হয়!’ ব্রাহ্মণের কথা শুনিয়া শ্যাম একেবারে তাহার পা জড়াইয়া ধরিল এবং কহিল, ‘মহাশয়! আপনার উপদেশ না শুনিয়া যেমন এ বাসা পরিত্যাগ করিয়াছিলাম, তাহার উপযুক্ত ফল হইয়াছে, এক্ষণে আমার অপরাধ মার্জনা করুন।’ তাহার পরে শ্যাম ব্রজ বাবুর সমুদয় কাণ্ড ব্রাহ্মণের নিকট বর্ণন করিল। ব্রাহ্মণ শুনিয়া ‘উত্তম হইয়াছে’ বলিয়া আত্মসম্মতি প্রকাশ করিলেন না, বরং ব্রজকে রক্ষা করিবার কোন উপায় আছে কি না, শ্যামকে তাহাই জিজ্ঞাসা করিলেন। শ্যাম বলিল, ‘মহাশয়, আমরা সামান্য লোক, মাসে ২০।২৫ টাকা উপার্জন করি, ইহাতে কি প্রকারে ব্রজর উপকার করিব ? আমার বোধ হয়, সে দুই তিন শত টাকা দেনা করিয়া ফেলিয়াছে। এক্ষণে টাকা ভিন্ন আর ব্রজকে রক্ষা করিবার কোন উপায় নাই। আজি কালির মধ্যে সমস্ত পাওনাদারেরা একেবারে ব্রজর উপর নালিশ করিবে। মিঠাইওয়ালা বলিয়া গেল যে, সে একেবারে খাড়া শমন করিয়া ব্রজকে গ্রেপ্তার করিবে। পলায়ন ভিন্ন এক্ষণে তাহার আর অন্য উপায় নাই।’

এ দিকে ব্রজ পাওনাদারদিগকে নানা মতে স্তোক দিয়া

বিদায় করিল। তাহার পর ভাবিয়া চিন্তিয়া অন্য কোন উপায় না দেখিয়া স্বদেশে পলায়ন করিতে বাধ্য হইল। বাটীতে গিয়া দেখে, দুর্দশার অবধি নাই। ঘর ছুই খানির খড় উড়িয়া গিয়াছে, পরিবারদিগের পরিধেয় বস্ত্র নাই, আহা-রাদির কষ্টে ছেলেগুলির শরীর শীর্ণ হইয়া পড়িয়াছে, পাওনা-দারেরা তাগাদা করিয়া পরিবারদিগকে ব্যতিব্যস্ত করিয়া তুলি-তেছে। কর্তা আজ বাটী আসিবেন, কাল বাটী আসিবেন বলিয়া পরিবারেরা এত দিন তাহাদিগকে ক্ষান্ত করিয়া রাখিয়াছিল, তাহার পর কর্তা বাটী আসিয়াছেন শুনিয়া সকল পাওনাদাররাই খাতা বগলে করিয়া আসিতে লাগিল। ব্রজর হাতে এক কড়াও নাই, কিসে নিস্তার লাভ করিবে।

ব্রজ যে দেশে বিদেশে এই রূপ অপমান হইতে লাগিল, এই অপমান হইবার বীজ কোথায়? তাহার অবস্থার দিকে দৃষ্টি না রাখিয়া কার্য্য করাই এই সমস্ত শাস্তি ভঙ্গের মূল কারণ। সে যদি আপনার সাবেক চাল পরিভ্যাগ না করিত, তাহা হইলে, এই সামান্য উপার্জ্জনের উপর নির্ভর করিয়া মনের স্বখে কাল যাপন করিতে পারিত। বিলাস পরিপূরিত নগরে আসিয়া বাস করিতে হইলে, কেবল নিম্ন দিকে দৃষ্টি রাখিয়া চলিলে, বিপদে পড়িয়া কষ্ট পাইবার সম্ভাবনা থাকে না। উর্দ্ধ দৃষ্টি করিলেই মস্তক ঘুরিয়া যাইবেক, বিলাস মুর্ত্তিমান হইয়া সম্মুখে দাঁড়াইবে ও বুদ্ধির ভ্রম জন্মাইয়া দিবে। বিলাস যদি একবার অশিক্ষিত মনকে স্পর্শ করে, তাহা হইলে, আর রক্ষা নাই। ব্রজ যদি তিন টাকার জুতা কিনিতে কাল বিলম্ব করিত, তাহা হইলে, তিন চার মাসের মধ্যে তাহাকে এইরূপ দুর্দশা-

গ্রস্ত হইতে হইত না । যদি বেশ্যাদিগের বারিকের নিকট না আসিয়া কোন গৃহস্থ পল্লীতে বাস করিত, তাহা হইলে, তাহাকে বেশ্যার প্রলোভনে পড়িয়া বেশ্য কৰ্ত্তৃক অপমানিত হইতে হইত না । যদি বেশ্যার নিকট আপনাকে ধনবান্ বলিয়া প্রতিপন্ন করিবার অভিলাষ না করিত, তাহা হইলে, বাধা হুঁকা, চৌকি ও প্রত্যহ ধোপ কাপড়ে এবং মিঠাইগুলার দোকানে উঠনা লইবার প্রয়োজন হইত না । যদি সেতার হস্তে না করিত, তাহা হইলে, তাহাকে সাবেক বাসা পরিত্যাগ করিতে হইত না । কেবল সেতারের অনুরোধেই তাহার রন্ধন শালা ব্যাভ্রের দ্বায় বোধ হইল, হিতেচ্ছু ব্রাহ্মণের সহিত কলহের কারণ হইল, বেশ্যাগণে প্রবেশ করিবার সোপান হইল । সেই সেতার এবং প্রাণের প্রতিমা বামীকে ফেলিয়া যখন ব্রজ পলায়ন করিল, তখন ঐ দুই প্রিয় বস্তুকে এক বার মনে করিবারও অবসর হইল না । যখন সেতার ও বামী ব্রজ বাবুকে অৰ্দ্ধ প্রাস করিয়াছিল, তখন যদি তাহার কোন বিচক্ষণ বন্ধু বামীর বাটীতে যাইতে নিষেধ করিতেন, সেতার বিক্রয় করিয়া বাটীতে খরচ পাঠাইতে বলিতেন, তাহা হইলে কি ব্রজ বাবু তাহার বন্ধুর উপদেশ সেই মন্তভার সময় গ্রহণ করিত ? কখনই করিত না । যখন ধন গেল, মান গেল, অপমানের এক শেষ হইল, তখন ব্রজ আপনা আপনি শাস্ত মুক্তি ধারণ করিল । লোকে যে বিলাসী হইয়া আপন যুক্তিতে কষ্ট পায় ও মনের শান্তি ভঙ্গ করে, ব্রজর আখ্যায়িকাই তাহার দৃষ্টান্ত স্থল ।

সংসার তরঙ্গ ।

সংসার শব্দের প্রকৃতার্থ অদ্যাপি স্থির হয় নাই । ইহার আদি নাই অন্ত নাই । কেহ কেহ স্ত্রী পুত্র পরিবার লইয়া দিন পাত করাকে সংসার कहিয়া থাকেন । কেহ বা বিবাহের পরই সংসারী হইলেন, পূর্বে সংসারী ছিলেন না, এই কথার উল্লেখ করিয়া থাকেন । শাস্ত্রকারেরা এই সংসার লইয়া কত কথারই আশ্চর্যজনক করিয়া গিয়াছেন । কেহ কেহ লিখিয়াছেন যে, এ সংসারের সমস্তই মায়াময়, ইহাতে কিছুই সার নাই । কেহ বা সংসার যাত্রা নির্বাহ করাকে অমূলক স্বপ্নের সহিত তুলনা করিয়াছেন । যেমন আমরা স্বপ্নে কখন বা সুখ কখন বা দুঃখ ভোগ করিয়া থাকি, নিদ্রা ভঙ্গের পর সেই স্বপ্ন বৃত্তান্ত স্মরণ হইলে, কখন বা হাস্য করিয়া থাকি, কখন বা ভয়ে বিহ্বল হই, স্ত্রী পুত্র লইয়া সংসার করাও তেমনি একটি অলীক স্বপ্নের ন্যায় । মৃত্যুর পর কে কোথায় থাকিবেক, তাহার কিছুই স্থিরতা নাই । আমিই বা কে ? কোথা হইতেই বা আসিয়াছি ? কেনই বা এই সংসার আবর্তনে পড়িয়া দুঃখ ভোগ করিতেছি, সুখ ভোগ করারই বা ফল কি, দুঃখ ভোগেই বা কষ্ট কি, মরিতেই বা ভয় কি, অদ্যাপি ইহার কিছুই নির্ণয় হয় নাই, কোন কালে যে হইবে, তাহারও আশা করা যায় না । কেহ কেহ এই সংসারকে রূপকে বর্ণনা করিয়া সংসারবাসী জনগণকে ঘোরতর ভ্রম প্রমাদে

নিপতিত করিয়াছেন। তাঁহারা এই সংসারকে একটি প্রকাণ্ড নদীর স্বরূপ করিয়া বর্ণনা করিয়া থাকেন। এই ভবনদী মকর কুস্তীর প্রভৃতি ভয়ঙ্কর হিংস্র জল জন্তুতে পরিপূর্ণ। এই নদীতে সর্কক্ষণ ভরঙ্গ তুফান হইতেছে। এই নদীর অপরাপারে সর্ক স্বখপ্রদ একটি পরম রমণীয় স্থান আছে, কোন স্রোযোগে সেই স্থানে যাইতে পারিলে, শান্তি স্রুখ সম্ভোগ করিতে পারা যায় ; কিন্তু এই ভয়ানক নদী পার হইবার উপযুক্ত তরণী নাই ও কাণ্ডারীও নাই, কেবল ভক্তিমান লোকেরাই ভগবানের পাদপদ্মকে তরণী করিয়া ভবনদীর অপর পারে যাইতে পারে ; এতদ্ভিন্ন ভবনদীর পারে যাইবার আর উপায়ান্তর নাই। এই রূপক বর্ণনার নানা অর্থ আছে। যাঁহার যাহা ইচ্ছা হইয়াছে, তিনি সেই ভাবেই আপন বিদ্যা প্রকাশ করিয়া সংসারবাসী জনগণকে প্রকৃত ভাবে বঞ্চিত করিয়া রাখিয়াছেন।

শাস্ত্রকারেরা যে সংসারকে স্বপ্নের আয় অমূলক ও ভয়ানক নদী বলিয়া বর্ণনা করিয়াছেন, এ সমস্তই কি অলীক কথা? না, ইহাতে কিছু মাত্র সার আছে। আমার বিবেচনায় তাঁহাদিগের সেই সকল রূপক বর্ণনা অতি চমৎকার এবং আয় যুক্তি ও ধর্ম সঙ্গত। এ সংসার মায়াবয়, এ কথার প্রতিবাদ কে করিবে? মায়া যেমন আমাদিগকে একটা নিতান্ত অলীক পদার্থের উপর আকৃষ্ট করিয়া দেয়, এ সংসারও তদনুরূপ। ইহার দৃষ্টান্ত স্থলে বিশ্বশাসক রাজার উপাখ্যানটি সর্কতোভাবে সঙ্গত বলিয়া বোধ হয়।

কোন সময়ে এই পুণ্য ক্ষেত্র ভারত ভূমে বিশ্বশাসক নামে এক জন প্রবল পরাক্রান্ত নরপতি ছিলেন। তিনি আপন

ভুক্ত বলে সমস্ত ভূপালগণকে অধীনে আনিয়া দীর্ঘ কাল এই ভারতবর্ষে রাজত্ব করিয়াছিলেন। অনেক ষাগ যজ্ঞ করিয়া বৃদ্ধাবস্থায় তাঁহার একটি পুত্র হয়। রাজা শেষ দশার পুত্র রত্নপাইয়া সমস্ত রাজ কার্য্য পরিত্যাগ করিলেন এবং সর্ব্বক্ষণ রাজা ও রাজ্ঞী সেই পুত্রের লালন পালনে ব্যতি-
ব্যস্ত হইয়া রহিলেন। দিনান্তে এক বার ঈশ্বরারাধনা করা দূরে থাকুক, নিয়মিত সময়ে স্নানাহার করিতেও কোন কোন দিন বিস্মৃত হইয়া বাইতেন। পুত্রটি ক্রমে ক্রমে যৌবন সীমায় পদার্পণ করিল। পিতা মাতার অধিক যত্নে রাজকুমারের শরীরের লাভণ্য সমধিক বৃদ্ধি পাইয়াছিল ; কিন্তু কপের সমতুল্য গুণ হয় নাই। রাজা সেই পুত্র লইয়া মনের আনন্দে কাল হরণ করিতেছেন, এমন সময় দৈব প্রতিকূলবশতঃ সর্পাঘাতে সেই পুত্রটি গতায়ু হইল। রাজা এবং রাজ্ঞী পুত্র শোকে শয্যাশায়ী হইয়া রহিলেন। রাজার এক জন বহুদর্শী বিজ্ঞ মন্ত্রী ছিলেন। তিনি রাজ্যের কুশল কামনার জন্য এক দিন রাজ সমীপে গিয়া বলিলেন, মহারাজ, যমপীড়ন যজ্ঞ আরম্ভ করুন, তাহা হইলে, মৃত পুত্র পুনঃ প্রাপ্ত হইতে পারিবেন। যজ্ঞ সম্বন্ধে মন্ত্রীর সহিত রাজার অনেক কথাবার্ত্তা হইল, এ স্থলে সে সকল বিস্তারে বর্ণন করা নিষ্প্রয়োজন। ফলতঃ মন্ত্রীর পরামর্শানুসারে রাজা কয়েক জন সুযোগ্য ব্রাহ্মণ আনাইয়া শাস্ত্র সম্মত যমপীড়ন যজ্ঞ আরম্ভ করিলেন। যজ্ঞের অন্যান্য কার্য্য সম্পন্ন করিয়া ব্রাহ্মণগণ যখন পর্য্যায় ক্রমে যম রাজকে লক্ষ্য করিয়া অষ্ট ধাতু নির্ম্মিত ঢেঁকিতে পাড় দিতে লগিলেন, তখন সেই আঘাত প্রেত পতি অসত্য বোধ করিয়া চিত্রগুপ্তকে তাহার কারণ জিজ্ঞাসা করাত্তে যম রাজের প্র-

ধান অমাত্য বিশ্বশাসক রাজার বমপীড়ন যজ্ঞের কথা আত্মপূর্বিক বর্ণন করিলেন । তৎ শ্রবণে বম রাজ অগত্যা অন্ত উপায় না দেখিয়া কিস্করগণকে কহিলেন, রাজার মৃত পুত্র কোথায় আছে, সত্ত্বর আমার নিকট আনয়ন কর । বম কিস্করেরা একটি মৎস্তরাজ পক্ষী বমের নিকট আনিয়া উপস্থিত করিল । তদ্রূপে ধর্মরাজ ক্রুদ্ধ হইয়া বলিলেন, ওরে কিস্করগণ ! তোরাও এই বিপদের সময় আমার সহিত পরিহাস করিবি ? রাজপুত্রকে না আনিয়া এই পক্ষীকে আনিয়া উপস্থিত করিলি কেন ? শুনিয়া পক্ষী কহিল, ধর্মরাজ ! আমিই সেই রাজপুত্র । রাজাকে উচিত শাস্তি দিবার জন্যই পুত্র রূপে তাহার ঔরসে জন্ম গ্রহণ করিয়াছিলাম । আপনি আমাকে সমভিব্যাহারে লইয়া সেই রাজার নিকট চলুন, রাজার সম্মুখেই আমি আপন বৃত্তান্ত আদ্যোপান্ত সমস্ত বর্ণন করিব । প্রেত পতি তাহাই করিলেন । তিনি রাজ সমীপে উপস্থিত হইয়া কহিলেন, মহারাজ ! কি জন্য অকারণ আমাকে পীড়ন করিতে আরম্ভ করিয়াছেন ? এই আপনার পুত্র গ্রহণ করুন । পক্ষী সেই সময়ে রাজ পুত্রের মূর্ত্তি ধারণ করিয়া বলিল, অহে অজ্ঞানাজ্ঞ রাজা ! তুমি কাহার শোকে অধৈর্য্য হইয়া বমপীড়ন যজ্ঞ আরম্ভ করিয়াছ ? আমি তোমার পুত্র নহি, পরম শত্রু । তোমার কি স্মরণ হয়, তুমি এক দিন যুগয়া করিতে গিয়া বিপিন মধ্যস্থিত একটি সরোবর তীরে দাঁড়াইয়াছিলে ? সেই সময়ে আমি ক্ষুধায় কাতর হইয়া বহু কষ্টে একটি ক্ষুদ্র মৎস্ত ধরিয়া আহার করিবার উপক্রম করিতেছি, এমন সময়ে তুমি শর সজ্জানে আমার প্রাণ বিনষ্ট করিলে, মুখের গ্রাস খাইতে দিলে না ? সেই আক্রোশে আমি তোমার ঔরসে পুত্র রূপে জন্ম গ্রহণ করিয়া বৈরনির্ধাত্তন

করিয়াছি। এই দেখ, আমিই সেই পক্ষী কি না? এই কথা বলিয়া রাজপুত্র তৎক্ষণাৎ মৎস্যরূপ পক্ষী হইয়া প্রেতপুরে চলিয়া গেল।

তৎপরে যম রাজ নরপতিকে কহিলেন, রাজন্, পুত্র শোকে অর্ধৈর্য্য হইয়া আপনি অকারণ পর পীড়নে রত হইয়াছেন। কে কাহার পুত্র, কে কাহার পিতা? এ মায়াময় সংসারে সকলই অনিত্য। যত দিন মনুষ্যের মায়া ভ্রম দূর না হয়, তত দিন আমার পুত্র, আমার ধন, আমার রাজ্য, এই রূপে আমার আমার করিয়া পরমাযু ক্ষয় করে; সে যে প্রতি দিন, প্রতি দণ্ডে ও প্রতি মুহূর্ত্তে মৃত্যুর সমীপবর্ত্তী হইতেছে, ইহা একবারও ভাবিয়া দেখে না; অতএব মহারাজ, আমি আপনাকে সারকথা কহিতেছি এই যে, বৃদ্ধবয়সে পুত্র শোকে কাতর হইয়া মনের শাস্তি ভঙ্গ করিবেন না। মৃত্যুকাল প্রায় আগত বিবেচনা করিয়া ভক্ত জ্ঞানে মনোনিবেশ করুন। যদি এখনও আপনার চৈতন্যোদয় না হয়, তাহা হইলে, আপনাকে অতি অল্প দিনের মধ্যেই প্রেত পুরে গিয়া দুঃসহ নরক যন্ত্রণা ভোগ করিতে হইবে। প্রত্যক্ষ দেখিলেন এবং শুনিলেন, কে আপনার পুত্র হইয়া জন্ম গ্রহণ করিয়াছিল। এই রূপ সংসারের সমস্ত বিষয়ই জানিবেন। যাঁহারা ভক্তদর্শী, তাঁহারা কাহাকেও আপনার বলিয়া জ্ঞান করেন না; নৈসর্গিক কোন বস্তুতে মায়া রাখেন না; এই জন্তই শোক দুঃখ তাঁহাদিগের সমীপবর্ত্তী হইতে পারে না। আপনি ভুজ বলে এই পুণ্য ক্ষেত্র ভারতবর্ষে একাধিপত্য স্থাপন করিয়াছেন, আপনার রাজ্য লোভে এবং ধন লোভে লক্ষ লক্ষ লোকের প্রাণ বিনষ্ট হইয়াছে, বল পূর্ব্বক অনেক রাজার সর্বস্ব হরণ করিয়া লইয়াছেন; কিন্তু এক্ষণে বিবেচনা করিয়া দেখুন, আপনার মৃত্যুর পর এই প্রকাণ্ড রাজ্য কাহার হইবে? এই

জন্ম বলিতেছি, আপনার অতুল বিভব মনের মানসে সংস্কার্যো ও
সংপাত্রে দুই হস্তে বিতরণ ককন। যে সকল রাজগণকে রাজ্যচ্যুত
করিয়াছিলেন, তাঁহাদিগকে পুনর্বার আপন আপন রাজ্যে প্রতি-
ষ্ঠিত ককন। আপনার এক লোভ রিপু চরিতার্থের জন্ম যে সকল
সৈন্য সামন্ত সমরশায়ী হইয়াছে, তাহাদিগের স্ত্রী পুত্র পরিবার-
গণের গ্রাসাচ্ছাদনের উপায় করিয়া দিন, তাহা হইলেই ইহ কাল
ও পর কালে সৰ্ব্ব দোষ হইতে নিস্তার লাভ করিবেন। এক্ষণে আমি
স্বস্থানে প্রস্থান করি। আপনিও যমপীড়ন যজ্ঞে ক্রান্ত হইয়া ঈশ্বর-
রাধনায় মনোনিবেশ ককন। এই কথা বলিয়া যম রাজ অন্তর্হিত
হইলেন। রাজারও ভ্রমাক্ষকার দূর হইয়া দিব্য জ্ঞানের উদয়
হইল। তখন তিনি এই সংসারকে নিতান্ত অসার জ্ঞান করিয়া
তত্ত্বজ্ঞানে মনোনিবেশ করিলেন।

উপরি উক্ত উদাহরণে অনেক অলীক কথা উল্লিখিত হইয়াছে।
উদাহরণ স্থলে পৌরাণিক ইতিবৃত্তের যে কোন অংশ সঙ্কলন করা
হইয়া থাকে প্রায় তৎসমুদয়ই অস্বাভাবিক; কিন্তু তাহার মধ্যে অনেক
নিগূঢ় ভাব আছে, এ কথা অবশ্যই স্বীকার করিতে হইবে। যম-
পীড়ন যজ্ঞের প্রভাবে যম রাজ স্বয়ং মৃত রাজপুত্র সমভিব্যাহারে
রাজপ্রাসাদে আসিয়া উপস্থিত হইলেন এবং রাজপুত্রের প্রে-
তাত্মা মৎস্যরূপ পক্ষী হইয়া রাজার পূৰ্ব্ব অপরাধের কথা স্মরণ
করাইয়া দিল, এই সকল অলীক কথা এক্ষণকার সত্য সংসারের
স্ববিদ্যান্ লোক কখনই সত্য বলিয়া স্বীকার করিবেন না; কিন্তু
পুরা কালের পণ্ডিতগণ যখন এই সকল উপন্যাস লিপি বদ্ধ
করিয়া গিয়াছেন, তখন এতৎ সম্বন্ধে অবশ্যই তাঁহাদিগের কোন
নিগূঢ় অভিপ্রায় থাকিবে।

সংসারের সমস্ত কার্য তন্ন তন্ন করিয়া দেখিতে গেলে, তাহার একটিরও বিশেষ মীমাংসা করিয়া উঠিতে পারা যায় না। সংসারে অকাল মৃত্যু হয় কেন? কেহ বা বাল্য কালাবধি বহু কষ্টে নানা শাস্ত্রে পণ্ডিত হইয়া উঠিলেন; কিন্তু আজন্ম কাল তাঁহার দৈন্য দশা ঘুচিল না। চিরদিন হা অন্ন! হা অন্ন! করিয়া ধনীর দ্বারে দ্বারে ভ্রমিতে হইল। আবার অন্য দিকে দেখিতে পাওয়া যায় যে, এক জন মূর্খতম একটি সাগান্য ব্যবসায় অবলম্বন করিয়া দেখিতে দেখিতে মহা ধনবান্ হইয়া উঠিল। কেহ বা লক্ষ মুদ্রা মূল ধন লইয়া ব্যবসায় কার্য আরম্ভ করিল; কিন্তু ব্যবসায় দ্বারা উপার্জন হওয়া দূরে থাকুক, যে সঞ্চিতার্থ লইয়া বাণিজ্য করিতে বসিয়াছিল, কার্য গতিকে সেই মূল ধন পর্যন্ত লোপ পাইয়া গেল। কাহারও বা অতুল ঐশ্বর্য আছে, কিন্তু শরীর ক্লম হওয়াতে সে ঐশ্বর্য ভোগ করিতে পাইল না। কেহ বা সামান্য বংশে জন্ম গ্রহণ করিয়া কেবল আপন ক্ষমতায় অতি অল্প কালের মধ্যে উচ্চ সম্মান প্রাপ্ত হইল। কেহ বা বিপুল ধন পাইয়া তাহা রক্ষা করিতে পারিল না, অবশেষে উদরার্নের জন্য লালায়িত হইয়া বেড়াইতে লাগিল। সংসারে একপ বিপর্যয় ঘটিবার কারণ কি, একগকার তত্ত্বদর্শী পণ্ডিতেরাও ইহার বিশেষ মীমাংসা করিয়া উঠিতে পারেন নাই। অনেকে এতৎ সম্বন্ধে অনেক যুক্তি দর্শাইয়া গিয়াছেন বটে, কিন্তু সে সকল যুক্তি সর্বতোভাবে আমা-দের মনঃপূত হয় না।

এতদ্দেশে শুভক্লর নামে এক জন গণিতশাস্ত্রদর্শী পণ্ডিত জন্মিয়াছিলেন। অদ্যাপি পাঠশালার গুরুমহাশয়েরা তাঁহাকে সর-স্বতীর বরপুত্র বলিয়া নমস্কার করিয়া থাকেন। তিনি সুস্মানুস্মান

কপে অন্ধ মিলাইবার জন্য এক কড়া কড়িকে তিন ক্রান্তিতে, চারি কাকে, নব দন্তীতে, আশী তিলে ও বার শত আশী বহরে বিভক্ত করিয়া গিয়াছেন। বার শত আশী বহর চক্ষে দেখিবার সামগ্রী নহে, নব দন্তী কাঁহাকে বলে, তাহাও আমরা জানি না ; তথাচ গুরুমহাশয়ের পাঠশালায় অন্ধ কষিবার সময় ছাত্রগণ শুভঙ্করের সেই সকল প্রচলিত নিয়মের প্রতি বিশেষ দৃষ্টি রাখিয়া থাকে। সেই কপ এতদেন্দ্রীয় ধর্মশাস্ত্রবিৎ পণ্ডিতেরা সংসারের সমস্ত গোল-বোগ মীমাংসা করিবার জন্য অদৃষ্ট, পর কাল ও পূর্ব জন্মের ফলাফলের উপর নির্ভর করিয়া যান। এক পিতার দুই পুত্র, এক জন নানা বিদ্যায় পারদর্শিতা লাভ করিল, এক জন কিছুই শিখিতে পারিল না কেন ? একপ প্রশ্ন উপস্থিত হইলে, সেই সকল পণ্ডিত মহাশয়েরা বলিয়া থাকেন,—

“পূর্বজন্মার্জিতা বিদ্যা, পূর্বজন্মার্জিতং ধনম্।”

পূর্ব জন্মের সংস্কার বশতঃ এ জন্মে এক পুত্র অতি অল্প কালেই নানা শাস্ত্রে পণ্ডিত হইয়া উঠিল ; অন্য পুত্রের পূর্ব জন্মের সংস্কার ছিল না বলিয়া কিছুই করিয়া উঠিতে পারিল না। এক ব্যক্তি বিদ্যা বুদ্ধি বিহীন, অথচ অতুল ঐশ্বর্যের অধিপতি হইয়া নানা সুখ ভোগ করিতেছে, অন্য এক ব্যক্তি বিদ্যা বুদ্ধি সত্ত্বেও উদরাম্বের জন্য লালায়িত হইয়া বেড়াইতেছে। একপ প্রশ্নে পণ্ডিত মহাশয়েরা মীমাংসা করেন যে, পূর্ব জন্মে যে যে কপ কর্ম করিয়া আসিয়াছে, সে এ জন্মে তাহার সেই কপ ফল ভোগ করিবে ; স্বয়ং বিধাতাও সে ফল ভোগের অন্যথা করিতে পারিবেন না। যদি আমরা পূর্ব জন্ম, পর কাল ও অদৃষ্টের ফলাফলের কথা বিশ্বাস করি, তাহা হইলে, আমরা সংসারের

যে সকল গোলযোগ সৰ্ব্ব কণ ঝঞ্জন করি, তাহা আপনা আপনিই মীমাংসা করিয়া লওয়া যায় ; কিন্তু সকল সময়ে পণ্ডিত মহাশয়দিগের একপ মীমাংসা সঙ্গত বোধ হয় না । তাঁহারা যখন অদৃষ্ট মানিয়া অনেক বিষয়ের মীমাংসা করেন, তখন এককণকার ভদ্রদর্শী পণ্ডিতেরা একপ আপত্তি উপস্থিত করিয়া থাকেন যে, অদৃষ্টে বাহা লিখিত হইয়াছে, তাহা অবশ্যই ঘটবে, বিধাতাও তাহার অন্তথা করিতে পারিবেন না, তবে যাগ যজ্ঞ দ্বারা আমাদের আপদ শান্তি করিতে যাওয়া নিষ্প্রয়োজন । দেব দেবীর পূজা করিয়া ধন যাক্কা, যশ যাক্কা এবং পুত্র যাক্কা করাও বাতুলের কার্য্য । আমি পূৰ্ব্ব জন্মে যে কপ কার্য্য করিয়া আসিয়াছি ও আমার অদৃষ্টে যাহা লিখিত আছে, এ জন্মে সেই কপ ফল ভোগ করিব, দেব দেবী দ্বারা তাহার কিছুই অন্তথা হইবে না ; তবে আমরা কোন দৈব বিপাকে পড়িয়া স্বস্তায়ন দ্বারা সেই আপদ শান্তির চেষ্টা করি কেন ? এ স্থলে পর কাল দেখাইলে চলিবে না, অর্থাৎ এ জন্মে দেব দেবীর পূজা করিয়া ধন পুত্র কামনা করিয়া রাখ, পর জন্মে তাহার ফলভোগী হইবে । এ জন্মে হাইকোর্টে একটি তুমুল মোকদ্দমা উপস্থিত হইয়াছে, তাহার শুভ ফল কামনার আমি ছাদশ জন ব্রাহ্মণকে কালীঘাটে স্বস্তায়ন কার্য্যে ব্রতী করিলাম, সে স্বস্তায়নের ফল কি পর জন্মে পাইব ? না, এ কথা পণ্ডিত মর্হাশয়েরা কখনই বলিতে পারিবেন না ; যে হেতু, কোন ধনবান্ উৎকট পীড়ায় প্রপীড়িত হইলে, নানা স্থানের নানা দেবালয়ে স্বস্তায়ন কার্য্য আরম্ভ হয়, সে স্বস্তায়নের ফল তাঁহারা ইহ জন্মে পাইবার আশা করেন ; যদি তাহার ফল পর জন্মে হয়, তাহা হইলে, কল্প দশায় দেব দেবীর আরাধনা

করা নিষ্প্রয়োজন। ইহাতে কোন কোন ব্রাহ্মণ পণ্ডিত বলেন যে, পূৰ্ণ জন্মের ফলাফল ভোগ এই জন্মে অবশ্যই ঘটয়া থাকে, কিন্তু গ্রহ বৈগুণ্য বশতঃ আমরা সে ফল ভোগে বঞ্চিত হই; এই জন্ম সেই সকল গ্রহ শাস্তির জন্ম স্বস্ত্যয়নাদির প্রয়োজন হইয়া থাকে। এ কথাও নিতান্ত অর্থ বিহীন। যখন পূৰ্ণ জন্মের ফলাফলের উপর স্বয়ং বিধাতারও হস্ত ক্ষেপের ক্ষমতা নাই, তখন গ্রহ বৈগুণ্য বশতঃ যদি আমরা সে ফলে বঞ্চিত হই, তাহা হইলে, পর জন্মের সুখের জন্ম এ জন্মে যাগ বজ্র প্রভৃতি ব্রত করিয়া রাখাও নিষ্প্রয়োজন। কারণ আমরা আগত জন্মে কোন কুলে কোন লগ্নে জন্ম গ্রহণ করিব, তাহার কিছুই স্থিরতা নাই; তবেই পর জন্মে সুখ ভোগের প্রত্যাশায় এ জন্মের সমস্ত উপস্থিত সুখে জলাঞ্জলি দিয়া কঠোর ব্রতাদি করা নিতান্ত মূৰ্খের কার্য। এ দেশের শাস্ত্রকারেরা যে সকল যুক্তির পথ দেখাইয়া গিয়াছেন, এ পর্য্যন্ত তাহার কোন স্থলেই সুন্দর মীমাংসা হয় নাই।

ধর্ম শাস্ত্রের পরস্পর বিরোধ থাকাতোই আমরা এই সংসারকে অকুল পাথারের ন্যায় বিবেচনা করিয়া থাকি। তাহার কথা শুনিব, কোন্ পথে চলিব, তাহা স্থির করিতে না পারিয়া কৰ্ণ বিগীন এক খানি ক্ষুদ্র তরিতে আরোহণ করিয়া সংসার সমুদ্রে ঘুরিয়া বেড়াইতেছি। যদি উপযুক্ত কৰ্ণধার পাইতাম, তাহা হইলে, ভব সাগরের অপর পারে গিয়া সুখময় স্থানের অধিকারী হইতে পারিতাম; কিন্তু এ কাল পর্য্যন্ত উপযুক্ত কৰ্ণধার অভাবে সংসারের প্রায় কেহই সেই সুখময় স্থানের অধিকারী হইলেন না। যখন আমরা ভব সাগরের ঘোর তরঙ্গ দেখিয়া উপযুক্ত

কর্ণধারের অনুসন্ধান করি, তখন অনেক আমাদিগের সেই ক্ষুদ্র তরির নাবিক হইতে অগ্রসর হন ; কিন্তু কার্য্য কালে তাঁহারাও আমাদিগের স্থায় অকর্ম্মণ্য প্রতিপন্ন হইয়া থাকেন ।

ভব সাগর পার হইবার পক্ষে শাস্ত্রকারেরা যে সকল উপায় উদ্ভাবন করিয়া গিয়াছেন, তাহার একটিও কার্য্যকর বলিয়া বোধ হইতেছে না । তাঁহারা বলেন, ভগবানের ত্রীপাদপদ্মই এই ভয়ানক সাগর পার হইবার এক মাত্র সুদৃঢ় তরণী । সেই ত্রীতী-
শূন্য তরণীতে আরোহণ করিয়া স্রোতস্বতীর অপর পারে বাইতে হয় । ভগবানের চরণ যদি ভব সাগরের এক মাত্র তরণী হইল, তাহা হইলে, সে তরণীতে ভক্তেরা কি প্রকারে আরোহণ করিবেন, কোন স্থলেই তাহার মীমাংসা করেন নাই ।

এই সংসারে ধর্ম্মশাস্ত্রের গোলযোগ একটি ভীষণ ভাষ্যধারণ করিয়াছে । ইহার সহিত সাগরের তুলনা, কিস্বা নিবিড় অরণ্যের তুলনা করিলে, এই মাত্র উপলব্ধি হয়, যেমন দৈব প্রতিকূল বশতঃ অনাবিকৃত সাগরের মধ্যে কখন কখন দুই এক খানি অর্ণবযান গিয়া পড়িলে, পোতস্থ ব্যক্তিগণ দিক্ হারা এবং পথ হারা হইয়া সেই অকূল পাথারে ভাসিয়া বেড়ায় ; সে সময়ে ঐ পোতস্থ ব্যক্তিবৃন্দের মধ্যে আপনা আপনি যিনি অধিক বুদ্ধিমান ও বহুদর্শী বলিয়া গ্লাঘা করেন, তাঁহারই পরামর্শানুসারে নাবিকগণ কার্য্য করিতে আরম্ভ করে ; কিন্তু সেই অকূল সাগরের কূল কিনারা না পাইয়া নাবিকগণ সেই পরামর্শ দাতার প্রতি অশ্রদ্ধা করিয়া অপর এক জনের পরামর্শানুসারে কার্য্য করিতে আরম্ভ করে । হয় ত, প্রথম ব্যক্তির পরামর্শ অপেক্ষা দ্বিতীয় ব্যক্তির পরামর্শ আরও অনিষ্টকর হইয়া পড়ে ।

তখন পরম্পর আর কেহই কাহারও কথা শুনে না, সকলেই স্বেচ্ছা-চারী হইয়া উঠিয়া সেই অকূল সাগরের মধ্যে এক কালে বিনষ্ট হয় ; এ সংসারের ধর্মশাস্ত্রও তদনুরূপ হইয়া উঠিয়াছে । সৃষ্টি কাল হইতে এ পর্য্যন্ত এই বিচিত্র ব্রহ্মাণ্ডের প্রকৃত ভাব কেহই বুঝিয়া উঠিতে পারেন নাই । কেবল অনুমান ও কল্পনার উপর নির্ভর করিয়া ইহ পর কাল সম্বন্ধে নানা মুনি নানা মত প্রকাশ করিয়াছেন । তাঁহাদিগের পরম্পর মত ভেদের কথা সংক্ষেপে বর্ণন করিতে গেলে, এক খানি স্বতন্ত্র পুস্তক লিখিতে হয় । ধর্ম সম্বন্ধে মত ভেদ ঘটাতে মনুজকুল অকারণ দুঃসহ দুর্দশা ভোগ করিতেছে । সকলেরই ইচ্ছা ইহ কালে অতুল সুখ ভোগ করিয়া চরমে অক্ষয় স্বর্গ লাভ করিব । ইহ কালের সুখ ভোগের সঙ্গে ধর্মশাস্ত্রের অনেক সংশ্রব আছে । মনুষ্যের অভিলষিত কার্য সিদ্ধি না হইলে, কিছুতেই সুখ বোধ হয় না । আমি যাহা ইচ্ছা করি, ধর্মশাস্ত্র তাহা করিতে বারণ করিতেছে ; আমি যাহা কখনও মনে ভাবি না, ধর্মশাস্ত্র তাহারই উপদেশ দিতেছে । যদি কেহ ইহ সংসারে সর্বতোভাবে সুখী হইবার জন্য শাস্ত্রানুসন্ধান প্রবৃত্ত হন, তাহা হইলে, ইহ জগতে আর তিনি কোন কালেই সুখ ভোগ করিতে পারিবেন না । কোন শাস্ত্র উপদেশ দিতেছে, সংসারত্যাগী সন্ন্যাসী হইয়া দেশ ভ্রমণ করিয়া বেড়াও, তাহা হইলেই চরমে পরম গতি লাভ করিতে পারিবে । তাত্ত্বিক মতে শব-সাধনের বিধি আছে, এবং বৈষ্ণব ধর্মে ইহ কালের সমস্ত সুখ পরিত্যাগ করিয়া এক হরির চরণ সার করিলেই পরম ধার্মিক হইতে পারা যায় । গৃহস্থাশ্রমে থাকিয়া ব্রতাদি করাও সামান্য কষ্টকর নহে । তবেই শাস্ত্রানুসারে চলিতে গেলে, এ জন্মে

আর সুখ ভোগের সম্ভাবনা থাকে না। কোন শাস্ত্রেই একপ আদেশ নাই যে, ইচ্ছামত ভোজন পান করিয়া আমোদ প্রমোদে কাল হরণ কর, হৃত্যুর কিঞ্চিৎ পূর্বে দশ সহস্র মুদ্রা ধর্ম্মার্থে রাখিয়া গেলেই চরমে অক্ষয় স্বর্গ প্রাপ্ত হইবে।

শাস্ত্রে একপ উল্লেখ আছে যে, পূর্ব জন্মে যে দিবস যে সময়ে যে কপ কার্য্য করিয়াছ, এ জন্মে সেই দিবস সেই সময়ে সেই সকল কার্য্যের ফলাফল ভোগ করিবে। কর্ম্ম নিবন্ধন যে সকল জীব ইহ সংসারে গতায়ত করিতেছে, তাহারা পূর্ব জন্মার্জ্জিত পাপ পুণ্যের ফল ভোগ করিবে, ইহা স্বীকার করিলাম ; কিন্তু যাঁহারা শাপ ভ্রষ্ট কিম্বা দেব কার্য্য সাধনের জন্য এক বার মাত্র অবনীতে আবির্ভূত হন, তাঁহারা কি জন্য সুখ দুঃখ ভোগ করিয়া থাকেন ? বসু অবতার ভীষ্ম বশিষ্ঠ মুনির শাপে কুক কুলে জন্ম গ্রহণ করিয়াছিলেন, তাঁহার পূর্ব জন্মার্জ্জিত পাপ পুণ্য কিছুই ছিল না, তবে তিনি কি পাপে পিতৃ রাজ্যের অধিকারী হইলেন না ? কেনই বা শরশয্যাগত হইয়া দীর্ঘ কাল বর্ণনাতীত কষ্ট ভোগ করিলেন ? যখন শাস্ত্রকারেরা বিশেষ করিয়া লিখিয়াছেন যে, পাপ ব্যতিরেকে জীবের কষ্ট ভোগ হইবে না, তবে স্বয়ং ভগবান্ রামচন্দ্র কি পাপে চির কাল কষ্ট ভোগ করিলেন ? এক সময়ে তিনি মহাপাপীর ন্যায় রাক্ষস কর্তৃক উৎপীড়িত হইয়াছিলেন, প্রিয়তমা জানকীর বিরহে বনে বনে রোদন করিয়া বেড়াইয়াছিলেন। স্বয়ং ভগবানের একপ পাপের ভোগ কি জন্য হইল ? তিনি ভোগাভোগের জন্য পূর্ব জন্মে কোন ফল সঞ্চয় করিয়া আইসেন নাই। যদি কেহ বলেন যে, মনুষ্য দেহ ধারণ করিলেই গ্রহ বৈগুণ্য বশতঃ সকলকেই দুঃখ ভোগ করিতে হয় ; তবেই

কর্ম ফলের উপর কুগ্রহের আধিপত্য চলে । একপ হইলে, গ্রহ-
গণেরই প্রাধান্য স্বীকার করিতে হয় ; কেন না, যাহা বিপুল হইলে,
মনুষ্যের কথা দূরে থাকুক, দেবগণেরও দুর্দশার অবধি থাকে না ।

আবার কতকগুলি লোক সকল কথাতাই অদৃষ্টের দোহাই
দিয়া থাকেন । অদৃষ্ট শব্দের অর্থ কি ? যাহার উপর আমাদের
দৃষ্টি চলে না, অর্থাৎ ভবিষ্যৎ ঘটনা । ভবিষ্যৎ ঘটনা যার
পর নাই কৌতুকাবহ । বোধ কর, কয়েক জন নরনারী এক খানি
ক্ষুদ্র তরলী যোগে নদী পার হইতেছে, মধ্য স্থলে নৌকা খানি জল-
মগ্ন হইল । আরোহীদিগের মধ্যে যে কয়েক জন সন্তরণে বিলক্ষণ
পটু ছিগ, তাহারাই আত্ম রক্ষা করিতে পারিল না ; যে কিছু মাত্র
সাঁতার জানিত না, সে সেই আসন্ন বিপদ হইতে নিস্তার লাভ
করিল । কোন সময়ে একটি ভগ্ন গৃহের ভিতর দুই বন্ধু একত্র
সতরঞ্চ খেলিতেছিলেন । তথায় গৃহস্থামীর একটি পঞ্চম বর্ষীয়
বালক মার্জ্জার শাবক লইয়া ক্রীড়া কৌতুক করিতেছিল ; দৈবাৎ
মার্জ্জার শাবক শিশুর হস্ত হইতে পলাইয়া সম্মুখস্থ একটি টেবি-
লের নীচে আশ্রয় লইল । বালক তাহাকে ধরিয়া আনিবার জন্য
টেবিলের নিম্নে প্রবেশ করিবা মাত্রই উপরের ছাদ ভাঙ্গিয়া
পড়িল । যে দুই জনে মনোযোগ পূর্বক সতরঞ্চ খেলিতেছিলেন,
তাঁহারা তৎক্ষণাৎ পঞ্চত্ব লাভ করিলেন ; কিন্তু বালক টেবিলের
নীচে বসিয়া থাকাতে তাহার গাত্রে কিছু মাত্র আঘাত লাগিল না ।
রানীকৃত ইষ্টক ও কাষ্ঠের মধ্যে অক্ষত শরীরে বসিয়া রহিল ।
ছাদ পড়িয়া মানুষ খুন হইল, এই সংবাদ চারি দিকে বিস্তার হইয়া
পড়াতে নিকটস্থ ক্ষুদ্র ভদ্র সমস্ত লোক ঘটনা স্থলে ছুটিয়া আসিয়া
প্রাণপণে ইষ্টক ও কাষ্ঠ সরাইতে লাগিল । ক্রমে ক্রমে দেখা

গেল, গৃহস্থামী ও তাঁহার বন্ধু মৃত পড়িয়া রহিয়াছেন ; কিন্তু ক্ষুদ্র শিশুটি ইষ্টক রাশির মধ্যে অক্ষত শরীরে উপবিষ্ট আছে । একপ ঘটনা ঘটে কেন, কে ইহার মীমাংসা করিতে পারে ? এ কি পূর্ব জন্মের ফল, না গ্রহ বৈগুণ্যের কারণ, না ঈশ্বরের ইচ্ছা ? যদি ঈশ্বরের ইচ্ছা বলি, তাহা হইলে, অনেকে করুণাময়কে পক্ষপাতী বলিবে । যদি গ্রহ বৈগুণ্যের কারণ বলি, কিম্বা পূর্ব জন্মের ফল বলিয়া ধরি, তাহা হইলে, কতক পরিমাণে মীমাংসা হইতে পারে, কিন্তু সর্ব বিধায়ে নহে । ইহাতে ধর্মশাস্ত্র ব্যবসায়িগণ অবশ্য বলিবেন যে, যাহাদিগের ক্ষয় কাল উপস্থিত হইয়াছিল, তাহারাই উপরি উক্ত দৈব বিপাকে মরিল, আর যাহার মৃত্যুর কাল বিলম্ব আছে, কতক গুলি সুযোগ ঘটিয়া তাহাকে বাঁচাইয়া দিল । ক্ষয় কালে অবশ্য মৃত্যু ঘটিবে, ইহা সৌপ্তিক পর্বে শ্রীকৃষ্ণ ধর্ম পুত্র যুধিষ্ঠিরকে বিশিষ্ট বিধানে বুঝাইয়াছিলেন । শ্রীকৃষ্ণ বলিয়াছিলেন দেখ, মহারাজ, সময় না হইলে, কেহ কাহাকেও সংহার করিতে পারে না । দ্রৌপদীর পঞ্চ পুত্র এবং ধৃষ্টদ্যুম্ন ও শিখণ্ডী কুরুক্ষেত্রের অষ্টাদশ দিবসীয় তুমুল সংগ্রামে বিশেষরূপে লিপ্ত থাকিয়াও প্রত্যহ অক্ষত শরীরে শিবিরে প্রত্যাবর্তিত হইত ; কিন্তু অদ্য ক্ষয় কাল উপস্থিত হওয়াতেই উহারা কাপুরুষ দ্রোণ পুত্রের হস্তে পশুবৎ নিহত হইল । ইহাতে অবশ্য স্বীকার করিতে হইবে যে, মৃত্যু কাল উপস্থিত না হইলে, কেহই কাহাকেও হনন করিতে পারে না ; এই জন্য প্রাক্তনই বল, আর পূর্বজন্মের ফলাফলের ভোগই বল, আর ঈশ্বরের ইচ্ছাই বল, যে যাহা বলিয়া পরিতুষ্ট হয়, তাহাদিগের তাহাই বলিবার সম্পূর্ণ অধিকার আছে ।

পূর্বে লিখিত হইয়াছে যে, জলমগ্ন হইয়া ও ইষ্টক রাশির মধ্যে পতিত হইয়া যে কয়েক জন ব্যক্তি মৃত হইল, ‘ঈশ্বরের ইচ্ছা’ এই কথা পরিত্যাগ করিয়া যদি আমরা পূর্ব জন্মের ফলাফল বা অদৃষ্ট বলিয়া মনকে পরিতুষ্ট করিতে যাই, তাহা হইলে, ‘পূর্ব কথিত ঘটনা দ্বয়ের সর্বোৎকৃষ্ট সুন্দর রূপ মীমাংসা হয় না ; কারণ ইতি পূর্বে আমরা প্রতিপন্ন করিয়াছি যে, পূর্ব জন্মের পাপ পুণ্যের ফল ইহ জন্মে ভোগ করিবার সময় কুগ্রহগণ কখন বা স্বাপক কখন বা বিপক্ক হইয়া দাঁড়ায় । স্বয়ং বিধাতা যে ফলের বাধ্য গ্রহগণ তাহারও বিপরীত করিয়া দিতেছে । পূর্ব জন্মের আবার কোন কথাই আমরা ভাল রূপ বুঝিতে পারি না । ভগবদ্বাক্যে ভগবান্ স্বয়ং বলিয়াছেন, যেমন মনুষ্য জীর্ণ বস্ত্র পরিত্যাগ করিয়া নব বস্ত্র পরিধান করে, সেই রূপ জীবাত্মা জীর্ণ কলেবর পরিত্যাগ করিয়া নূতন কলেবরে প্রবিষ্ট হয়। তবে এই রূপ আধারগত পাপ পুণ্যের ভাগী কে হইবে ? যদি বল, আত্মাই স্মৃতি চুঃখের ভাগী হইয়া থাকেন, তাহা হইলে, আত্মা যে ঈশ্বরের অংশ সে কথায় সর্বতোভাবে দোষ পড়িয়া যায় ।

মনুষ্য দেহ ধারণ করিয়া আমরা ভয়ানক বিপদে নিপতিত হইয়াছি । যেমন পূর্বে বলা হইয়াছে যে, অনাবিক্ষৃত সাগর মধ্যগত অর্ণবধানের আরোহিণ প্রথমতঃ যাহাকে দূরদর্শী বোধে তদীয় পরামর্শানুসারে কার্য্য করিয়াছিল, এবং তাঁহার আদেশ মতেই চলিয়া অকূল পাথারে কুল পাইবার জন্য পোত চালন করিতে আরম্ভ করিয়াছিল ; কিন্তু দুই এক দিবস কার্য্য করিয়া দেখিল যে, যিনি অধ্যক্ষ তিনিও তাহাদিগের ন্যায় অনভিজ্ঞ । তখন তাহারা সকলেই স্বেচ্ছাচারী হইয়া উঠিল, কেহ বা সমুদ্রে বস্প দিয়া প্রাণ

পরিভ্যাগ করিল, কেহ কেহ দৈবের উপর নির্ভর করিয়া স্থির-
ভাবে বসিয়া রহিল ; কিন্তু তাহাদিগের মধ্যে কতকগুলি উ-
দ্যোগী পুরুষ যত্ন ও চেষ্টা একেবারে পরিভ্যাগ করিলেন না,
পোতা চালনও করিতে লাগিলেন এবং অকূল কাণ্ডারী ঈশ্বরকেও
ডাকিতে লাগিলেন ।

এই সংসার তরঙ্গও মনুজকুলের পক্ষে সেই রূপ হইয়া
উঠিয়াছে । আমাদিগের এই দেহ রূপ ক্ষুদ্র তরি অজ্ঞান রূপ
অকূল পাথারে সর্ব্ব ক্ষণ ভাসিতেছে । যে দিকে দৃষ্টি পাত
করি, সেই দিকেই অকূল পাথার । এই বিপদে পাড়িয়া যদি
শাস্ত্রকারদিগের উপদেশের কথা স্মরণ করি, তাহা হইলে,
মনোমধ্যে আরও আতঙ্ক উপস্থিত হয় ; কেন না, সংসার
সাগর উত্তীর্ণ হওন সম্বন্ধে নানা মুনি নানা মত প্রকাশ
করিয়া গিয়াছেন । কেহ বলিয়াছেন, যাহা ঘটবার তাহা
ঘটিবে ; কেহ বলিয়াছেন, বিপদে পড়িলে ঈশ্বরকে ডাকিও ;
কেহ বলিয়াছেন, চেষ্টার অসাম্য কিছুই নাই । বিপদ কালে এই
সকল মত ভেদের কথা স্মরণ হইলে, কাহার কথা বিশ্বাস করিব,
স্থির করিয়া উঠিতে পারি না ; সেই জন্য সকলের মত পরিভ্যাগ
করিয়া একটা স্বকল্পিত উপায় উদ্ভাবন করি । এই রূপে পর্য্যায়
ক্রমে সংসারের সমস্ত লোকই ধর্ম্ম উপদেষ্ট্রগণের উপদেশ পরি-
ভ্যাগ করিয়া আপনাদিগের ইচ্ছামত পথে পরিভ্রমণ করিয়া
বেড়াইতেছে । যদি দৈব বশতঃ সেই স্বেচ্ছাচারিগণের মধ্যে কেহ
কোন স্মরণ প্রাপ্ত হন, এবং মনে মনে বিবেচনা করেন যে,
আপন বুদ্ধি অনুসারেই অকূল সংসার সাগরে কূল প্রাপ্ত হইলাম ;
যদি শাস্ত্রকারদিগের কথা শুনিয়া দুর্গম পথের পথিক হইতাম,

তাহা হইলে, একপ সুবিধা ঘটিবার কোন সম্ভাবনা থাকিত না। এক জন স্বেচ্ছাচারীকে কিয়ৎ পরিমাণে নির্ভয় দেখিয়া আর দশ জনও সেই পথে অগ্রসর হইল। অবশেষে সকলেই দেখিতে পাইল যে, আমরা যাহাকে কুল বিবেচনা করিয়াছিলাম, ইহা প্রকৃত কুল নহে, একটি স্থাপদ সঙ্কুল মায়াময় ক্ষুদ্র দ্বীপে আসিয়া উপস্থিত হইয়াছি। এখানে থাকিলে আশু বিনষ্ট হইব, অতএব স্থানান্তরে প্রস্থান করাই যুক্তি সিদ্ধ। প্রাণী মাত্রেই সংসার সাগরে পড়িয়া অবিরত ঘুরিয়া বেড়াইতেছে। দুর্বলকে সবলে বিনষ্ট করিতেছে। কেহ কোন কালে যদি একটি নিরাপদ স্থানে আসিয়া আশ্রয় গ্রহণ করে, কিন্তু বিবেচনার দোষে সেই নিরাপদ স্থানেও বিপদ পূর্ণ বোধে আবার ছুতন স্থানে গমনের চেষ্টা দেখে।

আমাদিগের এই সকল প্রজ্ঞাপের প্রকৃতার্থ নিম্নে প্রকাশ করিতেছি। এই সংসার প্রকৃতই সাগরের তুল্য। পোতাধ্যক্ষ যেমন সমুদ্র পথে পোত চালন করিবার সময় পদে পদে আপদ বিপদ ভোগ করিয়া থাকেন, আমাদিগের এই দেহ রূপ ক্ষুদ্র তরণীর অধ্যক্ষও সেই রূপ সমস্ত জানিয়া শুনিয়াও মধ্যে মধ্যে সংসার রূপ সাগরের ঘোর আবর্তনে পড়িয়া বর্ণনাভীত কষ্ট ভোগ করেন। সমুদ্র পথে কি রূপে পোত চালন করিতে হয়, প্রত্যেক পোতাধ্যক্ষগণ বাল্য কাল হইতে সদৃশকর নিকট বিশিষ্ট বিধানে শিক্ষা করিয়াছেন, আবার দুই এক বার সমুদ্র পথে পরিভ্রমণ করিয়া বহুদর্শিতাও লাভ করিয়াছেন। প্রত্যেক জলখানে দিগদর্শন যন্ত্র রহিয়াছে, তাহার সম্মুখে মানচিত্র ঝুলিতেছে। পোতাধ্যক্ষ সমূহ সতর্কতার সহিত বর্ণ ধারণ করিয়া সহযোগীগণকে

প্রকৃত পথে পোত চালনের আদেশ করিতেছেন; তথাচ কখন বা কর্ণধারের অনভিজ্ঞতা, কখন বা তাঁহার অনবধানতা এবং কখন বা দৈব প্রতিকূলতা বশতঃ কত শত জলযান জলমগ্ন হইতেছে। অকুল পাথরের মধ্যে থাকিয়া অনেক সময়ে অনেক জাহাজ আগুনে পুড়িয়া ছারখার হইতেছে। আবার কখন বা গাঢ় কুজ্ঝটিকায় দশ দিক্ আচ্ছন্ন হইলে, দূরবীক্ষণ দ্বারা দূরে দৃষ্টি না চলাতে চড়ায় ঠেকিয়া বা জলমগ্ন শৈলে আঘাত লাগিয়া অনেক জলযান বিনষ্ট হইয়া থাকে। সেই রূপ আমাদিগের এই দেহ রূপ ক্ষুদ্র তরঙ্গী অনুক্ষণ ভব সাগরে ভাসমান রহিয়াছে। মন ইহার বিচক্ষণ কাণ্ডারী, জ্ঞানই এ তরঙ্গীর দিগদর্শন যন্ত্র, পরিদৃশ্যমান পৃথিবীই ইহার মানচিত্র, ও অমূল্য ছুই চক্ষুই ইহার দূরবীক্ষণ যন্ত্র। এমন কাণ্ডারী ও একপ আয়োজন সত্ত্বেও আমাদিগের দেহ তরি বিপথগামী হয় কেন? ইহার উত্তর এই যে, যদি মন বিশেষ সাবধানের সহিত দেহ তরি চালন করে, তাহা হইলে, কখনই ভব সাগরের আবর্তনে পড়িয়া ‘গেল! গেল!’ শব্দ করিয়া উঠিতে হয় না। যেমন সিন্ধু সলিল গত অর্নবযান গাঢ় কুজ্ঝটিকায় পড়িলে, কর্ণধার কর্তৃক বিপথে চালিত হয়, আমাদিগের দেহ তরির পক্ষে দারা, পুত্র প্রভৃতি পরিবারও সেই রূপ কুজ্ঝটিকা; কেবল তাহাদিগেরই জন্ত দেহ তরি পদে পদে বিপথগামী হয়।

দৈব বিড়ম্বনার উপর কোন কথাই চলে না। দূর দৃষ্টি কি অদৃষ্ট এই দুইটির উপর কাহারও হস্ত বিস্তার করিবার ক্ষমতা নাই। বিপদ দূরস্থ রহিয়াছে, এবং ধীরে ধীরে নিকটস্থ হইতেছে, আমরা তাহা অবগত হইবার কিছু মাত্র ক্ষমতা রাখি না; এই

জন্ম ভাবী বিপদ যাহাতে না ঘটে, তৎ পক্ষে নিশ্চেষ্ট হইয়া থাকি। বিবেচনা করিয়া দেখ, ভারতবর্ষের প্রধানতম রাজ প্রতিনিধি ও শাসনকর্তা লর্ড মেও বাহাদুর পোর্টব্লেয়ার পরিদর্শন করিতে যখন কলিকাতা হইতে বাহির হইলেন, তখন তিনি কিছুই জানিতে পারেন নাই যে, আগুমান দ্বীপ হইতে আর তাঁহাকে প্রত্যাবর্তিত হইতে হইবে না। দূর দৃষ্টির প্রতি দৃষ্টি চলে না বলিয়াই তিনি আনন্দ মনে আগুামানে গমন করিয়াছিলেন। যে দিন বৈকালে সিন্ধু জলে সূর্যাস্তের শোভা দর্শন মানসে পর্ষভারোহণ করেন, তখন দূর দৃষ্টি নিকটস্থ হইয়াছে এবং অদৃষ্টে যাহা ঘটিবার তাহার সমুদয় আয়োজন হইয়া রহিয়াছে, সে সময়েও তিনি তাহার বিন্দু বিসর্গ কিছুই অবগত নহেন। ছুরায়া শেয়ার আলি শত্রুপাণি হইয়া পর্ষভের নিম্নে উপবিষ্ট আছে, লর্ড বাহাদুর সূর্য্য অস্তের শোভা দেখিয়া স্বগণ সহিত হাসিতে হাসিতে নিম্নে আসিতেছেন, সেই সময় দুরন্ত যবন এক আঘাতেই তাঁহার জীবনান্ত করিল। লর্ড বাহাদুর পোর্টব্লেয়ারে আসিয়াছেন বলিয়া ক্ষণ কাল পূর্বে সেই ক্ষুদ্র দ্বীপ আনন্দ ধ্বনিতে প্রতিধ্বনিত হইতে ছিল; কিন্তু চক্ষের পলক পড়িতে না পড়িতেই সেই পোর্টব্লেয়ারে হাহাকার ধ্বনি উঠিল। দেখুন, দৈবের কি ভয়ানক কার্য্য! অদৃষ্টের কি অভাবনীয় ফল! দূরদৃষ্টি কি কপ নিকটস্থ হইয়াছিল। যিনি ভারতবর্ষের প্রধানতম শাসনকর্তা, যাহার একটি কথায় সহস্র সহস্র অশ্বারোহী ও পদাতিক সৈন্য যুদ্ধার্থে প্রস্তুত হয়, যাহার আজ্ঞায় শত শত কামানের শব্দ ভারতের হৃৎকম্প হয়, যাহার পার্শ্বে তাঁহার সহোদর শত্রুপাণি হইয়া আসিতেছিলেন, এবং দূরদর্শী ও রাজনীতিজ্ঞ সভাসদগণ

যাঁহার চতুর্দশ বেষ্ঠন করিয়াছিল, একপ ব্যক্তিকে কি না এক জন বন্দী অনায়াসে নিহত করিয়া ফেলিল ! কেহই তাঁহার প্রাণ রক্ষা করিতে পারিল না ! অতএব দৈব প্রতিকূল হইলে, কেহই আমাদিগের রক্ষা কর্তা নাই । ভবিষ্যতে যাহা আছে, শত বর্ষ চেষ্টা করিলেও কেহই তাহা জানিতে পারিবেন না ।

এই সকল দৈব ঘটনার কর্তা কে ? ঈশ্বর, এ কথা অবশ্যই বলিতে হইবে । তিনিই আমাদিগকে রক্ষা করেন, এবং তিনিই আমাদিগকে বিনষ্ট করিয়া থাকেন । সেই ইচ্ছাময়ের ইচ্ছার প্রতিকূলে দাঁড়াইতে কাহারও ক্ষমতা নাই । তিনি স্বহস্তে কোন কার্যই করেন না । তাঁহার ধনের ভাণ্ডার নাই যে, ধন প্রার্থীদিগকে ধন দান করিবেন, তাঁহার সৈন্য সামন্ত নাই যে, প্রিয়পাত্রের পক্ষ হইয়া শত্রু দলন করিবেন, তিনি স্বয়ং কোন কালেই অস্ত্র ধারণ করেন না যে, একটি সামান্য জীবের প্রাণ হনন করিবেন । যদিও তাঁহার ধন নাই, অস্ত্র নাই, এবং পৃষ্ঠ পুরুষ কেহই নাই, তথাচ তাঁহার নিয়মেই এই সংসারের সমস্ত কার্য অতি সূচক রূপে সম্পন্ন হইতেছে । তিনি যাহা করিতেছেন, তাঁহার উপর দোষারোপ করা নিতান্ত অজ্ঞানের কার্য । তিনি জীবের শিবের জন্ত সংসারের সমস্ত কার্য একপ শৃঙ্খলাবদ্ধ করিয়া রাখিয়াছেন যে, তাহার একটির প্রতি বিশেষ মনোনিবেশ করিতে গেলে, এক বারে বিশ্বয় সাগরে নিমগ্ন হইতে হয় । তিনি পক্ষপাতী নহেন, তাঁহার দয়া সকলের প্রতি সম ভাগে বিভক্ত । ঈশ্বর ও ঈশ্বরের কার্য সম্বন্ধে তর্কিকেরা চির কালই ঘোর বাধিতণ্ডা করিয়া আসিতেছেন । বিশেষতঃ, একগণকার বিবিধ বিদ্যা বিশারদ আধু-

নিক নাস্তিকের দল প্রতি কথ্যেই ঐশ্বরিক কার্যের উপর দোষ দর্শাইয়া থাকেন; কেহ বলেন, যদিও ঐশ্বর থাকেন, তাহা হইলে, কোন ক্রমেই তাঁহাকে দয়াময় বলিতে পারিব না; যে হেতু, তাঁহার ঘোর নিষ্ঠুরতার বিষয় পদে পদে আমাদের দৃষ্টি গোচর হইতেছে। সন্তান প্রসবের কালে প্রসূতি যে রূপ যন্ত্রণা ভোগ করে, তাহা বর্ণনাতিত। ঐশ্বর যদি দয়াময় হইতেন, তাহা হইলে, অনায়াসে সন্তান প্রসবের একটি সুস্বাদু উপায় অবধারিত করিয়া দিলে, তাঁহার দয়াময় নামের গৌরব রক্ষা হইত। সময়ে সময়ে আগ্নেয় গিরির অগ্ন্যুৎপাতে, ভূমিকম্প ও ভয়ানক ঝটিক প্রভৃতিতে অসংখ্য জীবের প্রাণ বিনষ্ট হয়। সেই সকল দৈব বিড়ম্বনায় কত শত লোক বর্ণনাতিত কষ্ট ভোগ করিয়া মৃত হইয়া থাকে। এক এক সময়ে মহামারীতে বা দুর্ভিক্ষে এক একটি বহু জনাকীর্ণ দেশ একেবারে প্রাণীশূন্য হইয়া পড়ে। স্বচক্ষে দেখা গিয়াছে, ভয়ানক দুর্ভিক্ষের সময়ে প্রসূতি ক্রোড়স্থ দুগ্ধপোষ্য শিশু সন্তানকে বিক্রয় করিয়া আপন ক্ষুধানল শীতল করিয়াছে। আহার সামগ্রীর অপ্রতুলকেই দুর্ভিক্ষ কহিয়া থাকে। যদি ঐশ্বর দয়াবান্ ও সর্বশক্তিমান্ হইতেন, তাহা হইলে, আহারাভাবে দীর্ঘ কাল যন্ত্রণা ভোগ করিয়া কখনই অসংখ্য মহাপ্রাণীর প্রাণ বিনষ্ট হইত না। তিনি যখন এই বিশ্ব রাজ্যের প্রাণিপুঞ্জকে উচিত মত আহার দানে অক্ষম, তখন তাঁহাকে সর্বশক্তিমান্ কেমন করিয়া বলিব? বর্তমান কালের নাস্তিকের দল ঐশ্বরের প্রতি এই রূপ দোষারোপ করিয়া অনেক গ্রন্থ রচনা করিয়াছেন, এবং সেই সকল গ্রন্থ পাঠ করিয়া বহু সংখ্যক শিক্ষিত যুবকও বিষম ভ্রমে নিপতিত হইতেছেন।

নাস্তিকদিগের প্রথম গুলির যথা সাধ্য উত্তর প্রদানের
অগ্রে আমরা এই বিচিত্র ব্রহ্মাণ্ডের আভ্যন্তরিক ভাব সম্বন্ধীয়
ছুই একটি উদ্ঘট গল্পের সার সংগ্রহ করিতে বাধ্য হইলাম ।
পূর্বে বলা হইয়াছে যে, ঈশ্বর স্বয়ং কোন কার্য করেন না, অন্য
ব্যক্তি দ্বারা অনেক সময়ে তাঁহার অভিপ্রায় সিদ্ধ করিয়া
থাকেন । এই সম্বন্ধে অতি প্রাচীন কালের একটি গল্প এই স্থলে
মন্নিবেশিত করা গেল ;—

পুরা কালে কোন গ্রামে একটি দরিদ্র ব্রাহ্মণ বাস করিতেন ।
তাঁহার অনেকগুলি সন্তান জন্মিয়াছিল । বহু পরিবারের অন্ন বস্ত্র
দানে ব্রাহ্মণ একেবারে অক্ষম হইয়া পড়িলেন । মধ্যে মধ্যে সেই
দরিদ্র বিপ্র সপরিবারে অনশনে থাকিতেন । ব্রাহ্মণ এক দিন
মনে মনে ভাবিলেন, শাস্ত্রকারেরা লিখিয়াছেন যে, সমস্ত দেবগণের
মধ্যে মহাদেবকেই অতি অল্প প্রয়াসে পরিতুষ্ট করিতে পারা যায় ।
তিনি অল্পে সন্তুষ্ট বলিয়াই লোকে তাঁহাকে আশুতোষ কহিয়া
থাকে ; অতএব গৃহে বসিয়া একপ যন্ত্রণা ভোগাপেক্ষা একান্ত
মনে কিছু দিন শিবের আরাধনা করিব । দেখিব, পশুপতি
আমার প্রতি কৃপা দৃষ্টি করেন কি না । এই কৃপা চিন্তার পর
ব্রাহ্মণ এক নিবিড় অরণ্য মধ্যে প্রবেশ করিয়া এক মনে ও এক
ধ্যানে দেব দেব মহাদেবের আরাধনা করিতে লাগিলেন । দিবস
ত্রয় সেই ব্রাহ্মণ গণ্ডুষ মাত্র জলও গলাধঃকরণ করেন
নাই, কেবল ছুই হস্ত উত্তোলন করিয়া মহাদেবকে ধ্যান
করিতে লাগিলেন । ব্রাহ্মণ তিন দিবস অনশনে শিবারাধনা
করাতে পার্শ্বতীনাথ আর থাকিতে পারিলেন না, উমার স-
হিত উমাকান্ত সেই বিপিন মধ্যে আসিয়া প্রবিষ্ট হইলেন ।

হর পার্কতী এক বৃক্ষতলে উপবিষ্ট হইয়া কি প্রকারে ব্রাহ্ম-
ণের দুঃখ দূর করিবেন, তাহারই উপায় উদ্ভাবন করিতে লাগি-
লেন। মহাদেব পার্কতীকে কহিলেন, দেবি, আমি ঐ দরিদ্র
ব্রাহ্মণকে দশ সহস্র মুদ্রা প্রদান করিব, কিন্তু অদ্য নহে, কল্যা
স্বর্ধ্যাস্তের পূর্বে সম্মুখস্থ শিবের মন্দিরে ব্রাহ্মণ দশ সহস্র
মুদ্রা প্রাপ্ত হইবে। মহাদেব যে সময়ে পার্কতীকে এই সকল
কথা বলিতেছিলেন, সেই সময়ে এক জন ধূর্ত বণিক ঐ বৃক্ষের
উচ্চ শাখায় বসিয়া ফল চয়ন করিতেছিল। সে মহাদে-
বের সমস্ত কথা শুনিতে পাইল। হর পার্কতী অন্তর্ধান হইলে
পর সে ধীরে ধীরে বৃক্ষ হইতে নামিল, এবং ব্রাহ্মণের নিকটে
গিয়া কহিল, ওহে ব্রাহ্মণ, তুমি কেন বনে বসিয়া অনর্থক কষ্ট
ভোগ করিতেছ? এখনকার কালে কি আর দেবতার জাগিয়া
আছেন? তুমি আমার প্রতিবেশী, অর্থকষ্ট উপস্থিত হওয়াতে ভ্রমে
পড়িয়া প্রাণ হারাইতে বসিয়াছ! আমার বাড়ীতে আইস, আমি
তোমাকে হাজার টাকা দিব; ইহাতে আমার পুণ্য হইবে, নামও
হইবে। হাজার টাকার কথা শুনিয়া ব্রাহ্মণের আত্মাদের পরিসীমা
রহিল না। তিনি তৎক্ষণাৎ বণিকের সমভিব্যাহারে তাহার
বাটীতে গিয়া উপস্থিত হইলেন, এবং হাজার টাকার তোড়া
আনিয়া গৃহিণীর হস্তে দিয়া আপনাকে কৃতার্থ বোধ করিলেন।

পর দিবস সন্ধ্যার কিঞ্চিৎ পূর্বে বণিক বিপিন মধ্য স্থিত
শিবালয়ের দ্বারে গিয়া উপস্থিত হইয়া দেখিল, মন্দিরের দ্বার
বন্ধ রহিয়াছে। বণিক উচ্চৈঃস্বরে কহিল, হে দেব দেব
মহাদেব! দ্বার উদ্ঘাটন করিয়া আপন প্রতিজ্ঞা পূর্ণ কর।
তোমার কথা কখন অশ্রুতা হইবার নহে; অতএব তোমার ভক্তকে

শীঘ্র শীঘ্র টাকা গুলি দিয়া বিদায় কর, দাসের সহিত পরিহাস করা প্রভুর উচিত কার্য্য নহে। বণিক পুনঃ পুনঃ চীৎকার করিতে লাগিল, কিন্তু কিছুতেই মন্দিরের দ্বার উদ্ঘাটিত হইল না। অবশেষে ক্রোধে পরিপূর্ণ হইয়া সজোরে দ্বার দেশে একটি পদাঘাত করাতে তৎক্ষণাৎ মন্দিরের দ্বার উদ্ঘাটিত হইল ; কিন্তু বণিকের পদাঘাতে কবাটের এক খানি প্রস্তর ফলক ভাঙ্গিয়া যাওয়াতে তাহার দক্ষিণ পদের উক্দেশ পর্য্যন্ত কবাটের মধ্যে প্রবিষ্ট হইয়া গেল। বণিক এক প্রহর কাল প্রাণপণ চেষ্টা করিয়াও সেই ভগ্ন কবাট হইতে আপন চরণ বাহির করিতে পারিল না। অবশেষে নিকপায় হইয়া সমস্ত রজনী সেই মন্দিরের দ্বারে পতিত রহিল। প্রত্যাষে তাহার পুত্রগণ পিতার অন্বেষণে বাহির্গত হইল। বিস্তর অনুসন্ধান করিয়াও বণিক কোথায় আছে, তাহার কিছুই সংবাদ পাইল না। দিবা ছুই প্রহরের সময় এক জন কাঠুরিয়া আসিয়া বণিকের জ্যেষ্ঠ পুত্রকে সংবাদ দিল যে, আপনার পিতা বনের ভিতর শিবালয়ের দ্বারে পতিত রহিয়াছে, জীবিত কি মৃত তাহা বলিতে পারি না। এই সংবাদ প্রাপ্ত মাত্রই বণিক পুত্র ভ্রাতৃগণের সহিত শিবালয়ে গিয়া উপস্থিত হইল। দেখিল, পিতা জীবিত আছেন, কিন্তু দক্ষিণ চরণের উক্দেশ পর্য্যন্ত কবাটে আবদ্ধ রহিয়াছে। তাহারা কয়েক সহোদরে একত্রিত হইয়া পিতার উদ্ধার সাধনে বিশেষ চেষ্টা করিল, কিন্তু কিছুতেই কৃতকার্য্য হইতে পারিল না। অবশেষে মন্দির অভ্যন্তরে এই দৈব বাণী হইল যে, ওরে অর্থ পিশাচের পুত্রগণ ! তোরা শত বর্ষ চেষ্টা করিলেও তোদের পিতাকে উদ্ধার করিতে পারিবি না। তোদের পিতা প্রভারণা দ্বারা ব্রহ্মস্ব হরণ করিতে

আসিয়াছিল, এক্ষণে তাহারই ফলভোগ করিতেছে। যদি তোদের পিতাকে রক্ষা করিতে চাহিস্, তাহা হইলে, পাপের প্রায়শ্চিত্ত স্বরূপ আর নয় সহস্র মুদ্রা সেই দরিদ্র ব্রাহ্মণের বাটীতে পঁহুঁছিয়া দে; নতুবা এই অবস্থাতেই ইহার মৃত্যু হইবে। তোদের পিতা চির কাল প্রবঞ্চনা দ্বারা বিপুল অর্থ সঞ্চয় করিয়াছে, এ পর্য্যন্ত তাহার এক কপর্দকও সংকার্য্যে ব্যয় করে নাই। অন্য কি কথা, আপন স্ত্রীপুত্র পরিবারগণকেও ভাল করিয়া অন্নবস্ত্র দেয় নাই। পাপের ধন কোন কালে স্থায়ী হইবার নহে। বিশেষতঃ, ক্লেশ-
 ণের ধনে অগ্নি, চোর, রাজা এবং প্রতারণার সম্পূর্ণ অধি-
 কার আছে। যাহারা সং কার্য্যের দ্বারা অর্জিত ধনের পরি-
 মিতাচারে সার্থকতা সম্পাদন করে, তাহারাই ধন ভোগের যথার্থ
 পাত্র। যাহাদিগের ধনের নিতান্ত প্রয়োজন আছে, দেবতারা তোর
 পিতার ভাণ্ডার হইতে সেই সকল লোকের অভাব মোচন করাই-
 বেন, কল্য তোদের পিতা আপনা হইতেই তাহার সূত্র পাত
 করিয়াছে। যদিও তোর আর নয় সহস্র মুদ্রা ঐ ব্রাহ্মণকে
 দান করিয়া পিতার উদ্ধার করিতে বিলম্ব করিস্, তাহা হইলে,
 অদ্য রজনীতেই দক্ষ্য কর্তৃক তোদের সমস্ত ধন লুণ্ঠিত হইবে।
 দেবতাদিগের গৃহে সঞ্চিত ধন নাই, তাঁহারা প্রকারান্তরে এক
 জনের ধন অপর এক জনকে দেওয়াইয়া থাকেন। এই ভবের
 আভ্যন্তরিক কৌশল সমস্ত বুঝিয়া উঠা কাহারও সাধ্য নহে,
 কোন কালে কেহ তাহা জানিতে পারিবে না। এই সকল দৈব-
 বাণী শুনিয়া তৎক্ষণাৎ তাহার ঐ ব্রাহ্মণকে নয় সহস্র মুদ্রা দিয়া
 পিতার উদ্ধার সাধন করিল।

যেমন আগ্নেয় গিরির অগ্নি ১৭পাতে বহু সংখ্যক লোক একে

বারে ধনে প্রাণে বিনষ্ট হয় ; কি জন্য একপ চুর্ঘটনা ঘটে, কেনই বা ঈশ্বর অকালে বহু সংখ্যক মহাপ্রাণীকে বর্ণনাভীত কষ্ট দিয়া এক কালে বিনষ্ট করেন, তাহার গুঢ় ভাব অবগত হইতে না পারিয়া নাস্তিকেরা যেমন ঈশ্বরকে নির্দয় ও নিষ্ঠুর বলিয়া অগ্রাহ্য করে, সেই রূপ উপরি উক্ত গল্পটিতে দেব দেব মহাদেব ঐ রূপণ বণিকের নিকট মিথ্যাবাদী ও প্রতারণক হইয়াছিলেন ।

সৃষ্টি প্রকরণ সম্বন্ধে ঈশ্বরের গুঢ় অভিপ্রায় সম্যক বুঝিতে পারা মনুষ্যের সাধ্য নহে । দৈব বিড়ম্বনায় অসংখ্য প্রাণীহত্যা দেখিয়া নাস্তিকেরা করুণাময় ঈশ্বরকে নিষ্ঠুর বলিতে সাহসী হইয়াছে ; এ কি তাহাদিগের কম স্পর্দ্ধার কথা ! তাহারা কি এক বার ভাবিয়া দেখে না যে, আগ্নেয় গিরির অগ্ন্যাংপাতেও ঈশ্বরের মহিমা দেদীপ্যমান রহিয়াছে । তাহারা কি জানে না যে, পৃথিবীর অভ্যন্তর নানাবিধ ধাতু মিশ্রিত অত্যুষ্ণ তরল পদার্থে পরিপূর্ণ । কখন কখন সেই তরল ধাতুতে ভয়ানক তরঙ্গ উপস্থিত হয়, তাহার কিয়দংশ বহির্গত না হইলে, সে তরঙ্গের কোন ক্রমেই শমতা হয় না ; এই জন্য করুণাময় পৃথিবীর স্থানে স্থানে সেই তরল পদার্থ নির্গত হইবার জন্য এক একটি পথ প্রস্তুত করিয়া রাখিয়াছেন, আগ্নেয় গিরি বলিয়া আমরা সেই সকল পথের নামকরণ করিয়াছি । যদি নির্দিষ্ট স্থান দিয়া পৃথিবীর অভ্যন্তরস্থ তরল ধাতু, ভস্ম ও ধূমরাশি নির্গত না হইয়া সময়ে সময়ে এক একটি নূতন স্থান ভেদ করিয়া ঐ সকল অনিষ্টকর পদার্থ নির্গত হইত, তাহা হইলে, ঈশ্বরের সৃষ্টি কৌশলের দোষ বলিয়া ধরিতাম । তিনি যখন এক একটি নির্দিষ্ট স্থানে আগ্নেয় গিরির সৃষ্টি করিয়া রাখিয়াছেন, এবং অগ্ন্যাংপাতের দুই

তিন দিবস পূর্বে হইতে সঙ্কেত দ্বারা অগ্ন্যুৎপাত নিকটস্থ বলিয়া জানাইয়া থাকেন, তথাচ যাহারা কেবল আলস্য পরবশ হইয়া আগ্নেয় গিরির চতুর্পার্শ্ব হইতে পলায়ন না করে, তাহার জন্ম ঈশ্বরকে দোষী করা নিতান্ত মূর্খের কার্য্য। যে কোন প্রকার দৈব বিড়ম্বনা ঘটুক না কেন, অকস্মাৎ সেই মহা অনিষ্টকর ব্যাপার কখনই উপস্থিত হয় না। তিনি কি ঝটিকা, কি জলপ্লাবন, কি ভূভিক্স ঘটবার পূর্বে আভ্যাসের দ্বারা প্রাণী মাত্রকেই সাবধান হইবার জন্য পুনঃ পুনঃ সঙ্কেত করিতে আরম্ভ করেন, তাহাতেও যাহাদিগের চৈতন্য না হয়, দৈব বিপাকে তাহারাই বিনষ্ট হইয়া থাকে।

সন্তান প্রসব সম্বন্ধে নাস্তিকেরা যে কথা উত্থাপন করে, তাহাও নিতান্ত ভ্রান্তি মূলক। প্রসূতিকে প্রসব বেদনায় কিয়ৎ ক্লম কষ্ট ভোগ করিতে হয় সত্য; কিন্তু নব প্রসূত সন্তানের মুখ দেখিলে, সে কষ্ট একেবারে দূর হইয়া যায়। যে দ্রব্য বহু কষ্টে অর্জিত, আমরা তাহারই প্রতি বিশেষ যত্ন ও স্নেহ করিয়া থাকি, অনায়াস লভ্য দ্রব্যের প্রতি সমধিক আদর করি না। বহু কষ্টে প্রসূতি সন্তানের মুখাবলোকন করিতে পান বলিয়া আপন প্রাণ অপেক্ষাও অপত্যকে অধিক মমতা করিয়া থাকেন, উহা অনায়াস লভ্য হইলে, বোধ হয়, ততদূর করিতেন না। আবার দেখিতে পাওয়া যাইতেছে, প্রসব কালীন যন্ত্রণা সমস্ত প্রাণীর এক রূপ নহে। যাহারা এককালীন অধিক শাবক বা ডিম্ব প্রসব করে, প্রসব সময়ে তাহাদিগের অতি সামান্যই যন্ত্রণা হইয়া থাকে। স্বচক্ষে দেখা গিয়াছে রাজহংসীরা চারি দিকে নৃত্য করিয়া প্রসন্ন হৃদয়ে আহারাশ্বেষণ করিতে করিতে ডিম্ব প্রসব করিয়া

থাকে। যদি মনুষ্যের আহার তাহাদিগকে প্রসব কালে যন্ত্রণা ভোগ করিতে হইত, তাহা হইলে, আহার করিতে করিতে কখনই ডিম্ব প্রসব করিতে পারিত না ; তবেই প্রসব সময়ের যন্ত্রণার ক্রাস করিয়া দিতে সর্বশক্তিমানের শক্তি আছে। মানব জাতি সম্বন্ধে যখন তাহা করেন নাই, তখন অবশ্যই ইহাতে ঈশ্বরের কোন গুঢ় অভিপ্রায় আছে, তাহা আমরা হয় ত বিশিষ্ট বিধানে বুঝিয়া উঠিতে পারি নাই।

মহামারী ও দুর্ভিক্ষে বহু প্রাণী নাশ সম্বন্ধে আমরা আরও একটি কথা বলিব। শাস্ত্রজ্ঞ পণ্ডিতেরা বিশিষ্ট বিধানে প্রমাণ করিয়াছেন যে, পাঞ্চভৌতিক শরীর বিনষ্ট হইলেও জীবাত্মা বিনষ্ট হয় না। উপস্থিত দুর্ভিক্ষে বহু সংখ্যক প্রাণী নাশ হইল সত্য, কিন্তু কৰুণাময় ঈশ্বর যদি তাহাদিগকে অন্য কোন সুখময় স্থানে লইয়া বাইবার জন্য এই সুলভ উপায়ে বিনষ্ট করিয়া থাকেন, সে কথা কে বলিতে পারে ? বিশেষতঃ, এক্ষণকার বহুদর্শী পণ্ডিতেরা কহিয়া থাকেন যে, এই ভারত ভূমি বিংশতি কোটি মনুষ্যের আহার দিতে সক্ষম, ইহার অধিক প্রজা বৃদ্ধি হইলেই দুর্ভিক্ষের সম্ভাবনা। গত বর্ষের লোক সংখ্যার তালিকার স্পষ্ট দেখা গিয়াছে যে, পূর্বাপেক্ষা এক্ষণে ভারতে পাঁচ কোটি নর নারী অধিক জন্মিয়াছে। যদিও বৎসর বৎসর বহু সংখ্যক নর নারী মহামারীতে বিনষ্ট হইতেছে, তথাচ প্রজা সংখ্যা উন্নত ভিন্ন অবনত হইতেছে না। একপ অবস্থায় ভারত বর্ষে মহামারী ও দুর্ভিক্ষে বহু সংখ্যক প্রাণী নাশ প্রয়োজন বলিয়া ধরিতে হয়। যে সকল স্থানে যুদ্ধ বিগ্রহে অধিক পরিমাণে প্রাণীনাশের সম্ভাবনা নাই, সেই সকল স্থানে Natural

check এ প্রাণী নাশ না হইলে, সংসারের ঘোর বিড়ম্বনা ঘটিবার সম্ভাবনা হয় । যেটি দৈব কর্তৃক হইয়া থাকে, তাহাকেই Positive check কহা যায় । যে সকল বিষয় সংসারের কল্যাণের জন্য আমরা আপনা আপনি করিয়া থাকি, পণ্ডিতেরা তাহাকেই Preventive check কহিয়াছেন । ভারতবর্ষীয়-গণ অতি অল্প বয়সেই বৈবাহিক সূত্রে আবদ্ধ হয় । বাহাদিগের অপত্য প্রতিপালনের কিছু মাত্র ক্ষমতা নাই, অগ্র পশ্চাৎ বিবেচনা না করিয়া কায় ক্লেশে তাহারাও একটি দার পরিত্রা করিয়া থাকে । এই সকল কারণে অন্যান্য ভূভাগ অপেক্ষা ভারতবর্ষে অধিক পরিমাণে প্রজাবৃদ্ধি হইয়া উঠিতেছে ; এই জন্যই পূর্বা-পেক্ষা এ দেশে দুর্ভিক্ষের আধিক্য হইয়া উঠিবে, ইহাতে আর বিচিত্র কি ।

মানব জাতি অপেক্ষা নিকৃষ্ট প্রাণীর মধ্যে Preventive check দেদীপ্যমান রহিয়াছে । মৎস্য জাতির ডিম্ব প্রসব করিয়া তৎক্ষণাৎ আপনাই ভক্ষণ করিয়া ফেলে । দৈবাৎ স্রোতের মুখে ছুই এক বার ডিম্ব ভাসিয়া যায় বলিয়া কি পরিমাণে মৎস্য বৃদ্ধি হইয়া থাকে, তাহা প্রত্যক্ষ দেখিতে পাওয়া যাইতেছে । যদি মৎস্য জাতির ডিম্বভক্ষণ স্বভাব সিদ্ধ না হইত, তাহা হইলে, সলিলে তাহাদিগের স্থান হওয়া ভার হইয়া উঠিত । এতদ্ভিন্ন বিড়ালী, ব্যাঘ্রী ও অন্যান্য নিকৃষ্ট প্রাণীরাও অনেক সময়ে আপন আপন শাবক ভক্ষণ করিয়া ফেলে । বানরী পুং বানর প্রসব করিলেই বানরেরা তৎক্ষণাৎ তাহাকে মারিয়া ফেলে ; এই জন্য দুই শত বা তিন শত বানরীর মধ্যে একটি বা দুইটির অধিক বানর দৃষ্ট হয় না । যদি ঠৈশবাবস্থায় পুং

বানরগুলি এই রূপে বিনষ্ট না হইত, তাহা হইলে, বানরের সংখ্যা যে কি পরিমাণে বৃদ্ধি হইত ও তদ্বারা সংসারের কতদূর অনিষ্ট ঘটিত, তাহা সহজেই বুঝিতে পারা যায় ।

সংসার তরঙ্গ আমাদের মূল প্রস্তাব । কথার প্রসঙ্গে নাস্তিক সম্প্রদায়ের ঈশ্বরের সৃষ্টি প্রকরণ সম্বন্ধে দোষারোপ করণের বিষয় উপস্থিত হইয়াছে । ধর্ম সংক্রান্ত বিপ্লব সংসারের একটি সামান্য তরঙ্গ নহে । সময়ে সময়ে এই তরঙ্গ উপস্থিত হইয়া এক একটি সুসভ্য দেশের সর্বনাশ ঘটয়া গিয়াছে । অদ্যাপি কাল্পনিক ধর্ম রূপ ঝটিকার প্রবল বেগে ভব সাগরে ভয়ানক তরঙ্গ উপস্থিত হইয়া থাকে । কেবল এক ঈশ্বরপরায়ণ ব্যক্তিবৃন্দেরই সে তরঙ্গে আতঙ্ক উপস্থিত হয় না । তাঁহারা বিশ্বাস রূপ সূদৃঢ় উপকূলের উপর দাঁড়াইয়া স্থির চিত্তে এই ভব সাগরের লহরী লীলা দর্শন করেন । যেমন পরিদৃশ্যমান সিন্ধু সলিল কি জল লবণাক্ত হইয়াছে, বা উপকূল হইতে দৃষ্টি করিলে, কি জল সাগরের অগাধ জলরাশি নীল বর্ণ দেখায়, ইহার বিশিষ্ট কারণ এ পর্য্যন্ত কেহই অবধারণিত করিতে পারেন নাই ; সেই রূপ এই ভব সাগরের তরঙ্গ লহরী দেখিয়া তাহারা কি জল বিশ্বয় সাগরে নিমগ্ন হয়, তাহার তথ্যানুসন্ধান করিতে না পারিয়া মূঢ়ের ঈশ্বরের সৃষ্টি কৌশলের উপর অকারণ দোষারোপ করিয়া থাকে । যাহা আমরা বুঝিতে পারি না, তাহার অভ্যন্তরে অবশ্যই কোন নিগূঢ় ভাব আছে ; কিন্তু যাহা বুঝিবার প্রয়োজন নাই, ঈশ্বর সে সকল বিষয় বুঝিতে আমাদের উপর একাধিপত্য করিত, তাহার গতি রোধ করিতে কাহারও ক্ষমতা হইত না, এক্ষণে স্তম্ভিত

বুদ্ধির প্রভাবে স্বভাবকে কিঙ্করের ন্যায় খাটাইয়া লইতেছি। এই জ্ঞান অনুমান করিতে পারা যায় যে, যে সকল বিষয় এক্ষণে আমাদের নিত্য বুদ্ধির অগম্য হইয়া রহিয়াছে, কাল প্রভাবে হয়ত সেই সকল বিষয় আমরা অনায়াসে বুঝিতে পারিব। অতএব ঈশ্বরপরায়ণ ব্যক্তিবৃন্দের উচিত এই যে, তাঁহারা যেন স্থির ভাবে ঈশ্বরের সৃষ্টি কৌশল পরিদর্শন করেন ; কেন না, কোন বিষয়ে সন্দিগ্ধ চিত্ত হইয়া নিষ্ফল বাগ্যুদ্ধে প্রবৃত্ত হইয়া ঈশ্বরের প্রতি দোষারোপ করা নিত্য মূর্খের কার্য। যখন আমরা কে, কোথা হইতে আসিয়াছি, ও মৃত্যুর পর কোথায় গমন করিব, তাহাই স্থির করিয়া উঠিতে পারি নাই, তখন এই প্রকাণ্ড ব্রহ্মাণ্ডের প্রত্যেক কার্য প্রণালীর গূঢ় ভাব বুঝিবার চেষ্টা করা কি অনধিকার চৰ্চা নহে ?

প্রত্যক্ষ পরিদৃশ্যমান সিদ্ধু সলিল যখন স্থির ভাবে থাকে, তখন গলিলস্থ বাষ্পীয় পোত আরোহিণের আনন্দের পরিসীমা থাকে না। সে সময় কেহ বা আহাৰ করিতেছেন, কেহ বা স্নেহে নিদ্রা যাইতেছেন, কেহ বা পুস্তক পাঠ করিতেছেন, এবং কেহ বা স্মৃতিব্য যন্ত্র বাজাইয়া সংগীত দ্বারা শ্রোতাগণের চিত্ত বিনোদন করিতেছেন। সাগরের শান্ত ভাব দেখিয়া সকলের হৃদয়েও শান্তি দেবী মূর্তিমতী হইয়া দাঁড়াইয়া আছেন। কেহ এক বার মনেও ভাবিতেছেন না যে, এই সাগর আবার এক সময়ে ভীষণ ভাব ধারণ করিবে, তখন ইহার ভয়ানক ভরঙ্গ লহরী দেখিয়া জীবনের আশা পরিত্যাগ করিতে হইবে, প্রতিকূল অনুমান হইতে থাকিবে যে, এই বার বুঝি অগাধ জল রাশির মধ্যে পোত নিমগ্ন হইল, আর উঠিবে না, আর রক্ষা

পাইবার কোন উপায় নাই ; অন্তিম সময়ে স্ত্রী পুত্র পরিবারগণের
 কি আত্মীয় বন্ধুর সহিত সাক্ষাৎ হইল না। বহু কষ্টে যে ধন উপা-
 র্জন করিয়াছিলাম, তাহাও অতল জলে ডুবিল। এক্ষণে যদি ককণা-
 ময় ঈশ্বর কৃপাদৃষ্টি করেন, তবেই রক্ষা ; নতুবা নিস্তার লাভের
 আর উপায়ান্তর নাই। হে ককণাময় ! হে বিপদ ভঞ্জন !
 আমাদিগকে রক্ষা কর ! রক্ষা কর ! মুহুমূর্হঃ এই কপ চীৎকার
 শ্রুতি উঠিতে থাকিবে। নাবিকগণ আপনা লইয়া ব্যস্ত হইয়া উ-
 ঠিবে, কেহই কাহারও সাহায্য করিতে আসিবে না। ভব সাগরের
 অন্তর্গত মনুষ্যের দেহ কপ ক্ষুদ্র তরঙ্গীও তদনুরূপ। যখন ইহ
 সংসারে শান্তি বিরাজমান থাকে, অর্থাৎ মনুষ্যের ধন থাকে,
 জন থাকে, পূর্ণ যৌবন থাকে, ও শরীর সুস্থ থাকে, সে সময়
 মানব জাতি এই সংসারকে তৃণ তুল্য জ্ঞান করিয়া দিন যামিনী
 মনের আনন্দে শান্তি সলিলে সন্তরণ করিয়া বেড়ায় ; এক বার
 মনেও ভাবে না যে, এই সংসার সাগরে কোন সময় কুবাভাসে ঘোর
 আন্দোলিত হইয়া উঠিবে, তখন ইহার ভীষণ তরঙ্গ তুফান দেখিয়া
 এই দেহরূপ ক্ষুদ্র তরির কাণ্ডারী একেবারে কর্ণ পরিত্যাগ করিয়া
 বসিবে। তরঙ্গী ভয়ানক আবর্তনে পড়িয়া ঘুরিতে থাকিবে, তখন
 পূর্বে যে সকল সুখ ভোগ করিয়াছিলাম, তাহা কিছুই স্মরণ হইবে
 না, এই সংসারের চতুর্দিকে কেবল বিভীষিকা দর্শন হইবে। কি
 হইল ! কি হইল ! কেন এত দিন আমোদে উন্মত্ত হইয়া প্রকৃত কার্য্য
 বিস্মরণ হইয়াছিলাম ! ভব সাগরের যে একপ তরঙ্গ তুফান আছে,
 পূর্বে তাহা কিছুই অনুভব করিতে পারি নাই। ভাবিয়াছিলাম,
 চির কালই সম ভাবে যাইবে। এক্ষণে দেখিলাম যে, মনুষ্যের সুখ
 নলিনী দলান্বিত জলের ন্যায় সর্ব্বক্ষণ টল টল করিতেছে।

এই সংসার সাগর কামরূপী। এক এক সময় এই সাগর নানা ভাব ধারণ করে। কাহারও পক্ষে শান্ত, কাহারও পক্ষে অশান্ত। যখন এক জন এই সাগরে পড়িয়া ‘প্রাণ যায়!’ বলিয়া চীৎকার করিতেছে, ঠিক সেই সময়েই এই সাগরের অন্য এক দিকে আনন্দ কোলাহলের গগনভেদী ধ্বনিতে নভোমণ্ডল কম্পিত হইতেছে। এই সাগরের উপকূলে দাঁড়াইয়া কেহ বা বিনা আয়াসে দুই হস্তে রাশি রাশি বহু মূল্য রত্ন সংগ্রহ করিতেছে, কেহ বা তরঙ্গ লহরী যুক্ত সিন্ধু জলের তলস্পর্শ করিয়াও একটি কপর্দক উদ্ধৃত করিতে পারিতেছে না। তবেই সংসার সকলের পক্ষে সমান নহে। যাহার এক দিন অতুল ঐশ্বর্য ছিল, পুত্র কলত্র ছিল, ছরদৃষ্ট বশতঃ সে সমস্ত হারাইয়া নিভাস্ত দীন ভাবাপন্ন হইয়া পড়িয়াছে। যে পূর্বে দীন দরিদ্র ছিল, এক্ষণে সে ধনে জনে পরিপূর্ণ হইয়া উঠিয়াছে। অদ্য যে হাসিতেছে, কল্য তাহাকেই আবার ক্রন্দন করিতে দেখা যাইবে। এক দিবস যে নগর ধনে জনে পরিপূর্ণ ছিল, এক দিনের দৈব বিড়ম্বনা বশতঃ সেই নগর অদ্য প্রাণী শূন্য হইয়া পড়িয়াছে। কল্য যে সুস্থ শরীরে মনের আনন্দে সংগীত করিয়াছিল, অদ্য সে রোগের যন্ত্রণায় অস্থির হইয়া শয্যাবলুণ্ঠিত হইতেছে। কিছু কাল পূর্বে যে সকল স্থান মরুভূমি বলিয়া বিখ্যাত ছিল, এক্ষণে সেই সকল স্থানেই বহু জনাকীর্ণ নগর ও উপনগর হইয়াছে। পূর্বের শ্মশান ভূমি এক্ষণে কুম্বমোদ্যান হইয়াছে, রাজ প্রাসাদ শ্মশান ভূমিতে পরিণত হইয়াছে। তবেই এই সংসার যার পর নাই পরিবর্তনশীল; ইহা কখন কি ভাব ধারণ করিবে, তাহার কিছুই স্থিরতা নাই। এই জন্যই পণ্ডি-

তেরা এই পরিবর্তনশীল সংসারকে কখন বা প্রচণ্ড ভরঙ্গমালা সঙ্কুল সাগরের সহিত, কখন বা ঐন্দ্রজালিক ক্রীড়ার সহিত, এবং কখন বা একেবারে সমস্তই অলীক বলিয়া বর্ণন করিয়াছেন । যাঁহারা জ্ঞান চক্ষে এই সংসার সাগরের ভরঙ্গ তুফান দর্শন করিয়া প্রফুল্ল চিত্তে হাস্য করেন, তাঁহারাই ধন্য ; নতুবা অজ্ঞানের পক্ষে এই জগত কখন কুসুম শয্যা, কখন বা অগ্নিকুণ্ড বলিয়া বোধ হয় ।

আত্মতত্ত্ব ।

যে রাজ্যের রাজা আপন রাজ্য খণ্ডের সবিশেষ তত্ত্বানু-সন্ধান না লইয়া নিশ্চিন্ত ভাবে বিলাস ভোগ করেন, তাঁহার রাজ্য অচির কাল মধ্যেই শত্রু হস্ত গত হয় । যে গৃহস্থামী প্রত্যহ আপন সংসারের তত্ত্বানুসন্ধান না লন, তাঁহার পরিবারের মধ্যে নানা দোষ ও সংসারে মহা বিশৃঙ্খল ঘটয়া সর্বতোভাবে তাঁহাকে ব্যাধিত করে । যে কৃষক স্বকীয় ভূমি খণ্ডের বিশেষ তত্ত্ব অবগত না হইয়া বীজ বপন করে, তাহার সে ভূমিতে কোন কালেই সুন্দর শস্য উৎপন্ন হয় না । যে গৃহে কালসর্প বাস করে, সেই গৃহের অধিকারী উক্ত সর্পের বিনাশ সাধন না করিয়া যদি অকুতোভয়ে সসর্প গৃহে বাস করে, তাহা হইলে, তাহাকে অবশ্যই সর্পাঘাতে মরিতে হয় । যদি কেহ অন্ধকারাচ্ছন্ন গৃহে আলোক না লইয়া প্রবেশ করে, তাহা হইলে, সে যে গৃহাভ্যন্তরস্থ কোন কঠিন দ্রব্যের আঘাতে ধরাভলশায়ী হইবে,

ইহা আশ্চর্যের বিষয় নহে। সেই রূপ যিনি এই ভৌতিক দেহ রাজ্যের সমস্ত তদন্ত, ও বাহ্য জগতের সহিত ইহার সমস্ত সম্বন্ধ অবগত হইবার প্রয়াস না পাইয়া অজ্ঞানাক্রমে ইতস্ততঃ পরিভ্রমণ করেন, তাঁহার দেহ রাজ্যে নানা প্রকার বিশৃঙ্খল ঘটে, ও তিনি মোহাদি শত্রু কর্তৃক আক্রান্ত হইয়া পদে পদে কষ্টভোগ করিয়া থাকেন।

শাস্ত্রকারেরা লিখিয়াছেন যে, আমাদিগের এই দেহ রাজ্যে আত্মাই সর্বেশ্বর; যদিও তিনি কোন বিষয়ে লিপ্ত নহেন, তথাচ স্বভাবের রীতি অনুসারে তাঁহাকে দেহবাসী হইয়া সুখ দুঃখের ভাগী হইতে হয়। দেহ যে প্রকারে বিনষ্ট হউক না কেন, আত্মা অক্ষত ভাবে সে দেহ পরিত্যাগ করিয়া দেহান্তরে প্রবিষ্ট হইতে পারেন, আত্মার কোন কালেই বিনাশ নাই। সে যাহা হউক, সকল মনুষ্যেরই এক মনে ও এক ধ্যানে সৰ্বাগ্রে আপনাকে চিনিয়া তৎপরে সংসারের অপরাপর বিষয়ের তত্ত্বানু-
সন্ধানেনে প্রবৃত্ত হওয়া, এবং সমস্ত জগতের সহিত একটি মাত্র মনুষ্যের কত দূর সংস্রব আছে, তন্ন তন্ন করিয়া তাহা জানা উচিত। আত্মজ্ঞান হীন লোকেরা কবন্ধের ন্যায় এই সংসার ক্ষেত্রে বিচরণ করে; এই জন্ত প্রতিকণ তাহাদিগের বিপদ ও দুঃখ ঘটিবার সম্পূর্ণ সম্ভাবনা। পূর্বে বলা হইয়াছে যে, আলোক ব্যতীত অন্ধকার গৃহে প্রবিষ্ট হইলে, যেমন পদে পদে নানা বিঘ্ন ঘটিবার সম্ভাবনা থাকে, সেই রূপ আত্মজ্ঞান বিহীন হইয়া সংসার ক্ষেত্রে বিচরণ করিতে গেলে, কোন অবস্থাতেই মানবের ঐ লাভের সম্ভাবনা থাকে না। নিকৃষ্ট প্রাণিগণের আত্মজ্ঞান নাই, এজন্য তাহারা পদে পদে বিপদে পতিত হয়। পক্ষীর

মধ্যে কাক ও চতুষ্পদ পশুর মধ্যে শৃগাল অভ্যস্ত ধূর্ত হইলেও মনুষ্যের নিকট সৰ্ব্বদা প্রতারিত হইয়া থাকে ; সেই রূপ আত্ম-তত্ত্ব বিহীন, অথচ সাংসারিক কার্য্যে বিলক্ষণ চতুর ব্যক্তির বহু কাল ধূর্ততা দ্বারা শত শত লোককে প্রতারণা করিয়া অবশেষে আপনারাই স্বকীয় জালে নিপাতিত হইয়া সমূলে বিনষ্ট হয় ; কিন্তু যাঁহাদিগের আত্মজ্ঞান আছে, অথচ সাংসারিক চতুরতার লেশ মাত্র জানেনা, তাঁহারা সেই জ্ঞান প্রভাবে শত সহস্র ধূর্তের নিকট বিনা আয়াসে আত্ম রক্ষা করিতে পারেন । বিনা তত্ত্বজ্ঞানে কেহই আপনা আপনি ভাল হইতে পারেন না । যিনি আপনাকে আপনি ভাল করিয়া চিনিয়াছেন, আপ-নার দোষ গুণের সমালোচনা আপনা আপনি করিতে পারেন, তিনিই আত্মতত্ত্বের অধিকারী হন ।

আমরা যে সৰ্ব্বদা ‘আমি আমি’ করিয়া ব্যতিব্যস্ত হইতেছি, আমার বাটী, আমার ঘর, আমার পুত্র কলত্র, ও আমার শরীর ভাবিয়া মনোমধ্যে ইহারই সৰ্ব্বদা আন্দোলন করিতেছি ; কিন্তু বিশেষ বিবেচনা করিয়া দেখিতে গেলে, ইহার কেহই আমার নহে । অন্য কি কথা, আমার দেহ এবং অঙ্গ প্রত্যঙ্গগুলিও আ-মার বশ নহে, তাহারা স্বভাব সম্মত হইয়া স্বভাবেরই কার্য্য করি-তেছে । যাহার যে কার্য্য স্বভাব কর্তৃক নির্ণীত হইয়াছে, সে তাহাই করিবে । আমার আদেশে চক্ষু কথা কহিবে না, কর্ণ দর্শন করিবে না, ও হস্তদ্বয় শরীর বহন করিয়া এক স্থান হইতে অন্য স্থানে গমন করিবে না । যে সকল অঙ্গ প্রত্যঙ্গ লইয়া আমি দেহী শব্দে বাচ্য হইয়াছি, তাহারাই যখন আমার নহে, ও আমি যে কে, তাহারই যখন স্থিরতা নাই, তখন আর কাহাকে

আমি ‘আমার’ বলিয়া শ্লাঘা করিব ? স্ত্রী পুত্র কি আমার ? এবং আমিই কি তাহাদের ? তাহাই বা কেমন করিয়া বলিব । শাস্ত্রানুসারে যে স্ত্রী আমার অর্দ্ধাঙ্গের অধিকারী হইয়াছেন, যাঁহার সুখ স্বচ্ছন্দতার জন্য আমি এই সংসার ক্ষেত্রে না করিতেছি এমনত কার্য্যই নাই, যিনি পুত্রবতী হইলে, আমার যথা সর্ব্বস্বের অধিকারিণী হন, তিনিই কি আমার ? কাল আগত হইলে, তিনি কি আমার জন্য লোকান্তরে গমন করিতে প্রস্তুত থাকিবেন ? না, মুহূর্ত্ত কালের জন্যও না । আমি যত কেন যত্ন করি না, যত কেন স্নেহ করি না, আমার সহধর্ম্মিণী কিছুতেই আমার বাধ্য হইতে পারিবেন না, ইচ্ছা সত্ত্বেও তিনি আমার আজ্ঞানুবর্ত্তিনী হইবেন না, তাঁহাকে কালের বাধ্য হইয়া চলিতে হইবেই হইবে । আত্মীয়, বান্ধব, পুত্র, কন্যা প্রভৃতি সকলেই সেই কালের আজ্ঞাবহ, আমি স্বয়ংও তদীয় অবাধ্য হইতে পারিব না । সে যখন ডাকিবে, তখনই তাহার পশ্চাদ্বর্ত্তী হইতে হইবে, আর সাংসারিক কোন বিষয়ের প্রতি দৃষ্টি করিবার অবসর প্রাপ্ত হইব না । বহু কষ্টে যে বিষয় বিতব করিয়াছি, তাহা সমস্তই পড়িয়া থাকিবে, তাহার এক কপর্দকও সঙ্গে যাইবে না । আমি কোথা হইতে আসিয়াছিলাম, এক্ষণেই বা কোথায় যাইতেছি, এবং যদি কোন স্থান থাকে, সেই স্থানে গিয়াই বা আমার কি অবস্থা ঘটবে, এ কাল পর্য্যন্ত তাহার কিছুই স্থির হইল না; তবে দেখিয়া শুনিয়া এই স্থির সিদ্ধান্ত করিয়াছি, এক দিবস এই জগৎ পরিত্যাগ করিতে হইবেই হইবে ; কিন্তু কবে যে, ত্যাগ করিতে হইবে, তাহার দিন স্থির নাই ।

বাহ্য জগতের সহিত অদৃশ্য জগতের অনেক সাদৃশ্য আছে ;

শাস্তিকারেরা অনুমান দ্বারা সেই গুলি কল্পনা করিয়া লইয়াছেন। বিশেষতঃ, পৌরাণিক মতে পৃথিবীর সহিত স্বর্গ রাজ্যের সমস্ত বিষয়েরই সাদৃশ্য দেখিতে পাওয়া যায়। স্বর্গে রাজা আছেন, তাঁহার হয় হস্তী ও সৈন্য সামন্ত আছে, তাঁহার প্রমোদ কানন আছে, তিনি কখন কখন শত্রু কর্তৃক রাজ্যচ্যুত হন, আবার যুদ্ধ বিগ্রহ করিয়া আপন রাজ্য উদ্ধার করেন, যুদ্ধ বিগ্রহে লিপ্ত হইয়া মানবের ন্যায় তাঁহাকে কখন কখন শোক দুঃখে অভিভূত হইতে হয়, স্বর্গের রাজা স্বর্গবাসী প্রজাপুঞ্জের সদস্য কার্যের বিচার করিয়া থাকেন, এবং উচিত বিধানে পাপের দণ্ড ও পুণ্যের পুরস্কার করেন। ইহ জগতেও সেই রূপ দেখিতেছি, ইহ জগতের রাজাও পাপ পুণ্যের বিচার করিয়া থাকেন। যদি কেহ ইচ্ছা পূর্বক নরহত্যা করে, তাহা হইলে, রাজা কিম্বা রাজপ্রতিনিধি বিচার করিয়া তাহার প্রাণ দণ্ডের আদেশ করিয়া থাকেন, এবং কোন্ দিবস বধ্য ভূমিতে তাহার প্রাণান্ত হইবে, তাহা অবধারিত করিয়া দেন; কিন্তু আমাদের যে কবে প্রাণান্ত হইবে, তাহার দিন অবধারিত নাই; সেই জন্য সকলে মৃত্যুর কথা একেবারে বিস্মৃত হইয়া চিরজীবীর ন্যায় কার্য্য করিতে আরম্ভ করিয়াছে। এটি সৃষ্টিকর্ত্তার একটি চমৎকার কৌশল, ইহা অবশ্যই স্বীকার করিতে হইবে; কিন্তু অজ্ঞান লোকেরাই তাঁহার সেই কৌশলে ভুলিয়াছে, তত্ত্বদর্শী লোককে তিনি ভুলাইতে পারেন নাই। তত্ত্বদর্শী লোকেরা সংসারকে নিতান্ত মায়াময় জ্ঞান করিয়া প্রতিকূળ মৃত্যুর জন্য প্রস্তুত হইয়া আছেন। জ্ঞানবলে তাঁহারা জীবন ও মৃত্যুকে সমান জ্ঞান করিয়া থাকেন, তাঁহারা শরীরের অস্তিত্বই স্বীকার করেন না। তাঁহারা বলেন যে, যেমন সমুদ্র জলের ঘোর

আবর্তনে বুদ্ধবুদ্ধ সৃষ্টি হয়, সেই গুলি কিয়ৎ ক্ষণ স্রোত জলে ভাসিয়া আবার জলেই লয় প্রাপ্ত হইয়া যায়, আমাদিগের এই নর দেহও সেই রূপ। ভূভগণ সৰ্বদা সংসার আবর্তনে ঘুরিতেছে, সেই আবর্তন হইতে জল বুদ্ধবুদ্ধের ন্যায় প্রাণী সকল সমুৎপন্ন হইয়া কিয়ৎ ক্ষণ এই সংসার ক্ষেত্রে ক্রীড়া করিয়া আবার সেই ভূতেই লয় প্রাপ্ত হইতেছে। ষাঁহাদিগের এই রূপ জ্ঞান আছে, তাঁহারা এই সংসারকে অকিঞ্চিৎকর বোধ করিয়া প্রতিক্ষণ চরম ভাবিয়া থাকেন, মোহে মুগ্ধ হইয়া কিছুতেই লিপ্ত হন না।

পূর্বে উক্ত হইয়াছে, ধনই বল, কিস্তী স্ত্রী পুত্র পরিবারই বল, ইহা কিছুই প্রকৃত প্রস্তাবে আমার নহে, কেবল মায়ায় মুগ্ধ হইয়া ‘আমার আমার’ করিতেছি। জ্ঞানীরা জ্ঞান অস্ত্রে সেই মায়া জাল ছিন্ন করিয়া এই সংসারের কিছুতেই লিপ্ত হন না, অর্থাৎ ‘আমার’ বলিয়া ধরেন না। যখন প্রতিক্ষণ দেখিতেছি যে, সংসারের কিছুই চিরস্থায়ী নহে, আজ এক ব্যক্তি সামান্য অবস্থা হইতে উচ্চ পদাধিকার হইল, তাহার সম্পদের সীমা রহিল না, ধনগর্বে সংসারের লোককে তৃণতুল্য জ্ঞান করিতে লাগিল, ধনের অহঙ্কারে যত্ন একেবারে ভুলিয়া গেল; কিছু দিন পরে আবার সেই ব্যক্তিই অশেষ দুর্দশা ভোগ করিল। কিছু কাল পূর্বে যে স্থানে নদী প্রবল বেগে প্রবাহিত হইয়াছিল, এক্ষণে সেই সকল স্থান শস্তক্ষেত্র হইয়াছে। পূর্বে যে সকল মহাবীরের বীরদর্পে ধরিত্রীর হৃৎকম্প হইয়াছিল, ষাঁহারা সাম্রাজ্য স্থাপনের জন্য নির্দয় হৃদয়ে অসংখ্য মহাপ্রাণীর প্রাণ নষ্ট করিয়াছিলেন, এক্ষণে তাঁহাদিগের সমাধি মন্দির মাত্র নাম রক্ষা করিতেছে।

এই সংসারে ভূত সমষ্টি ব্যতিরেকে আর কিছুই নাই, তাহার স্বভাবের আবর্তনে অবিরত ঘুরিতেছে । সেই ভূত সমষ্টির একত্র সংযোগের নাম জন্ম, বিচ্ছিন্ন হওয়ার নাম মৃত্যু । পাঠকগণ, অনেকেই কাগজ প্রস্তুত করণের যন্ত্র দেখিয়া থাকিবেন । সেই যন্ত্রের প্রথম প্রক্রিয়ার স্থানে একটি প্রকাণ্ড চৌকা আছে, সেই চৌকাটি নানাবিধ উপকরণে পরিপূর্ণ । জল ও অগ্নির শক্তিতে তৎসমুদয় একত্র মিলিত হইয়া যন্ত্র মধ্যে প্রবিষ্ট হইতেছে । নানা প্রক্রিয়ার পর তাহা হইতে এক খণ্ড কাগজ নির্গত হইয়া থাকে । সেই কাগজ খণ্ড মনুষ্যের হস্ত গত হইলে, কার্য্য গতিকে তাহার নানা অবস্থা ঘটে, দীর্ঘ কালের পর তাহা একেবারে অকর্ষ্য্য হইয়া যায় । সে সময় কেহ বা দক্ষ করিয়া ফেলে, কেহ বা খণ্ড খণ্ড করিয়া দূরে নিক্ষেপ করিয়া থাকে । তৎ কালে আমরা ভাবিয়া থাকি যে, দক্ষ দ্বারা কাগজ খণ্ড বিনষ্ট হইয়া গেল ; কিন্তু তাহার একটি পরমাণুও নষ্ট হইল না । পূর্বে যে ভূত সমষ্টি হইতে সেই কাগজ উৎপন্ন হইয়াছিল, দক্ষ করবার সময়ে সেই ভূত সমষ্টি আপন আপন অংশ আকর্ষণ করিয়া লইল । আমাদের এই ভৌতিক দেহ সমুৎপন্ন হইবার প্রক্রিয়াও সেই কাগজ প্রস্তুত করণ যন্ত্রের সমতুল্য । আমরা যে সকল সামগ্রী আহাৰ করিয়া জীবন ধারণ করি, তাহার প্রত্যেক দ্রব্যের মধ্যে ভূত সমষ্টি আশ্রয় করিয়া আছে । আহাৰ সামগ্রী উদরস্থ হইলে, পাক যন্ত্রে পরিপাক হইয়া শরীর রক্ষার জন্য যাহা যাহা প্রয়োজন, তাহা নানা স্থানে বিভক্ত হইয়া পড়িল । কতক রক্ত হইল, কতক মাংস হইল, কতক অস্থি হইল, আবার অসারাংশ মলরূপে নির্গত হইয়া গেল ।

রক্ত হইতে বীৰ্য্য উৎপন্ন হয়, সেই বীৰ্য্য শোণিত সংযোগে একটি বুদ্ধবুদ্ধাকার ধারণ করে। তাহার পর জননীর আহারের সাহায্যে সেই বুদ্ধবুদ্ধাকারের ক্রমে ক্রমে অবয়ব গঠিত হইতে থাকে, অর্থাৎ আহারীয় দ্রব্যের সার ভাগ শরীরস্থ যন্ত্রের নানা প্রক্রিয়া দ্বারা সেই উদরস্থ জীবের রক্ত মাংস ও অস্থি প্রভৃতির পুষ্টি সাধন করিতে থাকে। শোণিত শুক্রের সংযোগ অবধি জীব শরীরের সম্পূর্ণ অবয়ব হওয়া পর্য্যন্ত জননীর এক জঠর যন্ত্রে যে কত প্রকার প্রক্রিয়া হইতে থাকে, তাহার শতাংশের একাংশও বর্ণন করা মনুষ্যের সাধ্যায়ত্ত নহে। জীবের জঠরে জীবের সৃষ্টির ন্যায় অদ্ভুত ব্যাপার আর কিছুই দৃষ্টি গোচর হয় না। সেই অদ্ভুত প্রক্রিয়া দ্বারা সৃষ্ট জীব সমূহের মধ্যে আমিও একটি জীব। আমি কি জন্ম সৃষ্ট হইয়াছি, না হইলেই বা সংসারের কি ক্ষতি বৃদ্ধি হইত, এ পর্য্যন্ত তাহা স্থির করিয়া উঠিতে পারি নাই; তবে এই মাত্র উপলব্ধি হয় যে, আমা দ্বারা আর কতকগুলি মহাপ্রাণীর পরম্পরের সাহায্য জন্ম আমি সৃষ্ট হইয়াছি। যখন স্পষ্ট দেখা যাইতেছে যে, এই পরিদৃশ্যমান জগতের কীটানুকীটের দ্বারাও ঐশ্বরের অভিশ্রুতি সাধিত হইতেছে, তখন আমার উৎপত্তিরও অবশ্য কোন বিশিষ্ট কারণ আছে, তাহাতে সংশয় নাই।

একগে আমি কে, তাহারই তত্ত্বানুসন্ধান প্রবৃত্ত হইলাম। এই দেহ কি আমার? না, ‘আমি’ শব্দের অন্য কোন অর্থ আছে? এই ভৌতিক দেহে যদি আমার আমিত্ব থাকিত, তাহা হইলে, এ শরীর কখনই স্বভাবের বশীভূত হইয়া চলিত না। যখন এই শরীরকে আমি ‘আমার’ বলিয়া গর্ব করি, হয় ত

উৎকণ্ঠা আমার সেই গর্ক খর্ক হইতে পারে । আমি যুদ্ধে পূর্বে মনে করিয়াছিলাম, অদ্য নদী তীরে সন্ধ্যা সমীরণ সেবন করিতে যাইব ; কিন্তু বাটী হইতে বহির্গত হইবার কিঞ্চিৎ পূর্বে আমার শিরঃপীড়া উপস্থিত হওয়াতে, যন্ত্রণায় অস্থির হইয়া পড়িলাম । শরীরের এক অঙ্গে পীড়া উপস্থিত হইল বলিয়া অচ্যাত্ত অঙ্গ প্রত্যঙ্গ সেই কষ্টে ক্লিষ্ট হইয়া পড়িল ; সুতরাং সন্ধ্যা সমীরণ সেবনে আর বহির্গত হইতে পারিলাম না । এক জন ভূত্যের উপর আমার যত দূর আধিপত্য চলে, তাহার শতাংশের একাংশও আপন শরীরের উপর চলে না । শরীর প্রকৃতির বশ হইয়া যাহা করিবে, আমাকে তাহারই অনুগত হইয়া চলিতে হইবে । তবেই শরীরের উপর আমার ‘আমিত্ব’ নাই । তবে আমি কে ? এই সম্বন্ধে মহাপ্রাজ্ঞ শঙ্করাচার্য্য যাহা বলিয়াছেন, নিম্নে তাহারই সারাংশ সঙ্কলন করা গেল ;—

ষোড়শ বর্ষ বয়ঃক্রম কালেই শঙ্করাচার্য্য এক জন ধীশক্তি সম্পন্ন পণ্ডিত হইয়া উঠিয়াছিলেন । পণ্ডিত মণ্ডলী তাঁহাকে যখন যে প্রশ্ন করিতেন, তিনি দ্বি ভাবে তাহার উত্তর দিতেন । এক দিন এক জন পণ্ডিত তাঁহাকে জিজ্ঞাসা করিয়াছিলেন,— মহাত্মন, আপনি কে, তাহা কি স্থির করিয়াছেন ? তৎক্ষণে তিনি কহিলেন, ‘স নিত্যোপলব্ধি স্বরূপো মহাত্মা ।’ পণ্ডিতবর পুনরায় বলিলেন, সে কি রূপ ? শঙ্করাচার্য্য কহিলেন, যেমন বহু সংখ্যক সরাব স্থিত জলে সূর্য্যের প্রতিবিম্ব পড়িয়া বহু সংখ্যক সূর্য্য পরিদৃশ্যমান হন, আমিও সেই রূপ ঈশ্বরাত্মার একটি প্রতিবিম্ব মাত্র । যেমন কুন্তকারেরা মৃত্তিকার সরাব প্রস্তুত করিয়া থাকে, স্বভাব আমার এই শরীরটিও সেই রূপ পঞ্চ ভূতে

নিৰ্মাণ করিয়াছেন, এবং ঈশ্বর আত্মা রূপে এই দেহের মধ্যে বিরাজমান রহিয়াছেন । যেমন জল পরিপূরিত সরাব গুলি একটি যষ্টি দ্বারা ভগ্ন করিয়া ফেলিলে, আর সূর্য্যের প্রতিবিম্ব দৃষ্টি গোচর হয় না, এবং সরাবের উপর যে আঘাত পড়ে, তাহা সূর্য্যকে স্পর্শ করিতে পারে না, সেই রূপ এই নশ্বর শরীর যখন বিনষ্ট হয়, তদভ্যন্তরস্থ চৈতন্যাংশও ঈশ্বরে লয় হইয়া যায় । মনুষ্য শরীর ধ্বংস দ্বারা আত্মার কিছু মাত্র ক্ষতি বুদ্ধি হয় না, তিনি যে রূপ সেই রূপেই থাকেন ।

অবিনশ্বর আত্মাই বা কে ? এ রূপ প্রশ্ন হইতে পারে । এতৎ সম্বন্ধে ভগবদ্গীতায় লিখিত আছে, শরীর অপেক্ষা ইন্দ্রিয়-গণ শ্রেষ্ঠ, ইন্দ্রিয়গণ অপেক্ষা মন শ্রেষ্ঠ, মন অপেক্ষা সংশয় শূন্য বুদ্ধি শ্রেষ্ঠ ; সেই বুদ্ধি অপেক্ষা শ্রেষ্ঠকেই আত্মা বলা যায় । সেই আত্মা সামান্য বুদ্ধির অগোচর, অথচ সর্বত্র বিরাজমান । যেমন সমীরণ সর্বত্র সঞ্চারিত হইতেছে, অথচ আমরা চক্ষে দেখিতে পাই না, কেবল ত্রুৎ দ্বারা অনুভব করিতে পারি, সেই রূপ আত্মার অস্তিত্ব কেবল তত্ত্বদর্শী মহাত্মা লোকেরা মনে ধারণা করিতে পারেন ; এতদ্ভিন্ন আত্মার অস্তিত্ব প্রশংসার আর উপায়ান্তর নাই । যদি কোন তार्কিক লোক বলেন যে, আমি আত্মার অস্তিত্ব স্বীকার করিব না ; তাহা হইলে, প্রশংসা প্রশংসা দর্শাইয়া তাঁহাকে বুঝাইয়া দেওয়া সহজ নহে । আত্মার অস্তিত্ব যিনি স্বয়ং না বুঝেন, তাঁহার সে বিষয় প্রতীতি করান কাহারও সাধ্যায়ত্ত নহে ।

ঈশ্বর জ্ঞান ও আত্মতত্ত্ব উভয়ই সহজে কাহারও বোধগম্য হয় না । ঈশ্বর রূপা ব্যতিরেকে ঈশ্বর জ্ঞান কোন্ কালে কাহার

হইয়াছে ? তর্ক দ্বারা ঈশ্বর তত্ত্ব নির্ণয় কখনই হইতে পারে না । বিশ্বাস ব্যতিরেকে সেই বিশ্বপতিকে প্রাপ্ত হইবার আর উপায়ান্তর নাই । এই জগতের সৃষ্টি কৌশল আলোচনা করিয়া যাঁহার মনে দৃঢ় বিশ্বাস জন্মে যে, এই বিচিত্র ব্রহ্মাণ্ডের অবশ্য এক জন সৃষ্টি কর্তা আছেন—তিনি অনাদি, সর্ব ব্যাপী, তুলনা রহিত, পবিত্র, ও চৈতন্য স্বরূপ, এবং তিনিই আত্ম রূপে প্রত্যেক জীবের মধ্যে অবস্থান করিতেছেন, তিনিই ঈশ্বরকে প্রত্যক্ষ দেখিতে পাইবেন, এবং তাহা হইলেই তাঁহার আপনা আপনি আত্মজ্ঞান হইবে । তখন তিনি জ্ঞান চক্ষু দেখিতে পাইবেন যে, এই সংসারের স্থাবর জঙ্গম প্রভৃতি সমস্ত বস্তুই সেই পরমাত্মার অংশ মাত্র । আমরা নিরন্তর মায়া মোহে বিমোহিত হইয়া নানা রূপ কল্পনা করিতেছি, নানা পথের পথিক হইতেছি ; যে সকল বস্তু আমার নহে, সেই সকল বস্তুই ‘আমার আমার’ করিয়া ব্যতিব্যস্ত হইতেছি ; কিন্তু আত্মার আমি, ও আত্মা আমার, ইহা ভিন্ন আমি কাহারও নহি, এবং আমারও কেহ নহে ।

জগৎ আত্মায়, মনে এই দৃঢ় বিশ্বাস জন্মিলে, মন নির্মল হয়, এবং কিছুই অপবিত্র বলিয়া বোধ হয় না । আত্মপর বিবেচনাই মনোমালিন্যের ও শাস্তি ভঙ্গের একটি প্রধান কারণ । যাঁহাদিগের সত্ত্বগুণ প্রবল, তাঁহারা সেই শ্রেষ্ঠ গুণের প্রভাবে ইহ সংসারে কাহাকেও পর দেখেন না । আপন সন্তানের প্রতি যে রূপ স্নেহ করেন, একটি নিকৃষ্ট প্রাণীকে স্পর্শ করিলে, পুরাণাদি শাস্ত্রের মতে পাপ স্পর্শ হয়, তাহাকেও সেই রূপ স্নেহে লালন পালন করিয়া থাকেন । এতৎ সম্বন্ধে মহাত্মা শঙ্করাচার্য্য

একটি চমৎকার দৃষ্টান্ত দর্শাইয়াছিলেন । এক দিন তিনি ভ্রমণ করিতে করিতে দেখিলেন, একটি কুকুর কর্দমে পড়িয়া রহিয়াছে, কর্দম হইতে আত্মোদ্ধার করিবার যৎপরোনাস্তি চেষ্টা পাইতেছে ; কিন্তু কোন মতে কূতকার্য্য হইতে পারিতেছে না । তদূষ্টে দয়ার্দ্ৰ চিত্ত শঙ্করাচার্য্য সেই কর্দম পূরিত দুর্গন্ধময় স্থানে গিয়া কুকুরটিকে ক্রোড়ে লইয়া শুষ্ক ভূমিতে আনয়ন করিলেন, এবং তথা হইতে স্বল্পে তুলিয়া একটি জলাশয়ে লইয়া গিয়া তাহার গাত্র ধোত করিতে আরম্ভ করিলেন । সেই জলাশয়ে এক জন প্রাচীন ব্রাহ্মণ স্নান করিতেছিলেন, তিনি ব্রাহ্মণ তনয়কে একপ নিকৃষ্ট পশুর সেবা করিতে দেখিয়া ভৎসনা করিয়া বলিলেন, ওহে অবোধ ব্রাহ্মণ ! তুমি কি করিতেছ ? যে কুকুর স্পর্শ করিলে ব্রাহ্মণের শরীর অপবিত্র হয়, তুমি সেই কুকুরের গাত্রের কর্দম ধোত করিতেছ ? তোমার পাপের ইয়ত্তা নাই । তৎশ্রবণে শঙ্করাচার্য্য হাস্য করিয়া বলিলেন, “ আত্মজ্ঞান পথি বিচরিতাং কো বিধি কো নিষেধঃ । ” শঙ্করাচার্য্যের এই অর্থ পূরিত বাক্যটি শ্রবণ করিয়া বৃদ্ধ ব্রাহ্মণ মনে মনে বিবেচনা করিলেন, এই ব্রাহ্মণও সামান্য ব্যক্তি নহে ; এই সামান্য একটি কথায় প্রকৃত তত্ত্বজ্ঞানের সারাংশ সঙ্কলন করিল । ব্রাহ্মণ নীর হইতে তীরে উঠিয়া শঙ্করাচার্য্যের নিকটে উপস্থিত হইলেন, এবং বলিলেন, ব্রাহ্মণ, তুমি কে, আমাকে পরিচয় দাও । শঙ্করাচার্য্য কহিলেন, আমি কুকুরের দ্বায় ঈশ্বরের একটি সৃষ্ট পদার্থ । আমি কুকুর স্পর্শ করিয়াছি বলিয়া আপনি পূর্বে যে ভৎসনা করিলেন, সেটি নিতান্ত অযুক্ত । এক্ষণে বিবেচনা করিয়া দেখুন, যাহার আত্মজ্ঞান জন্মিয়াছে, যে তত্ত্ব পথের পথিক হইয়াছে,

তাহার পক্ষে কিছুই বিধিও নাই, এবং কিছুই নিষেধও নাই। শাস্ত্রকারেরা যে সকল বিধি লিপিবদ্ধ করিয়া গিয়াছেন, তৎ সমুদয়ই অজ্ঞানের পক্ষে, জ্ঞানীর পক্ষে কোন কথাই লিপিবদ্ধ হয় নাই। হে ব্রাহ্মণ, আমাদিগের এই শরীর ভূত সমষ্টি দ্বারা সৃষ্ট, ইহা আপনি অবশ্য স্বীকার করিয়া থাকেন, এবং “যত্র জীব তত্র শিব” বোধ হয় এ মহাবাক্যেরও অবমাননা করেন না; তবে কুকুরস্পর্শে ব্রাহ্মণের শরীর অপবিত্র হইবে কেন, আপনাকে এই কথাটি ভাল করিয়া বুঝাইয়া দিতে হইবে। বৃদ্ধ ব্রাহ্মণ বলিলেন, তুমি কি বলিতেছ, পড়িয়া শুনিয়া কি তোমার এই জ্ঞান জন্মিয়াছে? ব্রাহ্মণ শরীরে ও ঘৃণিত পশু কুকুরে কি প্রভেদ, তাহা কি আবার বুঝাইয়া দিতে হইবে। শঙ্করাচার্য্য কহিলেন, মহাশয়, পড়িয়া শুনিয়া যত দূর জ্ঞান সঞ্চয় করিয়াছি, তাহাতে কুকুরের সহিত আমার কি প্রভেদ একপ কথা কিছুই লিখিত নাই; তবে তত্ত্বজ্ঞানীদিগের মুখে শুনিয়াছি যে, “যত্র জীব তত্র শিবরূপেণ নারায়ণঃ” এ কথা যদি সত্য হয়, তাহা হইলে, আমিও নারায়ণ, আপনিও নারায়ণ, এবং এই কুকুরও নারায়ণ। মহাশয়, বিবেচনা করিয়া দেখুন, এই কুকুর কদমে পড়িয়া প্রায় গতাস্থ হইয়াছিল, বহু যত্নে আমি ইহার প্রাণ রক্ষা করিয়াছি, এই কার্যের দ্বারা পুণ্য না হইয়া কুকুর স্পর্শজনিত আমাকে পাপের ভাগী হইতে হইবে? ব্রাহ্মণ কহিলেন, নিকৃষ্ট প্রাণীর প্রাণ রক্ষা করাতে ধর্ম আছে, এ কথা আমি অবশ্য স্বীকার করি; তাহা বলিয়া কি কুকুরকে অস্পর্শীয় পশু বলিয়া স্বীকার করিব না? কুকুরের সেবা শুশ্রূষা করা ব্রাহ্মণের ধর্ম নহে, ব্রাহ্মণের পক্ষে যে সকল নিয়ম আছে, তৎ সমুদয় অগ্রে প্রতিপালন করিতে হইবে। নিকৃষ্ট

জাতিরাই কুকুরের সেবা করিবে, ব্রাহ্মণের পবিত্র হস্ত দেব সেবার জন্ত নিৰ্ম্মিত হইয়াছে। অতএব হে বিপ্র ভনয়, তুমি কুকুরের স্পর্শ রক্ষা করিয়া যে পুণ্য সঞ্চয় করিয়াছ, কুকুর স্পর্শ-জনিত পাপ তাহা অপেক্ষাও অধিক বলিয়া জানিবে। অতএব ঐ ঘৃণিত পশুকে পরিত্যাগ করিয়া সত্বরে গঙ্গা স্নান করিয়া আইস, ও ত্রিবিষ্ণু স্মরণ কর; নচেৎ সন্ধ্যা বন্দনাতে তোমার কোন অধিকার থাকিবেক না, তোমার এক্ষণে চণ্ডালত্ব প্রাপ্তি হইয়াছে। শঙ্করাচার্য্য বলিলেন, এক কুকুর স্পর্শেই আমার ব্রাহ্মণত্ব একেবারে নষ্ট হইয়াছে, শাস্ত্রানুসারে আমি চণ্ডাল হইয়াছি; এক্ষণে সুরধুনী সলিলে এই পাপ দেহ ধোত করিলে, পুনরায় ব্রাহ্মণত্ব প্রাপ্ত হইব। সুরধুনীর পবিত্র সলিল যখন চণ্ডালকে ব্রাহ্মণ করিতে পারেন, তখন অদ্য আমি শত-ধিক চণ্ডাল সমভিব্যাহারে গঙ্গাস্নান করিতে যাইব, এবং আমার সহিত তাহাদিগকেও ব্রাহ্মণ করিয়া আনিব। স্নানে যাইবার সময় এই কুকুরকেও সমভিব্যাহারে লইয়া যাইব, গঙ্গাজলে ধোত করিলে ইহারও কুকুরত্ব থাকিবে না।

শঙ্করাচার্য্যের কথা শুনিয়া বৃদ্ধ ব্রাহ্মণের কিঞ্চিৎ ক্রোধের সঞ্চার হইল। তিনি উন্নত স্বরে বলিলেন, রে অবোধ বালক! তুই আমার সহিত কি সাহসে তর্ক করিতে প্রবৃত্ত হইয়াছিস্? তুই কি জানিস্ না যে, জন্ম জনিত দোষ কি গঙ্গা জলে ধোত হইতে পারে? শঙ্করাচার্য্য হাস্ত করিয়া কহিলেন, তবে জন্ম জনিত উৎকৃষ্টতাও কুকুর স্পর্শে নষ্ট হইতে পারে না। আমি যখন ব্রাহ্মণুলে জন্ম গ্রহণ করিয়াছি, তখন কুকুর স্পর্শে সে ব্রাহ্মণত্বের হানি হইবে কেন? অনুমানে বোধ হইতেছে, আপনি এক জন

পৌরাণিক । পৌরাণিকদিগের অসংলগ্ন কথাতেই আপনার দৃঢ় বিশ্বাস হইয়াছে । ভাল, বিবেচনা করিয়া দেখুন দেখি, যদি জন্ম জনিত দোষ কিছুতেই ক্ষয় না হয়, তাহা হইলে, অষ্টাদশ পুরাণ কৰ্ত্তা বেদব্যাস ধীবর কত্কার গৰ্ভে জন্ম গ্রহণ করিয়া কি প্রকারে ব্রাহ্মণ হইলেন ? মহাত্মা বিহুৰ শূদ্রাণীর গৰ্ভে জন্ম গ্রহণ করিয়া ব্রাহ্মবীর্য্যে সমুদ্ভূত হইয়াও কি জন্ম মাত্ৰ জনিত দোষে দূষিত হইয়া রহিলেন ? ব্রাহ্মণ কহিলেন, বেদব্যাস সাক্ষাৎ নারায়ণ, তিনি বেদার্থ প্রচার করিবার জন্তই অবনীতে আবির্ভূত হইয়াছিলেন ; তাঁহার জন্ম বিষয় লইয়া তর্ক করিলে, আমরা পাপ পক্ষে নিপতিত হইব । তুমি নিতান্ত বালক, শাস্ত্রের ভাবার্থ কিছুই বুঝ না ; এই জন্ম অনর্থক তর্ক করিতে প্রবৃত্ত হইয়াছ । বিবেচনা করিয়া দেখ, শ্রীকৃষ্ণ কতকূলে জন্ম গ্রহণ করিয়া কি জন্ম ব্রাহ্মণের নমস্কা হইয়াছিলেন ? স্বয়ং নারায়ণ সংসারের উপকার সাধন জন্ম যে ভাবে জন্ম গ্রহণ ককন না কেন, সে সকল বিষয় লইয়া তর্ক করায় কিছু মাত্র প্রয়োজন নাই । তিনি যে স্বয়ং ঈশ্বর, তাঁহার কার্য্যই তাহার সাক্ষ্য দিতেছে । বেদব্যাস যে সামান্য মনুষ্য নহেন, অষ্টাদশ পুরাণই তাহার দৃষ্টান্ত স্থল ।

শঙ্করাচার্য্য কহিলেন, পুরাণ লইয়া অনর্থক তর্ক বিতর্কের প্রয়োজন নাই ; কারণ পুরাণই কাল প্রভাবে সৰ্ব্ব অনিষ্টের মূল হইয়া উঠিয়াছে । আপনি বহুদর্শী বৃদ্ধ ব্রাহ্মণ, ইতি পূর্বে নিজ মুখেই বলিয়াছেন, আমি পুরাণ ব্যবসায়ী ; সুতরাং পুরাণে আপনার বিলক্ষণ বোধাদিকার আছে, তাহাতে আর সন্দেহ নাই । যে পুরাণ মুক্তি পথের কণ্টক, তাহা লইয়া আমার তর্ক করিতে ইচ্ছা হয় না । ব্রাহ্মণ বলিলেন, তুমি আমার সহিত অত্যন্ত

ধৃষ্টতা করিতে আরম্ভ করিতেছ। পুরাণ মুক্তি পথের কণ্টক কিসে হইল? শঙ্করাচার্য্য কহিলেন, আপনার প্রশ্নের উত্তর দিবার পূর্বে আমি একটি প্রশ্ন করিতেছি। ভাল, আপনি বলুন দেখি, এই কুকুরের এমন নীচ জন্ম কেন হইল? ব্রাহ্মণ সদর্পে বলিলেন, পূর্ব জন্মে কঠোর পাপ করিয়াছিল, তাহাতেই এই জন্মে কুকুর যোনিতে জন্ম গ্রহণ করিয়াছে, এবং লোকের দ্বারে দ্বারে উচ্ছিষ্ট ভোজন করিয়া বেড়াইতেছে। তুমি পূর্ব জন্মে অধিক পুণ্য করিয়াছিলে, সেই পুণ্যেই উৎকৃষ্ট ব্রাহ্মণ দেহ প্রাপ্ত হইয়াছ। শঙ্করাচার্য্য বলিলেন, মহাশয়, কি পাপে কুকুর জন্ম হয়? উত্তরে ব্রাহ্মণ বলিলেন, যাহারা দেব দ্রব্য অপহরণ করিয়া খায়, ব্রাহ্মণ সেবার অগ্রে ভোজন করে, তাহারাই কুকুর হইয়া জন্ম গ্রহণ করিয়া থাকে। শঙ্করাচার্য্য বলিলেন, উত্তম কথা, কিন্তু আদিতে কি ঈশ্বর উৎকৃষ্ট ব্রাহ্মণ ব্যতিরেকে অন্য কোন নিকৃষ্ট প্রাণীর সৃষ্টি করেন নাই? যদি তাহা করিয়া থাকেন, শাস্ত্রে ইহার প্রমাণ প্রাপ্ত হওয়া যায়, তাহা হইলে, পাপ ব্যতিরেকে কি জন্ম কুকুরের সৃষ্টি হইল? বিষ্ঠাভোগী কীটানু-কীটেরও আদি কাল পর্য্যন্ত শাস্ত্রে বর্ণনা আছে। পাপ ব্যতিরেকে এই সকল নিকৃষ্ট প্রাণীর উৎপত্তি হওয়া কি আপনার অসম্ভব বলিয়া বোধ হয় না? ব্রাহ্মণ বলিলেন, আদিতে সকল প্রাণীই পবিত্র ছিল, কেবল কালের প্রভাবে প্রাণী পুঞ্জের পুণ্য ধ্বংস হইয়া পাপের বৃদ্ধি হইতেছে। শঙ্করাচার্য্য বলিলেন, আপনার কথার ভাবার্থ বুঝিতে পারিতেছি না, আপনি বিস্তারে বুঝাইয়া দিন যে, আদি কাল পর্য্যন্ত শাস্ত্রে পাপ পুণ্যের কথা উল্লেখ আছে কি না? ভিন্ন ভিন্ন যুগে পাপ পুণ্যের ভিন্ন ভিন্ন প্রকরণ

আছে কি না ? ব্রাহ্মণ বলিলেন, যুগ ভেদে কাল ভেদে সকল বিষয়েরই পরিবর্তন হইয়া আসিতেছে, তাহাতে আর সংশয় নাই। সত্য যুগে ধর্ম্মাধর্ম্মের যে রূপ নিয়ম ছিল, পাপের যে রূপ দণ্ড বিধান ছিল, ত্রেতার তাহার অনেক পরিবর্তন হইয়া যায়। দ্বাপরে তদপেক্ষা হ্রাস হয়, কিন্তু কলিতে সত্য যুগের নিয়ম আর কিছুই নাই; কারণ এক্ষণকার লোকের অল্প আয়ু ও অল্প ভোগ; সুতরাং সত্য ও ত্রেতার ধর্ম্মানুষ্ঠান কলিযুগের লোক কি প্রকারে করিবে; এই কারণেই ধর্ম্মশাস্ত্রবেত্তারা পৃথক্ পৃথক্ যুগের পৃথক্ পৃথক্ নিয়ম অবধারিত করিয়াছেন।

শঙ্করাচার্য্য বলিলেন, তবে কি সমুদয় শাস্ত্রই মনুষ্য প্রণীত ? তাঁহারা কি লোকের অবস্থা বুঝিয়া ধর্ম্ম কর্ম্মের অনুষ্ঠান করিবার আদেশ করিয়া গিয়াছেন ? কেন না, আমার জ্ঞানগুরু বলিয়াছেন যে, সত্যের কোন কালে পরিবর্তন নাই, সত্য অনন্ত কাল সত্যই থাকিবে। যাহা কালীনিক, তাহা দেশ ভেদে কাল ভেদে অবশ্যই পরিপবর্তিত হইয়া যাইবে। সেই সত্য স্বরূপ, জ্ঞান স্বরূপ, আত্মায় ঈশ্বর আদিতে যে রূপ ছিলেন, অন্ত কালেও সেই রূপ থাকিবেন, কোন কালেই তাঁহার পরিবর্তন নাই। এই কথাই সত্য, এবং এই সত্য কথা লইয়া যাহারা সেই আত্মায় ঈশ্বরের অনুসন্ধান করেন, তাঁহারা ইযার্থ ঈশ্বর পরায়ণ সাধু ব্যক্তি। এই সহজ কথা বিশ্বাস করিলে, সহজেই আত্মতত্ত্ব অবগত হইতে পারা যায়। তাহা না করিয়া কালীনিক ধর্ম্মশাস্ত্র পাঠে মন কলুষিত করিয়া চির কাল ভ্রমপথে পরিভ্রমণ করা কি জ্ঞানবানের কর্তব্য কার্য্য ? মহাশয়, পুনর্বার বলিতেছি, ঈশ্বর এক, আত্মায়, ও সর্ব্ব ভূতের আশ্রয় স্থল। এই পরিদৃষ্টমান

জগৎ তাঁহা হইতেই উৎপত্তি, এবং তাঁহাতেই নিরুত্তি হইয়া থাকে ।
 নিষ্কাম হইয়া তাঁহার উপাসনা করাই প্রকৃত উপাসনা । সত্য ও
 জ্ঞান স্বরূপ ঈশ্বরের উপাসনায় ঘুপ, দীপ, নৈবেদ্য ও বলির
 প্রয়োজন নাই । নিৰ্জ্জনে একাসনে বসিয়া এক মনে তাঁহাকে
 ধ্যান করিলে, আত্মার প্রকৃত তত্ত্ব অনায়াসে প্রাপ্ত হওয়া যায় ।
 আত্মার উপাসনা কি, অজ্ঞ জনেরা তাহা সহজে বুঝিয়া উঠিতে
 পারে না বলিয়াই আড়ম্বর যুক্ত ধৰ্ম্মে সহজে তাহাদের আস্থা হইয়া
 থাকে । অজ্ঞদিগকে আয়ত্তে রাখিবার জন্যই হিন্দু শাস্ত্রকারেরা
 আড়ম্বর যুক্ত ধৰ্ম্মের কল্পনা করিয়া গিয়াছেন ; স্মরণ্য
 পূৰ্ব্বের সত্য ধৰ্ম্মের লোপ হইবার উপক্রম হইতেছে । মহাশয়,
 বিবেচনা করিয়া দেখুন দেখি, স্থির চিত্তে নিৰ্জ্জনে বসিয়া সেই
 নিন্ত্য ও সত্য ঈশ্বরের উপাসনা করিতে কয় জন লোকের ক্ষমতা
 আছে? যাহাদিগের চিত্ত চঞ্চল, তাহারা কি একাসনে মুহূর্ত্ত
 কাল নিৰ্জ্জনে অবস্থান করিতে পারে? কিন্তু আড়ম্বর যুক্ত ধৰ্ম্ম
 অজ্ঞ লোকের এত দূর চিত্ত আকর্ষণ করিয়াছে যে, দেব দেবীর
 সম্মুখে অজ, মেঘ ও মহিষ প্রভৃতি বলিদান দিবার সময় তাহা-
 দিগের ক্ষুধা তৃষ্ণা বর্জিত হইয়া যায় । রাজপথে হরি সঙ্কীৰ্ত্তন
 বহির্গত হইলে, নৃত্য গীতে এত দূর উন্মত্ত হইয়া উঠে যে, স্বেদ-
 জলে শরীর আর্দ্র হইয়া গেলেও তাহারা তাহাতে ক্রক্ষেপ করে
 না । উক্ত রূপ ধৰ্ম্মে রাগ, দ্বেষ, ও দম্ব আপনা আপনি আসিয়া
 উপস্থিত হয় । পুরাণাদি শাস্ত্র এই কাল্পনিক ধৰ্ম্মের প্রবর্তক ও
 উত্তেজক ; উহা কৰ্ম্ম ফল দেখাইয়া অজ্ঞ লোককে নিৰ্কাণ মুক্তির
 পথ হইতে দূরস্থ করিয়া রাখিয়াছে, তাহারা ভোগ বাসনায় না
 করিতেছে, একপ কার্য্যই নাই । পুরা কালে অশ্বমেধাদি যজ্ঞে যুদ্ধ

বিগ্রহে লক্ষ লক্ষ লোকের প্রাণান্ত হইত । প্রবল পরাক্রান্ত নর-
পতিরা শত অশ্বমেধ করিয়া ইন্দ্রত্ব পদ লইবার জন্য ব্যতিব্যস্ত
হইতেন । শাস্ত্র নির্দিষ্ট যজ্ঞ করিতে কেহই ক্রটি করেন নাই ;
কিন্তু কোন কালে কাহারও অদৃষ্টে ইন্দ্রত্ব পদ লাভ হয় নাই ।
নরপতিগণ ছুরাশার দাস হইয়া অনর্থক যুদ্ধ বিগ্রহে লিপ্ত হই-
তেন ; এক জনের ইন্দ্রত্ব পদ লাভের জন্য অকারণ অসংখ্য
লোক কালের কবল শায়ী হইত । এই কলিযুগে অশ্বমেধ যজ্ঞের
বিধি নাই, তথাচ স্বর্গভোগ কামনায় রাজগণ রাজসিক বিধানে
শত শত ছাগ মহিষ মেষ প্রভৃতি দেব দেবীর নিকট বলি প্রদান
করিয়া থাকেন । “অহিংসা পরমো ধর্মঃ” এই মহাবাক্য কল্লিত
স্বর্গলাভের জন্য সাধারণ লোকে একেবারে বিস্মৃত হইয়া গিয়াছে ।
কর্ম করিয়া ফলভোগী হইব, এই ছুরাশার দাস হইয়া একগণকার
লোক বাহ্য আড়ম্বরের সহিত কর্ম করিবার মানসে উৎকট
পাপ দ্বারা ধন উপার্জন করিতেও কিছুমাত্র কুণ্ঠিত হয় না ।

শাস্ত্রে কথিত আছে যে, এক কর্মই আমাদেরকে অনন্ত কাল
সংসার আবর্তনে ফেলিয়া রাখে । কর্মফল ভোগের জন্যই পুনঃ
পুনঃ জন্ম মৃত্যু হয় । দুষ্কর্মই হউক বা সৎকর্মই হউক, একবার
মাত্র করিলে, কোটিকল্প তাহার ফল ভোগ করিতে হইবে ।
তত্ত্বে উক্ত আছে—

“দেহে বিনষ্টে তৎকর্ম পুনর্দেহে প্রলভ্যতে ।

যথা ধেনু সহস্রেষু বৎস বিন্ধতি মাতরম ॥”

যেমন সহস্র ধেনুর মধ্যে একটি মাত্র বৎস থাকিলে, সে তাহার
নিজ মাতাকে জানিয়া লয় ; সেই রূপ কর্মের ফলাফল দেহ
হইতে দেহান্তরে গিয়া থাকে । দেহীর পুনর্জন্ম কোথা হই-

রাছে, অর্থাৎ কর্মফল বৎসের জ্বায় তাহা অনুসন্ধান করিয়া লইতে পারে। ধন ব্যয়ে মুক্তির সম্ভাবনা নাই, কর্মকাণ্ড করিয়াও মুক্তি হয় না। যত দিন জীবাত্মা ও পরমাত্মা এক জ্ঞান না হইবে, তত দিন জীবের নির্ক্ষণ মুক্তির কোনও সম্ভাবনা নাই। কেবল এক ভোগাভিলাষের জন্যই মানবগণ কর্মকাণ্ড করিয়া থাকে। যদিও বেদে কর্মকাণ্ডের কথা উল্লেখ আছে, কিন্তু তাহার রীতি পদ্ধতি স্বতন্ত্র। স্মৃতি শাস্ত্র বেতারা সেই বেদোক্ত কর্মকাণ্ড একেবারে লগুভণ্ড করিয়া দিয়াছেন। তাঁহারা মানবের স্বর্গলাভের এত স্থূলভ উপায় দেখাইয়া গিয়াছেন যে, অতি সামান্য পুণ্য কার্য্য করিলে, লোকের আর নরক যন্ত্রণার ভয় থাকে না। যেমন লোকে এক বার মাত্র শিবরাত্রির ব্রত করিলে, মৃত্যুর পর শিবলোকে ও অনন্ত ব্রতের ফলে বিষুুলোকে গমন করিবে এবং যোগে গঙ্গাস্নান করিলে, কোটিকল্প স্বর্গভোগ হইবে, শাস্ত্রে ইহার ভূরি ভূরি প্রলোভন আছে। স্মৃতি শাস্ত্রে এবং পুরাণাদি শাস্ত্রে কেবল ভোগের কথাই লিখিত হইয়াছে, নির্ক্ষণ মুক্তির কিছুই বিশেষ উক্তি নাই। তত্ত্বদর্শী পণ্ডিতেরা লিখিয়াছেন যে, ভোগাভিলাষের জন্যই কর্ম করিতে ইচ্ছা হয়, কর্ম হইতে ক্রোধাদির উৎপত্তি হয়, ক্রোধ হইতে অভিমান, অভিমান হইতে অবিবেক, অবিবেক হইতে অজ্ঞানের উৎপত্তি হইয়া থাকে। যে আপনাকে আপনি জ্ঞাত নহে, সেই অজ্ঞান; একপ অজ্ঞানাকার দূর হওয়া সহজ ব্যাপার নহে।

বেদেও কর্মকাণ্ডের কথা উল্লেখ আছে সত্য, কিন্তু পৌরাণিকেরা শুদ্ধ কর্মকাণ্ডের প্রাধান্য দেখাইয়া সাধারণ লোককে ভ্রমে

নিপতিত করিগাছেন । কর্ম করিতে গেলেই, আপনি আপনি ঘোর আড়ম্বর আসিয়া উপস্থিত হয় । কোন আধুনিক পুরাণে লিখিত আছে যে, কলিতে দুর্গোৎসব করিলে, অশ্বমেধ যজ্ঞের ফল প্রাপ্ত হওয়া যায় ; সেই জন্য কলিতে সাত্বিক, রাজসিক ও তামসিক মতে দুর্গোৎসব হইয়া থাকে । সত্ত্ব গুণাধিত ব্যক্তিরা সাত্বিক ভাবে পূজায় ব্রতী হইলে, সাত্বিক বিধানানুযায়ী পূজার সমস্ত সামগ্রী সংগ্রহ করিতে পারেন না ; সুতরাং দেবী পূজার অঙ্গহীন জন্য কৃতীকে ছুরদৃষ্টের ভাগী হইতে হয় । রাজসিক বিধানের পূজায় অহঙ্কার, মাৎসর্য, ক্রোধ এবং দম্ভ মুক্তিমান হইয়া দাঁড়ায় । তামসিক বিধানে কেবল বাহ্য আড়ম্বর ভিন্ন আর কিছুই নাই । তবেই বিবেচনা করিয়া দেখিলে, কালর অশ্বমেধ দুর্গোৎসব করিতে গিয়া উপাসকগণকে পদে পদে ছুরদৃষ্টের ভাগী হইতে হয় কি না ? দুর্গা দেবীর ত্রিবিধ উপাসকেরা এই মন্ত্রে আপনাদিগের অভীষ্ট সিদ্ধির কামনা করিয়া থাকেন যথা—

“রূপং দেহি যশো দেহি ভাগ্যং ভগবতি দেহি মে ।

পুত্রান্ দেহি ধনং দেহি সর্কান্ কামাঙ্কং দেহি মে ।”

উপরি উক্ত প্রার্থনায় “মুক্তিং দেহি” এক্ষপ প্রার্থনা নাই । কেনই বা থাকিবে ? বাহারা ভোগাভিলাষের প্রার্থী, তাহারা নির্বাক মুক্তির প্রার্থনা করিবে কেন ? ভোগাভিলাষী হইয়া ইহ জগতে বসবাস করিতে গেলে, আমরা কোন অবস্থাতেই নির্ভয়ে ও শাস্তির সহিত কাল হরণ করিতে পারি না । কারণ ভোগে রোগ ভয় আছে, কুলে চ্যুতি ভয় হইয়া থাকে, বিত্তি ভোগে চির কাল রাজাকে ভয় করিয়া চলিতে হয়, মানে দৈন্য ভয় আপনা

আপনি আসিয়া উপস্থিত হইয়া থাকে ; এতদ্ভিন্ন বলে রিপু ভয়, কপে নারী ভয়, শাস্ত্রে বাদী ভয়, গুণে খল ভয়, এবং শরীর ধারণে যম ভয় চির কালই আছে । কেবল আত্মতত্ত্বে মনো-নিবেশ করিলে, কোন কালে কোন ভয় থাকে না, যে স্থানে ভয় নাই, সেই স্থানেই আনন্দ ও শান্তি ।

পরিশেষে শঙ্করাচার্য্য ব্রাহ্মণকে বলিলেন, হে ব্রাহ্মণ, আত্ম-তত্ত্বদর্শী লোকেরাই একেবারে ভয়শূন্য হইয়া থাকেন । তাঁহাদিগের রাজ ভয় নাই, দম্বা ভয় নাই, জাতি ভয় নাই । অন্য কি কথা, তত্ত্বদর্শী লোকেরা মরিতেও ভয় করেন না ; কেবল সেই সচ্চিদা-নন্দ ব্রহ্মে আত্ম সমর্পণ করিয়া মনের আনন্দে কাল হরণ করেন । যাঁহারা এই সংসারকে ব্রহ্মময় দেখেন, তাঁহারা এই কুক্কুরকে কি বলিয়া অপবিত্র জ্ঞান করিবেন ? যাঁহার মন অপবিত্র, সে এই সংসারে নানা অপবিত্র বস্তু দর্শন করে । যাঁহার মন নিষ্কল হইয়াছে, তিনি জগতের কোন বস্তুই অপ-বিত্র জ্ঞান করেন না । মহাশয়, আপনার বয়স অধিক হইয়াছে, মৃত্যুর অধিক কাল বিলম্ব নাই, এক্ষণেও আপনার তত্ত্ব জ্ঞানের উদয় হয় নাই । আপনি কি জানেন না যে, মহা প্রলয় কালে এই সমস্ত জগৎ ঈশ্বরে লয় হইবে ? সে সময় কি তিনি অপবিত্র বস্তুগুলি আপনাতে লয় হইতে দিবেন না ? বাছিয়া অন্যত্র নিক্ষেপ করিবেন ? মহাশয়, যত দিন আপনার অহং তত্ত্ব না উদয় হইতেছে, তত দিন আপনি তত্ত্বদর্শী লোকের কার্য্য দেখিয়া বিব্রত হইবেন, ইহা বিচিত্র নহে ।

শঙ্করাচার্য্যের কথা শুনিয়া ব্রাহ্মণ বিশ্বয় সাগরে নিমগ্ন হই-লেন, এবং সবিনয়ে কহিলেন,—বাপু, তুমি কে, আমাকে যথার্থ

পরিচয় দাও। তোমার কথা বার্তা শুনিয়া বোধ হইতেছে যে, তুমি সামান্য ব্যক্তি নহ। শঙ্করাচার্য্য তাঁহাকে প্রকৃত পরিচয় দেওয়াতে, ত্রাঙ্কণ গেই দিন অবধি তত্ত্বজ্ঞানামূলীলনে প্রবৃত্ত হইলেন।

বিবেক ও বৈরাগ্য।

পৃথিবীর চতুষ্খণ্ডের মধ্যে এই পুণ্য ক্ষেত্র ভারত ভূমির পুরা কালের পণ্ডিতগণ বিবেক ও বৈরাগ্যের উপর যত দূর পাণ্ডিত্য প্রকাশ করিয়া গিয়াছেন, বোধ হয়, পৃথিবীর অন্য কোন দেশের লোক কর্তৃক এক্ষণ হয় নাই। বিশেষ বিবেচনা করিয়া দেখিতে গেলে, ইউরোপ খণ্ডে বর্ত্তমান কালে বিবেক ও বৈরাগ্যের কথা এক দিনের জন্যও কোন সমাজে উত্থাপিত হয় না। ভারতবর্ষে বিবেক ও বৈরাগ্যের নাম আছে, গ্রন্থ আছে, এবং অনেক উপদেষ্টাও আছেন; কিন্তু প্রকৃত প্রস্তাবে বিবেক ও বৈরাগ্য লোকের মনে উদয় হওয়া স্মকঠিন।

এক্ষণে দেখা যাউক, কোন্ শাস্ত্রানুযায়ী হইয়া চলিলে, আমরা শান্তি স্বেচ্ছের অধিকারী হইতে পারি। প্রথমতঃ, নীতি শাস্ত্রের আশ্রয় লইলাম; কিন্তু তাহাতেও বিবেক ও বৈরাগ্যের উদয়ের কোন সম্ভাবনা নাই। বাল্য কালাবধি আমরা অনেক নীতিগর্ভ পুস্তক পাঠ করিলাম, ও নীতিজ্ঞ লোকের মুখে অনেক নীতি কথা শুনিলাম, কিন্তু তাহাতেও আমাদের চিত্ত শুদ্ধি হইল না,

হৃদয়ে শান্তি আসিয়া আশ্রয় করিল না । যদি প্রকৃত প্রস্তাবে ধর্মশাস্ত্রের বিধানানুসারে ধর্ম কর্মে রত হই, তাহা হইলে, কি মন নির্মল হইবে, চিত্তের চাঞ্চল্য দূর হইবে ? তাহাই বা কিরূপে সম্ভব বলিয়া ধরি । প্রথমতঃ, ধর্ম শাস্ত্রের নিয়মগুলি অতিশয় কষ্টসাধ্য ; ধর্ম কর্মের আয়োজন করিতে লোকদিগকে যৎপরোনাস্তি ব্যতিব্যস্ত হইতে হয় । বিশেষতঃ, উপাসনা ভেদে এক ধর্মাক্রান্ত লোক অন্য ধর্মাক্রান্ত লোকের সহিত চির কালই বাধিতগু করিয়া আসিতেছে । আবার ধর্ম লইয়া কোন কোন সময়ে এক সম্প্রদায়ী অস্ত্র ধারণ করিয়া অন্য সম্প্রদায়ীর সহিত সমরে প্রবৃত্ত হইয়া থাকে । তবেই ধর্মের জন্য যদি অস্ত্রধারী হইয়া সমরে প্রবৃত্ত হইতে হয়, তাহা হইলে, সে ধর্মে বৈরাগ্য ও শান্তি কোথায় পাইব ? সুতরাং স্বীকার করিতে হইবে যে, ধর্মেও শান্তি নাই । তবে কি গৃহত্যাগ করিয়া অরণ্যে প্রবেশ করিয়া কুটীরে বাস করিলে বিবেক, বৈরাগ্য ও শান্তি আমার হৃদয় মন্দিরে বিরাজমান হইবে ? তাহারই বা সম্ভাবনা কই ? পুরাণাদি পাঠ করিয়া দেখা গিয়াছে, মহর্ষিগণ চির কাল পবিত্র তপোবনে বাস করিয়াছেন, হরীতকী, আমলকী ও গলিত পত্র ভক্ষণে প্রাণ ধারণ করিয়াছেন, শীতে জল মধ্যে ও গ্রীষ্মে চারিদিকে অনল জ্বালিয়া পঞ্চতপা করিয়াছেন, এক কথায় বলিতে গেলে, ইন্দ্রিয় নিগ্রহ করিবার জন্য মহামহোপাধ্যায় মহর্ষিগণ সাধ্যানুসারে চেষ্টার ক্রটি করেন নাই ; তথাচ তাঁহাদিগের মধ্যে অনেকে অঙ্গুরাগের চাতুরীজালে পড়িয়া যোগভ্রষ্ট হইয়াছেন, কেহ বা সামান্য কারণে ক্রোধের পরতন্ত্র হইয়া এক এক জন মহাশয় ও শরগাগত প্রতিপালক রাজার সর্বনাশ করিয়া-

ছেন। আবার দেখিতে পাওয়া যায়, কোন ঋষি অমৃত এক ঋষির সহিত শত্রুতা করিয়া তাঁহার পুত্র কলত্রাদির প্রাণ বিনাশ করিয়াছেন। চুর্কাসার ঋষি কোপন স্বভাব ঋষি পুরাণাদি শাস্ত্রে আর দেখিতে পাওয়া যায় না। তিনি ব্রহ্মতেজে ও ভপোবলে লঘু পাপে লোককে গুরু দণ্ড দিতেন। পরাশর অমৃত ঋষির কন্যাকে হরণ করিতে কিছু মাত্র কুণ্ঠিত হন নাই। যদি অরণ্যে বাস, গলিত পত্র ভোজন ও ইন্দ্রিয় নিগ্রহ করিয়াও সংসার-ত্যাগী ঋষিদিগের এই রূপ বিভ্রম ঘটিয়া থাকে, তাহা হইলে, গৃহ ত্যাগ করিয়া অরণ্যে প্রবেশ করিলে, আমাদের কি ফল হইবে? বাহার শরীরে ক্রোধ আছে, কাম আছে, এবং হিংসা ঘৃণা আছে, তাহার মনে কি প্রকারে শান্তি স্থান প্রাপ্ত হইবে? বাহার কমাগুণ নাই, তাহাকে বিবেকী কি প্রকারে বলিব? বাহার মধ্যে মধ্যে রাজপ্রাসাদে প্রবিষ্ট হইয়া নরপতিগণের পূজা গ্রহণ করিতেন, তথায় কিঞ্চিৎ সেরা সেবার ক্রটি হইলে, শাস্তি দিয়া আসিতেন, তাঁহাদিগের আবার বৈরাগ্য কোথায়? তবেই বোধ হইতেছে যে, সর্বত্যাগী হইয়া অরণ্যে বাস করিলেও সর্বভোগ্যে শান্তি সম্ভোগের সম্ভাবনা নাই। তবে কোথায় শান্তির দেখা পাইব? কি প্রণালীতে অর্চনা করিলে, শান্তিদেবী আমার প্রতি প্রসন্ন হইবেন? এই সংসারে কোন কালে কেহই কি শান্তি লাভ করিতে পান নাই? তবে ভর্তুকের দাস হইয়া আমাদেরই কি সকল বিষয়ে সন্দেহ উপস্থিত হইতেছে? যে সকল স্থানে অমুগুণ শান্তিদেবী বিরাজিত হইতেছেন, আমি মনো-মধ্যে নিরর্থক ভর্তুক করিয়া কি সেই সকল স্থানের সমীপবর্তী হইতে পারিতেছি না? নীতিজেরা বলিয়াছেন, অধ্যবসায় সহ-

কারে চেষ্টা করিলে, যিনি যে কণা বাসনা করেন, তাঁহার তাহা অবশ্যই সিদ্ধ হয়।

যদিও গৃহ পরিত্যাগের বিকল্পে আমরা অনেক কথা বলিলাম, তথাচ মহাত্মব ব্যক্তিবৃন্দের কথা একেবারে অলীক ও বুদ্ধি বিহীন বলিয়া বোধ হয় না। তাঁহারা চির কাল এক ভাবে বলিয়া আসিতেছেন যে, অরণ্যবাসী মুনি ঋষিরাই যে শান্তিসুখ সন্তোগ করিয়া থাকেন, গৃহীর পক্ষে কোন কালেই তাহা ঘটিয়া উঠিবার নহে। এই সার কথার উপরেও অনেকে একপ তর্ক উপস্থিত করেন যে, এক শান্তিসুখের জন্য সকলের সংসার ভাগ করা ঈশ্বরাভিপ্রের নহে; সকলেরই সংসারে বিরাগ হইলে, সংসার চলিবে কেন? একপ তর্কের উত্তরে অবশ্য বলা যাইতে পারে যে, সংসার চলুক আর নাই চলুক, তাহাতে আমার কতি বুদ্ধি কি? এত কাল যে চলিল, তাহাতেই বা সাধারণের কি উপকার হইয়াছে? সাধারণ কথায় বাহাকে সাংসারিক সুখ বলিয়া থাকে, সকলের ভাগ্যে তাহা ঘটিবার নহে। তবে জন কতক লোকের সুখের জন্য জগৎ শুদ্ধ লোক কষ্ট ভোগ করিবে কেন? বিবেচনা করিয়া দেখ, দিল্লীশ্বর সাজাহানের ময়ূরাসন প্রস্তুত কালে কত লোকের সর্বনাশ হইয়াছিল। তিনি সর্বতোভাবে সুখী হইবার জন্য প্রায় সমস্ত ভারতবাসীকে যৎপরোনাস্তি পীড়ন করিয়া ছিলেন। তবে কতিপয় রাজা ও প্রধান লোকের জন্য পৃথিবীর অধিকাংশ লোক মস্তকের ঘর্ষ পদভঙ্গে নিক্ষেপ করিবে কেন? যাহাদিগের সুখের সম্ভাবনা আছে, তাহারাই সংসার ককক। যাহাদিগের পক্ষে এ সংসার হিংস্রজন্তু পূর্ণভয়ানক অরণ্য তুলা, তাঁহারা যে স্থানে শান্তিদেবী বিরাজমান হইতেছেন, সেই স্থানে গিয়া মনঃ

প্রাণ শীতল করিবেন। যেখানে অনারামলভ্য ফলমুখে উপর পূর্ণ করিতে পাইবেন, সেইখানেই যাইবেন। যেখানে ক্রোধ নাই, ঘেব নাই, হিংসা নাই, অহঙ্কার নাই, মন্ত নাই, আত্মসন্নিহিত নাই এবং পীড়ন নাই, সেই স্বথময় ও শান্তিপ্রদ স্থানে গিয়াই জীবনের অবশিষ্ট কাল এক লেশ্বরচিন্তায় অতিবাহিত করিবেন।

স্বাহার ধন নাই ও প্রভুত্ব নাই, এ সংসার তাহার পক্ষে বিষময় ভড়াগ, প্রজ্বলিত অনলকুণ্ড ও কালসর্পের বিবর ; এ ভয়ানক স্থান তাহার পক্ষে আশু পরিত্যজ্য। যদি কেহ বলেন, অরণ্যের কষ্ট সংসারীরা সহজে সহ্য করিতে পারে না ; এ কথা নিতান্ত অন্তায় ও অমূলক। ইহা সত্য যে, শস্যের অভাবে অরণ্য বাগীকে তৃণশস্যায় শয়ন করিতে হয়, উপাধানের অভাবে বাহুর উপর মস্তক রাখিতে হয়, উপাদেয় বস্তুর অভাবে বনফল ও গুলিত পত্র ভক্ষণ করিতে হয়, জলপাত্রের অভাবে অঞ্জলি পুরিয়া জল পান করিতে হয় এবং গৃহের অভাবে গিরিগুহায় ও তরুকোটরে বাস করিতে হয় ; কিন্তু বিবেচনা করিয়া দেখিতে গেলে, ধনহীন গৃহস্থেরা সংসারাত্রমে থাকিয়াও ত এই সকল কষ্ট ভোগ করে। উত্তম শস্যের অপ্রভুলে তাহারা তৃণশস্যায় (মাছুর বা কুশাসনে) শয়ন করে, উত্তম বস্ত্রের অপ্রভুলে জীর্ণ ও মলিন বস্ত্র পরিধান করে, উপাদেয় খাদ্য সামগ্রীর অভাবে যথা কালে শাক সংযোগে কদম্ব ভোজন করে, উত্তম জলপাত্রের অভাবে যুগ্ময়পাত্র ব্যবহার করে, আহার তাহাদের বাসগৃহ দেখিলে, তাহা অপেক্ষা গিরিগুহা শত অংশে উৎকৃষ্ট বলিয়া বোধ হয়। নির্ধনের পক্ষে গৃহ অপেক্ষা বনের সমস্ত বিষয় অনারামলভ্য ; কিন্তু গৃহে থাকিলে, সেই কদম্ব, তৃণশস্য, ও ভগ্ন কুটীর প্রভৃতিরও আরোজন করিয়া

লইতে লাঞ্ছনার অবধি থাকে না। একপ অবস্থাপন্ন লোকের সংসার অপেক্ষা অরণ্যে বাস বখন অধিক শান্তি প্রদ, তখন এ সংসার তাহাদিগের পক্ষে আশু পরিত্যাগ করাই যুক্তি।

অন্য এক সম্প্রদায় বলেন যে, দারিদ্র অবস্থাপন্ন হইলেও একেবারে হতাশ হওয়া ও গৃহ ত্যাগ করা নিতান্ত কাপুরুষের কার্য। ধৈর্যের সহিত সাংসারিক কষ্ট সহ্য কর, এবং অধ্যবসায়ের সহিত আপনার উন্নতিকল্পে যত্নশীল হও, তাহা হইলে, সমস্ত দরিদ্রের মধ্যে অন্ততঃ দশ জনেরও অবস্থার পরিবর্তন ঘটিবার সম্ভাবনা আছে। একপ প্রশ্নের আর এক পক্ষীয় লোক এই প্রত্যুত্তর দেন যে, আমরা দরিদ্রের সম্মান বটি, কিন্তু বাল্য কালাবধি সমূহ যত্ন ও পরিশ্রমের সহিত বিশেষ রূপে বিদ্যার্জন করিয়াছি ; তথাপি এ পর্যন্ত সমাজে আদরনীয় হইতে পারিলাম না ; কেন পারিলাম না ? কতকগুলি পক্ষপাতী লোকে আমাদিগকে মস্তক উন্নত করিতে দিবেছে না। তাহারা মূর্থ ধনীদিগের যথেষ্ট পূজা করে, কিন্তু আমাদের দুঃখে দুঃখও প্রকাশ করে না ; যে হেতু, আমরা সহায় ও সম্পদ বিহীন। যখন সম্পদই সংসারের এক মাত্র পূজ্য হইয়া উঠিয়াছে, তখন সম্পদ ও সহায় বিহীন লোকের কোন কালেই উন্নতির সম্ভাবনা নাই। সংসার আমাদের দিকে চাহিল না, আমরা সংসারের দিকে চাহিব কেন ? সংসারে থাকিয়া সামান্য অর্থের জন্য নীচাশয় ধনীদিগের স্তুতি পাঠ করিয়া বেড়াইব কেন ? আমরা সংসারের সমস্ত সম্পদ ও সহায়বিহীন লোক লইয়া অন্ততঃ বাস করিব। ধনীরা আপনাদিগের প্রয়োজনীয় বিষয় আপনারাই প্রস্তুত করিয়া লউক। ধনীর আধিপত্য ধনীরাই দেখুক,

আমরা স্বভাবের শোভা সন্দর্শনে আত্মা ও মন সর্বভোভাবে তৃপ্ত করিয়া জীবনযাত্রা নির্বাহ করিব, তথাচ এ পাপ সংসারে থাকিব না ।

পৃষ্ঠকগণ, একপ ভাবিবেন না যে, জগৎ শুদ্ধ লোক সংসারে অপ্রজ্ঞা করিয়া অরণ্যে প্রবেশ করিবে । কাহার সাধ্য এই মায়া-ময় সংসার পরিত্যাগ করে ! কখনও কখনও দুই চারি জনের মনে সংসার বৈরাগ্য উদয় হয় সত্য, কিন্তু সে মনের ভাব অতি অল্প কালেই লোপ পাইয়া থাকে । যখন সংসারে বিলক্ষণ অপ্রতুল হইয়া পড়ে, উত্তমর্গগণ ভাড়া করিতে আরম্ভ করে, গৃহিণীর বাক্যবাণে শরীর জর্জরীভূত হয়, সেই সময় এক এক বার মনো-মধ্যে কণপ্রভার ন্যায় সংসার ত্যাগের কল্পনা উপস্থিত হয় ; কিন্তু সেই অপ্রতুল কিছু মাত্র হ্রাস হইলেই, আর পূর্বের ভাব স্মরণ হয় না । এক মায়াই হইয়াছে আমাদের চরণের দৃঢ় লৌহ শৃঙ্খল । এই শৃঙ্খল ভাঙিয়া সংসার ত্যাগ করা কি সামান্য জ্ঞানের কার্য্য ! পুরাণ ও ইতিহাসাদিতে দেখিতে পাওয়া যায়, এক এক জন রাজা তাঁহাদিগের বিপুল বিভব ও বিস্তীর্ণ রাজ্য সম্বন্ধে সংসারকে তৃণতুল্য জ্ঞান করিয়া অরণ্যে প্রবেশ করিয়াছিলেন । তাঁহারা ইথার্থ বিবেকী, এবং তাঁহারা বৈরাগ্য ধর্ম্মের পরাকাষ্ঠা দর্শাইয়া গিয়াছেন । বাহাদিগের বিষয় নাই, বিভব নাই, এক কথায় সংসারে কিছু মাত্র স্থখ নাই, কিন্তু যদি কখন হয়, এই এক আশার উপর নির্ভর দুঃসহ দুর্দশা ভোগ করিতেছে, তথাচ এ পাপ সংসার পরিত্যাগ করিতে চাহেনা । আশার কি চমৎকার শক্তি ! আশা কল্পতরু হইয়া নির্ধনকে ধন দিতেছে, পুত্র-হীনকে পুত্র দিতেছে, চির রোগীকে সুস্থ করিতেছে, এবং চির-

বিরহী লক্ষ্মণের একত্র সম্মিলনে দুঃসহ বিরহ-বেদনা এক কালে দূর করিয়া দিতেছে। যিনি এই আশাকে মানবের মনে আবিস্কৃত করাইয়াছেন, তিনিই ধন্য। যদি এই আশা ক্ষুদ্র ভদ্র সমস্ত লোকের মনে না থাকিত, তাহা হইলে, অক্লেশে বহু সংখ্যক লোক এই সংসার পরিত্যাগ করিয়া যে নিবিড় অরণ্যে বাস করিত, তাহাতে আর সংশয় নাই।

যত কণ লোকে স্বার্থ ত্যাগ করিতে না পারিবে, তত কণ কেহই শান্তি ভোগ করিতে পাইবে না। এক স্বার্থই হইয়াছে আমাদের মনঃপ্রাণ আকুল করিবার প্রধান হেতু। যেমন বিষ্ণু দশ অবতার হইয়া সংসারের লোককে বিমোহিত করিয়াছিলেন, ভগবতী দশ মহা বিদ্যার রূপ ধারণ করিয়া মহাযোগী মহাদেবের মন আকুলিত করিয়া তুলিয়াছিলেন, সেই রূপ এক স্বার্থই এই সংসারে নানা মূর্ত্তি ধারণ করিয়া মোহাজ্ঞ ব্যক্তিবৃন্দকে ব্যতিব্যস্ত করিয়া তুলিতেছে। যদি স্বার্থ ত্যাগ করিতে পার, তাহা হইলে, অনেকাংশে মোহাজ্ঞকার দূর হইবে, বৈরাগ্য আসিয়া আপনা আপনি মনোমন্দিরে উদ্ভিত হইবে, এবং চিন্তা স্থির ভাব ধারণ করিবে। কেবল এক স্বার্থ লইয়াই সংসারে অশ্রু-কণ তুমুল কাণ্ড উপস্থিত হইতেছে। রাজার রাজা য যুদ্ধ কেন? স্বার্থের জন্ত; জাতি বিরোধ ও ভ্রাতৃ বিরোধ উপস্থিত হয় কেন? স্বার্থের জন্ত; বিদেশ বাসে মহা কষ্ট ভোগ করিতে হয় কেন? কেবল এক স্বার্থের জন্ত; লোকে হিতাহিত জ্ঞান শূন্য হইয়া পরস্পর হরণ করিতে উদ্যত হয় কেন? পরপীড়ক হয় কেন? পরদারা হরণ করে কেন? স্বার্থ ভিন্ন ইহার আর কিছুই কারণ নাই। সেই স্বার্থ একেবারে পরিত্যাগ কর, অনেকাংশে মন শান্ত হইবে।

পূর্বে বলি হইয়াছে যে, নীতি শিকায় মনের শান্তি হইবে না, ধর্ম কন্ঠে মনের শান্তি হইবে না, নানা শাস্ত্রে পাণ্ডিত্য লাভ করিলেও শান্তির দর্শন পাইবে না, অরণ্য বাসেও একেবারে প্রবৃত্তির নিবৃত্তি হইবে না । সুযোগ পাইলেই মন মত্ত হইবে, মনের দোষে দীর্ঘ কালের জপ তপ এক দিনে ভ্রষ্ট হইয়া যাইবে । মনুষ্য দেহ ধারণ করিয়া একেবারে শান্তি ভোগ এক প্রকার অসম্ভব বলিয়া ধরিতে হয় । তবে কি শান্তি ভোগের উপায় নাই ? আছে, কিন্তু সে উপায় অবলম্বন করা সামান্য লোকের কার্য্য নহে । অগ্রে আপনার মনকে পরীক্ষা কর, মনকে সর্ব্বতোভাবে আয়ত্ত কর, তাহার পর শান্তি ভোগের আশা করিও । মনুষ্যের মন দিল্লীর ছর্তু বাদশাহদিগের অপেক্ষাও অশাসিত, মত্ত মাতঙ্গ অপেক্ষাও ছর্তু । এই ভয়ানক মনকে যদি কায়-মনোযত্নে সম্পূর্ণ আয়ত্ত করিতে পার, তাহা হইলেই বিবেক, বৈরাগ্য ও শান্তির দর্শন পাইবে ।

ঈশ্বরের প্রতি প্রগাঢ় প্রীতির সঞ্চার, এবং ভোগবাসনার নিবৃত্তি না হইলে, এই সংসারকে কখনই মায়াময় ও অসার জ্ঞান হয় না । শাক্য সিংহের মনে প্রথমতঃ এই রূপ চিন্তা উপস্থিত হয়, আমি পিতৃ রাজ্যের অধীশ্বর হইব, আমার ভাণ্ডার ধন রত্নে পরিপূর্ণ হইবে, সহস্র সহস্র লোকের উপর আমি একাধিপত্য করিব, প্রজালোকে আমাকে ধার্মিক ও প্রজা বৎসল কুপাল বলিয়া অনুরাগ করিবে, তথাচ আমার মনে শান্তির উদয় হইবে না । এক্ষণে এই সকল মূখ্য সম্ভোগ নিতান্ত অলীক বলিয়া বোধ হইতেছে । যদিও আমি রাজা হইব, সংঘারে প্রভুত্ব লাভ করিব, আমার ভাণ্ডারে ধনের অপ্রতুল হইবে

না, যখন যাহা অভিলাষ করিব, প্রায় তৎক্ষণাৎ তাহা সম্পন্ন হইয়া যাইবে ; কিন্তু আমি ইহা একবার ভাবিতেছি না যে, আমাকে এক দিবস মৃত্যু মুখে পতিত হইতেই হইবে । রোগ, শোক, জরা ও মৃত্যু এই চারটির হস্ত হইতে আমি কখনই নিস্তার লাভ করিতে পারিব না । কেবল আমি পারিব না একপন্থে, মানব মাত্রেই পারিবে না ; ঐ চারিটি বিষয় ক্ষুদ্র ভদ্র, পাপী পুণ্যাত্মা, উচ্চ নীচ এবং ধনী দরিদ্র সকলের পক্ষেই সমান, কাহারও প্রতি অনুকূল এবং কাহারও প্রতি প্রতিকূল নহে । যদি সংসারের নিয়ম এই রূপ হইল, তখন আমাতে ও এক জন পর্ণশালা নিবাসী ভিক্ষুকে প্রভেদ কি ? তাহার যদি সুস্থ শরীর হয়, আর আমি রাজ্যেশ্বর হইয়া যদি আমার শরীর কণ্ড হয়, তাহা হইলে, আমার অবস্থা তাহার অবস্থা অপেক্ষা অনেক পরিমাণে নিকৃষ্ট বলিয়া ধরিব । যেখানে ইহ সংসারে জরা জীর্ণ, রোগ শোক, ও মৃত্যু হইতে কাহারও নিস্তার নাই, সেখানে আবার রাজা প্রজায় প্রভেদ কি ? রাজা বলিয়া আমি যে ঐশ্বর্য্যের অহঙ্কার করি, কল্য শোকে উত্তপ্ত হইলে, সেই ঐশ্বর্য্য ভোগ বিষয় বোধ হইবে । এই শরীর জরা জীর্ণ হইলে, এই অখণ্ড ভ্রমণের একাধিপত্য পাইলেও সাংসারিক সুখ ভোগের কিছু মাত্র ক্ষমতা থাকিবে না । শরীরের গ্রন্থি সকল শিথিল হইয়া পড়িবে, মল মূত্র পরিভ্যাগের স্থান অস্থান বোধ থাকিবে না, উপাদেয় খাদ্য সামগ্রী ভোজন করিলেও তাহা পরিপাক পাইবে না, স্নেহাভ্যাসে শরীর আচ্ছন্ন হইয়া থাকিবে, এবং জ্ঞান বুদ্ধি বিলুপ্ত প্রায় হইয়া যাইবে । আমার এই শরীর জরায় জীর্ণ হইবার আর অধিক কাল বিলম্ব নাই ; কিন্তু ভোগাভিলাষ সম

রত হয় । এমন সময় হঠাৎ প্রবল বাত্যা উপস্থিত হইলে, সাগরের অসীম জলরাশি একেবারে ভীষণ ভাব ধারণ করে । তখন তাহার ভয়ঙ্কর তরঙ্গ দেখিয়া জলযানস্থিত লোকের শরীরের শোণিত শুষ্ক হইয়া যায় । সেই রূপ এই সংসার সাগরস্থিত মনুষ্যাগণ যখন ধনে জনে পরিপূর্ণ হইয়া উঠে, তখন একেবারে হিতাহিত জ্ঞানশূন্য হইয়া যায় । মনে মনে ভাবে, আমাদিগের ধন অপ-
 র্যাপ্ত, পরমায়ু অনন্ত, শরীর অক্ষয় ; যত কেন অত্যাচার করি
 না, কিছুতেই আমাদিগের এই বলিষ্ঠ শরীর ক্ষয় প্রাপ্ত হইবে না ।
 কিন্তু যখন কাল কুটিল ভাব ধারণ করে, তখন এক দিকে ধন নাশ;
 অন্য দিকে পুত্র কলত্রাদির অকাল মৃত্যু, শরীরে রোগ ও জাতি-
 গণের প্রাভুর্ভাব এক কালে ঘটিয়া উঠায়, যে ব্যক্তি কিছু কাল
 পূর্বে সংসারকে পরম সুখের স্থান বলিয়া স্থির করিয়াছিল, এক্ষণে
 তাহার সেই অমৃতময়ী পৃথিবীকে বিষময়ী বলিয়া বোধ হইতে
 লাগিল । সমুদ্র মন্থনে যেমন সর্ক্যাগ্রে স্খাভাও উঠিয়াছিল,
 তাহার পর অতিরেক মন্থনে হলাহল ও অগ্নি সমুখিত হইয়া
 সুরাসুরগণকে ব্যতিব্যস্ত করিয়া তুলিয়াছিল, সেই সময়ে কেবল
 ষোগীর অগ্রগণ্য মহাদেব সেই বিষ পান করিয়া সকলের ভয়
 ভঞ্জন করিয়াছিলেন, সংসার সিদ্ধিও তদনুসারে । যৌবন কালে
 বিদ্যাবলে উপর নির্ভর করিয়া প্রথমতঃ প্রায় সকলেই শাস্ত্র ও
 শিষ্ট ভাবে ধীরে ধীরে সংসার সাগর মন্থনে প্রবৃত্ত হয়, তাহাতে
 অবশ্যই পরিশ্রমের পুরস্কার স্বরূপ যে যে রূপ পাত্র সে সেই রূপ
 রত্ন লাভ করিতে থাকে । ক্রমে ধন হইতে অহঙ্কার ও অভিলাষ
 উপস্থিত হইয়া পড়ে, সেই সময় অনেকে বিবেক বিহীন হইয়া
 ' আরও মন্থন কর ! আরও মন্থন কর ! এক্ষণে যাহা পাইলে, ইহা

অপেক্ষা আরও অধিক পাওয়া যাইবে’—এই রূপ চীৎকার করিতে আরম্ভ করে; কিন্তু অতিরিক্ত মন্থনে যেমন সাগরে হলাহল উঠিয়াছিল, সংসার সাগরেও সেই রূপ অমৃতের বিনিময়ে গরল উঠিয়া পড়ে। কখন বা শোক জনিত, কখন বা নৈরাশ্র বশতঃ, কখন ধনক্ষয় জন্ম, কখন বা রোগ শরীর হেতু, কখন বা শত্রু-ভয়ে এই সূখপূর্ণ সংসারকে দুঃসহ দুঃখময় বলিয়া বোধ হইতে থাকে। দেবদেব মহাদেবের ন্যায় যিনি সেই তীব্র কালকূট পান করিয়াও স্থির থাকিতে পারেন, তিনিই যথার্থ তত্ত্বজ্ঞানী; নতুবা সেই বিষের আলায় অস্থির হইয়া কেহ বা আত্মনাশ করে, কেহ বা একেবারে ভগ্নোৎসাহ হইয়া যায়, কাহারও বা উন্মাদ দশা ঘটে, এবং কেহ কেহ বা বিষের আলায় জর্জরিত হইয়া কোথায় যাইব, কি করিব, কিসে সুস্থ হইব, এই রূপ ভাবিতে ভাবিতে অসহ্য যন্ত্রণাভোগ করে। ইদৃশ অবস্থাপন্ন লোকেরা কি করিয়া প্রকৃত শান্তিসুখের অধিকারী হইবে? যখন সংসার সিদ্ধু মন্থনে সুধাভাণ্ড পাওয়া গিয়াছিল, তখন যদি তাহারা মনে মনে ভাবিয়া রাখিত যে, অদ্য যে হস্তে সুধাভাণ্ড গ্রহণ করিতেছি, কল্য হয় ত আবার সেই হস্তেই বিষপাত্র গ্রহণ করিতে হইবে; অতএব প্রথমাবধিই অমৃত ও গরলকে সমতুল্য ভাবিয়া রাখি, তাহা হইলে, আর চরমে কষ্ট পাইতে হইবে না। যিনি সংসারের তরঙ্গ দেখিয়া মন বিচলিত না করেন ও সংসারের শান্তি দেখিয়া আত্মদে উন্মত্ত হইয়া নির্ভয়ে যথেষ্টাচারে প্রবৃত্ত না হন, তিনিই সকল অবস্থাতে সম ভাবে কাল যাপন করিতে পারেন।

এই সংসারে সুখ ও দুঃখ বলিয়া কোন স্বভাব পদার্থ নাই। অগ্নি আর জল এ দুইটি আমরা চাক্ষুষ প্রত্যক্ষ করি-

তেছি। অগ্নির দাহিকা শক্তি আছে এবং জলের নিষ্কারণী শক্তি আছে। এই দুইটি পদার্থই সংসারের নিত্য প্রয়োজনীয়। কাব্যকারেরা অগ্নিকে দুঃখের সহিত ও জলকে সুখের সহিত তুলনা করিয়া থাকেন ; কিন্তু সে দুইটি মনে মনে কল্পনা করিয়া লইতে হয় এই মাত্র। আমি কি সুখের নাম দুঃখ ও দুঃখের নাম সুখ রাখিতে পারি ? না, এক্ষণে আর তাহা পারি না, পূর্বকার সময় হইলে পারিতাম ; কেন না, সুখ এবং দুঃখের একেবারে অধিকার নির্ণয় হইয়া গিয়াছে। যে সকল বিষয়কে সংসারের লোক সুখ বলে, তাহাকে আর দুঃখ বলিবার ঘো নাই। পূর্বে বলা হইয়াছে যে, সুখ দুঃখ দৃশ্যমান পদার্থ নহে। যেমন মনকে আমরা চক্ষে দেখিতে পাই না, কিন্তু মন আমাদের শরীরে অবস্থান করিতেছে, ইহা বিলক্ষণ অনুমান করিতে পারি ; সুখ দুঃখও সেই রূপ আনুমানিক পদার্থ। যেমন মনের কতকগুলি গুণ আছে, সেই রূপ সুখ দুঃখও কতকগুলি অধিকার নির্ণয় আছে। এক্ষণে সেই সকল বিষয়ের হেতুবাদ করিবার প্রয়োজন হইতেছে ;—

মনের অভিলাষ সর্বতোভাবে পূর্ণ হওয়ার নাম সুখ, এতদ্ভিন্ন সুখের আর সাধারণ নামকরণ কিছুই হইতে পারে না ; আর মনের অভিলাষ পূর্ণ না হওয়ারই দুঃখ। কিন্তু যখন প্রত্যেক লোকের অবস্থা ভেদে, সময় ভেদে, মনের অভিলাষ স্বতন্ত্র হয়, তখন একের সুখে সকলের সুখ এবং একের দুঃখে সকলের দুঃখ ইহা কি রূপে সম্ভব হইতে পারে। আমি বাহাকে পরম সুখ বলিয়া জ্ঞান করি, অন্য এক জন হয় ত সেই সুখকে দুঃখের একশেষ বলিয়া গণ্য করিতে পারে। বোধ কর, এক

জন সুরাপায়ী কোন ধনবান্ কর্তৃক নিমন্ত্রিত হইল যে, অদ্য তুমি আমার উদ্যানে সন্ধ্যার পর আসিয়া সুরা সেবন করিবে। একপ নিমন্ত্রণ পাইয়া উক্ত সুরাপায়ীর আর আহ্বাদের পরিসীমা রহিল না। সে ভাবিল, কয়েক দিন হইতে মনের যাহা অভিলাষ হইয়াছিল, অদ্য তাহা পূর্ণ হইল। অন্য দিকে সেই ধনী আর একটি ব্রাহ্মণ পণ্ডিতকে বল পূর্বক আপন উদ্যানে লইয়া গিয়াছেন, এবং পুনঃ পুনঃ কহিতেছেন যে, যদি তুমি হস্ত বদনে আমাদিগের সহিত সুরা সেবনে যোগ না দাও, তাহা হইলে, তোমার কষ্টের অবধি থাকিবে না ; এই কারণে হয় ত তোমার জীবনান্ত পর্য্যন্ত ঘটিতে পারে। এক বিষয়ে এক জনের সুখ ও অন্য জনের দুঃখ উপস্থিত কি জন্ত হইল ? ব্রাহ্মণ পণ্ডিত ভাবিলেন, যত্ন পর্য্যন্ত স্বীকার করিব, তথাচ ধর্ম্ম নষ্ট করিয়া সুরা পান করিতে পারিব না। সুরাপায়ী ভাবিতেছে যে, যদি প্রত্যহ এই রূপ সুরা সেবন হয়, তাহা হইলে, আমার কোন কষ্টই থাকে না। যাহা হউক, অদ্য আমার পক্ষে সুপ্রভাত, তাহাতে আর সংশয় নাই। যে সকল লোক বহু কষ্টে কেবল এক সাংসারিক সুখের জন্ত দেশ বিদেশে ধন উপার্জন করিয়া বেড়াইতেছে, তাহাদের সর্বদা এই চিন্তা প্রবল হয় যে, যদি কিছু ধন সঞ্চয় করিতে পারি, তাহা হইলেই মনের সমস্ত অভিলাষ পরিপূর্ণ হইবে, মনের সাধ মিটাইয়া সুখ ভোগ করিব। অন্য এক জন বিনা আয়াসে বিপুল ধনের অধীশ্বর হইয়া দেখিল যে, সংসারে সুখের লেশ মাত্র নাই ; এই জন্ত সে সংসারের উপস্থিত সুখকে সুখ বলিয়াই ধরিল না, এবং সন্ন্যাস ধর্ম্ম গ্রহণ করিয়া পরমার্থ চিন্তায় রত হইল। কোন ব্যক্তি হিন্দুর অথবা ভোজনে পরম পরিচোষ লাভ করে, এবং

তাহার মন প্রভূত সেই সকল হিন্দুশাস্ত্র নিষিদ্ধ সামগ্রী আহাৰ করিতে অভিলাষ করে, অন্য এক জন সেই সকল খাদ্য সামগ্রীর নাম শুনিলেই ক্ষুধার তুলিয়া থাকে । উন্নত মনের সুখ উন্নত ও অবনত মনের সুখ অবনত । কেহ যদি এক খানি ভগ্ন পর্ণকুটীর হুতন ভূগে আচ্ছাদন করিতে পারে, তাহা হইলে, তাহার আর আচ্ছাদনের পরিসীমা থাকে না ; কেহ বা দুই লক্ষ টাকা ব্যয় করিয়া এক সুন্দর অটালিকা প্রস্তুত করার পর দেখিতে পাইল যে, তাহা অপেক্ষা তাহার এক জাতি উৎকৃষ্ট বাটী প্রস্তুত করিয়াছে, তখন তাহার নিজ বাটীতে বসবাস করিয়া আর সুখ বোধ হইল না, তদপেক্ষা তাহার সেই জাতিকেই সুখী বোধ করিতে লাগিল । কোন ব্যক্তি বহু কষ্টে অর্থ উপার্জন করিয়া মধ্য বয়সে একটি গুণবতী সুন্দরী কামিনীর পাণি গ্রহণ করিয়া মনে মনে যার পর নাই সুখী হইলেন ; পক্ষান্তরে আবার বিস্তীর্ণ রাজ্যের অধীশ্বরগণ আপন আপন অস্ত্রপুরে বহু সংখ্যক সর্কাজ সুন্দরী ললনাগণকে একত্র সমবেত করিয়া রাখিয়াও এক দিনের জন্য সুখী হইলেন না । দিল্লীশ্বর আলাউদ্দীন শত শত স্বকপা কামিনীর পাণি গ্রহণ করিয়াও এক চিত্তোরেণ্বরী পদ্মিনীর জন্য মনোমধ্যে কিছু মাত্র সুখানুভব করিতে পারেন নাই ; তবেই সুখ দুঃখ সকলের পক্ষে সমান নহে । যাহার যেকপ মন, যেকপ কচি ও যেকপ স্বভাব সে সেই মত বিষয়েই সুখানুভব করে । যখন সুখ দুঃখের স্থিরতা হইল না, তখন সকল অবস্থাতেই মনের স্বচ্ছন্দতা রক্ষা করা সর্বতোভাবে কর্তব্য ; তাহা হইলে, আর কোন বিষয়েই অসুখী হইতে হয় না । বাঁহারা অটালিকার বিনিময়ে পর্ণকুটীরে বাস করেন, উপা-

দেয় খাদ্যের বিনিময়ে ফল মূল ভক্ষণ করেন, বহু মূল্য পরি-
চ্ছদের বিনিময়ে বস্ত্রকল পরিধান করিয়া সমান তৃপ্তি লাভ
করেন, তাঁহাদিগের মনেই শাস্তি থাকিতে পারে ; নতুবা
শান্তির স্থান আর কোথাও নাই। যদি শাস্তিদেবী কোথাও থাকেন,
তাহা হইলে, পৰ্ণকূটরেই আছেন, রাজপ্রাসাদে নাই। মন যে
খানে অবনত, সেই খানেই শাস্তি বিরাজমান। উৰ্দ্ধ দৃষ্টি করিলে,
পদে পদে মনের শাস্তিভঙ্গ হইবে ; এই জন্ত স্নেহে সম ভাবে
ভোগ করিতে শিক্ষা কর, তাহা হইলে, শাস্তি স্নেহ অন্ততঃ
করিতে পাইবে।

তিরস্কার ও স্তুতিবাদকে সমান জ্ঞান করা সামান্য মনু-
ষ্যের কার্য্য নহে ; একপ মনুষ্য নাই বলিলেও অত্যাশ্চর্য্য হইবে
না। বর্ত্তমান সময়ে স্তুতি ও তিরস্কারই সৰ্ব্বনাশের পথ হইয়া
উঠিয়াছে। তিরস্কারের সামান্য অর্থ দোষের সমালোচনা। যদি
কেহ নিতান্ত আপনার ভাবিয়া আমাকে তিরস্কার করিতে আরম্ভ
করেন, তাহা হইলে, আমার বিরক্তির ইয়ত্তা থাকে না। যদিও
সেই তিরস্কারকারী আমাকে একটিও অযথা কথা বলিলেন না,
আমার শরীরে যে সকল দোষ আছে, তিনি তাহারই উল্লেখ
করিলেন, তথাচ আমার তাহা সহ্য হইল না। আমি অস্বাভাবিক
কার্য্য করিব, সৰ্ব্বদা পাপপথে বিচরণ করিব ; কিন্তু লোকে
আমাকে সদাচারী বলিয়া স্তুতি করুক—অধিকাংশ লোকের
এই রূপ মনোগত অভিলাষ। আমি সুরা পান করি, অকার্য্য
করি ; কিন্তু কোন চাটুকার আসিয়া যদি আমাকে এই
বলিয়া স্তুতি করিতে আরম্ভ করে,—মহাশয়, আপনার ছায়
দেব ভুল্য এক্ষণকার কালে আর দেখিতে পাওয়া যায় না ;

আপনার পুণ্যেই সংসার চলিতেছে । একগকার সুরাপায়ী ও অস-
চ্চরিত্র লোকগুলার পাপেই সংসার ছার খার হইয়া যাইতেছে ।
আপনার ত্রায় জন কতক পুণ্যাত্মা লোক এই ধরাধামে ন'
থাকিলে, এত দিন পৃথিবী রসাতলগত হইত । উক্ত চাটুকার
প্রকারান্তরে আমাকে বিলক্ষণ বিক্রপ করিল, ও স্তুতির সঙ্গে
সঙ্গে বাস্তবিকই নিন্দা করিল ; কিন্তু আমি ধনগর্বে তাহার
সেই কথাগুলি আপনার পক্ষে সত্য বলিয়া ধরিয়া লইলাম ।
আমার মনে হয় ত তৎ কালে এই রূপ ভাবের আবির্ভাব হইল
যে, আমার দোষের কথা এ ব্যক্তি কিছুই অবগত নহে ; সুতরাং
আমি স্তাবকের উপর যথোচিত সম্ভ্রষ্ট হইলাম ।

একগকার ধনাঢ্য লোকের চরিত্রের সহিত দেব চরিত্রের কিছু
মাত্র প্রভেদ দেখি না ; কারণ পুরাণাদিতে দেখিতে পাওয়া যায়,
যিনি যখন যে দেবতার স্তব করিয়াছেন, তখন তিনিই তাঁহাকে
হর্তা কর্তা বিধাতা ও সর্ব দেবের পূজ্য বলিয়া জ্ঞান করিয়াছেন ।
দেবতাদিগের বর প্রদানও একগকার ধনাঢ্য লোকের সমতুল্য ।
তাঁহার চাটুবাক্যে মোহিত হইয়া পরম শত্রুর প্রতিও প্রসন্ন
হইয়াছেন । দেখ, ভগবান্ রামচন্দ্রের বনিতাপহারী রক্ষঃকুলপতি
দশানন সম্মুখ সংগ্রামে এক প্রকার পরাস্ত হইয়া যখন তাঁহার স্তব
আরম্ভ করিলেন, তখন তিনি সেই পরম শত্রু দশাননেন স্তুতি
বাক্যে প্রসন্ন হইয়া সীতা উদ্ধারের আশা একেবারে পরিত্যাগ
করিয়া বসিলেন । একগকার ধনিগণ যেমন চাটুকারদিগের প্রতি
ক্লেণে কষ্ট ও ক্লেণে তুষ্ট হইয়া থাকেন, তৎ কালের দেবতারাও
তদনুরূপ ছিলেন । রাবণের স্তুতিতে রামচন্দ্র ধনু ও অস্ত্র
পরিত্যাগ করিয়া বসিলেন এবং মনে মনে ভাবিলেন, বরং

সীতাকে পরিভ্যাগ করিয়া যাইব, তথাচ একপ ভক্তের প্রতি
 অন্ত্রভ্যাগ করিতে পারিব না। এমন সময়ে দশানন দুই সরস্বতী
 কর্তৃক উত্তেজিত হইয়া কর্কশ স্বরে রামচন্দ্রকে কহিলেন, অরে ভণ্ড
 তপস্বি! আমি আমার ইষ্টদেবের স্তব করিলাম, আর তুই ভাবিলি
 ভয় পাইয়া দশানন আমাকে স্তব করিল? এ কি তোর সামান্য ভ্রম!
 এই দেখ, এখনই তোর শিরশ্ছেদন করিয়া ইন্দ্রজিৎ ও কুন্তকর্ণের
 শোক বিস্মৃত হই। এই কয়েকটি কর্কশ কথা শ্রবণ মাত্রেই রাম-
 চন্দ্রের ক্রোধ শত গুণে বর্দ্ধিত হইয়া উঠিল, এবং তৎক্ষণাৎ অস্ত্র
 ধারণ করিয়া পূর্বে বাহাকে পরম ভক্ত বলিয়া ধার্য্য করিয়াছিলেন,
 তাহারই প্রতি অস্ত্র প্রয়োগে তৎপর হইলেন। রামচন্দ্রের স্মার
 ইন্দ্রাদি দেবভারাও সময়ে সময়ে স্তাবকের প্রতি যার পর নাই
 প্রসন্ন হইয়াছিলেন, তাহার পর আবার সেই সকল ভক্তের বিনাশ
 জন্য যে সকল কষ্ট ভোগ করিয়াছিলেন, তাহা বর্ণনাভীত ;
 কিন্তু আমাদিগের যোগীশ্রেষ্ঠ মহাদেব সে প্রকৃতির দেবতা
 ছিলেন না। তিনি অল্পে সন্তুষ্ট হইতেন বলিয়া লোকে তাঁহাকে
 আশুতোষ বলিয়া থাকেন। কথিত আছে, মহাদেব প্রত্যহ
 ভিক্ষা করিয়া আনিয়া জ্বীপুত্র পরিবারের ভরণ পোষণ করি-
 তেন। যখন তিনি সর্ক শরীরে ভস্ম লেপন, সর্পের দ্বারা
 জটা বন্ধন, ভিক্ষার ঝুলি ও শিলা ডমক লইয়া রূষে আরোহণ
 পূর্বক ‘ভিক্ষাং দেহি’ বলিয়া গৃহস্থগণের দ্বারে দ্বারে বেড়া-
 ইতেন, তখন অজ্ঞান বালকেরা তাঁহার প্রতি কিরূপ দৌরাভ্য
 করিত, নিম্নে বর্ণিত হইল ;

“ কেহ বলে ওই এল শিব বুড়া বাপ,

কেহ বলে বুড়াটি খেলাও দেখি সাপ।

রত হয় । এমন সময় হঠাৎ প্রবল বাত্যা উপস্থিত হইলে, সাগরের অসীম জলরাশি একেবারে ভীষণ ভাব ধারণ করে । তখন তাহার তরঙ্গর তরঙ্গ দেখিয়া জলযানস্থিত লোকের শরীরের শোণিত শুষ্ক হইয়া যায় । সেই রূপ এই সংসার সাগরস্থিত মনুষ্যাগণ যখন ধনে জনে পায়পূর্ণ হইয়া উঠে, তখন একেবারে হিতাহিত জ্ঞানশূন্য হইয়া যায় । মনে মনে ভাবে, আমাদিগের ধন অপ-
র্যাপ্ত, পরমাণু অনন্ত, শরীর অক্ষয় ; যত কেন অত্যাচার করি না, কিছুতেই আমাদিগের এই বলিষ্ঠ শরীর ক্ষয় প্রাপ্ত হইবে না । কিন্তু যখন কাল কুটিল ভাব ধারণ করে, তখন এক দিকে ধন নাশ, অন্য দিকে পুত্র কলত্রাদির অকাল মৃত্যু, শরীরে রোগ ও জাতি-
গণের প্রাচুর্য্য এক কালে ঘটিয়া উঠায়, যে ব্যক্তি কিছু কাল পূর্বে সংসারকে পরম সুখের স্থান বলিয়া স্থির করিয়াছিল, এক্ষণে তাহার সেই অমৃতময়ী পৃথিবীকে বিষময়ী বলিয়া বোণ হইতে লাগিল । সমুদ্র মন্থনে যেমন সর্সাগ্রে সুধাভাণ্ড উঠিয়াছিল, তাহার পর অতিরেক মন্থনে হলাহল ও অগ্নি সমুখিত হইয়া সুরাসুরগণকে ব্যতিব্যস্ত করিয়া তুলিয়াছিল, সেই সময়ে কে-
ল যোগীর অগ্রগণ্য মহাদেব সেই বিষ পান করিয়া সকলের ভয় ভঞ্জন করিয়াছিলেন, সংসার সিন্ধুও তদনুরূপ । যৌবন কালে বিদ্যাবলের উপর নির্ভর করিয়া প্রথমতঃ প্রায় সকলেই শান্ত ও শিষ্ট ভাবে ধীরে ধীরে সংসার সাগর মন্থনে প্রবৃত্ত হয়, তাহাতে অবশ্যই পরিভ্রমের পুরস্কার স্বরূপ যে যে রূপ পাত্র সে সেই রূপ রত্ন লাভ করিতে থাকে । ক্রমে ধন হইতে অহঙ্কার ও অতিলোভ উপস্থিত হইয়া পড়ে, সেই সময় অনেকে বিবেক বিহীন হইয়া
'আরও মন্থন কর ! আরও মন্থন কর ! এক্ষণে সাহা পাইলে, ইহা

অপেক্ষা আরও অধিক পাওয়া যাইবে’—এই রূপ চীৎকার করিতে আরম্ভ করে; কিন্তু অতিরিক্ত মন্থনে যেমন সাগরে হলাহল উঠিয়াছিল, সংসার সাগরেও সেই রূপ অমৃতের বিনিময়ে গরল উঠিয়া পড়ে। কখন বা শোক জনিত, কখন বা নৈরাশ্র বশতঃ, কখন ধনক্ষয় জন্ম, কখন বা রোগ শরীর হেতু, কখন বা শত্রু-ভয়ে এই সুখপূর্ণ সংসারকে দুঃসহ দুঃখময় বলিয়া বোধ হইতে থাকে। দেবদেব মহাদেবের স্তায় যিনি সেই ভীত কালকূট পান করিয়াও স্থির থাকিতে পারেন, তিনিই যথার্থ তত্ত্বজ্ঞানী; নতুবা সেই বিষের জ্বালায় অস্থির হইয়া কেহ বা আত্মনাশ করে, কেহ বা একেবারে ভগ্নোৎসাহ হইয়া যায়, কাহারও বা উন্মাদ দশা ঘটে, এবং কেহ কেহ বা বিষের জ্বালায় জর্জরিত হইয়া কোথায় যাইব, কি করিব, কিসে সুস্থ হইব, এই রূপ ভাবিতে ভাবিতে অসহ্য যন্ত্রণা ভোগ করে। ঐদৃশ অবস্থাপন্ন লোকেরা কি করিয়া প্রকৃত শান্তিস্থখের অধিকারী হইবে? যখন সংসার সিদ্ধি মন্থনে সুখাভাও পাওয়া গিয়াছিল, তখন যদি তাহারা মনে মনে ভাবিয়া রাখিত যে, অদ্য যে হস্তে সুখাভাও গ্রহণ করিতেছি, কল্য হয় ত আবার সেই হস্তেই বিষপাত্র গ্রহণ করিতে হইবে; অতএব প্রথমাবধিই অমৃত ও গরলকে সমতুল্য ভাবিয়া রাখি, তাহা হইলে, আর চরমে কষ্ট পাইতে হইবে না। যিনি সংসারের তরঙ্গ দেখিয়া মন বিচলিত না করেন ও সংসারের শান্তি দেখিয়া আক্লাদে উন্মত্ত হইয়া নির্ভয়ে যথেষ্টাচারে প্রবৃত্ত না হন, তিনিই সকল অবস্থাতে সম ভাবে কাল যাপন করিতে পারেন।

এই সংসারে সুখ ও দুঃখ বলিয়া কোন স্বতন্ত্র পদার্থ নাই। অগ্নি আর জল এ দুইটি আমরা চাক্ষুষ প্রত্যক্ষ করি-

তেছি। অগ্নির দাহিকা শক্তি আছে এবং জলের স্নিগ্ধকারিতা শক্তি আছে। এই দুইটি পদার্থই সংসারের নিত্য প্রয়োজনীয়। কাব্যকারেরা অগ্নিকে দুঃখের সহিত ও জলকে সুখের সহিত তুলনা করিয়া থাকেন ; কিন্তু সে দুইটি মনে মনে কল্পনা করিয়া লইতে হয় এই মাত্র। আমি কি সুখের নাম দুঃখ ও দুঃখের নাম সুখ রাখিতে পারি ? না, এক্ষণে আর তাহা পারি না, পূর্বকার সময় হইলে পারিভাম ; কেন না, সুখ এবং দুঃখের একেবারে অধিকার নির্ণয় হইয়া গিয়াছে। যে সকল বিষয়কে সংসারের লোক সুখ বলে, তাহাকে আর দুঃখ বলিবার যো নাই। পূর্বে বলা হইয়াছে যে, সুখ দুঃখ দৃশ্যমান পদার্থ নহে। যেমন মনকে আমরা চক্ষে দেখিতে পাই না, কিন্তু মন আমাদের শরীরে অবস্থান করিতেছে, ইহা বিলক্ষণ অনুমান করিতে পারি ; সুখ দুঃখও সেই রূপ আনুমানিক পদার্থ। যেমন মনের কতকগুলি গুণ আছে, সেই রূপ সুখ দুঃখেরও কতকগুলি অধিকার নির্ণয় আছে। এক্ষণে সেই সকল বিষয়ের হেতুবাদ করিবার প্রয়োজন হইতেছে ;—

মনের অভিলাষ সর্বতোভাবে পূর্ণ হওয়ার নাম সুখ, একান্ত সুখের আর সাধারণ নামকরণ কিছুই হইতে পারে না ; আর মনের অভিলাষ পূর্ণ না হওয়ারই দুঃখ। কিন্তু যখন প্রত্যেক লোকের অবস্থা ভেদে, সময় ভেদে, মনের অভিলাষ স্বতন্ত্র হয়, তখন একের সুখে সকলের সুখ এবং একের দুঃখে সকলের দুঃখ ইহা কি রূপে সম্ভব হইতে পারে। আমি যাহাকে পরম সুখ বলিয়া জ্ঞান করি, অন্য এক জন হয় ত সেই সুখকে দুঃখের একশেষ বলিয়া গণ্য করিতে পারে। বোধ কর, এক

জন সুরাপায়ী কোন ধনবান্ কর্তৃক নিমন্ত্রিত হইল যে, অদ্য তুমি আমার উদ্যানে সন্ধ্যার পর আসিয়া সুরা সেবন করিবে। একপ নিমন্ত্রণ পাইয়া উক্ত সুরাপায়ীর আর আত্মাদের পরিসীমা রহিল না। সে ভাবিল, কয়েক দিন হইতে মনের যাহা অভিলাষ হইয়াছিল, অদ্য তাহা পূর্ণ হইল। অন্য দিকে সেই ধনী আর একটি ব্রাহ্মণ পণ্ডিতকে বল পূর্বক আপন উদ্যানে লইয়া গিয়াছেন, এবং পুনঃ পুনঃ কহিতেছেন যে, যদি তুমি হাস্ত রদনে আমাদিগের সহিত সুরা সেবনে যোগ না দাও, তাহা হইলে, তোমার কণ্ঠের অবধি থাকিবে না; এই কারণে হয় ত তোমার জীবনান্ত পর্য্যন্ত ঘটিতে পারে। এক বিষয়ে এক জনের সুখ ও অন্য জনের দুঃখ উপস্থিত কি জন্য হইল? ব্রাহ্মণ পণ্ডিত ভাবিলেন, মৃত্যু পর্য্যন্ত স্বীকার করিব, তথাচ ধর্ম্ম নষ্ট করিয়া সুরা পান করিতে পারিব না। সুরাপায়ী ভাবিতেছে যে, যদি প্রত্যহ এই রূপ সুরোগ হয়, তাহা হইলে, আমার কোন কষ্টই থাকে না। যাহা হউক, অদ্য আমার পক্ষে সুপ্রভাত, তাহাতে আর সংশয় নাই। যে সকল লোক বহু কষ্টে কেবল এক সাংসারিক সুখের জন্য দেশ বিদেশে ধন উপার্জন করিয়া বেড়াইতেছে, তাহাদের সর্বদা এই চিন্তা প্রবল হয় যে, যদি কিছু ধন সঞ্চয় করিতে পারি, তাহা হইলেই মনের সমস্ত অভিলাষ পরিপূর্ণ হইবে, মনের সাধ মিটাইয়া সুখ ভোগ করিব। অন্য এক জন বিনা আয়াসে বিপুল ধনের অধীশ্বর হইয়া দেখিল যে, সংসারে সুখের লেশ মাত্র নাই; এই জন্য সে সংসারের উপস্থিত সুখকে সুখ বলিয়াই ধরিল না, এবং সম্যাস ধর্ম্ম গ্রহণ করিয়া পরমার্থ চিন্তায় রত হইল। কোন ব্যক্তি হিন্দুর অথবা ভোজনে পরম পরিচোষ লাভ করে, এবং

তাহার মন প্রত্যহ সেই সকল হিন্দুশাস্ত্র নিষিদ্ধ সামগ্রী আহাৰ করিতে অভিলাষ করে, অন্য এক জন সেই সকল খাদ্য সামগ্রীর নাম শুনিলেই ঞ্চক্কার তুলিয়া থাকে । উন্নত মনের সুখ উন্নত ও অবনত মনের সুখ অবনত । কেহ যদি এক খানি ভগ্ন পৰ্ণকুটির হুতন ভূণে আচ্ছাদন করিতে পারে, তাহা হইলে, তাহার আর আচ্ছাদনের পরিসীমা থাকে না ; কেহ বা দুই লক্ষ টাকা ব্যয় করিয়া এক সুন্দর অট্টালিকা প্রস্তুত করার পর দেখিতে পাইল যে, তাহা অপেক্ষা তাহার এক জাতি উৎকৃষ্ট বাটী প্রস্তুত করিয়াছে, তখন তাহার নিজ বাটীতে বসবাস করিয়া আর সুখ বোধ হইল না, তদপেক্ষা তাহার সেই জাতিকেই সুখী বোধ করিতে লাগিল । কোন ব্যক্তি বহু কষ্টে অর্থ উপার্জন করিয়া মধ্য বয়সে একটি গুণবতী সুন্দরী কামিনীর পাণি গ্রহণ করিয়া মনে মনে যার পর নাই সুখী হইলেন ; পক্ষান্তরে আবার বিস্তীর্ণ রাজ্যের অধীশ্বরগণ আপন আপন অন্তঃপুরে বহু সংখ্যক সৰ্ব্বাঙ্গ সুন্দরী ললনাগণকে একত্র সমবেত করিয়া রাখিয়াও এক দিনের জন্য সুখী হইলেন না । দিল্লীশ্বর আলাউদ্দীন শত শত সুরূপা কামিনীর পাণি গ্রহণ করিয়াও এক চিতোরেশ্বরী পদ্মিনীর জন্য মনোমধ্যে কিছু মাত্র সুখানুভব করিতে পারেন নাই ; তবেই সুখ দুঃখ সকলের পক্ষে সমান নহে । যাহার যেকপ মন, যেকপ কচি ও যেকপ স্বভাব সে সেই মত বিষয়েই সুখানুভব করে । যখন সুখ দুঃখের স্থিরতা হইল না, তখন সকল অবস্থাতেই মনের স্বচ্ছন্দতা রক্ষা করা সৰ্ব্বতোভাবে কর্তব্য ; তাহা হইলে, আর কোন বিষয়েই অসুখী হইতে হয় না । যাঁহারা অট্টালিকার বিনিময়ে পৰ্ণকুটিরে বাস করেন, উপা-

দেয় খাদ্যের বিনিময়ে ফল মূল ভক্ষণ করেন, বহু মূল্য পরি-
চ্ছদের বিনিময়ে বস্ত্রকল পরিধান করিয়া সমান তৃপ্তি লাভ
করেন, তাঁহাদিগের মনেই শান্তি থাকিতে পারে ; নতুবা
শান্তির স্থান আর কোথাও নাই। যদি শান্তিদেবী কোথাও থাকেন,
তাহা হইলে, পর্ণকুটীরেই আছেন, রাজপ্রাসাদে নাই। মন যে
খানে অবনত, সেই খানেই শান্তি বিরাজমান। উর্দ্ধ দৃষ্টি করিলে,
পদে পদে মনের শান্তিভঙ্গ হইবে ; এই জন্ত সুখ দুঃখ সম ভাবে
ভোগ করিতে শিখা কর, তাহা হইলে, শান্তি সুখ অমুভব
করিতে পাইবে।

তিরস্কার ও স্তুতিবাদকে সমান জ্ঞান করা সামান্য মনু-
ষ্যের কার্য্য নহে ; একপ মনুষ্য নাই বলিলেও অত্যাক্তি হইবে
না। বর্ত্তমান সময়ে স্তুতি ও তিরস্কারই সর্ব্বনাশের পথ হইয়া
উঠিয়াছে। তিরস্কারের সামান্য অর্থ দোষের সমালোচনা। যদি
কেহ নিভাস্ত আপনার ভাবিয়া আমাকে তিরস্কার করিতে আরম্ভ
করেন, তাহা হইলে, আমার বিরক্তির ইয়ত্তা থাকে না। যদিও
সেই তিরস্কারকারী আমাকে একটিও অবধা কথা বলিলেন না,
আমার শরীরে যে সকল দোষ আছে, তিনি তাহারই উল্লেখ
করিলেন, তথাচ আমার তাহা সহ্য হইল না। আমি অন্তায়
কার্য্য করিব, সর্ব্বদা পাপপথে বিচরণ করিব ; কিন্তু লোকে
আমাকে সদাচারী বলিয়া স্তুতি ককক্—অধিকাংশ লোকের
এই রূপ মনোগত অভিলাষ। আমি সুরা পান করি, অকার্য্য
করি ; কিন্তু কোন চাটুকর আসিয়া যদি আমাকে এই
বলিয়া স্তুতি করিতে আরম্ভ করে,—মহাশয়, আপনার ছায়
দেব তুল্য একগুণকার কালে আর দেখিতে পাওয়া যায় না ;

আপনার পুণ্যেই সংসার চলিতেছে । এক্ষণকার সুরাপায়ী ও অস-
চরিত্র লোকগুলার পাপেই সংসার ছার খার হইয়া বাহিতেছে ।
আপনার জায় জন কতক পুণ্যাত্মা লোক এই ধরাগামে না
থাকিলে, এত দিন পৃথিবী রসাতলগত হইত । উক্ত চাটুকার
প্রকারান্তরে আমাকে বিলক্ষণ বিদ্রুপ করিল, ও স্তুতির সঙ্গে
সঙ্গে বাস্তবিকই নিন্দা করিল ; কিন্তু আমি ধনগর্বে তাহার
সেই কথাগুলি আপনার পক্ষে সত্য বলিয়া ধরিয়া লইলাম ।
আমার মনে হয় ত তৎ কালে এই রূপ ভাবের আবির্ভাব হইল
যে, আমার দোষের কথা এ ব্যক্তি কিছুই অবগত নহে ; সুতরাং
আমি স্তাবকের উপর যথোচিত সমুদ্র হইলাম ।

এক্ষণকার ধনাঢ্য লোকের চরিত্রের সহিত দেব চরিত্রের কিছু
মাত্র প্রভেদ দেখি না ; কারণ পুরাণাদিতে দেখিতে পাওয়া যায়,
যিনি যখন যে দেবতার স্তব করিয়াছেন, তখন তিনিই তাঁহাকে
হর্তা কর্তা বিধাতা ও সর্ব দেবের পূজ্য বলিয়া জ্ঞান করিয়াছেন ।
দেবতাদিগের বর প্রদানও এক্ষণকার ধনাঢ্য লোকের সমতুল্য ।
তাঁহারা চাটুবাক্যে মোহিত হইয়া পরম শত্রুর প্রতিও প্রসন্ন
হইয়াছেন । দেখ, ভগবান্ রামচন্দ্রের বনিভাপহারী রক্ষসকুলপতি
দশানন সম্মুখ সংগ্রামে এক প্রকার পরাস্ত হইয়া যখন তাঁহার স্তব
আরম্ভ করিলেন, তখন তিনি সেই পরম শত্রু দশাননেন স্তুতি
বাক্যে প্রসন্ন হইয়া গীতা উদ্ধারের আশা একেবারে পরিত্যাগ
করিয়া বসিলেন । এক্ষণকার ধনিগণ যেমন চাটুকারদিগের প্রতি
ক্লেণে কষ্ট ও ক্লেণে তুষ্ট হইয়া থাকেন, তৎ কালের দেবতারাও
তদনুরূপ ছিলেন । রাবণের স্তুতিতে রামচন্দ্র ধনু ও অস্ত্র
পরিত্যাগ করিয়া বসিলেন এবং মনে মনে ভাবিলেন, বরং

সীতাকে পরিত্যাগ করিয়া যাইব, তথাচ একপ ভক্তের প্রতি
 অস্বত্যাগ করিতে পারিব না। এমন সময়ে দশানন দুই সরস্বতী
 কর্তৃক উত্তেজিত হইয়া কর্কশ স্বরে রামচন্দ্রকে কহিলেন, অরে তপ
 তপস্বি! আমি আমার ইষ্টদেবের স্তব করিলাম, আর তুমি ভাবিলি
 ভয় পাইয়া দশানন আমাকে স্তব করিল? এ কি তোর সামান্য ভ্রম!
 এই দেখ, এখনই তোর শিরশ্ছেদন করিয়া ইন্দ্রজিৎ ও কুন্তকর্ণের
 শোক বিস্মৃত হই। এই কয়েকটি কর্কশ কথা শ্রবণ মাত্রেই রাম-
 চন্দ্রের ক্রোধ শত গুণে বর্দ্ধিত হইয়া উঠিল, এবং তৎক্ষণাৎ অস্ত্র
 ধারণ করিয়া পূর্বে যাহাকে পরম ভক্ত বলিয়া ধার্য্য করিয়াছিলেন,
 তাহারই প্রতি অস্ত্র প্রয়োগে তৎপর হইলেন। রামচন্দ্রের ন্যায়
 ইন্দ্রাদি দেবতারাও সময়ে সময়ে স্তাবকের প্রতি যার পর নাই
 প্রসন্ন হইয়াছিলেন, তাহার পর আবার সেই সকল ভক্তের বিনাশ
 জন্য যে সকল কষ্ট ভোগ করিয়াছিলেন, তাহা বর্ণনাতীত ;
 কিন্তু আমাদের যোগীশ্রেষ্ঠ মহাদেব সে প্রকৃতির দেবতা
 ছিলেন না। তিনি অল্পে সন্তুষ্ট হইতেন বলিয়া লোকে তাঁহাকে
 আশুতোষ বলিয়া থাকেন। কথিত আছে, মহাদেব প্রত্যহ
 ভিক্ষা করিয়া আনিয়া স্ত্রীপুত্র পরিবারের ভরণ পোষণ করি-
 তেন। যখন তিনি সর্ষ শরীরে ভক্ষ্য লেপন, সর্পের দ্বারা
 জটা বন্ধন, ভিক্ষার ঝুলি ও শিলা ডমক লইয়া ঘূষে আরোহণ
 পূর্বক ‘ভিক্ষাং দেহি’ বলিয়া গৃহস্থগণের দ্বারে দ্বারে বেড়া-
 ইতেন, তখন অজ্ঞান বালকেরা তাঁহার প্রতি কিকপ দৌরাভ্য
 করিত, নিম্নে বর্ণিত হইল ;

“ কেহ বলে ওই এল শিব বুড়া কাপ,

কেহ বলে বুড়াটি খেলাও দেখি সাপ।

কেহ বলে জটা হতে বার কর জল,
কেহ বলে জল দেখি কপালে অনল ।
কেহ বলে ভাল করে শিঙ্গাটি বাজাও,
কেহ বলে ডমরু বাজায়ে গীত গাও ।
কেহ বলে নাচ দেখি গাল বাজাইয়া,
ছাই মাটি কেহ দেয় গায় ফেলাইয়া ।”

মহাদেব বালকগণের এই সকল কথা শুনিতে শুনিতে হাস্য
মুখে অশ্রুপথে গমন করিতেন । যে মহাদেবের ভুজবলে কত
বার ইন্দ্রের ইন্দ্রত্ব রক্ষা পাইয়াছিল, সমুদ্র মন্থন কালে যে মহা-
দেব কালকূট কণ্ঠস্থ করিয়া দেব দেবীগণের আশঙ্কা দূর করিয়া-
ছিলেন, যে মহাদেব সক্রোধে ত্রিশূল ধারণ করিলে ব্রহ্মাও
কাঁপিয়া উঠিত, সেই মহাদেব ভিক্ষালব্ধ অন্ন জীবন ধারণ করি-
তেন, স্বর্গধাম পরিত্যাগ করিয়া কৈলাস পর্বতে বাস করিতেন,
মণি মাণিক্যের প্রতি দৃষ্টিপাত না করিয়া অস্থি মালায় কণ্ঠ
বিভূষিত করিতেন, বস্ত্রের বিনিময়ে ব্যাঘ্রচর্ম্ম পরিধান করি-
তেন, এবং নিন্দা ও স্তুতি সমান জ্ঞান করিতেন । অত-
এব দেবদেব মহাদেব এবং বাল-বৈরাগী শুকদেবের ন্যায় যাঁহারা
স্তুতি ও তিরস্কার সমান জ্ঞান করিতে পারিবেন, ইহ সংসারে
ধাকিয়াও তাঁহাদিগের মনে অনেক পরিমাণে শান্তি থাকিতে
পারে ।

এই সম্বন্ধে আমরা গুটি কতক পুরা কালের মহামুখের কথা
উদাহরণ স্থলে গ্রহণ করিতেছি । পণ্ডিত চূড়ামণি সক্রেন্টিস
স্তুতি ও নিন্দা উভয়ই সমান জ্ঞান করিতেন । তিনি বলি-
তেন,—আমাকে নিন্দা করিলে, সে নিন্দায় অকারণ ব্যথিত

হইব কেন ? যদি সে আমার যথার্থ দোষ উল্লেখ করে, তাহা হইলে, তাহাকে বন্ধুর মধ্যে গণ্য করা উচিত ; কেননা, আমাদিগের পিতা মাতা ও গুরু জনেরাই দোষের উল্লেখ করিয়া ভৎসনা করিয়া থাকেন। আর আমি যে দোষে দোষী নহি, 'নিন্দুকেরা যদি আমার প্রতি সেই সকল দোষারোপ করে, তাহা হইলে, সে সকল ব্যক্তিকে উন্নত জ্ঞান করিয়া হাস্ত্য করা উচিত। এই মর্মে শাস্তিশতকেও একটি চমৎকার কবিতা আছে, তাহার ভাবার্থ এই ;—“ যদি কেহ আমার নিন্দা করিয়া পরিতোষ লাভ করে, তাহাতে আমি দুঃখিত নহি ; বরং অযত্ন স্নেহ অনুগ্রহ ভাজন হইলাম। দেখ, লোকে বহু দুঃখে যে ধন উপার্জন করে, তাহা বিতরণ করিয়া অন্তের তুষ্টি সম্পাদন পূর্বক আপনার মঙ্গল কামনা করিয়া থাকে ; আমি যদি তাহা অক্লেশে ও বিনা অর্থ বায়ে পাই, তাহা হইলে, আপনাকে ভাগ্যবান্ বিবেচনা করিব। ” আর এক জন পণ্ডিত কহিয়াছেন ;—

ঝাঁহারা চাটুকারের কথায় কর্ণপাত করেন না ও নিন্দুকের সহিত একাসনে বসেন না, তাঁহারাই শাস্তিমুখ লাভ করিবার যোগ্য পাত্র। স্তুতি ও নিন্দা এই দুইটি সমাজের কণ্টক স্বরূপ। সংসারে যে সমুদয় অনিষ্ট ঘটতেছে, তৎ সমুদায়ের ভিত্তিতেই চাটুকার ও নিন্দুক আছে। যখন শূর্ণগথা লক্ষণ কর্তৃক অপমানিত হইয়া লঙ্কাপুরে প্রবেশ করে, তখন সে মনে মনে এই রূপ ভাবিতে ভাবিতে গিয়াছিল যে, সহোদরকে যৎপরোনাস্তি ভৎসনা করিব ; কেননা, লঙ্কাধিপতির ক্রোধানল প্রজ্বলিত করিতে না পারিলে, আমার অভীষ্ট সিদ্ধ হইবে না। এক মাত্র নিন্দাই ক্রোধের উদ্দীপক। এই যুক্তি স্থির করিয়া

শূর্ণপথা রাজ্য সভায় প্রবিষ্ট হইল, এবং কর্কশ বচনে মহোদরকে বলিল, যে রাজা দিন যামিনী স্ত্রীমণ্ডলী মধ্যে বাস করে, অচির কাল মধ্যেই সে রাজ্য ত্রুষ্ট হয় । লঙ্কাধিপতিরও তাহাই ঘটিতেছে । আমাদিগের অধিকৃত স্থান কি না দুই জন সামান্য মনুষ্যে আসিয়া অধিকার করিয়া লইল ! কামুকের আবার রাজ্য কেন ? যে দিন যামিনী স্ত্রী সেবায় অহুরক্ত, কোন্ কালে তাহার সম্মান রক্ষা হয় ? ভাতঃ, তুমি ঘরে বসিয়া আপনাকে বড় দেখিতেছ, আর মন্দোদরীর দাসত্ব করিতেছ । যাহারা রাবণের ভগিনীর নাসা কর্ণ ছেদন করিল, এখনও তাহারা জীবিত আছে, এই আশ্চর্য্য ! ভগিনীর এই সকল কটুক্তি শুনিয়া রক্ষঃ-কুলপতি আরক্ত নয়নে কহিলেন, তুই আমার সম্মুখে দাঁড়াইয়া যে সকল কটু বাক্য বলিতেছিস, কেবল মহোদরা বলিয়াই তাহা সহ্য করিলাম, নতুবা এক্ষণেই তোঁর শিরশ্ছেদন করিয়া ফেলিতাম । আমি কি রাজ্য শাসনে অক্ষম ? শীঘ্র বল, কে আমার অধিকৃত স্থানে উপদ্রব করিতেছে ? কে তোঁর নাসা কর্ণ ছেদন করিয়াছে ? যদি এই দণ্ডে তাহার সমুচিত শাস্তি বিধান করিতে না পারি, তাহা হইলে, আমাকে যেন আর কেহ বিশ্ব-বিজয়ী বলিয়া সম্বোধন না করে । মহোদরের ক্রোধ উদ্দীপ্ত হইয়াছে দেখিয়া শূর্ণপথা সমস্ত ঘটনা বর্ণনা করিল । রাবণ শুনিয়া তৎক্ষণাৎ সীতাহরণে বহির্গত হইলেন ।

এ সম্বন্ধে আর পৌরাণিক দৃষ্টান্তের প্রয়োজন নাই । বর্তমান সময়ে পদে পদে দেখিতে পাওয়া যাইতেছে, কেবল এক নিন্দার ভয়ে অনেক অজ্ঞ লোক আপনার ক্ষমতার অতিরিক্ত কার্য্য করিয়া মনের শান্তি ভঙ্গ করে । কেহ কেহ বা কেবল

আপনার স্তুতিবাদ শুনিবার জন্য অকাতরে অর্থ ব্যয় করিয়া থাকে । এই রূপ লোককে সাধারণ কথায় ‘নাম পাগলা’ বলে । ‘নাম পাগলা’ লোকের অগ্র পশ্চাৎ জ্ঞান নাই, হিত-হিত জ্ঞান নাই, ও কর্তব্যাকর্তব্য জ্ঞান নাই । আমাকে কিসে লোকে পুণ্যাত্মা বলিবে, কিসে লোকে দাতা বলিবে, “কিসে লোকে ধনাঢ্য বলিবে, সৰ্ব্বদা এই চিন্তাতেই নিমগ্ন থাকে, এবং নাম কিনিবার অনুরোধে আপনার ধনও নষ্ট করে । ধন ক্ষয়ে এবং বিরোধে যে রূপ মনের শান্তি ভঙ্গ হয়, একরূপ আর কিছুতেই হয় না । তবেই স্তুতি ও নিন্দার মধ্যে একটিতে ধন ক্ষয় ও অপরটিতে মনের গ্লানি আনিয়া উপরিস্থত করে । যে স্তুতি ও নিন্দা সমান জ্ঞান করিবার মানসে জ্ঞানবান্ ব্যক্তিরা সমূহ চেষ্টা করিয়া থাকেন, ভিক্ষুকেরা তাহা অনেকাংশে অনায়াসে শিক্ষা করে । যাচকদিগকে আমরা যত কেন নিন্দা করি না, কিছুতেই তাহাদের মনের গ্লানি হয় না, মনোমধ্যে কিছু মাত্র ক্রোধ জন্মে না, সেই সকল কটুক্তি অনায়াসে সহ্য করিয়া তাহারা আপন অভীষ্ট সিদ্ধির জন্য দাঁড়াইয়া থাকে । যদি শত সহস্র কটু বাক্য বলিয়া অবশেষে তাহাদিগের অভীষ্ট পূর্ণ হয়, তাহা হইলে, ভিক্ষুকের আর আনন্দের পরিসীমা থাকে না । পাঠক, আপনি যদি সেই ভিক্ষুককে যথোচিত স্তব স্তুতি করিয়া রিক্ত হস্তে বিদায় করিতে চাহেন, তাহা হইলে, সে স্তুতিতে তাহাদিগের মনের প্রফুল্লতা জন্মে না ; তবেই নিন্দা ও স্তুতি তৎ কালে তাহাদের পক্ষে সমান হয় ।

এক জন চতুর ব্যক্তি বলিয়াছিলেন, যে সকল লোক স্তবে তুষ্ট হয়, কিম্বা নিন্দাবাদ শুনিয়া ক্রুদ্ধ হইয়া উঠে, একরূপ লোক যদি

মহাধনবান্ হয়, তাহা হইলে, তাহাকে অল্প কালের মধ্যে দরিদ্র করিয়া দিতে পারি । যে ব্যক্তি ব্যঙ্গ স্তুতি শুনিলে বিরক্ত হয় না, তাহাকে অজ্ঞায়াসে চতুরেরা নষ্ট করিতে পারে । স্তুতি ও নিন্দা সুহৃদ্ভেদের এক অমোঘ অস্ত্র স্বরূপ । বিষ্ণুশৰ্ম্মার হিতোপদেশে তাহা পদে পদে প্রকাশ পাইয়াছে । কিন্তু যাহা-দিগের ধৈর্য্য, বীর্য্য, গাম্ভীৰ্য্য ও সত্যের দিকে দৃষ্টি আছে, তাঁহার স্তুতি বাক্য শুনিয়া মনকে উল্লাসিত করেন না এবং কটু কথা বা নিন্দাবাদ শ্রবণে সহসা কুপিত হইয়া উঠেন না । রামচন্দ্র ভরতের স্তুতি বাক্যে পিতৃসত্য প্রতিপালনে পরাঙ্মুখ হন নাই ও বালি রাজার মৰ্ম্মভেদী কটু কথা অনায়াসে সহ্য করিয়া তাঁহাকে চরম চিন্তায় মনোনিবেশ করিতে পদে পদে উপদেশ দিয়াছিলেন । কটু বাক্য সহ্য করিতে অক্ষম বলিয়াই কুরুপতি দুৰ্য্যোধন একাকী ভীমসেনের সহিত সম্মুখ সংগ্রামে প্রবৃত্ত হইয়াছিলেন । দুৰ্য্যোধন যখন কুরুক্ষেত্র সমরে সৰ্ব্বতোভাবে পরাস্ত হইয়া দ্বৈপায়ন ব্রহ্মে আত্ম গোপন করিয়াছিলেন, যুধিষ্ঠির চর মুখে সেই সম্বাদ প্রাপ্ত হইয়া সসৈন্যে ব্রহ্মের তীরে উপস্থিত হইলেন ; কিন্তু দুৰ্য্যোধনের কোন চিহ্নই দেখিতে পাইলেন না । অবশেষে তিনি হতাশ হইয়া মন্ত্রী চূড়ামণি শ্রীকৃষ্ণকে জিজ্ঞাসা করিলেন, হে কৃষ্ণ ! তুমি দুৰ্য্যোধনের সহিত সাক্ষাৎ লাভ যে কঠিন হইয়া উঠিল । সে এই গভীর ব্রহ্মের যে কোথায় রহিয়াছে, তাহার কোন চিহ্নই লক্ষ্য হইতেছে না । শ্রীকৃষ্ণ কহিলেন, চিন্তিত হইবেন না, ইহার সন্ধান করিতেছি । আপনি এই ব্রহ্মের তীরে দাঁড়াইয়া উচ্চস্বরে দুৰ্য্যোধনকে গালি দিতে আরম্ভ করুন, তাহা হইলে, অক্লেশে তাহার সাক্ষাৎ পাই-

বেন । শ্রীকৃষ্ণের উপদেশানুসারে ধর্মপুত্র যুধিষ্ঠির ত্রয়ো-
ধনকে ভৎসনার সহিত এই রূপ নিন্দা কুরিতে ও কটু বাক্য
বলিতে লাগিলেন ;—

“এত শুনি যুধিষ্ঠির বলিল রাজাকে,—
‘জলের ভিতর কেন আছ মায়া পাকে ?
ভ্রাতৃ বন্ধু আত্মীয়েরে মারিয়া পামর,
আপনার প্রাণ লাগি হইলে কাতর !
উঠ উঠ নরাদম দুষ্ট কুরুবর,
ভয় পরিহারি কর আসিয়া সমর ।
নিজ বাহু বলে তুমি শাসিলে সংসার,
এক্ষণে হইলে কেন কুলের অঙ্গার ?
আপনি পণ্ডিত বট জান ধর্মাদর্ম,
ভূপতির যোগ্য নহে পলায়ন কর্ম ।
সমর সাগর যেই নাহি হয় পার,
মনে ভাবি দেখ তার জীবন অসার ।
ইষ্ট বন্ধু সখা আর সখ্যকী মাতুল,
সবারে মারিয়া তুমি করিলে নির্মূল ;
মরিয়াছে মহাযোদ্ধা উনশত ভাই,
কেমনে জীবন আশা কর মম ঠাঁই ?
হইলে যে ধর্ম ছাড়ি অধর্ম আচারী,
প্রাণ লয়ে লুকাইলে রণ পরিহারি ?
কর্ণ শকুনির যত শুনিলে বচন,
তার ফল ভুঞ্জ এবে পাপী ত্রয়োদন ।’

এতেক কটুক্তি যদি করিলেন ধর্ম্য,
 শুনি কোপে জ্বলিলেক দুর্ঘোষন মর্ম্ম :—
 ‘বিক্‌মম বীরত্বে অসার ভুজ ভার,
 হেন নিন্দা বাক্যণ সহে না আমার !’
 ঘন শ্বাস ছাড়িয়া বলিল ক্রোধ মনে,
 ‘নিষ্পাপুবা পৃথিবী করিব আজি রণে ।
 শুন যুধিষ্ঠির তুমি সৈন্যেতে বেষ্টিত,
 একেশ্বর আছি আমি পদাতি রহিত ।
 একাকী করিব রণ শুন ধর্ম্মরায়,
 অনিয়ম সমর করিলে পাপ ভায় ।’
 স্মরণ সাজোয়া বীর হৃদয়েতে ধরি,
 দীপ্তিমান্ কুরুবর যেন হেম গিরি ।
 ভুজবলে বিদারিয়া জল গুণনিধি,
 উঠিল মৈনাক যেন হ’তে জলনিধি ।”

দুর্ঘোষন যে ভাবে দ্বৈপায়ন ব্রহ্মে অবস্থিতি করিতেছিলেন, যুধি-
 ষ্ঠির বহু দিন অনুসন্ধান করিলেও তাহা জানিতে পারিতেন
 না ; কিন্তু কর্কশ বাক্য মহামানী দুর্ঘোষনের পক্ষে অসহ্য হই-
 য়াছিল বলিয়াই তিনি আপনা হইতে প্রবল শত্রুর সম্মুখে আসিয়া
 উপস্থিত হইয়াছিলেন । বরং মৃত্যু হয়, হইবে, তথাচ দুর্সাক্য
 সহ্য করিতে পারিব না, এই ভাবিয়া দুর্ঘোষন শত্রুগণের সহিত
 একাকী যুদ্ধে প্রবৃত্ত হইয়াছিলেন । পক্ষান্তরে, দ্রুত ক্রীড়ার
 সময় দুঃশাসন ও কর্ণ ধর্ম্মাত্মা যুধিষ্ঠিরকে যেকপ বিক্রপ
 করিয়াছিল, এক জন হীন বল ব্যক্তিও তাহা সহ্য করিতে পারে
 না । যুধিষ্ঠির এক বার মাত্র ইঙ্গিত করিলেই, ভীম ও ধনঞ্জয়

সেই ক্ষণেই কুব্জ সভার সমস্ত জনগণকে অতি অল্প কালের মধ্যে নিপাত করিয়া ফেলিতেন ; কিন্তু একপক্ষ ক্ষমতা স্বত্বেও যুধিষ্ঠির অসময় জানিয়া ধৈর্যের সহিত জ্ঞাতির দুর্সাক্য সহ্য করিয়াছিলেন । সেই জন্যই তিনি চরমে পুনর্বার হস্তিনার সিংহাসন লাভ করেন । চুর্যোধন সর্বতোভাবে হীনবীৰ্য্য হইয়াও দান্তিক স্বভাব বশতঃ জ্ঞাতির দুর্সাক্য সহ্য করিতে পারিলেন না বলিয়াই অবশেষে ভীমের পদাঘাত পর্য্যন্ত সহ্য করিয়া মৃত্যু মুখে নিপতিত হইলেন ।

ইহা দ্বারা স্পষ্ট প্রমাণ হইতেছে যে, মনুষ্য মাত্রেরই স্তুতি ও নিন্দা সমান জ্ঞান করা উচিত । স্তুতি বাক্যে সম্ভূষ্ট হওয়া ও নিন্দাবাদে উগ্র মূর্ত্তি ধারণ করায় বিশেষ অনিষ্ট ঘটিয়া থাকে । নির্দোষ ব্যক্তির সময় একটি সামান্য কথা সহ্য করে না, কিন্তু অসময়ে তাহাদিগকেই তাহা অপেক্ষা শত গুণ অপমান সহ্য করিতে দেখা যায় । চাটুকারের অযথা স্তবে কণ পাতি করিয়া মনুষ্যের কথা দূরে থাকুক, দেবতারও সময়ে সময়ে অসহ্য কষ্ট ভোগ করিয়াছেন । অশুরেরা অন্তরের সহিত তপস্বী করিতে প্রবৃত্ত হইত না, কেবল আপন আপন অভীষ্ট সিদ্ধির জন্যই প্রধান প্রধান দেবগণকে স্তুতি করিত । দেবতারও সেই কপটদিগের কপটতার মুখে হইয়া দুর্ভাগ্যগণকে মনোমত বর প্রদান করিতেন ; তাহার পর সেই অশুরগণেরই দৌরাত্ম্যে আপনার স্থান ছাড়িয়া পলাহবার পথ পাইতেন না । এক্ষণে বিপুল ধনের অধীশ্বরগণকেই দেবতার স্থায় ধরলাম । তাহার প্রভাবকগণের অযথা স্তুতি বাক্যে মুগ্ধ হইয়া অনেক সময়ে সেই নরপ্রভগণের দ্বারা সর্বস্বান্ত হইয়া-

ছেন। চাটুকারেরা সময় বুঝিয়া ধনবান্গণকে কৌশলে নিন্দা ও স্তব করে, যিনি সেই সকল কথায় কর্ণ পাত করিয়া কষ্ট বা তুষ্ঠ হন, পদে পদে তাঁহাদিগের মনের শান্তি ভঙ্গ হইয়া থাকে। প্রশংসা লাভের জন্য সংকার্য্য ও নিন্দাবাদ শুনিয়া কলহে প্রবৃত্ত হওয়া দুইই সমান; অতএব যদি শান্তি স্মৃখ সম্ভোগের অভিলাষ থাকে, তাহা হইলে, স্তুতি ও নিন্দা সমান জ্ঞান কর। মনের শান্তি থাকিলে, বিবেক ও বৈরাগ্য আপনি আসিয়া উপস্থিত হইবেক।

সংসারবাসী জনগণ যাহা দুষ্প্ৰাপ্য তাহাই অধিক মূল্যবান্ বলিয়া জ্ঞান করে। মৃত্তিকা ব্যতিরেকে আমাদিগের মুহূর্ত্ত কাল চলে না। মাতৃগর্ভ হইতে এই মৃত্তিকাতেই নিপতিত হইয়াছি। যখন অক্ষম ছিলাম, তখন জড়ের ন্যায় মৃত্তিকাতেই পড়িয়া থাকিতাম। মৃত্তিকাই আমাদিগের শরীর পোষণ করিতেছে। সেই মৃত্তিকা আমরা দুই পদে দলন করিয়া থাকি। এই সংসারে মৃত্তিকারূপে নিতান্ত প্রয়োজন, তাহা এক বারও ভাবিয়া দেখি না। জল, বায়ু, অগ্নির প্রতিও আমরা মৃত্তিকার ন্যায় অনাস্থা প্রকাশ করিয়া থাকি। যে সকল পদার্থ লইয়া আমাদিগের দেহ, যাহা না হইলে, আমরা কণ কাল প্রাণ ধারণ করিতে পারি না, প্রায় সেই সকল বস্তুর প্রতিই সর্বদা অনাদর করিয়া থাকি। শরীর ধারণ পক্ষে যে সকল জব্যের কিছু মাত্র প্রয়োজন নাই, তাহাই আমাদিগের আদরের ধন। যিনি অঙ্গরীয়কে সংলগ্ন করিয়া এক টুকরা হীরক অঙ্গুলিতে ধারণ করিতে পারেন, তাঁহার আর অহঙ্কারের পরিসীমা থাকে না। এক অহঙ্কার ব্যতিরেকে হীরক আর আমাদিগকে কি দিতে পারে? প্রয়োজনের মধ্যে

হীরার ধারে কাচ কাটা যায় এই মাত্র। এই নিষ্প্রয়োজন দ্রব্যের জন্য কত শত লোক লালায়িত হইতেছে, তাহার ইয়ত্তা নাই। হীরক খনির মধ্যে জন্মিয়া থাকে; সেই হীরকের অল্প-সম্বন্ধে শত সহস্র লোক দিন যামিনী উৎকট পরিশ্রম করিতেছে। হীরক মৃত্তিকা সম্ভূত, তণ্ডুলও মৃত্তিকা সম্ভূত। তণ্ডুল ভক্ষণে জীবন ধারণ হয়; কিন্তু হীরক মুখে রাখিলে মৃত্যু পর্য্যন্ত ঘটিয়া থাকে। যে দ্রব্য অনায়াসে আমাদিগের প্রাণ নষ্ট করিতে পারে, আমরা তাহাই যত্ন সহকারে হৃদয়ে ধারণ করি।

হীরক দ্বারা কাচ কর্তন হইয়া থাকে। হীরকের ধার ব্যতিরেকে আর কোন অস্ত্রেই সহজে কাচ কাটা যায় না। তবেই সংসারে হীরক দ্বারা একটা উপকার সাধিত হইতেছে; কিন্তু মুক্তা দ্বারা কি উপকার সাধিত হয়? কি জন্যই বা অগাধ জলধি হইতে প্রাণের আশা পরিত্যাগ করিয়া মানবগণ মুক্তা পাইবার আশায় শুক্তি তুলিতে যায়? শুনিয়াছি যে, পূর্ব কালে মুসলমান বাদশাহগণ মুক্তা ভক্ষ্য করিয়া চূণ প্রস্তুত করিয়া সেই চূণ দিয়া তাম্বুল ভক্ষণ করিতেন। যদি চূণের জন্যই মুক্তার প্রয়োজন হয়, তাহা হইলে, সে কার্য্য সামান্য প্রস্তর খণ্ডের দ্বারা সম্পন্ন হইতে পারিত, মুক্তা ভক্ষ্য দ্বারা চূণ প্রস্তুত করার কিছু মাত্র প্রয়োজন ছিল না; তথাচ যে মুসলমান বাদশাহগণ প্রস্তরের চূণ পরিত্যাগ করিয়া মুক্তার চূণ ব্যবহার করিতেন, সে কেবল তাঁহাদিগের অহঙ্কার মাত্র। বৈদ্যক গ্রন্থের মতে কোন কোন ঔষধ প্রস্তুত করণ কালে মুক্তা ভক্ষ্মের প্রয়োজন হয়; একপ স্থলে হীরক অপেক্ষা মুক্তার প্রয়োজন অধিক বলিয়া ধরিতে হইবে। কিন্তু কেবল এক ঔষ-

ধের জন্ম কি বৎসর বৎসর সহস্র সহস্র লোক পারস্য উপ-
 সাগরে ও সিংহল দ্বীপের নিকটস্থ নির্দিষ্ট স্থানে মুক্তা তুলিতে
 যায় ? না, তাহা নহে । ঔষধের উপযুক্ত মুক্তা জনপদের
 কোন কোন অকৃত্রিম জলাশয়েও জন্মিয়া থাকে । বিশেষতঃ,
 মুক্তা ভস্ম ও স্বর্ণ ভস্ম যে সকল ঔষধে ব্যবহার হইয়া থাকে,
 তাহা সাধারণের জন্ম নহে । যাঁহারা মুক্তার চূর্ণ সংযোগে
 তাবুল ভক্ষণ করিয়া থাকেন, স্বর্ণ ও মুক্তার ঔষধ তাঁহাদিগেরই
 জন্ম প্রস্তুত হইয়া থাকে ; কারণ অধিক মূল্যবান্ না হইলে,
 ধনবান্ লোকের কোন পদার্থই মনোনীত হয় না । ধনাঢ্য
 লোকের চক্ষু থাকিতে চক্ষু নাই । যাঁহার অধিক মূল্য তাঁহারা
 তাহাকেই সারবান্ বলিয়া জ্ঞান করেন । এই জন্ম নির্ধন ও
 ধনী এই দুই সম্প্রদায়ের মধ্যে সকল বিষয়েই তারতম্য দৃষ্ট হয় ।
 কদলী পত্রে অন্নাহার করিলেও চলিতে পারে, কিন্তু ধনীরা
 তদ্বিনিময়ে স্বর্ণ ও রৌপ্য পাত্র ব্যবহার করিয়া থাকেন । অল্প
 মূল্যের শীতবস্ত্রে শীত নিবারণ হয়, কিন্তু ধনীদিগের শীত বস্ত্রের
 মূল্য অধিক হইয়া থাকে । এক পয়সা মূল্যের এক পাঁচ পাঁচনে
 নির্ধনের যে রোগ আরোগ্য হয়, ধনীর সেই রোগ দুই সহস্র
 মুদ্রা ব্যয়েও আরোগ্য হয় না । যদি কোন কথ ধনীর গৃহে
 এক জন স্নযোগ্য কবিরাজ উপস্থিত হইয়া তাঁহার প্রকৃত
 রোগের ঔষধের মূল্য অবধারিত করেন, তাহা হইলে, সেই
 কবিরাজকে হাশ্বাস্পদ হইয়া ফিরিয়া আসিতে হয় । নবাব
 আলিবর্দী খাঁ ঘোটকারোহণে নগর ভ্রমণ করিতে অভ্যস্ত ভাল
 বাসিতেন । তিনি এক দিন তাঁহার মন্ত্রীকে জিজ্ঞাসা করি-
 লেন যে, এমন কোন মাদক দ্রব্য আছে, যাঁহা সেবন গাত্রেই

আমার মনের বিলক্ষণ প্রফুল্লতা জন্মে ? যদি থাকে, তাহা হইলে, আমি অশ্ব পৃষ্ঠে আরোহণ করিবার পূর্বে প্রত্যহ সেই মাদক দ্রব্য সেবন করিব। মন্ত্রী কহিলেন, জাঁহাপনা, আমি কল্য ইহার ব্যবস্থা করিয়া দিব। পর দিন প্রত্যুষে মন্ত্রী এক কলিকা গাঁজা প্রস্তুত করিয়া স্বয়ং সিংহদ্বারে উপস্থিত রহিলেন। নবাব সাহেব অশ্বারোহণে বায়ু সেবনার্থে বহির্গত হইতেছেন, এমন সময়ে মন্ত্রী কহিলেন, জাঁহাপনা, গত কল্য যে রূপ মাদক সেবনের অভিলাষ প্রকাশ করিয়াছিলেন, তাহা প্রস্তুত করিয়া রাখিয়াছি। নবাব আগ্রহের সহিত মন্ত্রীর হস্ত হইতে গাঁজার ছুঁকী লইয়া তাহার ধূম পান করিলেন, ও মস্তক সঞ্চালনের দ্বারা কহিলেন, ইহা বড় চমৎকার দ্রব্য। তৎপরে মূল্যের কথা জিজ্ঞাসা করিতে মন্ত্রী কহিলেন, ইহার মূল্য ষৎসামান্য, অর্দ্ধ পয়সা মাত্র। অর্দ্ধ পয়সার কথা শ্রবণ মাত্রেই নবাব সাহেব হাস্য করিয়া কহিলেন, তবে আমি একপ ষৎসামান্য মূল্যের মাদক দ্রব্য কি করিয়া খাইব ? স্বার্থপর মন্ত্রী হইলে, এক ছিলিম গাঁজা খাওয়াইয়া নবাব সাহেবের নিকট সহস্র মুদ্রা গ্রহণ করিতে পারিতেন, এবং তাহা হইলে, নবাব সাহেবেরও গাঁজার প্রতি শ্রদ্ধা হইত। এই রূপে বড় মানুষে সকল বিষয়েরই মূল্য বৃদ্ধি করিয়া দেন। যাহা বড় মানুষে চাহেন, তাহারই মূল্য অধিক ; সেই কারণেই হীরক ও মুক্তার মূল্য বৃদ্ধি হইয়াছে। যদি বড় মানুষে ব্যবহার না করিতেন, তাহা হইলে, কোন কালেই হীরা মুক্তার এত আদর হইত না, এবং বই কণ্ঠে কেহ তাহা সংগ্রহ করিতেও যাইত না।

জ্ঞানবান্ লোকেরা আমার বস্তুর কোন্ কালে আদর করি-

যাচ্ছেন ? যাহা ব্যতীত জীবন ধারণ হয় না, যাহা ব্যতীত
 জ্ঞানের উন্নতি হয় না, যাহা ব্যতীত ঈশ্বর আরাধনা হয় না,
 তাহাই তাঁহাদিগের নিকট মূল্যবান্ । এক জন রাজা দৈবাৎ
 কোন তপস্বীর কুটীরে উপস্থিত হইয়াছিলেন । তিনি তাপসের
 ধর্মনিষ্ঠা ও ঈশ্বরের প্রতি প্রগাঢ় ভক্তি দেখিয়া, সবিনয়ে কহি-
 লেন, তপোধন, আপনার ঈশ্বর ভক্তি দেখিয়া আমি যৎপরো-
 নাস্তি পরিতুষ্ট হইয়াছি ; এক্ষণে আপনাকে আমার একটি অভি-
 লাষ পূর্ণ করিতে হইবে । আপনার গলদেশে যে বৃহৎ বৃহৎ
 কদ্রাক্ষের মালা রহিয়াছে, তাহার বিনিময়ে আপনি এক গাছি
 মুক্তার মালা পরিধান ককন, এবং আপনার কমণ্ডলুটি স্বর্ণে
 মণ্ডিত করাইয়া লউন । রাজার প্রস্তাব শুনিয়া তপোধন হাস্য
 করিয়া কহিলেন, রাজন্, আমি এমন কি অপরাধ করিয়াছি যে,
 আপনি আমাকে তস্কর দ্বারা বিনষ্ট করাইবার প্রয়াস পাই-
 তেছেন ? মুক্তার মালা তাপসের কণ্ঠ ভূষণ নহে ও স্বর্ণ পাত্রও
 তাপসের জল পাত্রের যোগ্য নহে ; কেননা, মণি মাণিক্য
 অহঙ্কারের উদ্দীপক । আমি যদি অদ্য একটি উত্তম শয্যা
 শয়ন করি, তাহা হইলে, কল্য আর যুগ চর্ম্মে শয়ন করিতে ইচ্ছা
 হইবেক না ; অদ্য যদি স্বর্ণ পাত্রে জল পান করি, তাহা হইলে,
 কল্য অলাবু পাত্রে জল পান করিতে যুগা বোধ হইবে ।
 আপনি যদি আমাকে এক গাছি মুক্তার মালা পারিতোষিক স্বরূপ
 প্রদান করিয়া যান, তাহা হইলে, তাহাতে কেবল আমার
 অহঙ্কার হইবে । বহু কষ্টে অহঙ্কার ও ঈর্ষার হস্ত হইতে
 নিস্তার লাভ করিয়াছি, এক একটি বিলাস পরিত্যাগ করিতে
 এক একটি বৎসর গিয়াছে । গুরু গৃহে বহু কাল যোগ শিক্ষা

করিয়াছিলাম; কিন্তু পুস্তক পাঠে কিছু মাত্র ফল দর্শে নাই। ভাহার পর এই বিপিন মধ্যে যোগাসন করিয়া ইন্দ্রিয়গণের যথোচিত নিগ্রহ করিতে আরম্ভ করায়, তাহার একে একে আমার বশে আসিয়াছে। আমার এক্ষণে কেবল ভগুবানের চরণ ব্যতিরেকে আর সমস্ত পদার্থই অকিঞ্চিৎকর বলিয়া বোধ হয়। আপনি যে মুক্তার মালার প্রলোভন দেখাইতেছেন, আমি তাহা শুদ্ধ হরীতকী অপেক্ষাও হেয় জ্ঞান করি; কেননা, আমার শুদ্ধ হরীতকীর যে শক্তি আছে, আপনার বহু মূল্যের মুক্তার মালার সে শক্তি নাই। হরীতকী ভক্ষণে জুই এক দিবস প্রাণ ধারণ হইতে পারে, আপনার মুক্তার মালা গ্রহণ করিলে, অদ্যই ভক্ষরেরা আমার প্রাণ বিনষ্ট করিয়া যাইবে। রাজন, ঐশ্বর্য্যই সমস্ত অনিষ্টের মূল; এই জন্মই জ্ঞানবান্ লোকেরা ঐশ্বর্য্যের দাস হইতে চাহেন না। সংসারে কেহ কাহারও শত্রু নহে, কেবল এক ঐশ্বর্য্যই ধনাঢ্য লোকের শত্রু সংগ্রহ করিয়া দেয়। আপনি যদি কোপীন ধারণ করিয়া অরণ্য মধ্যে পরিভ্রমণ করেন, তাহা হইলে, কেহই আপনার প্রতি তীক্ষ্ণ দৃষ্টিক্ষেপ করিবে না, কিন্তু এই রাজপরিচ্ছদ ধারণ করিয়া আপনি ভক্ষর পরিপূরিত বিপিনে পরিভ্রমণ করিলে, অচিরে প্রাণে বিনষ্ট হইবেনই হইবেন। ধনে কত দূর শান্তি ভঙ্গ হয় ও ধনের অভাবে কি কপ দিব্য জ্ঞান হয়, তাহার একটি আখ্যানিকা বলিতেছি, শ্রবণ করুন;—

এক ব্যক্তি বহু কষ্টে শত মুদ্রা সঞ্চয় করিয়াছিল। মুদ্রা-গুলি গণনা করিবার সময় ক্ষণ কালের জন্য তাহার মন প্রফুল্ল হইয়া উঠিল, এবং মনে করিল, আমি এক শত টাকা সংগ্রহ

বিবেক ও বৈরাগ্য

করিয়াই এত দূর আনন্দ অনুভব করিতেছি, কিন্তু যাহা আমার
সহস্র মুদ্রা আছে, তাহার কত দূর আনন্দ ভোগ করে, আমি
এক বার দেখিতে হইবে। এই রূপ চিন্তা করিতে করিতে সেই
ব্যক্তির মনে সহসা ভয় আসিয়া উপস্থিত হইল। ভাবিল,
আমি সহস্র মুদ্রার চিন্তা করিতেছি কি, এই শত মুদ্রাই রক্ষা
করা আমার পক্ষে ভার হইয়া উঠিবে; কেননা, আমার লোক বল
নাই, শরীরও তাদৃশ বলিষ্ঠ নহে। যদি তৎকরেরা ইহার
বিন্দু বিসর্গ জানিতে পারে, তাহা হইলে, আমার এই বহু কষ্টের
সঞ্চিত ধন বল পূর্বক কাড়িয়া লইয়া যাইবে। এই টাকা
গুলি এক জন বিশ্বস্ত লোকের বাটিতে রাখিয়া আসি; কারণ
এই ভগ্ন কুটীরে এত টাকা রাখা কোন ক্রমেই যুক্তি সিদ্ধ নহে।
এই রূপ ভাবিয়া সে তৎক্ষণাৎ পল্লীস্থ কোন বিশ্বস্ত লোকের
বাটিতে টাকাগুলি রাখিয়া আসিল; কিন্তু কুটীরে পুনঃ
প্রবেশ করিবা মাত্রই তাহার মনঃ প্রাণ ব্যাকুল হইয়া উ-
ঠিল। ভাবিল, কি করিলাম! আপনার বুদ্ধির দোষে সর্বনাশ
করিলাম! এত কষ্টের টাকা এক জনকে হাতে তুলিয়া দিয়া
আসিলাম! যদি সে বলে, আমার কাছে রাখিয়া যাও নাই,
তাহা হইলে, আমি তাহার কি করিতে পারিব? এই রূপ প্রতি-
কূল চিন্তায় মগ্ন হইয়া সে ব্যক্তি সমস্ত রজনীর মধ্যে এক বারও
নিদ্রা যাইতে পারিল না। প্রত্যুষে উঠিয়া সেই প্রতিবেশীর নিকটে
গিয়া কহিল, মহাশয়, আমার টাকা গুলি দিন; এই টাকায়
আমি এক খণ্ড ভূমি ক্রয় করিব। প্রতিবেশী তৎক্ষণাৎ
টাকাগুলি আনিয়া দিলেন। উহা পুনঃ প্রাপ্ত হইবা মাত্রই
সে একেবারে আফ্লাদে উন্নত হইয়া উঠিল; কিন্তু সে

আজ্ঞাদও ক্ষণ কালের মধ্যে তিরোহিত হইয়া গেল। পুনর্বার ভয় আসিয়া উপস্থিত হওয়াতে ভাবিল, প্রতিবেশীর নিকট টাকাগুলি রাখা নিতান্তই নিরক্ষোণের কার্য্য হইয়াছিল, আমার এতগুলি টাকা হইয়াছে, এ কথা ত কেহই জানিত না ; প্রতিবেশী কি পাঁচ জনের নিকট গল্প করিতে ক্ষান্ত হইবে? এখন যদি নগদ টাকা না রাখিয়া এই টাকায় ধান্য ক্রয় করিয়া রাখি, তাহা হইলে, হঠাৎ চোরে লইয়া যাইতে পারিবে না।

পর দিন সে শত মুদ্রার ধান্য ক্রয় করিয়া একটি মরাই বাঁধিয়া রাখিল ; কিন্তু ধান্য ক্রয় অবধি পূর্ক্সাপেক্ষা তাহার মন আরও চঞ্চল হইয়া উঠিল, প্রায় সমস্ত রাত্রি এক গাছি যষ্টি হস্তে করিয়া কুটীরের বহির্ভাগে বসিয়া থাকিত। প্রতিবেশীরা গৃহে অগ্নি জ্বালিলেই সে অকারণ তাহাদিগের সহিত বাধিতগু উপস্থিত করিত। প্রতিক্ষণ সে ভাবিত, যেন পল্লীতে আগুন লাগিয়াছে। এই রূপে হৃদয় মধ্যে অগ্নিভয় উপস্থিত হওয়ায়, সে মনে মনে ভাবিল, ধান্যের মরাই আর রাখিব না ; কোন্ দিন একেবারে হৃত সর্বস্ব হইয়া যাইব? ধান্য বিক্রয় করিয়া গুটি কড়ক দুগ্ধবতী গাভী ক্রয় করি ; তাহা হইলে, টাকাকে টাকা বজায় থাকিবে, এবং দুগ্ধ বিক্রয় করিয়া আরও দশ টাকা লাভের সম্ভাবনা হইবে। এই ভাবিয়া সে ধান্য বিক্রয় করিয়া পর দিনেই চারিটি দুগ্ধবতী গাভী ক্রয় করিল। গাভী কয়েকটি গৃহে আনিয়া ভাবিল, যদি ইহার একটি মরিয়া যায়, তাহা হইলেই সর্বনাশ!—না, গাভী ক্রয় করিয়া ভাল কাজ করিলাম না। এমন কোন দ্রব্য ক্রয় করিয়া রাখি, যাহার উপর চৌর্য্য ভয়, অগ্নিভয় প্রভৃতি কোন ভয়েরই সম্ভাবনা নাই। পর দিন সে

চারিটি গাভী বিক্রয় করিয়া ফেলিল, ও টাকাগুলি পুনরায় একটি পোঁটলা বাঁধিয়া ধাত্তোর জালার ভিতর লুকাইয়া রাখিল, এবং প্রতি রজনীতে উঠিয়া দুই চারি বার জালার গায়ে হাত বুলাইতে লাগিল। যে দিন অবধি তাহার হস্তে এক শত টাকা আসিয়াছে, সেই দিন হইতে সে আর কুটীর পরিত্যাগ করিয়া স্নান করিতেও যায় না। তাহার মূতন ভাব দেখিয়া প্রতিবেশীরা আশ্চর্য্য হইল। এক দিন কয়েক জন লোক একত্র হইয়া বলাবলি করিল যে, নিধিরাম আর কুটীরের বাহির হয় না কেন? পূর্বে ত লোকের বাড়ীতে ভাত চাহিয়া খাইত। গৃহস্থদিগের গৃহে কোন সমারোহের কাজ কর্ম্ম হইলে, নিধিরাম পরম আত্মাদের সহিত তাহাতে আসিয়া যোগ দিত। পূর্বে সন্ধ্যার সময় কুটীরের দ্বারে বসিয়া মনের আনন্দে রামপ্রসাদী গীত গাহিত; কিন্তু এক্ষণে কেহ ডাকিলেও কথা কয় না; সর্বদা চিন্তাযুক্ত হইয়া কুটীরের দ্বারে বসিয়া থাকে। সদানন্দ নিধিরাম এই রূপ নিরানন্দ হইয়াছে কেন, ইহার কারণ অনুসন্ধান করিতেই হইবে।

ক্রমে নিধিরামের টাকার কথা প্রতিবেশীরা সকলেই জানিতে পারিল। কয়েক জন চতুর প্রতিবেশী এক দিন পরামর্শ করিল যে, অন্য রজনীতে আমরা নিধিরামের টাকাগুলি হরণ করিয়া লইয়া আসিব। দেখি, নিধিরাম টাকার শোকে কি করে? যদি টাকার শোকে সে মর মর হইয়া পড়ে, তাহা হইলে, সেই সময় উহাকে টাকাগুলি প্রত্যর্পণ করিয়া উহার প্রাণ রক্ষা করিব। দিনের বেলায় এই পরামর্শ স্থির হইয়া রহিল, রজনীতে কয়েক জন বলবান্ যুবা বল পূর্ব্বক নিধি-

রামের টাকা কাড়িয়া লইয়া প্রস্থান করিল। নিধিরাম টাকার শোকে সমস্ত রজনী যতবৎ কুটীরে পড়িয়া রহিল। প্রত্যুষে উঠিয়া ভাবিল, আর এখানে থাকিয়া কি করিব ? যে দেশে টাকা আছে, সেই দেশে গমন করি। যদি পুনরায় টাকা করিতে পারি, তাহা হইলেই, জন্ম ভূমিতে আগিব ; নতুবা জন্মের মত নিধিরাম বাটী পরিত্যাগ করিল। এই ভাবিয়া কাঁথা, লাঠী ও জলপাত্র লইয়া নিধিরাম কুটীরের বাহির হইল, এবং কোন নগরে যাইবার অভিপ্রায়ে ক্রমাগত চলিতে লাগিল। দুই ক্রোশ পথ যাইতে না যাইতেই তাহার এক জন প্রতিবেশী যুবা দম্য বেশে আসিয়া নিধিরামের কাঁথা, লাঠী ও জলপাত্র কাড়িয়া লইল। এই ঘটনার পর নিধিরাম কিয়ৎ ক্ষণ এক বৃক্ষতলে স্তব্ধ হইয়া বসিয়া রহিল। সেই সময়ে হঠাৎ আর এক জন লোক আসিয়া নিধিরামের পরিধেয় বস্ত্র খানি কাড়িয়া লইল। নিধিরাম উলঙ্গ হইয়া সেই বৃক্ষতলে বসিয়া ভাবিতে লাগিল, উলঙ্গ হইয়া কি প্রকারে লোকালয়ে যাইব ? এক্ষণে লজ্জা আবরণের উপায় কি ? এই কপে ভাবিয়া চিন্তিয়া সম্মুখস্থ এক কদলী কাননে প্রবিষ্ট হইয়া শুষ্ক এক খানি কলার খোলা কলার ছোটায় বাঁধিয়া নিধিরাম শুভ ক্ষণে লজ্জা আবরণ করিল। কোপীন পরিধান করিয়া নিধিরাম কদলী কাননের বহির্ভাগে আসিয়া মনে মনে ভাবিল, আর আমাকে দম্য কর্তৃক আক্রান্ত হইতে হইবে না। এ কি ! আমার মন যে একেবারে ভয় শূন্য হইয়াছে। কি জন্ত একপ হইল ? ওহো ! বুঝিয়াছি, পূর্বেও ভয় ছিল না, এবং এক্ষণেও নাই। মধ্য কিছু দিন পাছে আমার টাকাগুলি কেহ লয়, এই ভয়ে ভীত হইয়াছিলাম।

একগে টাকার সহিত, অবশেষে জলপাত্র, কস্থা ও যষ্টির সহিত এবং সর্বশেষে আমার পরিধেয় বস্ত্র খানির সহিত আমার সমস্ত ভয় দূরীভূত হইয়া গেল। তবে কি এক অর্থই সমস্ত ভয়ের কারণ ? আজ ত আমার মন একেবারে শান্ত হইয়াছে, আমি অকুতোভয়ে এই জন শূন্য স্থানে উপবিষ্ট রহিয়াছি; কই আমি ত সাবধান হইতেছি না ? একগে ঘিলক্ষণ বুঝিতে পারিলাম যে, কেবল ধনের জন্যই সংসারে লোকের শাস্তি থাকে না। ধনের জন্যই রাজা প্রজাপীড়ন করিয়া থাকেন, ধনের জন্যই রাজায় রাজায় যুদ্ধ বিগ্রহ উপস্থিত হয়, ধনের জন্যই সহোদরে সহোদরে বিচ্ছেদ ঘটয়া থাকে, ধনের জন্যই দম্ভ্যরা নরহত্যা পাপে লিপ্ত হয়, এবং এক ধনের জন্যই নিধিরাম শর্মা ভগ্ন কুটীরে আবদ্ধ হইয়াছিলেন। আর আমি ধন চাহি না, এখন এই কোপীন পরিয়া সেই নিত্য ধনের অনুসন্ধান করিব। তবে এই মাত্র আশ্রয় যে, আমি ইচ্ছা পূর্বক সত্য পথের পথিক হইতে পারি নাই দম্ভ্যরাই বল পূর্বক আমাকে কোপীন পরিধান করাইয়াছে। আমার স্ত্রী ছিল না, পুত্র কন্যা ছিল না, উন্নত আটালিকা ছিল না, কেবল শত মুদ্রা ও ছিন্ন কস্থার মায়ায় ভগ্ন কুটীরে পড়িয়া থাকিতাম। যাঁহারা অভুল বিভব অকিঞ্চিৎকর পদার্থের ন্যায় জ্ঞান করিয়া স্বেচ্ছায় কোপীন ধারণ করেন, তাঁহারাই সাধু। আমি যদি কিছু কাল তাঁহাদিগের দাসত্ব করিতে পারি, তবেই কৃতার্থ হইব। দম্ভ্যগণ আমার শত্রু নহে, তাঁহারা বথার্থই মিত্রের কার্য্য করিয়াছে। একগে আমার কাচ ও কাঞ্চন সমান জ্ঞান হইতেছে, আর আমার মরিতেও ভয় নাই, আমি আর রাজাকেও ভয় করি না। ওঃ ! গৃহবাস কি ভয়ানক কষ্টকর !

হে নরপতে, কেবল এক ঐশ্বর্য্য ভোগ লালসাতেই মানবগণ সংসারিক চূৰ্দ্দশা ভোগ করে। কেবল মনুষ্য কেন, ঐশ্বর্য্য ভোগী হইয়া দেবরাজ ইন্দ্রও সময়ে সময়ে দুঃসহ চূৰ্দ্দশা ভোগ করিয়াছিলেন ; কিন্তু ঐশ্বর্য্য ত্যাগী পরম যোগী মহাদেবের প্রীতি কেহই কোন কালে কটাক্ষ পাত করে নাই। পুরন্দর কত বার শত্রু কর্তৃক স্বর্গচ্যুত হইয়াছেন ; কিন্তু মহাদেবকে কেহ কখন কৈলাসচ্যুত করিবার চেষ্টা করে নাই। রাজন্, আমি যে রূপ নিশ্চিন্ত হইয়া পরাৎপরের আরাধনা করিতেছি ; বোধ হয়, আপনি একপ নিশ্চিন্ত ভাবে রাজ্য ভোগ করিতে পারিতেছেন না। আপনি অর্থের দাস, কিন্তু অর্থ আপনার দাস নহে। দিখিজয় করিয়া নানা স্থানের ধন রত্ন আনিয়া রাজকোষে সঞ্চয় করিয়াছেন, এবং সেই গুলি ‘আমার’ বলিয়া আত্মগ্লাঘা করিতেছেন ; কিন্তু ভাবিয়া দেখুন, এই সংসারে কে কাহার ? ধন রত্ন এবং রাজ্য খণ্ড আপনার হওয়া দূরে থাকুক, আপনার এই দেহও আপনার নহে। যেমন ধন জন পরিপূর্ণ আপনার রাজ্য পাছে শত্রু কর্তৃক অপহৃত হয়, এই আশঙ্কায় শশব্যস্ত হইয়া আছেন, সেই রূপ নিশ্চয় স্থির করিয়া রাখুন, আপনার এই সুন্দর দেহের সারাংশ এক দিন প্রবল শত্রু কর্তৃক অপহৃত হইবে। তাহার পর আপনার পুত্র কলত্রাদি অনায়াসে এই সুন্দর শরীর অনলে ভস্মীভূত করিয়া ফেলিবে। অদ্য যে রত্নাদি আপনার হস্তে আসিয়াছে, তৎসমুদায় দৃষ্টি করিয়া আত্মদে উন্মত্ত হইতেছেন ; কিন্তু কল্য হয় ত আপনাকে শোক সাগরে নিমগ্ন করিয়া সেই সকল রত্নাদি অন্তের হস্তগত হইতে পারে। এই জন্তই বলিতেছি যে, কাচ ও কাঞ্চনে সমান জ্ঞান

না করিলে, কোন কালেই মনের শান্তি হয় না । আমাদের চক্ষে এক্ষণে মুক্তার মালা ও কদ্রাক্ষ মালা সমান বলিয়া বোধ হইয়াছে । আমাদিগকে আর জীপুঞ্জের দাসত্ব করিতে হয় না, ধন রত্ন নাই বলিয়া শত্রু ভয়ে ভীত হইতে হয় না, কোন প্রকার অধিকার রাখি না বলিয়া ভূস্বামীর পীড়ন সহ্য করিতে হয় না ; এই জ্ঞানই শান্তি দেবী অনুক্ষণ আমাদের হৃদয় মন্দিরে বিরাজিত হইতেছেন । অতএব ঐশ্বর্যের লালসা একেবারে পরিত্যাগ করিতে না পারিলে, কোন ক্রমেই আপনার মনের শান্তি হইবে না ।

ভাপসের মুখে এই সকল তত্ত্বজ্ঞানের কথা শুনিয়া রাজার মনে কিঞ্চিৎ জ্ঞানের উদয় হইল । তিনি সবিনয়ে বলিলেন, হে ভাপস, আমি এক বিস্তীর্ণ রাজ্য থণ্ড পাইয়াছি, ধন রত্নেরও আমার অপ্রতুল নাই ; তথাচ আমার ভোগ লালসা নিবৃত্ত হইতেছে না কেন ? ভাপস কহিলেন, রাজন্, অগ্নিতে সৰ্ব্ব ক্ষণ ঘটাহতি দিলে, কোন্ কালে অগ্নি নির্ঝাঁগ হইয়া থাকে ? ভোগ লালসাও প্রজ্বলিত হুতাশনের ন্যায়, তাহাতে যত আহতি দিবেন, ততই প্রবল হইয়া উঠিবে ; কোন কালেই তাহার নিবৃত্তি হইবে না । আপনি ত রাজ্যভোগে লিপ্ত হইয়া আছেন, যখন জ্ঞানগুরু শুকদেব গোস্বামী এক খানি ছিন্ন কস্মার মায়া পরিত্যাগ করিতে পারেন নাই, তখন আপনি যে এই অতুল ঐশ্বর্য সহজে পরিত্যাগ করিতে পারিবেন না, ইহা কিছু আশ্চর্য্যের বিষয় নহে । রাজা কহিলেন, হে মহাভাগ, সে কথা আমার নিকট বিস্তারে বর্ণন করুন ।

তাপস কহিলেন, নরনাথ, বেদব্যাস নন্দন শুকদেব পিতার নিকট নানা শাস্ত্র অধ্যয়ন করিয়া অবশেষে যোগ শিক্ষা করিবার অভিলাষে ব্যতিব্যস্ত হইলেন। পুত্রের অভিলাষ জ্ঞাত হইয়া মহর্ষি বেদব্যাস কহিলেন, বৎস, তোমার যদি নিতান্তই যোগ শিখিবার অভিলাষ হইয়া থাকে, তাহা হইলে, মহা প্রাজ্ঞ জনক ঋষির নিকট গমন কর। পিতার উপদেশানুসারে শুকদেব জনক ঋষির ভবনে উপস্থিত হইলেন। জনক ঋষি শুকদেবকে নিতান্ত বালক দেখিয়া সহাস্য আস্ত্র জিজ্ঞাসা করিলেন, ব্রহ্মন্, তুমি কি অভিপ্রায়ে আমার নিকট আগমন করিয়াছ? শুকদেব কহিলেন, কিঞ্চিৎ যোগ শিক্ষা করিবার অভিপ্রায়ে আগা হইয়াছে। ঋষিরাজ কহিলেন, উত্তম বল। এই রূপে শুকদেব রাজর্ষির নিকট যোগাভ্যাসে নিযুক্ত হইলেন।

এক দিন গুরু ও শিষ্য একাসনে সমাসীন হইয়া যোগ শাস্ত্রের আলোচনা করিতেছেন, এমন সময়ে অল্প দূরে অগ্নি জলিয়া উঠিল। বৈশ্বানর ভীষণ মূর্তি ধারণ করিয়া ক্রমে ক্রমে রাজর্ষি জনকের নানাবিধ দ্রব্য সামগ্রী ভস্মীভূত করিয়া অগ্নসর হইতে লাগিল। অগ্নি দেখিয়া শুকদেব কহিলেন, গুরো, ভূত্যাগণকে অনল নির্মাণ করিতে আদেশ করুন; নতুবা এই অনল দ্বারা সমুহ অনিষ্ট উৎপাদিত হইবে। ঋষিরাজ সে কথাই কিছুই উত্তর দিলেন না; পূর্বের ন্যায় স্থির ভাবে যোগ শাস্ত্রের কথা কহিতে লাগিলেন। শুকদেব দেখিলেন, অনল ক্রমে ক্রমে নিকটবর্তী হইতেছে, তখন তিনি ভয় প্রযুক্ত আপনার কহা খানি দূরে নিক্ষেপ করিলেন। জনক ঋষি তদ্রূপে কহিলেন, ঋষিকুমার, এ কি করিলে? সামান্য কহার মমতা

পরিভাগ করিতে পারিলে না ? তবে তুমি কি প্রকারে যোগাভ্যাস করিবে ? সৰ্ব্ব ভ্যাগী হইতে না পারিলে, যোগশাস্ত্রের অধিকারী হইতে পারা যায় না । আমি যদিও রাজত্ব করিতেছি, কিন্তু কিছুতেই লিপ্ত নহি । শুকদেব গুরুর কথায় লজ্জিত হইয়া কস্থা খানি অগ্নিতে নিক্ষেপ করিলেন । ইহাতে জনক ঋষি হাস্য করিয়া কহিলেন, বৎস, এ আবার কি করিলে ? তুমি এখনও চিত্ত শুদ্ধি করিতে পার নাই, এখনও তোমার স্তুতি তিরস্কার সমান জ্ঞান হয় নাই ; আমার এই সামান্য তিরস্কার তোমার অসহ্য হইয়াছে । গুরুর কথা শুনিয়া শুকদেব বিশ্বয় সাগরে নিমগ্ন হইয়া কহিলেন, শুকদেব, আপনার কথার ভাবার্থ আমি কিছুই বুঝিতে পারিতেছি না, এই অজ্ঞ জনকে জ্ঞান দান করুন । এক্ষণে বুঝিতে পারিতেছি, যোগশাস্ত্র শিক্ষা করা যার পর নাই সূকঠিন । জনক ঋষি কহিলেন, অদ্য এই খানেই বিশ্রাম । কল্য হইতে আমি তোমাকে সাধ্যানুসারে যোগ শিক্ষা দিব ।

পর দিন শুকদেব যথা সময়ে গুরুর নিকট উপস্থিত হইয়া দেখিলেন, তিনি এক সৰ্ব্বাঙ্গ সুন্দরী ষোড়শী যুবতীকে গাঢ় আলিঙ্গন করিয়া রহিয়াছেন । গুরুর কদাচার দেখিয়া তিনি কিঞ্চিৎ বিমর্ষ হইয়া অবনত মস্তকে রহিলেন । ঋষিরাঙ্গ শিষ্যের মনোগত ভাব বুঝিয়া গম্ভীর স্বরে নিম্ন লিখিত কবিতাটি আবৃত্তি করিলেন,—

“গৃহাতি দষ্টৈঃ স্তম্ভমাখুমোতুঃ

পুণ্ড্রেষু কাষ্ঠেষু নিবসন্তি ভৃগ্বাঃ ।

আলিঙ্গিতে স্ত্রীঃ স্নাতং মনুষ্যঃ

প্রবৃতি রেষা মনসঃ প্রধানা ॥ ৩

হে শিষ্য, মার্জারগণ যে স্ত্রীক দন্তে ইন্দুর চর্ষণ করিয়া থাকে, উদ্ভারা ধারণ ও বহন করিবার সময় স্বীয় শাবকের গাত্রে দন্ত বিদ্ধ করে না। ভ্রমরগণ প্রস্ফুটিত স্নকোমল পুষ্পে বসিয়া মধু পান করে, তাহাতে পুষ্পের কিছু মাত্র অনিষ্ট হয় না ; কিন্তু তাহারাই কঠিন গুল্ম কাষ্ঠে বসিয়া শত শত হিঙ্গ করিয়া থাকে। মানবগণ যে প্রবৃত্তির অধীন হইয়া প্রেমময়ী পত্নীকে হৃদয়ে ধারণ করে, সম্পূর্ণ বিভিন্ন প্রবৃত্তি বশে সেই হৃদয়েই বাৎসল্য রসের আধার স্নেহময়ী দুহিতাকে ধারণ করিয়া পুলকিত হয় ; অতএব মনুষ্যের মনে প্রবৃত্তিই প্রধান। আমি যখন সেই প্রবৃত্তির নিবৃত্তি করিয়াছি, তখন এই ষোড়শীকে হৃদয়ে ধারণ করিতে কিছু মাত্র কুণ্ঠিত নহি। আর একটি কথা বলিতেছি, মনো-যোগ পূর্বক শ্রবণ কর, রক্তজবার নিকট একটি মুক্তা রাখিলে, মুক্তাটি রক্তিমাত্মময় হইয়া থাকে ; কিন্তু মুক্তার প্রভার রক্তজবা কখন শ্বেতবর্ণ হয় না। ইহা দ্বারা বুঝিয়া লইতে হইবে যে, নিকৃষ্টের দোষের ভাগ উৎকৃষ্টে বর্তে ; কিন্তু উৎকৃষ্টের গুণ নিকৃষ্টে বর্তে না। দেখ, আমি এই মূর্তিমান্ কামাগ্নি তুল্য কামিনীকে হৃদয়ে ধারণ করিয়াছি, তাহাতে আমার মনের কিছু মাত্র ভাবান্তর হইতেছে না, প্রত্যুত স্নেহরসে হৃদয় স্নিগ্ধ হইয়া আসিতেছে। হে শিষ্য, মূর্তিকা কিম্বা দাক নির্ম্মিত, অথবা চিত্রিত নারীমূর্তি দেখিয়া অনেক সৈর্য্যাহীন পুরুষের চিত্ত বিকার ঘটে ; কিন্তু প্রকৃত রমণী হৃদয়ে ধারণ করিয়াও সাধুজনেরা মনের শান্তি রক্ষা করিতে পারেন। আমার হৃদয়স্থিতা রমণীকে

কাষ্ঠময়ী প্রতিমা বলিয়া জানিও, এবং আমার সর্কাদে যে মণি মুক্তার আভরণ রহিয়াছে, এ সমুদায় আমার পক্ষে শুষ্ক হরীতকী ফল বলিয়া জানিও । আমি মৃতও নহি, জীবিতও নহি, আমি গৃহীও নহি, আমি সম্যাসীও নহি ; আমার শক্তি নাই, জন্ম নাই, জাতি নাই, শত্রু নাই, শিষ্য নাই, বন্ধু নাই, বান্ধব নাই, পিতা মাতা প্রভৃতি সংসার বন্ধন কেহই নাই । আমি অসংলিপ্ত ভাবে ইহ লোকে কাল যাপন করিতেছি ।

হে শিষ্য, অগ্রে অহং তত্ত্ব দূর কর, তাহার পর অনায়াসেই যোগ শাস্ত্রের মথার্থ মৰ্ম্ম বুঝিতে পারিবে । আমার বলিয়া কিছুই জ্ঞান করিও না ; তোমার ছিল, এক্ষণে আমার হইল, ইহাও ভাবিও না । তুমিও তোমার নহ, এবং আমিও আমার নহি, কেবল সেই চৈতন্য স্বরূপ এক ঈশ্বরই সমস্ত । আরও বিবেচনা করিয়া দেখ, অনায়াস লভ্য এক খানি প্রস্তর আনিয়া ভাস্করেরা একটি কল্পিত দেব মূর্ত্তি গঠন করিল । কোন ধনাঢ্য লোকে সেই মূর্ত্তি মূল্য দিয়া ক্রয় করিয়া আনিল, ও একটি উৎকৃষ্ট মন্দির প্রস্তুত করিয়া সেই মূর্ত্তি তাহার অভ্যন্তরে স্থাপন পূর্ব্বক আপনাকে কৃতার্থ বোধ করিল । ভাবিয়া দেখ, কল্পিত মূর্ত্তি যদি মূর্ত্তিদাতা হইতে পারিত, তাহা হইলে, কল্পনা বশে দরিদ্র গনুষ্যে যে রাজ্য ভোগ করে, তাহাও সত্য বলিয়া বিবেচিত হওয়া উচিত । পূর্ব্বে যে প্রস্তর খণ্ডের এক কপর্দকও মূল্য ছিল না, এক্ষণে সেই প্রস্তরে দেবমূর্ত্তি গঠিত হওয়ায়, উহা মূল্যবান হইয়া উঠিল । আবার সেই মূর্ত্তি যখন মন্দিরে প্রতিষ্ঠিত হয়, তখন তাহাই নরের ধৰ্ম্ম অর্থ কাম মোক্ষ চতুর্কর্গ ফলদাতা হইল । সেই রূপ যখন মুক্তা সমুদ্র গর্ভে ও হীরক মেদিনী গর্ভে ছিল, তখন তাহার এক কপর্দকও

মূল্য ছিল না, এক্ষণে জ্ঞানি লোকেরা এক বদরী ফলের বিনিময়েও তাহা ক্রয় করিতে বাসনা করেন না; কিন্তু অজ্ঞানান্ধ ধনিগণ সেই সকল অকিঞ্চিৎকর পদার্থ বহু মূল্যে ক্রয় করিয়া আপনাদিগের অহঙ্কার বৃদ্ধি করে। আমার বিবেচনায় হীরক, মুক্তা ও মাণিক্য এবং স্বর্ণ রৌপ্যাদি মনুষ্যকে এক অহঙ্কার ভিন্ন আর কিছুই প্রদান করিতে সক্ষম নহে। অহঙ্কার যেমন আমাদের শত্রু বৃদ্ধি করে, সে রূপ আর কিছুতেই করে না; অতএব ঐ সকল দ্রব্য উচ্চ মূল্যে ক্রয় করিয়া কেবল পদে পদে আমাদের শত্রুর আশঙ্কা করিতে হয়। জ্ঞানি জনেরা সেই জন্তই তৎ সমুদায় পরিত্যাগ পূর্বক অমূল্য জ্ঞান রত্ন হৃদয় ভাণ্ডারে রাখিয়া পরমানন্দে শান্তি ভোগ করিয়া থাকেন।

এই সকল জ্ঞানগর্ভ কথা শুনিয়া শুকদেব কহিলেন, আমার যথেষ্ট হইয়াছে, আর আপনাকে অধিক ক্লেশ স্বীকার করিতে হইবে না। ইহা বলিয়া শুকদেব আপন পরিধেয় বস্কল পরিত্যাগ করিয়া দিগম্বর বেশে জনকপুর হইতে বহির্গত হইলেন।

যে ভূপাল পূর্ব কথিত তাপসের নিকট তত্ত্ব কথা শুনিতে ছিলেন, তাঁহার মনোমধ্যে কাঁচ ও হীরক খণ্ডকে সমান, এবং কণ্ঠভূষণ মুক্তামালাকে অতি অকিঞ্চিৎকর পদার্থ বোধ হওয়াতে, তিনি কহিয়া উঠিলেন, কি ভয়ানক ভ্রম! এই সকল অকিঞ্চিৎকর পদার্থের জন্ত আমরা অহঙ্কার করি? এই সকল পদার্থের প্রতি আমাদের এত দূর যত্ন? এই সকল পদার্থ অপচয় হইলে, আমাদের মনঃপীড়ার অবধি থাকে না? ইহাদিগেরই জন্ত আমরা শশব্যস্ত? এই আমার কণ্ঠভূষণ মুক্তামালা দূরে নিক্ষেপ করিলাম। এই সকল পদার্থ ই এখন আমাদের শত্রু অপে-

ক্ষাও শত্রু, ও শাস্তি ভঞ্জে প্রধানতম কারণ, তখন আর ইহাতে কিছু মাত্র প্রয়োজন নাই। এই সকল কথার পর রাজা রাজর্ষি হইয়া তাপসের সহিত কুটীরে বাস করিতে লাগিলেন।

• পাঠকগণ, যেমন সর্বস্ব অপহৃত হইয়া নিধিরামের দিব্য জ্ঞান উদয় হওয়াতে, তাহার শাস্তি লাভ হইয়াছিল, মনে আর কিছু মাত্র ভয় ছিল না, সেই রূপ তাপসের যোগমার্গের কথা শুনিয়া পূর্ব কথিত রাজার মুক্তাদিকে বদরী ফলবৎ জ্ঞান হইল। তিনি সংসারের মায়াজাল ছেদন করিয়া প্রকৃত ঈশ্বরপ্রেমিক হইয়া উঠিলেন, এবং অমূল্য শাস্তি লাভ করিলেন; কেননা, যিনি ঈশ্বরকে সর্বতোভাবে জ্ঞাত হইয়াছেন, তিনি তাঁহাকেই পরম রত্ন জ্ঞানে তদীয় প্রেমে মুগ্ধ হইয়া থাকেন, এবং এই সকল ধন রত্নকে অতি অকিঞ্চিৎকর পদার্থ বোধ করেন। উক্ত অসার বস্তু লাভে বা ক্ষয়ে তিনি কখনই আকুলিত হন না; সুতরাং তাঁহার মনে অনুক্ষণ শাস্তি দেবী বিরাজ করিতে থাকেন। অতএব যদি ইহ সংসারে শাস্তি ভোগের ইচ্ছা থাকে, তাহা হইলে, এক খণ্ড হীরক ও এক খণ্ড কাচকে সমান জ্ঞান করা উচিত; অকিঞ্চিৎকর পদার্থ লাভে বা ক্ষয়ে কদাচ আকুল হওয়া কর্তব্য নহে।

মেদিনী মণ্ডলে থাকিয়া কালের উচিত কার্য্য কর, কিন্তু কিছুতেই লিপ্ত হইও না। ভ্রমরগণ প্রফুল্ল শতদলের মধু পান করিয়াও বেড়ায়, আবার গুচ্ছ কাষ্ঠ কর্তন করিতেও ক্রটি করে না; কিন্তু পিপীলিকা ও মক্ষিকাগণ মিষ্ট রসের আশ্বাদ পাইয়া প্রাণ থাকিতেও আর সে স্থান পরিত্যাগ করিতে চাহে

মা। এই জন্মই বলিতেছি, কালের উচিত কার্য্য কর, কিন্তু কিছুতেই অমৃতের সহিত লিপ্ত হইও না।

কৃষ্ণের জীবনী পাঠে জ্ঞাত হওয়া যায় যে, তিনি কালের উচিত কার্য্য করিতে কোন সময়ে ত্রুটি করিডেন না। কৈশোরে ব্রজাঙ্গনাদিগের প্রেমে মুগ্ধ হইয়া কৃষ্ণ যে ভাবে দিন যামিনী নারী মণ্ডলোতে কাল হরণ করিডেন, তদ্বারা তাঁহাকে নিভাস্ত্র অপদার্থ বলিয়া কাহার না বোধ হইবে? তাহার পর পিতৃ-শত্রু কংসরাজকে নিপাত করিবার জন্ম মথুরা যাত্রা করিলেন, তখন ব্রজাঙ্গনাদিগের প্রেম একেবারে যমুনার জলে ভাসিয়া দিয়া বীর বেশে মথুরা রাজধানীতে উপস্থিত হইলেন। সেখানে কংসকে নিপাত, পিতা মাতাকে কারামুক্ত ও মাতামহ উগ্রসেনকে পুনরায় রাজ্যে স্থাপন করিয়া বিদ্যার্জ্জনে অমুরাগী হইয়া উঠিলেন। কিছু কালের মধ্যে নানা বিদ্যার ব্যুৎপত্তি লাভ করিয়া প্রবল শত্রু জরাসন্ধের সহিত দীর্ঘ কাল সংগ্রামে লিপ্ত থাকেন। সে সময়েও তিনি মথুরায় আসিয়া কংস কিঙ্করী কুজ্জার প্রণয় পাশে আবদ্ধ হইয়াছিলেন। তৎপরে জরাসন্ধ পুনঃ পুনঃ মথুরা আক্রমণ আরম্ভ করাতে শ্রীকৃষ্ণ মাতামহ উগ্রসেন ও যাদবগণকে লইয়া সমুদ্রতীরস্থ একটি নিরাপদ স্থান মনোনিীত করেন, এবং তাহার দ্বারকা নগর নাম দিয়া রাজ্য উগ্রসেনের রাজ-লিংহাসন স্থাপিত করিলেন। দ্বারকায় আসিবার সময় শ্রীকৃষ্ণ অশ্রান্ত আত্মীয় বন্ধু বান্ধবগণকে সমভিষ্যাহারে আনিয়াছিলেন, কিন্তু কুজ্জাকে জীবনের অনিশ্চিত কাল কৃষ্ণ বিরহ যন্ত্রণাভোগ করিতে হইয়াছিল। তিনি প্রকৃত প্রস্তাবে দ্বারকায় উপনিবেশ সংস্থাপন করিয়া পর্য্যায় ক্রমে কাকিনী প্রভৃতি আটটি স্বৰূপা

রমণীর পাণি গ্রহণ করেন । তৎপরে দুর্দান্ত নরকরাজকে গিন্ঠ
বরিয়া তদীয় অন্তঃপুর হইতে বহু সংখ্যক বন্দিণী কামিনীগণকে
দ্বারকায় আনিয়াছিলেন । তৎকালের ব্যবস্থানুসারে সেই
সকল কামিনী শ্রীকৃষ্ণেরই পরিণীতা হইয়াছিল । কাল ক্রমে শ্রীকৃষ্ণ
'ষ্ণের পুত্র পৌত্র ও প্রপৌত্রাদিতে যতুকুল বিলক্ষণ বর্দ্ধিত হইয়া
উঠে । তাহার ভুক্তবলে ও অর্থবলে উন্নত হইয়া সংসারে ঘোর
অত্যাচার আরম্ভ করে । ইহাতে তিনি কৌশলে আপন সম্মুখে
আপনার বিপুল বংশ ধ্বংস করিয়া অবশেষে জ্যেষ্ঠ ভ্রাতা বল-
ভদ্রের সহিত মানব জাতি সঞ্চার করিয়াছিলেন । যখন যাদবেরা
বাকণী পানে উন্নত হইয়া পরস্পর বিবাদারম্ভ করে, তখন শ্রীকৃষ্ণ
তাহাদিগকে নিবৃত্ত না করিয়া পদে পদে উত্তেজিত করিয়া-
ছিলেন । তাঁহার পুত্র পৌত্রাদিগণ যখন পরস্পর যুদ্ধ করিয়া
একে একে সমরাজ্যে শয়ন করিতে লাগিল, তখন তিনি
দূরে দাঁড়াইয়া তাহাদিগের মৃত্যু দেখিতে লাগিলেন, আপনার
বংশনাশ হইতেছে বলিয়া অক্ষেপণ করিলেন না ।

কৃষ্ণ চরিত্রে যদিও অনেক অস্বাভাবিক ও অসংলগ্ন কথা
আছে, কিন্তু আমরা তাহার এই মাত্র সার ভাগ গ্রহণ করিতেছি
যে, তিনি বাল্যে যৌবনে ও বৃদ্ধ কালে প্রকৃত সংসারীর
ন্যায় সমস্ত কার্য্যই করিয়াছিলেন ; কিন্তু কোন কালে কিছুতেই
লিপ্ত হন নাই । এই সংসার যে অলীক ও মায়াময়, তাহা তিনি
আত্ম কার্য্যের দ্বারা সকলকে জানাইয়া গিয়াছেন । কু-
পাওব বুদ্ধার্থে প্রস্তুত হইলে, অর্জুন দ্বাভ্যায় বন্ধুগণকে প্রতি-
দ্বন্দ্বী দেখিয়া মায়ায় মুগ্ধ হইয়া পড়িলেন । সেই সময় অর্জুনকে
শ্রীকৃষ্ণ যে সকল বোনের কথা বলিয়াছিলেন, এক্ষণে ভগবদ্বাক্যের

তাহা পাঠ করিয়া এই সংসারকে নিতান্ত অলীক ও মায়াময় বলিয়া
 কাহার না উপলব্ধি হইবে? ত্রীকৃষ্ণ অর্জুনকে পদে পদে
 বলিয়াছিলেন যে, মখে, কালের উচিত কার্য্য কর, ক্ষত্রিয় ধর্ম্মে
 জলাঞ্জলি দিয়া ধনুর্কাণ পরিত্যাগ করিও না। এ সময় যদি সম্মুখ
 যুদ্ধে পরাঙ্মুখ হও, তাহা হইলে, ইহ কালও পর কাল দুই কাল নষ্ট
 করা হইবে। যদি আপাততঃ সম্মুখ যুদ্ধে বিরত হও, তাহা হইলে,
 কৌরবেরা তোমাকে আর বীর পুরুষের মধ্যে গণ্য করিবে না।
 তাহাদিগের নিতান্ত বিশ্বাস হইবে যে, তুমি ভয় প্রযুক্তই ভীষ্মের
 সহিত সম্মুখ সংগ্রামে বিরত হইলে। পূর্বে ভূজবলে যে প্রতিপত্তি
 লাভ করিয়াছিলে, অদ্য তাহা বিনষ্ট করিতে বসিয়াছ; সুতরাং
 ইহা দ্বারা ইহ কাল নষ্ট করা ভিন্ন আর কি বলিব? আবার
 ক্ষত্রিয় হইয়া সম্মুখ যুদ্ধে বিরত হইলে, নরকগামী হইতে হয়,
 তাহাও তুমি বিশিষ্ট রূপে অবগত আছ। আমি দাক্ষকের মুখে
 শুনিয়াছি, স্তম্ভদ্রা হরণ কালে যখন আমার পুত্র পৌত্রগণ
 তোমাকে যুদ্ধার্থে আহ্বান করিল, তুমি তৎকালে বীরদর্পে দাক্ষ-
 ককে বলিয়াছিলে, সারথি, শীঘ্র রথ ফিরাও, ক্ষত্রিয়গণ আমাকে
 যুদ্ধার্থে আহ্বান করিতেছে। সে সময় দাক্ষক তোমার স্ত্রায়
 মায়ায় মুগ্ধ হইয়া বলিয়াছিল, বীরবর, আমি রথ ফিরাইতে
 পারিব না। তুমি এই রথে উপবিষ্ট হইয়া কৃষ্ণের পুত্রগণের
 প্রতি অস্ত্র নিক্ষেপ করিবে, তাহা আমি কখনই দেখিতে পারিব
 না; অতএব আমরা স্তম্ভদ্রার সহিত ইন্দ্রপ্রস্থে প্রস্থান করি।
 দাক্ষকের এই কথায় তুমি ক্রোধে উন্মত্ত হইয়া কহিয়াছিলে,
 কি, আমি শৃগালের স্ত্রায় পলায়ন করিব? ক্ষত্রিয় হইয়া যুদ্ধে
 বিরত হইব?

সথে, স্তভদ্রা হরণ কালে প্রবল পরাক্রান্ত যাদবগণের সহিত ক্ষত্রিয় ধর্মের অতুরোধে সংগ্রাম করিতে চাহিয়াছিলে, অদ্য কি বলিয়া সেই ধর্ম বিসর্জন করিতে যাইতেছ ? তবে কি আমাদিগের অপেক্ষা আততায়ী দুর্ব্যোধন তোমার প্রিয় হইল ? আততায়ীকে বিনাশ করা ত শাস্ত্র নিষিদ্ধ নহে । শাস্ত্রকর্তা-গণ লিখিয়াছেন, যে সকল লোকে গৃহে অগ্নি দেয়, বিষ পান করায়, ধনাদি অপহরণ করে, পদচ্যুত করে, ও বন পূর্বক সহধর্মিণীকে হরণ করিবার চেষ্টা পায়, তাহারাই আততায়ী । বলে ছলে ও কৌশলে এই রূপ আততায়ীকে অবশ্য বিনষ্ট করিবে । পূর্বে যে কয়েকটি আততায়ীর লক্ষণ বলিলাম, তোমাদের প্রতি দুর্ব্যোধন ইহার কোন্টি করিতে বাকি রাখিয়াছে ? সেই ভয়ানক আততায়ীকে সম্মুখ যুদ্ধে পাইয়া তুমি কি বলিয়া তাহাকে সংহারে বিরত হইতেছ ? যাহারা আততায়ীর সাহায্য করে, তাহারাই আততায়ী । কুরু পাণ্ডের সহিত ভীষ্মের কি সমান সম্বন্ধ নহে ? দ্রোণাচার্য্য কি তোমাদিগেরও শিক্ষাগুরু নহেন ? তবে তাঁহারা কি বলিয়া তোমাদিগের বিনাশার্থে অস্ত্রধারী হইয়াছেন ? যে হেতু, তাঁহারা কর্তব্য বিমূঢ় নহেন, তাঁহারা অন্নদাতা দুর্ব্যোধনের সাহায্যার্থে প্রাণ পর্যন্তও পণ করিয়াছেন । সথে, আমি তোমাকে সার কথা কহিতেছি, এই অষ্টাদশ অকোহিণী সেনা অষ্টাদশ দিবসের মধ্যে অবশ্যই বিনষ্ট হইবে ; যে হেতু, কাল ইহাদিগকে সমর ক্ষেত্রে আহ্বান করিয়াছে । তোমার ক্ষোষ্ঠভাতের পুত্র দুর্ব্যোধন কেবল মাত্র কালের বশবর্তী হইয়া পূর্ব কথা সমস্ত বিস্মরণ হইয়াছে । মৈত্র ঋষির অভিশাপ উহার মনে নাই, ~~বৈশি~~

নারদেরও ভবিষ্যদ্বাণী উহার স্মরণ হইতেছে না। মহাত্মা ভীষ্ম
 দুর্যোধনকে পদে পদে বলিয়াছেন যে, স্বয়ং ইন্দ্র আসিয়া যদি
 তোমার সহায়তা করেন, তথাচ তুমি পাণ্ডববিজয়ী হইতে পারিবে
 না; দুর্যোধন তাহাতেও সন্মুখ সংগ্রামে বিরত হইল না। কি
 জ্ঞাত হইল না? উহার কাল পূর্ণ হইয়াছে বলিয়া। সখে, এই
 যুদ্ধে তুমি কেবল মাত্র নিমিত্তের ভাগী হইবে নতুবা এই
 সমস্ত সৈন্যই অচিরে নিধন প্রাপ্ত হইবে। অতএব হে অর্জুন,
 তুমি মায়ায় মুগ্ধ হইও না, মুক্ত পুরুষের ন্যায় কার্য্য কর। কে
 কাহাকে বিনষ্ট করিতে পারে? কে বা কাহার শত্রু? কালই
 সকলের অরি, কালই সকলকে বিনষ্ট করিয়া থাকে। ক্ষত্রিয়
 কুল নিধন হইবার সময় উপস্থিত হইয়াছে, ইহাদিগকে সমরশায়ী
 করিবার তুমি উপলক্ষ মাত্র হইবে। মোহাক্ষ বাক্তিরাই আমার
 আগার করিয়া সংসার রূপ কারাগারে আবদ্ধ হয়। তোমার যুদ্ধ
 ক্ষেত্রে 'আসিয়া একপ মোহ উপস্থিত হইবে, তাহা আমি
 স্বপ্নেও ভাবি নাই। অর্জুন, সমাগত যোদ্ধৃগণের যদি পর-
 মায়ু থাকে, তাহা হইলে, তোমার অন্ত্রাঘাতে কখনই বিনষ্ট হইবে
 না; আর যদি কাল আগত হইয়া থাকে, তাহা হইলে, ভীমসেনের
 এক হুঙ্কার ধ্বনি উপলক্ষ করিয়া দুর্যোধনের একাদশ অক্ষৌহিনী
 সেনা সমরাস্ত্রনে শয়ন করিবে, তাহাতে আর সংশয় নাই।

ক্লেশের এই সকল যোগ কথা শুনিয়া অর্জুনের মোহাক্ষ-
 কার দূর হইল। তিনি সনর্পে গাণ্ডীব ধারণ করিয়া যুদ্ধার্থে
 প্রস্তুত হইলেন। সংসার বিমুক্ত পুরুষ ব্যতিরেকে কেহ
 কাহারও মোহ পাশ ছিন্ন করিতে পারে না, ত্রীকূষ সর্ব বিধায়
 সংসারী হইয়াও সংসারের কোন বিষয়েই লিপ্ত ছিলেন না,

ভগবদ্বাক্যে তাহা বিশেষ প্রমাণ হইয়াছে । তিনি যদিও সংসারীর ন্যায় সকল কার্য্যই করিতেন, কিন্তু এই সংসার যে অলীক ও মায়াময় তাহা তিনি বিলক্ষণ অবগত ছিলেন ।

বৌদ্ধধর্ম্ম মতে দেহের বিনাশই জীবের মুক্তি । সেই অনায়াস লভ্য মুক্তির জন্য কেবল অজ্ঞ জনেরাই ক্রিয়া কাণ্ড জপ তপ করিয়া অনর্থক শরীরকে কষ্ট দিয়া থাকে । এই মত খণ্ডন করিয়া এক জন মহাপুরুষ লিখিয়াছেন যে, যদি “মৃত্যুরেব মুক্তিরিতি” এই কথা যথার্থ হয়, তাহা হইলে, শূকরেরাও কেন মুক্তি লাভ করুক না ? পূর্ব্বোক্ত মহাত্মার মতে যাহার ব্রহ্মজ্ঞান নাই, তাহার মুক্তি কি রূপে সম্ভবে ? মৃত্যুর পর যাহা হইবে হউক, কিন্তু জীবন্মুক্তির স্বরূপ লক্ষণ এই ;—

“জীবঃ শিব সর্ব্বমেব ভূতে ভূতে ব্যবস্থিতঃ ।

একমেবা ভি পশ্যন্তি জীবন্মুক্ত স উচ্যতে ॥”

অর্থাৎ জীব মাত্রেরই শিব স্বরূপ ; কারণ এক মাত্র পর ব্রহ্মই সর্ব্ব ভূতে বিরাজিত আছেন । এই রূপে যিনি সর্ব্ব লক্ষণ সর্ব্বত্র পরমাত্মাকে দর্শন করেন, তিনিই জীবন্মুক্ত কথিত হইয়া থাকেন ।

“কর্ম্ম সর্ব্বত্র আদিষ্টং ন জানামি চ কিঞ্চন ।

কর্ম্ম ব্রহ্ম বিজানাতি জীবন্মুক্ত স উচ্যতে ॥”

যাঁহার কর্ম্মকাণ্ড প্রভৃতিতে কিছু মাত্র জ্ঞান থাকুক বা না থাকুক, কিন্তু সমুদায় কর্ম্মকেই ব্রহ্ম স্বরূপ বলিয়া জানেন, তাঁহাকেই জীবন্মুক্ত কহা যাইতে পারে ।

“সর্ব্ব ভূতে স্থিতং ব্রহ্ম ভেদাভেদৌ ন বিদ্যতে ।

একমেবাভি পশ্যন্তি জীবন্মুক্ত স উচ্যতে ॥”

যিনি আত্মাকে সর্ব ভূতস্থ জানিয়া এই জগৎ সংসারকে ব্রহ্মময় দেখিতেছেন, যিনি উৎকৃষ্ট ও নিকৃষ্ট প্রাণীর মধ্যে কিছুই প্রভেদ দেখেন না, তিনিই জীবনুজ্জ্বল পুরুষ। যেমন উজ্জ্বল প্রভাকর শত সহস্র জল পাত্রে প্রতিবিম্বিত হন, অথচ তাহার একটিতেও লিপ্ত নহেন, পরমাত্মাও সেই রূপ সকল প্রাণীর হইয়া সংসার স্মলভ স্মৃৎ ছুঃখে লিপ্ত নহেন। যাহার এই রূপ তত্ত্বজ্ঞান জন্মিয়াছে, তিনিই মুক্ত পুরুষ; কেননা, সাংসারিক স্মৃৎ ছুঃখে তাঁহাকে অভিভূত করিতে পারে না, এবং স্বর্গ, পর কাল ও মুক্তির জন্মও তিনি ব্যতিব্যস্ত নহেন।

“শরীরং কেবলং কৰ্ম্মশোক মোহাদি বর্জিতম্।

শুভাশুভ পরিভ্যাগী জীবনুজ্জ্বলঃ স উচ্যতে ॥”

যিনি এই সংসারের যাবদীয় কার্য্য শোক মোহাদি রহিত হন ও কার্য্য সকলের শুভাশুভ ফলের কামনা পরিভ্যাগী হইয়া কেবল সংসার যাত্রা নির্বাহ জন্ম প্রবৃত্ত কার্য্য সমাধা করেন, তাঁহাকেই জীবনুজ্জ্বল পুরুষ বলা যাইতে পারে।

আত্মতত্ত্ব জ্ঞান হইলে, সংসার যে সম্পূর্ণ মায়াময় ইহা বিশেষ রূপ হৃদয়ঙ্গম হইয়া থাকে। ইহা স্থির চিত্তে বিবেচনা করা উচিত যে, পৃথিবীর কোন বস্তুরই প্রকৃত তত্ত্বজ্ঞান আমাদিগের নাই, কেবল তাহাদিগের কতকগুলি গুণ আমরা পঞ্চ জ্ঞানেন্দ্রিয় দ্বারা অবগত হই এই মাত্র। ইহ সংসারে সকল অবস্থারই পরিবর্তন ঘটিয়া থাকে। অদ্য যে ব্যক্তি রাজ সিংহাসনে উপবিষ্ট হইয়া শত শত লোকের উপর আধিপত্য করিতেছেন, কল্য আবার হয় ত তিনিই ভিখারী হইতে পারেন। অদ্য যে স্থানে নদী প্রবল প্রবাহে প্রবাহিত হইতেছে, কিছু

কাল পরে হয় ত সেই স্থানে একটি বহু জনাকীর্ণ নগর হইতে পারে । এই যে রক্ত মাংসের সুন্দর শরীর অদ্য সংসারের সুখ দুঃখ ভোগ করিতেছে, নানা শোভা দর্শন করিতেছে, অহঙ্কারে উন্মত্ত প্রায় হইয়া পৃথিবীকে তৃণ তুল্য জ্ঞান করিতেছে, হয় ত, কল্য সেই শরীরই চৈতন্য রহিত হইয়া ভস্ম রাশিতে পরিণত হইবে । অতএব এই সংসারের তাবদীয় বস্তুই অলীক, কেবল সেই চৈতন্য স্বরূপ জগদীশ্বরই এক মাত্র সত্য পদার্থ । যে ব্যক্তি মনে এই রূপ অটল বিশ্বাস ও ঈশ্বরে দৃঢ় ভক্তি রাখিয়া ন্যায় যুক্তি সহকারে জীবনের কর্তব্য কার্য সকল নিরীক্ষা করেন, এবং আনন্দে উন্মত্ত বা শোক মোহ ও মৃত্যু ভয়ে অভিভূত না হন, তিনিই জীবমুক্ত পুরুষ, ও সেই ব্যক্তিই অনেকাংশে শান্তি সুখের অধিকারী হইয়া পৃথিবীতে পরম সুখে জীবন যাপন করিতে সমর্থ হয়েন ।

বিজ্ঞান-শান্তি-কুসুম সমাপ্ত ।



